



Ex Libris Henr. Peüt
Doct. Med. Sueffionæi.



BIBLIOTHÈQUE
DE M. NOËL GUENEAU DE MUSSY
JUN 1885

3,161/B



Digitized by the Internet Archive
in 2018 with funding from
Wellcome Library

<https://archive.org/details/b30500990>

ANTONII FRACASSINI

MEDICI VERONENSIS

OPVSCVLA PATHOLOGICA

ALTERVM

DE FEBRIBVS

ALTERVM

DE MALO HYPOCHONDRIACO

RECUSA CVM INDICE.



CVM PRIVILEGIO POTENT. REG. POL. ET ELECT. SAX.

L I P S I A E

IMPENSIS IOHANNIS IACOBI WEITBRECHT

BIBLIOPOL. GRYPSWALD.

MDCCLVIII.





PRAEFATIO EDITORIS.

Non tantum Nominis claritas, quam doctissimus Autor, scriptorum, quae recusa nunc damus, excellentia sibi comparavit, sed & ipsarum rerum, quibus ille rem medicam per istas scriptiones auxit, utilitas, illexit haud paucos, quo exemplarium optarent esse copiam, quibus & docentes & discentes uti possent. Igitur, excitatus, amicorum consiliis, editor hoc sibi beneficio devinciendam rem eruditorum publicam censuit, quo recuderet libellos hosce, eo maioris momenti esse visos, quo maior argumentorum, quae in illis pertractantur, latitudo est, & quo plus illa ad totius artis fundamentum, quod in motuum mechanicorum ac vitalium corporis humani rationibus maiorem partem ponitur, collineant; Sive enim febrium, sive spasmodum indolem tecum perpendis, ex morbis, qui de utrisque partem haud habeant, perspicis esse paucissimos, saepe etiam vides, utramque istam mutationem, sub varietatibus vix definiendis, eodem tempore,



in aegroto corpore occurrere, ut, si quis causarum sub motu humorum aucto, qui febris est, si quis earundem sub nervorum oscillationibus vel morbosis vel salutaribus & criticis, nexum penitus intellexit, aegrotationes mixtas ad unam notionem simplicem difficulter omnino reducendas expositurus clare & auxilia quaesita inventurus sit commode. Quando igitur in istis morborum communitatibus magno cum studio versatus earundemque ambitum breviter & ordinate hausisse intellectus Autor est, mirum esse debet nemini, fuisse, qui eius demonstrandi leges, prorsus simplices & legibus naturae conformes, multis innotescere optarent. Non enim forte hypothefibus, quas mechanica morborum tradit, solis, suae doctrinae superstruxit aedificium, sed vitae animali & motori eius iusta ubique persolvit, & mechanismo organismum ad latus posuit, in cuius scriptione & romani sermonis elegantiam atque facilitatem, & demonstrationum acumen ac lectionum antiquarum aequae ac recentium amplam supellectilem ubique esse offensurus, nec dubium est, fore, quo opusculorum horum editionem alteram omni studio excultam, quorum copiam fecit Clarus vir Doct. Joannes Ernestus Hebenstreit, Therapiae Professor & Facultatis Medicae Lipsiensis Decanus, veri rerum precii aestimatores aequi bonique sint consulturi.





AD LECTOREM.

Dolent quidem; ac vehementer dolent plerique medicorum, propriam artem, quoad institutiones, & theorias nuperis praecipue annis admirandos progressus & incrementa accepisse, quoad praxim vero, licet longe utiliore eisdem partem, haud pari passu progredi, sed eadem pene auxiliorum imbecillitate, arctoque numero detineri, ita ut de maiori, quam veteres, in curandis morbis, felicitate recentiores vix gloriari queant. Mirabuntur itaque nonnulli me in hoc meo de febribus liberculo, theorias explere voluisse, quippe sola praxis locupletari indigeat, quam ex tanto theoriarum fuco nil adhuc assecutam fuisse fatendum sit; spero tamen, opusculum perlegentes, institutum meum haud contempturos fore. Theoriam enim ad praxim tantummodo illustrandam a me exaratam fuisse, nec non tyrones edocendos, monendosque, ut nonnulla animadvertant praeiudicia, quae quorundam practicum mentem occupant, non sine gravi aegrotantium noxa, plane cognoscent. Ea tamen est medicinae constitutio, ut medentium errores exprobrare plerumque non valeat. Idcirco iidem practici ab illis praeiudiciis, quae nutriunt, difficulter evadunt, iisdemque commoriuntur. Equidem nescimus aegros fato succumbentes, utrum morbi indomita vi curam non admittentis, & quaecunque efficaciora artis auxilia eludentis, vel medentis culpa, qui infensa remedia adhibuerit, & opportuna non cognove-



rit, pereant; et ut ad peculiare morbos, in quibus medici opus minus elucescit, descendamus, acutae febres, quarum curatio e naturae viribus concinnisque motibus maxime pendet, non raro, etiam si sana methodo tractentur, aegrotantes eripiunt. E contra, Medico perperam agente, febrisque fomitem potius excitante, quam compescente, natura victrix non solum morbi vim, sed ipsius medici impedimenta superat, ac salutarem secretionem moliens, febrilem materiam expellit; Quare importuni naturae adiutores, ex quorundam morborum felici eventu animati magisque obcaecati, e praeiudiciorum tenebris nunquam resurgunt, sed in deteriori methodo firmantur. Qui, e. g., in acutis & inflammatoriis febribus, etiam in principio, expansivis & exaltantibus utuntur, necnon alexipharmacis, ob inanem malignae febris timorem, ex quo & phlebotomiam pavent, turgescere etiam plethora; Isti hoc pravo regimine sanguinem rarefacientes, solidorumque elasticitatem jam irritatam magis provocantes, febris aestum ac impetum augent, aegrumque in vitae discrimen ducunt, nec tamen morbi exacerbationem suae culpaе tribuunt, sed tanquam naturalem eiusdem progressum concipiunt, immo, si peculiari beneficio, natura, non sine tacita in eosdem, veluti imperitos ministros, obviurgatione, aegrum a morte vindicet, maiore proprii methodi aestimatione capiuntur. Possent quidem facile illuminari, si huiusmodi febricitantes diversa methodo tractatos inviserent; observarent enim, has acutas & inflammatorias febres, quae a sanguinis rarefcentia vasorumque distentione oriuntur, ac gravem morbum portendunt, nisi glandularum infarctu viscerumque naturalium cacochymia jungantur, sufficiente sanguinis quantitate extracta, plerumque mox extingui, vel saltem valde sensibilem remissionem assequi, ac paulisper sisti, quod Medici opus praestantius reddit; siquidem non solum a mortis periculo aegrotantem eripit, sed febris molestia eundem absolvit. Veruntamen praedicti Medici propriis aegrotantibus, ut par est, addicti, aliorum casus ignorant; hinc juxta viam suam proficiscuntur, nec proprias hallucinationes unquam



quam perspiciunt. Practicae tantummodo observationes, si referantur, ad praeiudicia ab illorum mente eruenda minime valent, etenim dubiam his praebent fidem, quippe sibi ipsis felices non desunt casus, licet rariores, quos praedictis observationibus obiiciant, & quod sola natura contra vim morbi, & medentis importuna remedia feliciter praestat, suae gloriae vertunt. Ut igitur illorum errores magis deprehendant, eosdemque ad vitandos tyrones discant, ratiocinii vias sequi oportet, quo proximam febrium causam detegamus, vel saltem ad eiusdem cognitionem propius accedamus, quam Medici cura semper respicere debet; Idcirco theoriam praxi junxi, ut haec ab illa illustrationem accipiat, & rationalis medendi methodus maiores progressus acquirat. Febrium theoriae physiologiae compendium praemittere necesse est, ut tuto per & maiori perspicuitate veritatem inquiramus; nisi enim naturales humani corporis, solidorum nempe, ac fluidorum affectiones innotescant, ex quibus cuncta animalis & vitalis oeconomiae phaenomena pendent, praeternaturales quoque, quae aetiologiam, seu morbum eiusque proximam causam respiciunt, concipere non valemus, & qui perperam de naturalibus corporis affectionibus iudicant, pravas quoque de causa morbi ideas sibi efficiunt. Hoc quidem in systematicis clare patet, quorum primi, nempe veteres, cum solam fluidorum naturam perpenderent, inania illorum principia in humoralis massa statuerunt, horumque varia combinationes, ac praedominia pro universali morborum causa agnoscebant, secundi vero, nempe chymici, qui propriam artem excolentes nil aliud praeter chymicas operationes ad naturalia, & morbosa corporis phaenomena percipienda excogitare potuerunt, salia tantummodo, sulphura, spiritus, ac phlegmata in eodem admittunt, atque salutis & mortis sola fundamenta esse contendunt; salia quaedam acida, quaedam alkali- ca, alia fixa, alia volatilia, alia coagulantia, & salsa, alia denique acria & dissolventia, vel caustica; unde menstrua digerentia, & aquae forti analoga. Sulphura ad sales imbibendos destinata, quae, si nimis
b
volatilia



volatilia sint, animalibus spiritibus commixta, simulque accensa, veluti pyrius pulvis, violentas explosiones pariunt. His ideo positis principiis non solum erroneos morbificae causae conceptus tales systematicos habuisse, sed ex illis nonnullas in praxi hallucinationes passos fuisse comperimus. Nostrum itaque de febribus agentium primarium institutum est tyrones docere, & monere, ut illa in febribus tractandis effugiant praedudicia, quibus non sine artis dedecore, & aegrotantium damno nonnulli nutriti fuerunt, quod ut assequi melius possimus, ex noto ignotum deducantes pene demonstrativa methodo progredi conabimur. Opus in duos libros dividimus. Primus praecipuas nostri corporis affectiones excutit, & primaria vitalis, & animalis oeconomiae phaenomena attingit, secundus de febribus agit, & in quatuor sectiones dividitur, prima scilicet continuas acutas simplices edisserit, secunda continuas acutas compositas & accidentales dictas, tertia continuas lentas, quarta denique febres intermittentes.





I N D E X

TRACTATUS DE FEBRIBVS.

LIBER I.

- CAP. I. *De sanguine, & lymphæ.* CAP. XI. *De nutritione.*
- CAP. II. *De spiritu animali.* CAP. XII. *De salinis particulis humani corporis fluida afficientibus, ac nonnulla de partibus essentialibus sanguinem, ac cetera liquida componentibus.*
- CAP. III. *De solidorum elementari structura ac proprietate.*
- CAP. IV. *De actione respirationis, & de aeris ingressu, & mixtione intra humanum corpus.* CAP. XIII. *De motu musculari, & animali.*
- CAP. V. *De aeris ambientis actione.* CAP. XIV. *De digestionem.*
- CAP. VI. *De motu solidorum.* CAP. XV. *De vitæ ac mortis naturæ, & causis.*
- CAP. VII. *De motu cordis.* CAP. XVI. *De sanitatis, ac morbi naturæ eiusque causis.*
- CAP. VIII. *De motu arteriarum.* CAP. XVII. *De reciproca solidorum vi, resistentia, & æquilibrio.*
- CAP. IX. *De secretionem in genere, & primo nonnulla de glandulis in genere.* CAP. XVIII. *De miro partium nostri corporis consensu.*
- CAP. X. *De flexilitate, duritie, ac elasticitate vasorum.*

LIBER II.

SECTIO I.

De Febris continuis, acutis, & simplicibus.

CAP. I. *De febre in genere.*

CAP. III. *De syncho.*

CAP. II. *De febre ephmera.*

CAP. IV. *De febre ardente.*

CAP. V. *De febre maligna.*

SECTIO II.

De Febris continuis, acutis, accidentalibus, & compositis.

CAP. I. *De typhiria.*

CAP. IV. *De febre epiala.*

CAP. II. *De febre asode, & syncopali.*

CAP. V. *De febris continuis*

CAP. III. *De colliquativa.*

periodicis.

SECTIO III.

De Febris continuis lentis.

CAP. I. *De febre hectica.*

CAP. II. *De febre lymphatica.*

SECTIO IV.

De Febris intermittentibus.

CAP. I. *De tertiana.*

CAP. II. *De quartana.*

CAP. III. *De quotidiana.*





DE
F E B R I B V S.

L I B E R I.

C A P V T I.

De sanguine, & lymphæ.



Nostrium corpus, ceterorumque animantium liquidis non minus ac solidis constare necesse est; partes enim fluidæ, nisi solidis continerentur, undique collapsuræ essent, nec corporis formam inire, nec servare, nec consistentia donari possent.

Primaria nostri corporis fluida, ceteris omiſſis, in duas classes, divido, prima, quæ in vasis circulatoriis, arteriis nempe, & venis cuiuscunque generis, secunda, quæ in cerebri substantia, eiusque productionibus, nempe nervis, continetur; prima classis sanguinem, & lympham amplectitur, secunda spiritum animale.

Sanguis in crassam, & fluidiorem, seu serosam partem passim dividitur(a), prima ex rubris constat globulis(b), quorum unusquisque ex sex minoribus componitur, (c) qui separati non rubri, sed flavi conspiciuntur, si vero in unum coalescant, rubrum nanciscuntur colorem, ut observavit Leeuwenhoekius.

Globulos rubros digito compressos elongari, fierique ellipticos, Leeuwenhoek quoque expertus est.

Pars fluidior, seu serosa globulis quoque constat, qui globuli, licet flavi sint, si in unum coalescant, rubros constituunt globulos, ex quibus crassior sanguinis pars resultat, quemadmodum in eodem Leeuwenhoek. legimus; hunc vero coalitum ex se fieri

non

(a) Gugliel. de sang. natura. (b) Thomas Schuvench. Haematologia, sive sanguinis historia. Acta Erud. Lipsiae 1745. pag. 502. (c) Schreiberus Elementa Medicinæ Physico Math.

non posse evincitur, alioquin serofi, & flavi globuli rubrum producerent colorem; Adest igitur vis in humano corpore, ex qua serofi globuli in rubros compinguntur.

Craffam, five rubram sanguinis partem sero innatare observamus; illa igitur hoc levior.

Specifica sanguinis gravitas ad gravitatem aquae se habet, ut 82. circiter ad 78. Si vas enim aqua repletum ponderet uncias IX. & dracmas VI. humano sanguine repletum ad uncias X. & dracmas II. & pauca grana pendet.

Ad aquae falsae vero gravitatem modo eductus cruor se habet ut 25: 26, serum autem se habet ad eandem, ut 300. ad 253; ergo serum ultra sextam partem specifica gravitate craffiori sanguinis parti praeponderat (a).

Serum aquae ferventi immixtum coagulabitur; ergo serum ex particulis aliquantulum glutinosis constat, quae accedente extrinseca vi in maiores moleculas rubram, & craffio rem sanguinis partem constituentes facile coeunt.

Serum sanguinis fere simile albumini ovi ostendit Boerhaavius (b), serum tamen est fluidum, albumen vero ovi vasculosis concentricis lamellis constat.

Serum, seu quilibet globulus serofus ex sex, vel pluribus globulis lymphaticis componitur, qui lymphatici globuli se ita habent ad globulum serofum, ut globuli serofi ad sanguinem (ex Leeuvvenhoek.)

Serum sanguinis sani hominis recte extracti igne leni destillatum copiosam exhibet lympham, ita ut

ad $\frac{5}{8}$ accedat, quae vero nullo experimento, vel acida, vel alkalica percipitur; Ergo serum, proinde totus sanguis fere ex sola lymphâ constat.

Si coagulatum serum destilles, dat primo spiritum, vel tenuem volatilemque liquorem, aucto vero igne sale alkalicum, deinde oleum duplex, leve, & ponderosum, tandem nigram terram (c).

Si sanguis humanus purissimo in tepore servatus aequali sani hominis calori per octo, vel plures dies fervetur, tunc sanguinem in volatilem liquorem ad ignem non coeuntem mutari deprehenditur.

Magnitudinem vero globuli sanguinei determinari docet Leeuvvenhoekius, (d) nempe quatuor diametros globulorum sanguineorum cum fili argentei diametro convenire, quallium 485. duodecimam pedis Londinensis partem aequant, hoc est, 23280. eorundem diametri integrum pedem Londinensem, ideoque unius globuli sanguinei diameter est $\frac{1}{25280}$ pedis Londinensis, diameter vero unius globuli serofi est aequalis $\frac{1}{139680}$, digitique geometrici $\frac{1}{139680}$.

Lympham quoque, quae in vasis eiusdem nominis continetur, albicantem, five aqueum succum esse nemo ignorat, sed & aliquantulum glutinosum manifeste deducitur, quippe feri, quod in lympham resolvitur, naturam sapere necesse est.

Haec, non solum ceterarum sanguinis partium matrix, sed & ipsius succi

(a) Schreiber. *ibid.* (b) *Exper. Chymica.* (c) Schreiber. *ibidem.* (d) *lib. 1. 201.*

succi nutritii, ex quo solida incrementum accipiunt proxima est materia.

Lympha a sero, quemadmodum serum a crassiori, & rubra parte vasis mediantibus magnitudine diversis, ac diametro eorundem moleculis proportionali separantur, ut infra videbimus.

CAPUT II.

De spiritu animali.

Fluida, quae in cerebri substantia eiusque productionibus continentur, adeo tenuia sunt, ut etiam armatos Leeuvvenhoeckiano microscopio oculos effugiant; eorumque viae, quas percurrunt, seu cavitates, quibus insident nos adhuc lateant, ita ut nonnulli sensibus magis, quam rationi addicti horum existentiam prorsus negent, fabulosamque praedicent. Haec tamen liquida spirituum animalium nomine merito dignata existere, (a) satis evincitur illo tantum experimento, quod Laurentius Heisterus imprimis (b), aliique attingunt, quidam vero liber Gallicus, cuius titulus *Anatomie d' Heister* fusc, ac minutim describit. Primo ligatis nervis diaphragmaticis motus diaphragmatis cessat, si infra ligaturam nervus manibus contrectetur, seu diaphragma versus perfricetur redit eiusdem motus; si diu perseveret frictio elanguescit, paulatimque deficit.

Secundo. Solvatur vinculum, ac solutus nervus paulisper relinquatur, deinde rursus religetur, versusque diaphragma confricantibus digitis primitivus motus revocatur.

Ex quibus evincitur: Praedicta nervorum diaphragma versus compressionem, seu perfrictionem aliquid succi eiusdem visceris motum excitantis protrudi, exprimique, proindeque animale spiritum nervosum genus replere.

Tertio. Puncto nervo horribiles convulsionem insurgunt, quod sine spiritu nervos influente concipi nequit; Ex laxis enim corporibus qualia sunt nervi, qui tum membranosas, tum musculares partes perrepentes huc illuc connectuntur, mirisque circumflexionibus invicem intricantur, undulationes ac tremores, quales in musicalibus chordis, prout tensis, observantur fieri nequaquam potest.

Haud equidem necesse est hunc spiritum tanta rapiditate praestantem concipere, ex qua nonnulli eandem cum luce materiam nactum esse crediderint (c). Alii, ut in Vuillifio habemus, perenni motu agitatam, fluentem, ac refluentem praedicant, similemque ac pulvis pyrius effectus producere.

Sufficit, ut nerveos ductus elastica fluidaque materia repletos (d) (ut evidenter constat) supponamus; ita ut levissima uni extremorum (E. G. pedi)

A 2

(a) Boerhaav. *Inst. M. Morgagn. Adverss. An. II. p. 70. VI. p. 29. 30.* (b) *De nerv. struct.* (c) Schelhammerus *Anal. Anat. dissert. XIII.* (d) Boerhaav. *praelect. academ. proprias institutiones cum not. Alber. Haller. lib. 2. Acta Erud. Lips. 1744. pag. 614.*

di) facta impressio ad cerebrum cito feratur, quod per succedentem earum minimarum partium impulsu facile intelligere quisque potest.

Proprietates igitur, seu affectiones huius spiritus, ex praedictis colliguntur: Summe Tenuis, non tamen ut lux, valde elasticus, ideoque rarefibilis, quae affectiones aeri quoque conveniunt. Haud temere itaque nonnulli Antiquorum aerem spirituum animalium materiam suppeditare scripserunt, quam Hippocrates *impetum faciens* vocavit; De quo vero satis apte Doctissimus Leibnitius mentionem facit in quadam Epistola. *Putem tamen hoc vim faciens non esse simpliciter instar fluidi considerandum, cum enim continuum sit, & magno impetu praeditum minima data apertura facile elaberetur, nisi nexum esset; Itaque putem quamdam habere speciem lanuginis elasticae, per quam impetus toto corpore propagetur, ut per aerem sonus. Eam autem in continua, & validissima esset oscillatione, qualis foret in aere, si undique sonus ageretur, aut qualis est in materia luminis, quae ut in omnes res ad quas appellitur, ita haec in omnia Obiecta undique sine confusione agunt. Et ipse Hippoc. lib. de Nat. §. 4. Maximus est in omnibus, quae corpori accidunt, & Auctor & Dominus Aer. Deinde lib. de Morb. sacro: Aer sensum, & motum praestat mem-*

bris, & prudentiam cordi subministrat.

Cum tamen praeter institutum evagare nolum, huiusmodi naturae arcana aliis detegendum relinquo (a), & ad solidorum nostri corporis elementarem structuram, ac proprietates perpendendas me confero.

C A P V T III.

De solidorum elementari structura, ac proprietate.

Ut solidorum proprietates melius innotescant, in eorum analysim descendere oportet.

Solida igitur humani corporis, ut ex Schreibero, (b) ultima arte, hoc est, summo igne in particulas minimas resolvi queunt, quas particulas elementa solidorum cum eodem Schreibero appellabimus.

Si qua humani corporis pars validissimo igne comburatur, Alcoolis nempe flamma capillum E. G., vel os calcinetur nonnullae eiusdem particulae eodem remanent, loco ibidemque priorem figuram servant, ita ut consistentia donatos esse oculis imponant, quae vel levissimo tactui non resistentes in cinerem fatiscunt (c).

Si huiusmodi pars intacta relinquatur, eaque sufficienti olei, vel aquae quantitate intingatur. Capillum, vel os, vel quaecumque pars pristinam suam duritiem recipit. Si vero illa pars nimis magnae, vel

parvae

(a) Vid. Lientaud dissertatione de natura spirit. animalium ac usu in Appendice Oper. Cuius titul. Exercitationes Anatomicae. (b) Elem. Medicinae phys. Mathematica. (c) Boerhaav. Chym.

parvae aquae, vel olei quantitate in-tingatur amissa, per ignem non redit durities (a).

Has particulas seu elementa, quas ex allatis experimentis terrestria esse comperimus, duplici modo cohaerentes concipere possumus. Primo per solam partium appositionem, seu superficierum contactum, quemadmodum (b) Bellinus, qui villos diversimode inter se cohaerentes, ac colligatos delineat, ut externa vi distrahi sine convulsione possint, quemadmodum Parietes lateritii, qui ex pluribus laterum ordinibus constructi lateris unius superioris extremam partem supra mediam inferioris ordinis collocatam habent; Haec equidem Hypothesis ad Villorum, seu fibrae distractionem absque divulsione declarandam optime inservit. Verum quicumque sit particularum fibras componentium ordo, atque cohaesio aliquid aliud requiritur, sine quo imprimis eadem particulae levi tactu, vel flatu in pulverem laberentur, deinde nec eiusdem fibrae contractionis modum, seu causam assequi possemus; Nam externa vi distrahente fibra quidem non divellitur, quod ex Belliniana Hypothesi resultat, at cessante distractionis vi eadem fibra contrahitur, & ad pristinum statum per se ipsam restituitur; Huius contractionis causa excutienda est, quod non leve, ut idem Bellinus fatetur (c). *Si causam & modum, quo*

vis contractionis operatur, intelliges, maximam partem rei naturalis affectus fueris.

Secundo. Partes elementares humani corporis invicem adhaerere, atque coniungi possunt alicuius substantiae interpositione, fluidae scilicet, quae Gluten a Schreibero appellatur, quodque ex Boerhaavii experimentis aqueo-oleosae naturae videtur esse (d).

Fibra tunc cum distrahitur elongatur, quia elementares partes a se invicem recedunt, nec scinditur fibra; nam glutinosa substantia oleosis, atque ramosis particulis constans easdem fibrae partes cohibet, ita ut ab hac divelli nequeant, nisi huius glutinis resistentia, cohaesioque vi distrahente superetur.

Distraeta vero fibra, cum elementares eiusdem partes a se invicem recesserint, rursus accedunt, & in pristinum statum reducuntur, propterea quia ramosae ipsius glutinis particulae, quae distrahenti vi resistunt, ad se redire conantur, ideoque distrahente vi ablata in naturalem statum coarctantur.

Hic igitur cohaesionis modus, per glutem scilicet, ex dictis satis evincitur, nam non solum distractilem verum etiam contractilem ostendit fibram, ita ut, si nimia, vel nimis parca aquae vel glutinis quantitate haec elementa cohaereant, rigidam vel debilem constituent fibram.

A 3

A deter-

(a) Boerhaav. Chym. (b) De contractione naturali. (c) Prop. 1. de contractione naturali. (d) Boerb. praelect. academ. lib. 3.

A determinata eius copia, & qualitate maior, vel minor elementaris fibrae durities ac elasticitas resultat.

Plures fibrae in longitudinem, & latitudinem productae, simulque in eodem plano cohaerentes membranam constituunt simplicem.

Si vero fibrae telae instar intertexantur membranam per superequitationem constituunt juxta Bellinum, & Glissonium.

Determinare docet Schreiberus eodem libro numerum cohaesionum in membrana, dato numero sibi juxta longitudinem appositarum fibrarum ex aequae multis fibrillis compositarum, quae fibrillae ex duobus elementaribus partibus sibi invicem cohaerentibus constant. Fibra vero ex pluribus fibrillis in directum sibi jacentibus.

Membrana simplex in se ipsam convoluta, ita ut cavitatem teneat, vasa primi generis, seu vasa minima exhibet; Membrana hujusmodi vasis contexta membrana secundi generis, seu vasculosa appellabitur.

Membrana vasculosa in orbem convoluta vasa secundi generis construit.

Proinde membrana ex iisdem secundi generis vasis constans in tubum convoluta vasa tertii generis reddet, & sic de ceteris quarti & quinti & plurium etiam ordinum concipere possumus.

Vasa quae a corde sanguinem accipiunt, nempe arteriae in vasa, quae sanguinem ad cor revehunt, nempe venas convertuntur, ita ut arteria, & vena sit unum, idemque vas hoc

solum discrimine inter utramque: arteriam a corde ad partes angustiores fieri, venam vero a partibus ad cor latiores, ideoque nullum intercedere spatium, seu corpus inter arteriae finem, & venae principium, quod nervose probat Pitcarnius (a), Heisterus, Schreiberus.

Omissis aliis Pitcarnii argumentis ex simpliciiori naturae systemate desumptis, nec non faciliiori sanguinis transitu, & e contra difficillimo, si supradictum spatium intercederet, illud Schreiberi (b) afferam: Si spatium huiusmodi, seu corpus daretur, vel minoris, vel aequalis, vel maioris esset diametri arteriae illius, vel venae diametro; Si aequalis diametri erit cylindri Tubi pars inter arteriam, & venam inserta; Si minoris diametri arteriae vel venae illius, nihil aliud erit, nisi arteria ipsa venam versus decrescens; Si tandem maioris diametri; ubi sanguinem extra vasa fusum absque eorundem laceratione, vel quacunque laesione ostendere potes? Vel quomodo armatos penetranti microscopio oculos effugere, latereque possent talia corpora sive cavitates?

Ex arteria in venam immediatam huiusmodi viam ipsis oculis detexit Leevenhoeck. in Anguilla, nec non celeberrimus Joan. Bernoulli. Experimentis, ac observationibus in vermiculis institutis, quae in disputatione de nutritione Groningae anno 1699. typis mandata intelligi possunt. Praeter hos Auctores quidem celeberrimos,

(a) *Dissert. de circul. san. p. vasa minima.* (b) *Ibidem.*

berrimos, Clarissimus, ac dexterissimus Anatomicus G. Cuuperus arteriarum venarumque communicationem seu immediatam anastomosis, vel potius unitatem observationibus in cane, fele, piscibus, ac ranis per microscopia institutis perbelle demonstravit (a) (b).

Determinare docet idem Leeuvvenhoeck. globuli sanguinei diametrum, cuius, si quadruplum accipias, seu quattuor globulorum sanguineorum diametros, fili argentei diametro aequales invenit, qualium 485. duodecimam pedis Londinensis partem seu unciam conficiunt.

Arteriae extremum, sicuti & venae principium unicum tantum sanguinis globulum admittens nobis delineavit Leeuvvenhoeck. (c) solidisque argumentis probat supradictus Schreiberus in primis possibiles haud nos concepturos esse obstructions.

Supponamus arteriae extremitatem duo capere sanguinis globulos, qui cum ad angustiores eiusdem arteriae apicem pervenerint, adeo aequali motu procedent, ut utrorumque centralis linea quocunque eius puncto aequaliter progrediatur, globulosque in aequidistantem a basi vasis punctum incidendo coeant, atque colligentur, sibi que alterum alteri resistentem, cum momenta virium, ac resistentiae sint aequalia, necessario (dices) consistere, ac immorari ex quo obstructions oriri.

Hoc tantummodo casu obstructio contingere posse videtur. Verumtamen etiam in praefato globulorum concursu nec eorundem cohaesio, nec vasis obstructio sequeretur; Quod ex supradictis satis evincitur.

Nam cum globuli sanguinei natura sint elastici, flexibiles quoque experiuntur, ideoque compressi ex sphaerica ellipticam figuram nanciscuntur, ut in supracitatis Leeuvvenhoeck. observationibus demonstravimus. Quare si ad eandem arteriae sectionem uterque globulorum simul perveniat, tunc cum obstructionis occasio jam accesserit, scilicet, vel arteriae diameter spasmodica contractione nimis coarctatus, vel ipsorum globulorum nimia per rarefactionem expansio, vel quaecunque alia stagnantis fluidi occasio, alter alterum comprimendo suam unusquisque transversalem axem coarctabit, ita ut vasis diametrum, sive comparative ad globulos, sive reapse angustiores facile subeat.

Quod supposita duorum tantummodo globulorum minimae arteriae capacitate diximus, eo magis, si plurius capax esset arteria, difficilem immo impossibilem obstructionis casum ostendit. Secus vero si unum tantum globulum eandem capillarem arteriam admittere supponamus.

Nam si sanguineus globulus nimis rarefiat, vel si lubet viscositatem acquirat, vel denique, si arteriola spasmodica contractione angustior evadat, obstructio facile continget.

Quo-

(a) *Act. phil. Anglic. an. 1702. n. 280.* (b) *Act. Erud. pub. Lips. Mens. Jan. 1704.* (c) *Arcan. naturae Epist. 65.*

Quotiescunque sanguineus globulus, sicuti in primo casu rarefactus arteriolae diametrum nimis excedat, nec ab imminuta eiusdem arteriolae elasticitate impelli, atque detrudi queat, quod in fibrillarum nervearum crispatione praecipue expectandum erit, nihilo tamen minus arteriolae, vel venae unicuique tantum globulum traicientis difficilem occlusionem fateor. At si duo globuli ad mutuum contactum perducti aequidistantem arteriae punctum attingant, ut Bellin (a) ostendit, obstructionis periculum imminebit.

Cui argumento aliud, ut mihi videtur, solidius addam; Nisi hae arteriolae, vel venae unicuique sanguinis globulum admittentes in natura existerent, sanguinis crasis, prout in homine, ceterisque animantibus observatur, nullo modo compingi posset.

Globulus sanguineus, seu ruber, sicuti supra diximus de eiusdem natura juxta Leeuwenhoeckium ex sex globulis serosis constat, qui seorsim conspecti flavi sunt, nec per seipsos, seu vi attrahente coalescere possunt (b); cum sint rotundi; praeterquam quod partem sanguinis rubram vase collectam in serum utique solvi, non autem serum in partem crassam, & rubram per se coagmentari nos docet experientia; Adest igitur in corpore humano vis, quae flavos, seu serosos globulos in rubros cogat, atque compingat.

Haec vis in capillaribus praecipue vasis unum tantum globulum admit-

tentibus a natura collocatam fuisse deducitur. Momentum enim cordis a centro ad circumferentiam per quascumque corporis ambages atque viscerum latebras sanguinem impellit, arteriae vero propria elasticitate primo flectuntur, & seipsas dilatando vi cordis impellentis, quodammodo obediunt, deinde enixe resiliendo in sanguinem irruunt, ac premunt, ex quo perennis circulatio sequitur; Verumtamen pars serosa, vel lymphatica, vel praecipue chylosa, quae in sanguinem commutari debet, licet assiduo solidorum motu comprimatur in praedictos globulos sanguineos nec coalescere, nec eorundem formam, ac magnitudinem assequi posse, nisi vasa minima ipsius magnitudinis, seu unius tantum globuli capacia subeant, quorum parietibus perangustum meatum constituentibus aequaliter compressa, eiusque sive serosis, sive lymphaticis particulis (de quibus supra) in unum coactis sanguineus globulus emergit (c).

CAPUT IV.

De actione respirationis & de aeris ingressu, & mixtione intra humanum corpus.

Non dissimilis pulmonum actio in sanguinem, qui exilium vasculorum aggerie partem nimis crassam atterit, dividit, ac heterogeneam substantiam quotidie in sanguifera vasa traiecit, nempe chylum, cuius crassiores partes attenuando subtiliores in globulos

(a) Prop. 26. de Mo. Bil. (b.) Schreiberus 238. 55. 201. (c) Boerhaav. de Oecon. Animal: Arteriae vis et actio. parag. 220.

globulos cogendo eidem sanguini assimilant (a).

Perinde respirationis actio adeo necessaria, huic potissimum usui destinata, scilicet, ut aer inspiratus pulmonares vesiculas dilatando sinuosa nimis vascula extendat, puncta contactuum minuat, sanguinique traicieiendi resistentiae multum auferat, expiratus vero nimiam compressionem avertat, quo ingressu ex arteria pulmonari in venam eiusdem nominis sanguinem promoveat (b).

Dices: praefatum respirationis usum adeo necessarium vitae ducendae non videri, ut intercepta respiratione animal cito pereat, nec per duo, vel tria minuta vitam protrahat, quemadmodum in cane, ove, &c. naribus rite obturatis expertus fuit Pitcarnius (c).

Respondeo: cum primum Fœtus in lucem editus aerem inspiraverit, nec non pulmonum viam sanguis adiverit, adeo necessaria fit respiratio, ut ea suppressa brevi suffocetur. Nam aer, expiratione prohibita, pulmonibus inclusus, visceris calore rarefactus, pulmonares vesiculas inflat, nimis distendit, sanguifera vasa vesicularum tunicis intertexta aucta vi elastica eo usque comprimit, & in maximas angustias cito reddit, ut sanguis progredi nequeat, cordis vi omnino resistat, ex quo eius-

dem fluidi stagnatio, oscillantis cordis retentio, proinde mors.

Instabis: si cani etiam post expirationem os et nares, vel quovis modo trachea occludatur aequali celeritate suffocatur.

Respondeo: cum aerem prius inspiratum expiret animal, pulmonares vesiculae evacuantur, quas aer ambiens actione aequilibræ inire conatur; at, occluso aditu thoracem undique comprimit, costas deprimit, ex quo vesicularum cavitates complanantur, sanguifera eorundem vasa coarctantur, complicantur, sanguinisque progressus necessario sistitur.

Utrum vero aer pulmones ingressus sanguini misceatur pro vitali elastica oscillatione, ut docet insignis Borellus (d), a plerisque graviorum recentiorum (e) (f) satis refellitur, adeo ut jam obsoleverit quaestio (g).

Aerem fluidis animalis corporis commisceri innumerabilia experimenta nos docent.

Aqua, quae maximam fluidorum nostri corporis partem amplectitur, multum aeris continet; nam intra machinam Guerikianam posita evacuato aere plurimae super eadem elevantur bullulae, quibus extinctis eodem aere pene impletur recipiens, ut ex Barometro percipitur (h).

Aqua eodem expulso aere nihil voluminis amittit, licet magnam aeris

(a) Boerhaav. Oecon. An. Pulm. vis et actio. (b) Boerhaav. praelect. academ. lib. V. Acta Erudit. Lips. 1745. p. 508. (c) Dissertat. de Causs. div. mol. (d) De motu animali. (e) Boerhaav. ibidem. (f) Pitcarnius dissert. de Causs. div. mol. &c. (g) Respiratio Anatomice illustrata Auctore Abrahamo Kaau. (h) Anatom. d' Heister le Meslange de l' Air.

ris quantitatem in se contineat, cuius partes summa elasticitate praeditae, tamen, cum intra aquae sinum adeo minutim dividantur, eorundem elasticitatis vis extinguitur.

Sanguis tum arteriosus, tum venosus in recipiente, seu machina positus non illico, sed paulatim turgescit, spumam edit, saepe tertiam molis partem supra naturalem acquirit, interdum ut observavit Boyleus quadruplum spatii naturalis occupat.

Sanguinis suillii pollex triginta tres pollices aeris quadratos destillatus reddit, ex quibus inferitur primo, aerem maiori copia in sanguine, quam aqua ut plurimum latere.

Secundo aeris particulas intra sanguinis moleculas minutim divisas, ac dispersas esse quemadmodum in aqua; nam si elementares haec aeris particulae coagmentarentur, momento temporis sanguis intra machinam turgesceret, ut vesicam flaccidam statim ac aer extrahitur, dilatari observamus.

Tertio aerem sanguini commixtum glutinosis ejusdem moleculis detinetur, ita ut multo difficilius, quam ex aqua egredi possit, ideoque rarefieri, & ad praedictam molem sanguinem tumefacere comperimus.

Sanguinis globuli intra machinam seorsum positi turgescere non videntur.

Hi tamen globuli notabili elasticitate praediti, ut supra diximus, calore turgescunt, quemadmodum ex interna, febrili agitatione, vel violento motu corporisque labore, vel igne, vel calido spirante austro, vel quacum-

que alia externa, vel interna caloris causa accedente, nostra vasa extendi, ac dilatari comperimus.

Globulorum sanguineorum elasticitas non aeris elasticitati, sed spiritus vini similem se ostendit; nam aer enormi compressione capax est, minime vero spiritus vini, qui tantummodo calore, sed mirum in modum rarefit, quod etiam sanguini evenit.

Vasorum distensio igitur ex globulorum elasticitate pro maiori parte repetenda erit, licet nonnihil ab aere rarefacto augmentum accipiat, propterea, quia aeris particulae perenni sanguinis motu non solum directo, verum etiam ex assiduo solidorum ictu, ac resistantia intestino, ac perturbato divisae retinentur, ita, ut parum suae elasticitatis exercere possint.

Urina ac serum sanguinis in machina Pneumatica positi bullulas emittunt eadem fere celeritate ac aqua, ebullitio tamen in his citius, quam in aqua quiescit, ut Muschembroekius & Boyleus observarunt, & licet serum ex oleosa, & nonnihil glutinosa ejusdem substantia bullulas diu retineat, pauciores tamen sunt, quam in urina; minorem igitur aeris copiam urina continet, quam aqua, & tenuiorem rursus serum quam urina.

Bilis aeris extractione vix incepta statim turgescens spumosa evadit, insignes edit bullulas, suumque volumen ad decuplum augefcit; Bilis ergo valde rarefcibilis, ita ut incalescente hepate, & mesenterio eorundem vasa nimis extendere, ac morbosas

com-

compressiones parere debeat; nam ipsa bile secretoria vasa difficilius permeante eorundem vasorum secretoriorum obstructions, infarctus, ac tumescuntiae insurgunt.

Saliva maiorem aeris copiam, quam bilis continet, ita ut in machina posita quatuor supra decem naturali volumine maius spatium occupet.

Haud secus in mucosarium experimur, nisi eorum partes tenaciores viscosioresque aerem diu retineant.

Ceterum si cuncta nostri corporis fluida etiam tenuiora aeris moleculis undique expansis plena essent, formidabilis sequeretur eorundem rarefactio.

Quibus viis aerem in sanguinem, ceteraque fluida perducere possit inquirendum restat. Verumtamen cum exteriores corporis meatus saltem aeri impervii sint, nec ut ex dictis pulmonum vasa ingredi queat; aer igitur, qui in sanguine reperitur, chylo immixtus sanguifera vasa adire necesse est.

Chylum aere abundare satis constat.

Primo, ex alimentis quibus utimur, aere plenis, praecipue oleribus & fructibus; horum etenim quidam tantam aeris copiam emittunt, ut recipientem quinquies implere valeant, nec non mercurium ad naturalem altitudinem elevare.

Secundo, quia chylus in vacuo recipiente plurimas edit bullulas, parumque chyli magnum aere implet recipientem, ita ut mercurium ad notabilem efferat altitudinem. Qui-

bus addere fas est, aeris moleculas adeo divisas, ut in sanguine non esse, quia propriam elasticitatis vim citius exercent; Nam si ductus thoracici portionem animalis non ieiuni ligatis extremitatibus intra machinam, vel in aquam calidam mergas, illico tumescit, quod in sanguine non evenit.

Maior quoque aeris quantitas chylo continetur, quia aequali posito sanguinis, & chyli volumine ad multo plures gradus ex chylo attollitur mercurius, quam ex sanguine.

Tunc cum feces a tenuiori chyli substantia separatae dissolvuntur ac putrescunt, plurimum aeris, qui intra easdem particulas cohibebatur, exit, ex quo flatus, ac venti, qui per anum erumpunt.

Non solum fluida, verum etiam solida nostri corporis aere plena deteguntur.

Animalia in machina supra dicta extracta aere expanduntur, ac tumescunt.

Membrana adiposa inter ceteras plurimo aere scatet, quia inter ceteras magis expanditur; quaelibet vero membrana aerem continet, nam membranae vasorum, aeris extractione vix incepta, inflantur, ac si pluribus compositae lamellis a se invicem separantur, quod ex occluso aere propriam elasticitatem exercente oriri necesse est.

Aeris igitur moléculae membranis inhaerentes crassiores, seu minus divisae censendae sunt, quam fluido innatantibus; nam si aequae divisae haud cito earundem membranarum infla-

tio contingeret, sed lente, paulatimque, quemadmodum in sanguine procederet. Ex quibus corollaria magni momenti sequuntur, nempe:

Primo aeris particulae membranis inclusae compressioni aequae, ac rarefactioni subiectae; ideoque frigore condensabuntur, calore rarefient.

Secundo, si alternatim comprimantur, alterna quoque expansione resiliunt, ideoque membranae nostri corporis ex aereis huiusmodi particulis, quibus redundant, insignem elasticitatem nanciscuntur, ita ut reciproca expansionis, vel compressionis vi accedente contractionis, ac expansionis actio prompte succedat. Verumtamen cum solida nostri corporis membranis consent, ipsa magnam ex aere oscillandi vim, seu elasticitatem acquirunt.

CAPUT V.

De aeris ambientis actione.

Vis aeris interni ambienti resistit, qui nostra corpora circumundique gravat fluida condensando, solidaque comprimendo; quod ex praedictis experimentis circa machinam actis satis deducitur. Quibus addam illud vesicae cuius orificio rite clauso, si supra montem transferatur, perspicue maiorem acquirit volumen, immo ad verticem appropinquans expansionem auget, a vertice vero abiens se contrahit, & quo humiliorem locum petit, eo plus voluminis amittit. Quae varietates a cylindrorum aeris diversa altitudine pendent; brevi-

ores enim supra montes, longiores vero supra valles, humilioraque loca, ideoque maior in his, quam in illis erit aeris gravitas. Quae tamen gravitas minime constans est, etiam in eodem loco E. G. Aer; cum nebulosus imbrisque scateat, levior est, contra vero serenus: (ut ex barometro) hic quia maiorem aquae copiam sustinet, ille vero cum particulas aqueas sustinere nequeat, quia rarior factus, eadem aqueae particulae descendunt, ac descendendo coagmentantur; hinc eo graviores factae in pluvias faceffunt.

Si quis quaerat: cur nebuloso tantummodo aere pluviis non decidentibus, nubibusque suspensis levior tamen sit idem ambiens?

Respondeo: cum nebulosus est aer etiam si pluviae sensibiles non decident, saepe tamen tenuissimae aqueae particulae jugiter descendunt, ut in laevibus marmoreis superficiebus madidis experimur, nec non in funibus canabinis, ita ut cum claustra petimus, si campanulam pulsare velimus, tunc contractam eiusdem campanulae funem invenimus, quod nisi ex humectante aere evenire posset.

Praedicti phaenomeni simillimam habemus speciem in Machina Guerikiana. Si vas ferventi aqua repletum intra eandem immittatur, ante aeris extractionem tenuissimi exhalant vapores, neque oculo perceptibiles, extractione vero aeris vix incepta, cum levior rariorque fiat, intra eandem machinam conspicui evadunt, iidem vapores, ac nubem repraesentantes descendunt.

Cum

Cum aer internus externo resistere debeat, aequilibrium inter hos servari necesse est, quo rupto indefinitae oriuntur mutationes, quae ut melius innotescant, aeris pondus pluribus philosophis jam determinatum perpendere necesse est.

Wolffius aeris cylindrum, cuius basis sit diametri unius pedis, ad 1703. librarum pondus ascendere statuit.

Si vero cylindrus in prisma commutetur, cuius basis sit quadrata unius pedis, cum altitudine supponantur aequales, (a) erit pondus aeris mensurae cylindricae ad pondus prismaticae, ut basis unius ad basem alterius, hoc est, ut area circuli ad aream quadrati circulo circumscripti, quae est circiter $\frac{1}{4} : \frac{1}{3}$; proinde aeris prisma, sive parallelepipedum, cuius basis quadrata sit unius pedis, 2270. circiter librarum pondus aequabit.

Supponamus igitur totam nostri corporis superficiem esse pedum quadratorum num. 20. Humanum corpus 34. mille, & plus librarum pondus sustinebit; verum ut huiusmodi ponderis vis clarius percipiatur.

Capfam supponamus, cuius cavitas sit pedum cubicorum quattuor aere vacuum, quae cum plus 40. mille librarum pondere gravetur, ideo confringi necesse foret: si vero aere repleta, interior exteriori aeri resistit, ac aequipollet. Idem thoraci, ac pulmonibus evenit. Aer inspiratus ambienti aequipollet insigni atmosphaerae ponderi resistit, ac ine-

vitabilem thoracis contractionem impedit.

Aer internus, seu nostri corporis partibus inhaerens compressionem, non minus ac divisionem ambiente maiorem patitur, propterea quia solidorum fibrae notabili elasticitate donantur, ex qua peculiarem, nec intermissam contrahendi vim exercent; ideoque aereas particulas comprimunt; hinc ex huius compressionis defectu, qui corporibus jam corruptis evenit, quorum fibrae liquefacto glutine, solutisque particulis easdem componentibus elasticitas omnino desit. Idcirco aereae particulae prius divisae, ac coarctatae extricantur, conglobanturque, necnon rarefiunt, proinde, nisi ex integumentis erumpant, corruptum corpus tumescere necesse est, quemadmodum in iis observatur mare, vel fluminibus necatis, qui antequam corrumpantur fundum petunt, ibique commorantur, corrupti vero supervehuntur, quia leviores ex aucto volumine facti ascendere coguntur. Praedictum vero ambientis pondus minime constans est, sed varietati obnoxium.

Pondus aeris juxta communem graviorum auctorum observationem diminutionem $\frac{1}{10}$ patitur; Mercurius enim a triginta, ad 27. gradus descendere, & vicissim a 27. ad 30. ascendere percipitur.

Supposita ambientis gravitate supra humanum corpus 20000. librarum, si ad $\frac{1}{10}$ pondus augeatur duarum mille librarum pondere super-

(a) Ex prop. VIII. select. Arch.

gravabitur, si ad $\frac{1}{10}$ mille librarum, quod compressionis augmentum, vel decrementum plurima phaenomena, ac insignes humano corpori inferre debet mutationes, quod (a) monet Hippocrates: *In aere considerandum, quanta insit caliditas, frigiditas, crassitudo, tenuitas, siccitas, humiditas, an plenior, an vero minor, & copiosior; in quibus quaenam mutationes &c.*

Si mille tantum librarum supergravetur nostrum corpus ex ambientis ponderis augmento vasa comprimi, atque coarctari, nec non internum aerem condensari necesse erit, ex quo aucta circulanti sanguini resistentia, proinde cordi, utpote impellenti causssae, quae resistentia fibrarum elasticitatem magis allicit, solidorumque actionem excitat, ita ut vegetiores, agilioresque ad motum, & labores subeundos nos sentiamus.

E contra, si levior aer E. G. mille librarum ex diminutione $\frac{1}{20}$ ponderis, aer internus rarefit, vasa minus compressa expanduntur, quae expansio, si naturalem vasorum diametrum nimis excedat, cerebrum, ac nervorum genus opprimitur, ideoque minor spirituum animalium copia separatur, fibrarumque, sive nervorum, sive membranarum elasticitas imbecillis redditur; ita ut sensibilem virium languorem experiatur corpus, quod flante australi vento praecipue contingit, sicuti etiam Hippocrati in-

notuit (b). *Austri caput gravant, surditatem, ac languorem inducunt, caliginem visui offendunt; cuius effectus rationem reddit Ramazzinus (c).*

Quia minor est atmosphaerae pressio, & consequenter maior fibrarum laxitas, segnior sanguinis per sua vasa fluxus (d).

Quod igitur omnibus animantibus cum aere maxima intercedit communitio dictum est. Huic quoque orationi subjiciendum morbos unquam vix aliunde quam ab aere oriri posse &c.

Quibus pronuntiationibus maxime assentitur Fridericus Hoffmannus (e), qui ait: Sapienter Div. Hippoc. lib. de natura hominis pronuntiat: *Morbi oriuntur tum a victus ratione, tum a spiritu (hoc est aere) cuius inspiratione vivimus Testantur id morbi, qui populariter grassantur &c.* postea (f) cum experientia doceat, ab intemperantia & victu pleno chronicas affectiones, magis acutas autem, quae sub certis temporibus nascuntur, & rursus abeunt ab aeris tempestatibus propullulare.

C A P V T VI.

De motu solidorum.

Ut solidorum motus efficiens causa detegatur, ad animalia recenter necata oculos convertamus.

Ranae cor extractum, & ab aliis visceribus abscissum, diutius pulsabit, ulte-

(a) VI. Epid. sect. VIII. (b) Aph. I. sect. 3. (c) Cap. III. Tom. 2. (d) Lib. de Flatibus sect. III. (e) Proem. dissertationis circa ventorum causam, vires, & operationes in corpora humana & Barom. (f) Eadem pagina.

ulterius si in frustra recidatur, recisae particulae oscillatorio motu moveri observantur, quo cessante, si stilo, vel acicula pungantur, redit primarius motus. Idem cordi avium, piscium, serpentum, immo ipsorum canum evenit, cuius cor in minutas particulas cultro divisum oscillare comprehendimus.

Hos motus in corde humano admittere praeter rationem non esset, propterea quia eandem formam, seu figuram, fibrarumque ordinem idem quoque consecutum est.

Re vera cor humanum si antequam frigescat extrahatur, haud secus ac raninum, si stimulo afficiatur, palpitat, immo eiusdem frustula, praesertim cuspis, aculeo puncta convellitur.

Ex calore iidem enascuntur effectus, ac ex aculeis; E. G. Ranae cor calefactum contrahi, ac dilatari elare percipitur. Supra laudatus Auctor Gallus (a) asserit, catuli cordis motum solo manus calore centies renovasse; Pulli quasi frigefacti cor aeris expirantis calore in motum excitavisse.

Huiusmodi motus oscillatorii cordi peculiares minime habendi sunt; nam partibus musculosis communes inveniuntur. Serpentes E. G. cuiuscunque generis, Anguillae, Salamandrae, Lampetrae, quorum corpora, si in plures partes scindantur, motum per plures horas protrahunt. Caput viperae a corpore recisum mordendi vim etiam lethalem ali-

quandiu servat. Quidam piscis carnivorus, quem Itali *Lamia*, Galli vero ex ferali devorandi natura *Requein* vocant, capite, caudaque non solum amputatis, verum etiam visceribus evulsis, truncus tanta vi detorquetur, ut duo, vel tres homines eundem cohibere non valeant. Testudinis ut ex Redi habemus abscisso capite, etiam post aliquot horas, si pedes aculeo pungantur non levi impetu retrahuntur, ac varie moventur, bovum quoque partes musculosae nuper necatorum contrahi vicissim, ac relaxari videntur.

Si animalium suffocatorum, nempe canum, & felium intra venam cavam inspiretur, redit motus cordis, nec cito extinguitur. Vide Beyerum, & Brunnerum.

Si ductus quoque thoracicus non sine dexteritate infletur, idem sequitur effectus. Stenon in vasa lymphatica canis aerem obnixe introduxit, ex quo necatus est; eodem aperto cane, abscisso pericardio, cordis aere turgidi perdurabat oscillatio. Idem fere in alio cane expertus est, cuius cordis auricula, etiam post quinque ab obitu horas moveri non desinebat.

Verumtamen non solum in partibus musculosis, infusionibus mediantibus, motus oscillatorius excitatur, sed etiam in vasis. In cane tribus post mortem horis tum cordis, tum auricularum motu extincto refrigeratis prorsus visceribus venae cavae superius truncum se moventem vidit

(a) *Anatom. d' Heister.*

vidit Steno, dummodo sanguinem in ipsam intruderet. Idem Auctor in corvo, postquam dextrum cordis ventriculum a sinistro amoverit, venae cavae tunicis jam laxatis complanatisque fibras transversas alternativo, ac vermiculari motu se attollentes, veluti undas observavit, qui motus ultra duas horas perduravit.

Fibrae non aequali, nec unisono donantur motu, propterea, quia etiam unius fibrae partes contractionem, ac relaxationem vicissim subeant, ita ut dum prima E. G. pars contrahitur, altera relaxatur, ac versa vice, dum prima relaxatur, altera contrahitur, sicuti Auctor Gallus (a) observavit.

In actis Academiae Regiae Scient. 1701. dissertatione Domini Litre eodem anno edita observatio legitur supra tres foetus humanos, quorum primus octimestris sine capite, secundus septimestris sine capite, & collo natus fuit.

Anno 1711. alia a Domino Leme-ri, quae refertur etiam in ipsis Act. 1740: Foetum humanum eidem Academiae exhibitum fuisse sine cerebro ac spinali medulla, ceterae quantumvis partes naturali sua structura perfectae fuerint; hoc monstrum jam nonimestrem terminum compleverat, ac postquam editus duas horas vixit.

Aliud simile monstrum a Monsieur Mery visum fuit, quod viginti, & unam horam vixit, & aliquantulum etiam depastum. Idem Auctor dissertationem supra humanum foetum

ad Academiam misit 1720. qui sexto mense exivit; hic corporis truncum adeo informe, & monstruosum nactus est, ut huius verticis pars superior in prima dorsii vertebra posita fuisset. Quare capite, collo, scapulis, claviculis & brachiis destituebatur, cavitates vero internae, corde, quod admirabilius fortasse est, pulmonibus, ventriculo, liene, hepate, pancreate, & intestinis tenuibus vacabant.

Eodem anno 1720. enata fuit Bononiae foemina sine capite, sine corde, pulmonibus ac diaphragmate, sine brachiis, hepate, & liene &c. quam se nonnihil movere post ortumprehenderunt; cuius Historiam indicat Clarissim. Vallisnerius in operibus suis posthumis, expositam in dissertatione suo nomine edita cuius titulus: *Fluidi nervei historia Auctore Joanne Hyacinto Vogli*. Primae huius Monstri descriptioni fidem non habuit Vallisnerius, nec prorsus acquievit secundae Valsalvae, ac Bianchi auctoritate; ideo percontatus est alium Medicum Urbis primum, ut de huius monstri structura certior factus esset, propterea quia monstrum, in quo sanguinis circulatio absque corde facta sit, concipere nequibat; licet prius simile exemplum habuerit in Appendice Blasii tractatu de monstribus.

Anno 1703. in historia eiusdem Academiae Regiae inseritur observatio agni foetus monstri, qui capite, thorace, vertebra ac extremitatibus ante-

(a) *Anatom. d' Heister.*

anterioribus destituebatur, quemadmodum interius corde, hepate, renibus, & vesica parvum tantummodo globum in ventre habens, a quo nerveae propagines oriebantur, quique cerebri officium gerere videbatur.

Anno 1726. Dominus Winslovvus ex Academia Strasburgensi relationem accepit foetus humani sex mensium in eiusdem amphitheatro dissecti, cuius corporis structura tota monstrosa, nec ullam quidem partem, quae a forma naturali non recederet, possidebat; inter cetera praeter naturalia, capite, & corde carebat. Monstrosis tamen foetibus huc usque adductis admirabilior sane & ille, quem Dominus Winslovvus refert in observationibus Anatomicis pag. 586. eiusque descriptio in Act. Acad. Regiae scient. anno 1740. in sua dissertatione prostat; hic non solum capite, & corde a natura defraudatus fuit, verum integro thorace, & brachiis, ac uno verbo dimidiam tantummodo corporis partem, inferiorem scilicet, nactus, quae in abdomine & inferioribus artubus consistit.

Mihi quoque puerperam invisenti monstrosam foetum nuper observare contigit, quippe cum foemina acutis doloribus per plures horas laboravisset; tandem solam manum exerentem transverso corpore prodire foetum evidenter sensit obstetrix, quare & consilium meum, & Chirurgi opem petiit. Init operationem D. Joannes Baptista Bueli, in arte Chirurgica optime meritis, qui sum-

ma, prout solet dexteritate, ac puerperae felicitate nudis manibus eundem extraxit.

Extrinseca huius corporis figura, five faciei, five trunci, artuumve omnino naturalis erat, sola quidem superior cranii pars, quae calvaria dicitur deficiebat; hinc cranii fundum cerebro prorsus vacuum oculis se exhibebat tenues continens membranulas inter se diversimode implicatas. Ex superiori umbilici parte per reliquum abdominis, ac per thoracis medium usque ad tiroideam cartilagineam extensa tres, vel quatuor lineas lata rima conspiciebatur. Extra thoracem cor propendebat sine pericardio, extra abdomen intestina mesenterio appensa, & ren sinister. Cor naturalem magnitudinem & figuram nactus erat suis cavitatibus auriculisque constructus, venis arteriisque maioribus. Intestina licet tumescentibus vasis sanguiferis rubicunda viderentur, sicuti & mesenterium, nihil praeternaturalis, quoad magnitudinem & figuram habebant; non vero adulti magnitudinem superabat, sed laxioris substantiae, & sanguinei coloris, eiusque vasa emulgentia ipsius magnitudini respondebant, ex quibus inferre procul dubio debemus sequentia corollaria.

Primum: partes solidae nostri corporis ex innata structura quam possident nervearum fibrarum, vasorumque se diversimode interfecantium aggerie, dummodo fluidis sufficienter repleta, praesertim subtilibus & elasticis (licet perennis a cerebro, cere-

bello, ac medulla oblongata jugiter descendens spirituum animalium fluxus deficiat, ut in adductis monstris capite, ac in aliquibus etiam spinali medulla destitutis) se movere ac oscillandi vim habere censendum est; hinc musculosae partes cadaverum recentiorum mortuorum, si stimulo afficiantur in motus conspicuos excitantur, non autem si aliquandiu post mortem, quoniam nervei tubuli tunc animali succo adhuc replentur, vel saltem nondum vacui sunt, postea vero ex naturali eiusdem succi exhalatione exinaniuntur, abiitque vis motrix.

Secundum: vasa, praecipue arteriae sanguiferae, absque cordis impulsu alterno suo dilatationis, ac constrictionis motu, licet leviori ac minus conspicuo, revera frui liquet.

CAPUT VII.

De motu cordis.

Si aperiatur vivens canis duo motus in corde manifeste apparent (a), ventriculorum nempe, & auricularum, alter alteri immediate succedens, qui alterni a plerisque censentur, minime autem a Lancisio. Tum cor, tum auriculae in contractione pallefcunt, eorumque parietes indurescere manu percipitur, in dilatatione vero rubescunt (b).

Ventriculorum contractio ex generali synchronaque fibrarum cordis crispatione ac inflexione resultat contra Borell. (c), qui ex sola fibrarum

cordis inflatione ventriculorum cavitatem occupante, seu arctante sanguinem expelli censet; fibrarum enim cordis contractio in ranis catulisque satis deprehenditur, sicut Steno multoties observavit, nempe cuspidem ad basim appropinquantem mediante ventriculorum contractione, quod ex earundem fibrarum spirali obliquitate, ac dispositione, columnis carneis, ac parietum foveis (d) dignoscere debemus.

Ligatis nervis, vel abscissis paris octavi, animal vel cito moritur, ut nonnulli volunt, vel languescit, sensumque deficit, ut Willisius, Lovverus ac Boerhaavius asserunt.

Iisdem experimentis, ac observationibus tam obscurum, reconditumque phaenomenon cordis motus explicaturi inniti fas est.

Plura quidem tum Antiqui, tum Recentiores de motu cordis pronuntiarunt, quae si enumerare vellem, refellendi gratia, praeter institutum nimis evagarer, nec non obsoletas tractando quaestiones legentes fastidirem.

Ignem seu calorem innatum in corde esse, ex quo perennis eiusdem motus, arbitrati fuerunt Veteres; fermentum vero Cartesiani sanguinem ita expandentem, ut ventriculos ingressus rarefiat, ac rarefactionis impetu in arterias protrudatur, quas Hypotheses prorsus corruisse nemo est, qui inficietur.

Nonnulli

(a) Lancis. de mot. Cord. (b) Anatom. d' Heister. (c) de mot. animali. (d) Lancis. de mot. cord. Boerhaav. de Oecon. animali.

Nonnulli Recentiorum ex sola musculari structura perennem cordis motum eliciunt, legibusque mechanicis suam Hypothesin his observationibus mox enarrandis superstructam fulcire conantur.

Prima : omnes muscoli ad contractionem tendunt, quemadmodum ex supra allatis experimentis satis evincitur; item reciso per ventrem musculo divisae eiusdem partes versus extremitates ubi connectuntur se contrahunt, ac a se invicem discedunt.

Secunda : quilibet musculus extincta Antagonistae actione contrahitur; nam abscissis tibiae canis extensoribus musculus flexus crus contractusque remanet.

Tertia : ligata prope cor canis arteria Aorta, ita ut sanguinis e corde venientis progressus omnino intercludatur, ceteri sanguinis ex arteria in venam commeatus minime impeditur; quin ipsae arteriae sanguine vacuae, venae autem turgidae post mortem plerumque inveniuntur (licet hoc a Domino Pasta Bergomenfi negetur Epistola ad Aletophilum (a). Ergo arteriae musculari vi donantur, qua sanguinem per se ipsas vi cordis prorsus exclusa e proprio sinu expellere valent.

Quarta : venae sanguinem versus auriculas protrudunt, tum propria parietum constrictione, tum ipsius sanguinis impetu ex arteriis contracto.

Quinta : Auriculae quoque magna elasticitate praeditae intra ventriculos sanguinem impellunt.

Sexta tandem : ex sanguinis ingressu provocata cordis systaltica ac musculari vi idem sanguis in arterias projicitur.

Sanguis igitur juxta hanc sententiam arteriarum pulsu, seu constrictione ex arteriis in venas trajicitur, ex his vero, tum sanguinis arteriosi a tergo subeuntis impetu, tum earundem venarum vi constrictoria in cordis auriculas migrat. Tandem ex auriculis propria earundem actione in ventriculos impellitur, quo impulsu nimium dilatatis, seu extra punctum, quo inter sanguinis impetum, & cor aequilibrium adesset, idem propria elasticitate resiliens, ac miratum fibrarum, tum lacertorum vi in sanguinem irruit, ac in arterias repellit.

Cui sententiae opponunt alii : praedictae organorum vires altera in alteram vicissim agentes, cum ad aequilibrium tendant, tandem inter se aequilibrari, ac consistere deberent.

Plerique in animali spiritu alternatim ad cor fluente systolis, ac diastolis causam statuunt, id est, irruente spiritu fibrarum contractionem, seu cordis systolem, momento vero suspensionis eiusdem spiritus fibrarum remissionem, seu cordis diastolem sequi.

Cur vero animalis spiritus alternis vicibus ad cor descendat inquirendum esset : Animalis spiritus per vices descendere nequit, nisi alterna vi impellatur, vel nerveos ductus modo apertos, modo clausos per vices quoque inveniat. Utrumque tamen repugnat.

C 2

Repu-

(a) *Acta Erud. Lipsiae anno 1739.*

Repugnat primo alterna vis impellens; haec enim vel in cerebro, vel in meningibus praecipue dura matre reputatur, cui motum systolis, & diastolis Baglivius, & Pacchionus tribuerunt; verum deceptos fuisse hos viros docet anatomes, qua dura mater cranio undique adhaerere per ligamenta comperimus (a).

Secundo autopfia, qua per cranii scissuras si quid motus in dura matre percipiatur ex arteriarum illam perreptantium oscillatione fieri necesse est, ut ex Ridley pluribus validisque experimentis probatur.

Tertio etiam ratio; dura mater nisi per internum cranii periossteum definiri nequit, quia sola concavam cranii superficiem vestit, externoque periossteo, seu pericranio per suturas connectitur, proinde reciprocam, & momentaneam ipsius periosstei adhaesionem, ac revulsionem admittere ineptum esset; praeterea vacuum spatium modo inter cranium, & meningem, modo inter meningem & cerebrum fieri deberet, quod vel atmosphaerae pondere sanguinem ac cerebrum cranium versus premente prohiberi fas est, vel ex vacuo, cum sanguis aut lymphæ ex aere saltem intus contento rarefacta (b) vasa nimis dilatet, ut in machina pneumatica, vasorum scissurae, lethalesque fluidorum eruptiones orirentur. His addere possumus non paucos illorum, quibus cranii, ac meningis frustum ex sinistro eventu amiserunt, nihilominus artificiali lamina foramen operiente optime convalescerunt.

Nec in cerebro quoque haec vis impellens admittenda est, cuius fibrae, sive tubuli spiritum animale fecerentes molles friabilisque substantiae sunt, vasa quoque sanguifera tenuiora, ut molle huiusmodi parenchyma non laederent, quemadmodum censet Hoffmannus.

Causam vero, propter quam alternatim aperiantur nervei ductus, quisnam excogitare potest? Constanter igitur aperti censendi sunt, quoniam clausi repugnant; ergo continuus & aequalis eorum fluxus in cor.

Alii hanc vim in cor alternatim agentem, ex reciproca ventriculorum, atque auricularum eiusdem cordis constrictione pendere autumant, nempe: Animalis spiritus per nervos in cor descendens fibras contrahendo ventriculorum parit systolem, quo tempore sanguine implentur auriculae, a quo musculares earundem fibrae extensae in contractionem, seu systolem resiliunt, sanguinemque in ostia cordis impellunt; ex hac auricularum contractione, nec non sanguinis impulsu nervos ad cor directos comprimi necesse erit, atque compressione paralyticos quodammodo reddi, proinde cordis parietes relaxati sanguinis ex auriculis venientis impetu dilatantur; facta vero in auriculis fibrarum remissione, spirituum materia prius detenta ac praepedita in cor dilatatum maiori impetu irruit, eiusque cava constringit. Interim huius constrictionis momento sanguinem e venis accipiunt auriculae, quae postea contrahuntur, nervil-

(a) Vid. Laurent. Heist. (b) Cap. 4. huius.

nervisque cardiacis paralyfin inducunt, ut ventriculorum diastoles rursus sequatur. Applaudunt huic hypothefi quidam clarae famae auctores, ceterisque praeferunt, attamen nonnullis difficultatibus obnoxiam fatentur. Ideo has figillatim depromere supervacaneum esset. Duas tantum affero.

Primam Lancisii auctoritate (a), qua repetitis observationibus in animalium extispiciis: Auricularum contractionem cum ventriculis alternam minime esse, ut passim creditur, sed non nihil antevertere, citiusque definire, ac propterea ex parte synchronam esse; ergo mendaci, vel saltem ancipiti principio haec nititur hypothefis.

Secunda: Amissa licet nervorum cardiacorum paralyfi ex auricularum constrictione, eo quia iidem nervi easdem traicientes comprimuntur, inquirendum tamen superest modum, quo nerveae auricularum fibrillae relaxentur, ita ut earum diastoles cum ventriculis alternatim succedat.

Quidquid ex super allatis experimentis circa cordis motum colligi potest modo exponam, non ut meam opinionem in medium afferam (opinio enim est propositio insufficienter probata juxta Wolff. Logicam) verum ut praedictis observationibus innixi aliquid de motu cordis inferre, ac instituta methodo demonstrare valeam. Considerandum est primo.

Cordis motum a nervorum actione pendere, abscissis enim, vel ligatis tan-

tum cardiacis nervis (b) deficit eiusdem motus.

Secundo; actio nervorum ex tenuiori fluido earundem fibras, seu tubulos implente originem ducit; nam si nervorum oscillatio, vel quaecumque actio ipsis insita esset, ut nonnulli animalem spiritum negantes volunt, ligatis etiam nervis subsistere deberet, sicuti musicalis chorda licet ligata oscillare, ac vibrationes edere non desinit. Praeterea si haec vis oscillationis solidis partibus, fibrisque muscularibus cordis insita & naturalis esset, cadaverum corda usque ad corruptionem oscillatorium motum non amitterent. Spirituum animalium vero existentia (c) satis probata; ergo a nervis spiritu animali repletis cordis motus perficitur.

Causa vero, propter quam cordis actio alterna sit, licet ut supra vidimus continuus, & aequalis per nervos spirituum fluxus, primo ex ipsa cordis fabrica, eiusque miro fibrarum ordine (d) resultat, ut ex adductis quoque (e) observationibus satis evincitur; cui enim tribuendus erit ille motus oscillatorius constrictionis, ac dilatationis, qui in cordibus non solum ranarum, piscium, serpentum, verum etiam brutorum, nec non ipsorum hominum recenter mortuorum a corpore extractis observantur, nisi ex reciproca fibrarum muscularium se invicem, ac diversimode decussantium actione, quae absque animalis spiritus easdem permeantis ope mini-

C 3

me

(a) *Lib. de mot. Cord. & Aneur. cap. 1. p. LIX.* (b) *Par. 3. huius cap.* (c) *Cap. 2.* (d) *V. Loeper. Tract. de Corde.* (e) *Huius cap. 6.*

me haberi posse probavimus? Nam si extracti cordis, & a quocumque viscere avulsi in animali recenter mortuo alterna pulsatio aliquandiu perseveret, intrinseca erit eidem cordi alternae pulsationis causa; ergo ab eius structura pendet: nega si potes.

Si petas, cur hic motus per aliquod tantum temporis spatium perduret?

Respondeo: perdurat donec maior fluidi nervei pars, qua cordis fibrae turgescunt, dissipetur, ita ut hoc exhaustae elasticitatem, ac contrahendi vim prorsus amittant, ut frigidis cadaveribus contingit.

Si petas rursus, quomodo ex cordis structura alterna eiusdem actio proficiatur?

Respondeo: licet morosa nimis sit haec quaestio, nec ad institutum meum omnino pertinens, nonnulla tamen expendere non recuso, quibus mechanicam phaenomeni explicationem assequamur.

Primo: varius, ac pene inextricabilis fibrarum substantiae cordis ordo, nonnullae rectae a basi versus apicem descendunt, nonnullae basi parallelae (a) ideoque transversales, pleraeque vero spirales, quarum aliae externae, aliae internae, illae a basi ad apicem sinistrorsum, hae dextrorsum excurrunt, se mutuo intersecant ac mirum in modum inosculantur, ita ut nodum veluti gordianum constituent, de quo enuntiari posset adagium il-

lud Hippocratis: Circulo descripto principium non invenitur (b).

Parum vero interest instituti nostri si diversa sit fibrarum cordis ac in musculis structura, ut contendit Wierus Muys in opere cuius Titul. (c).

Secundo: in Systole latitudo cordis augetur, longitudo minuitur basi ad apicem adducta, nec non substantia extrinsecus pallefcit.

Tertio: in eadem systole fibrae transversales, seu basi cordis parallelae, vel quodammodo ad parallelas accedentes divulsionem patientur, ex qua divulsione, cum sint elasticae, resilient, cordique attracto contranitentur, ut rursus extendantur.

Quarto: vis motrix cordis per se tantum considerata, saltem 3000. librarum pondus suspendere valet (d).

Quinto: cordis contractio nonnulla animalium spirituum e nervis expressione, seu dissipatione contingere necesse est, quod probatur experimento (e) super exposito, quo ligatis nervis diaphragmaticis deficit huius visceris motus, hi vero si digitis diaphragma versus perfricentur, diaphragmatici motus restituitur, qui post longam perfrictionem extinguatur, verum si paulisper vincula relaxentur, iidemque nervi rursus ligentur, diaphragmatis motus reviviscit; ergo in qualibet musculorum actione, ac proinde etiam in corde spirituum dissipatio continget; hinc lassitudo iis, qui vel motu, vel laboribus

(a) *Anatomie d'Heister.* (b) *Louver. Traët. de Cord. Boerh. de oecon. an. Lancis. prop. 30. 31.* (c) *Investigatio fabricae, quae in partibus musculos componentibus extat. &c.* (d) *V. Boerh. d. Mot. ani p. 67.* (e) *Huius. cap. 2. de Spir. Animal.*

ribus masculos nimis exercuerunt, a quibus si congrua quiete ferientur, primariam vim recuperant: quemadmodum qui brachium, vel onere gravatum, vel etiam solutum aliquandiu extensum, aut elatum sustineat, idem defessum remittere cogetur, verum remisso paulisper brachio, ac quiescenti amissum robur omnino redditur, quia spiritus labore prius dissipatus quiete redimetur.

His positis alternae cordis contractionis, ac dilatationis causam concipere non erit arduum (a).

Illo eodem systolis tempore fibrae cordis tali vi contrahuntur, ut supra nerveos tubulos magnam compressionem exercent aequali (si in solidum excipiantur) saltem 3000. libris, ex qua fibrarum compressione spiritus per ipsos nervorum tubulos in cor descendens intercipitur, qui cardiacas fibras in contractionis actione aliquantulum exinanitas subiturus esset, quapropter his fibris contractionis vis, vel deficit, vel saltem admodum minuitur. In hac cordis quasi paralyfi eiusdem cava non nihil aperientur, ac sanguinem e vasis redeuntem, nec non impetu in illa irruentem recipient, unde ipsius cordis diastoles. Huic adde fibrarum basi fere parallelarum renisus, quae extra punctum, quo cum ceteris, tum longitudinalibus, tum spiralibus aequilibrantur, exortae atque compressae vi propriae elasticitatis diastolem promovent. Interim amota diastolis tempore nervorum

compressione progredienti spiritui impedimentum solvetur, qui cum pene vacuos substantiae cordis tubulos impleverit, systoles rursus redit.

CAPUT VIII.

De motu arteriarum.

Sanguis e corde pulsus arterias ingreditur, deinde in venas, hic vero transitus non ex sola vi impulsiva cordis perficitur (b), sed ex arteriarum praecipue systolica contractione, quae muscularium fibrarum secundae earundem membranae, instar annuli arteriam cingentium, ope fit. Primo: quia tunc cum sanguis a corde pulsus in arterias dirigitur, easdem dilatat, utpote flexibiles quippe resistentiam invenit, tum residui sanguinis praeeuntis nondum egressi, ex qua progredi impotens quantitate motus a corde recepta ad latus reflectit, tum arteriae parietum, cuius diameter multo minor est diametro ventriculorum cordis; quapropter ex latiori in angustum tubum proiicitur, ita ut admonente Borello (c). Si progressivus sanguinis motus in arteriis cum motu restrictionis cordis comparetur, ille hoc triplo velocior erit, nam eodem tempore, quo motus cordis per spatium trium digitorum latitudini eiusdem ventriculorum aequale conficitur, sanguis in arteriis semipedis circiter spatium describit; Sanguinis igitur a corde expulsi impetum ex arteriarum dilatatione infringi

(a) Vide: *Exercitationes Medicae quatuor primo de motu vitali &c.* Auctore Domino de Gorter. (b) Bagliv. de Fibr. Motr. pag. 200. (c) pr. 69.

fringi necesse est, eo quia eadem arteriae tunc cum dilatantur novae illius portionis sanguinis capaces fiunt.

Secundo: extrema vasorum imprimis sanguineorum parvitas perpendenda est.

Cum sanguinei globuli diameter ad $\frac{1}{2183}$ pollicis partem extendatur, (a) supponamus extrema vasa singulos huiusmodi globulos traduentia habere diametrum ipsis globulis maiorem in proportionem sesquialtera, scilicet ut 3 : 2. (quae capacitas pro magna hic accipi potest) idcirco area maioris circuli globuli ad aream unicuiusque vasorum erit ut 4 : 9. Ergo supposita proportionem plurimum sane quam 1456. huiusmodi vasorum pollicis superficies capax erit, quae vasa si ordine parallelo extensa in quadrata pollicis superficie considerentur, saltem: 1456. in soliditate quidem plus quam 2119936. capi possunt, qui numerus admirabilis profecto est, verum tamen multo maior quantitas Microscopii ope detegi potest (b): Nam praeter sanguifera vasa minima, lymphatica quoque consideranda veniunt, quae cum proportionalia credenda sint diametris globulorum lymphaticorum, globulique lymphatici sex, vel plures ex Leeuvvenhoek. globulum serosum, sex vero serosi sanguineum globulum constituent, erit vas lymphaticum trigiesies sexies minor sanguineo descripto, quibus adde transpirantia vascula a Leeuvvenhoek. obser-

vata numero 125. mille intra granuli arenae arctissimum spatium.

Quamobrem canalium exilitas circulantī sanguini, ratione amplificatae, per quam excurrit, superficiei resistentiam auget. Tametsi arteriarum capillarium ad corporis peripheriam desinentium cavitates simul sumtae aortae cavitatem multum excedant (ut coniecit Guil. Cole.) (c) ac Jacob Keil expertus est, qui asserit proportionem summam sectionum arteriarum ab aorta immediate nascentium ad ipsius aortae diametrum eam esse, quae inter 102740. & 100000. intercedit; deinde arteriae mesentericae truncum ad suos ramos (quos 21. enumeravit) orificiorum summam ad trunci orificium se habet, ut 37418. ad 15129. Praeterea idem Keilius utriusque arteriae cruralis truncos & ramos cum Couperō cera replevit, ac dimensione facta rationem trunci ad ramos proximae esse, ait: 10000. ad 12387. ex quibus aequali posita sanguinis quantitate, quae ex aorta, ac ex minimis extremarum osculis simul sumtis praeterfluit (cui nemo est, qui inficietur) eiusdem sanguinis celeritatem multo maiorem in aorta, quam in capillaribus arteriis ad viscera, ac peripheriam corporis propagatis conicere fas est, cuius ratio ex Geometricis habetur, quemadmodum insignes viri Cartesius, & Galilaeus adnotarunt, nempe: si corpus servata forma in plures partes dividatur, in massam decrescere magis, quam superficies, (quod etiam ingeniosissi-

mus

(a) Hui. cap. 1. de natura flu. & 3. de Sol. el. str. (b) V. Leeuvvenhoek. (c) Tract. de sect. & digress. de vasor. sang. prop.

mus Bellinus (a) animadvertit) ideo gracilefcentium arteriarum superficies minus decrescere quam cavitates, proinde sanguinis massam, vel molem per ramos arteriarum fluentis ad eandem, quae per truncos multo minorem habere rationem, quam ramorum superficies ad superficiem trunci. Partes igitur sanguinis arteriarum ramos perfluentes, maioris superficiei ratione plures ineunt contactus, ac fricationes, quam in truncis, & consequenter maiorem resistantiam inveniunt, ita ut quo exiliora fiant vasa, eo fortiorem resistantiae vim superare debeant.

Tertio: docet Borellus (b) potentiam cordis seu eiusdem operationem ab operatione emboli non differre quoad effectum: ideo sicuti aqua E. G. intra tubum contenta embolo impellatur intra fistulam eidem tubo annexam, quae a circumambiente pondere omnino comprimatur, erit potentia embolum impellens ad vim resistantiae, qua aqua impulsioni resistit una cum vi, qua pondus circumpremiens dilatationem impedit, ut rectangulum sub longitudine, & latitudine fistulae repletae ad quadratum ex longitudine motus emboli in seipsam multiplicata resultans.

Praeterea ad rem nostram magis apta videtur sequens propositio 61. in qua ait: *Si fistula mollis fuerit plena aqua, sed non turgida, & a pondere incumbente, sive fasciis circumplexa resistatur dilatationi fistulae: erit potentia embolum impellens ad*

vim qua aqua praeeexistens, & de novo infusa impulsioni resistit una cum vi, qua pondus, vel fasciae dilatationi fistulae adversantur, ut rectangulum sub motu directo aquae de novo immissae, & sub dilatatione fistulae, ad quadratum ex longitudine motus emboli (c).

Tubus aqua plenus alterum cordis ventriculum repraesentat sanguinem continentem, emboli actio cordis actionem sanguinem impellentem, fistula mollis arteriam flexibilem sanguine plenam, sed non turgidam.

Ideo aliam infert propositionem nempe 62. vis motrix cordis musculum constringens ad totalem vim, qua sanguis impulsioni resistit in arteriis eandem proportionem habere, quam 1: 60.

Quae potentia cordis cum ex ipso Borello (d) sit maior 3000. librarum, sanguinis per arterias progressuri resistantiam infert esse factum ex 3000. \times 60. hoc est 180000. quae vis cordi possibilis non videtur.

Ponit idem auctor unicum vas cylindricum, ut calculum melius perficere possit, cordi annexum omnibus arteriis in unum truncum collectis veluti compositum, cuius longitudo, ac crassities, seu latitudo compensatis excessibus cum defectibus ceterorum vasorum sit prodescripta in eius Tab. (e).

Quarto: praeter vasorum imperceptibilem exilitatem perpendenda quoque

(a) De motu Bilis. (b) L. de motu animali. Idem Prop. 60. t. 17. fig. 8. (c) T. 17. fig. 9. (d) Loco citato. (e) T. 17. fig. 9.

quoque sunt eorundem figura, ac directio. Quoad primam cylindricam supponit in arteriis Borellus, cum re vera conica sit. Amplae enim in basi sunt arteriae, deinde angustiores corporis superficiem versus paulatim fiunt, quapropter earundem tunicae directo sanguinis motui magis obstando resistantiam augent.

Hanc vero multo maiorem reddit vasorum tortuosa directio in anfractus inexplicabiles desinentium, ita ut secundum Bellinum, & Cheyneum (a) resistantia liquidi exeuntis e canaliculo plicato seu quod idem sonat, imminuta velocitas liquidi sit ad velocitatem eiusdem liquidi eadem vi protrusi per rectum, ac aequalis diametri canaliculum, ut r. ad numerum plicarum, quod tamen recte determinari, nec ratione assequi, sed sola experientia doceri posse asserunt recentiores mathematici, sex plurimis circumstantiis hanc celeritatem mutare valentibus, tum ex amplitudine tubuli, tum ex eiusdem interna superficie, tum ex qualitate plicarum, deinde ex qualitate fluidi; (nam si liquidum ponatur fluidissimum, omnino falsa) ex hydraulicis (esset propositio.) Postremo quia aequales plicarum resistantiae aequalia quidem decremента virium pellentium inferant, non autem aequalia decremента velocitatum, ut Bernoullius & Michelotus admonent.

Aliud quoque argumentum solidum acconvincens adducit Borell. (b);

pulsationi cordis duo subsequi effectus, repletionem scilicet arteriarum, ac exitus eiusdem sanguinis ab iisdem arteriis, qui effectus uno eodem tempore proficisci nequeunt, quia arteriarum repletio fit dilatando, exitus vero ab arteriis fit in earundem constrictione, qui motus cum sint contrarii alternatim fiunt; ergo, cum ex impulsu cordis repleantur arteriae, ex eodem quoque evacuari nequaquam possunt.

Tandem autopsia, ac experimenta nos docent, arteriae, quae in vivo animali sanguine replentur, vel saltem multum sanguinis continent, in cadavere plerumque vacuae comperiuntur; ulterius si canis aorta prope cor ligetur, sanguis progreditur, ac in venas abit, ita ut exinanitate conspiciantur arteriae (c)

Hic sanguinis ex arteriis in venas transfluxus ex arteriarum praecipue actione (d) proficiscitur; nam cum earum fibrae sint elasticae, praesertim circulares, haec in dilatatione violenter distrahuntur, cui distractioni per vim elasticitatis contractio subsequi debet. Sanguis vero eadem contractione impulsus cum retroire nequeat, ex succedente sanguine a corde proiecto progredi, ac in venas migrare cogitur.

Qui modus exprimendi sanguinem ceteris naturae operationibus simillimus est; cibus enim deglutiri non potest, nisi circularium fibrarum oesophagi actione, qua fistula ex superiori parte ad infimam se contrahente

(a) *Theor. nova februm acutarum, & lentarum.* (b) *Prop. 75.* (c) *Anatomie d' Heister.* (d) *Cel. Svedemborgius. Oeconomia regni animalis in transactiones divisa. Refert. in actis. Lipsiae an. 1742. pag. 650.*

hente detruditur. Hoc in nonnullis experimur, qui vel fibrarum oesophagi nervearum morbosa crispatione, aut peculiari nervorum eiusdem paralyfi, amissa contractionis vi, deglutire nequeunt. Cibus in ventriculo digestus ope circularium fibrarum ipsius ventriculi expellitur. Sic feces in intestinis exprimuntur, nec non chylus per lactea vasa in thoracicum ductum, deinde in subclaviam circularium fibrarum actione ascendit, ac sursum pellitur. Quo agendi modo ad cetera fluida in visceribus separanda naturam uti censendum est.

C A P V T IX.

De secretione in genere, et primo nonnulla de glandulis in genere.

Quid veniat pro glandula hic discutendum esset, in hac enim definienda valde discrepant auctores. Quidam glandulam esse partem mollem, laxam, & fungosam; alii congeriem vasculorum omnis generis propria membrana inclusorum; alii ab usu ipsius glandulae definitionem ducunt, seu quaecumque pars secretionem peragit apud ipsos glandula est.

Tum primorum, tum secundorum minime adaequata, sed confusa est definitio, quia claram, peculiaremque glandulae notionem (a) non exhibet; tertia vero haud satis clara, quia nonnullis obnoxia difficultatibus; multae namque secretiones extra glandulas, vel sine glandulis fieri certum est. Quis nescit chylum in intestinis absque glandu-

larum ope a fecibus secerni osculisque vasorum lacteorum in villosae tunicae papillis hiantibus absorberi? Seminis quoque in testibus separatio nullo interventu glandulae completur, sic in cranii sinibus pituitosus humor, nec non in tenuissimis membranae adiposae cellulis, ubi nullae conspiciuntur glandulae pinguedo separatur.

E contra plures glandulae, vel saltem ab omnibus pro talibus habitae nihil secernere videntur. Quas inter pinealis, pituitaria, renes succenturiati, bronchiales glandulae, thyroidea, thymus, glandula oesophagi a Vesalio delineata, aliisque veteribus, ac dorsalis appellata, inguinales quoque glandulae vasis cruralibus adhaerentes, quae in multis morbis intumescunt, pluresque aliae, quorum secretio vel nulla, vel saltem dubia.

Ad confusionem vero vitandam veterum nomina immutanda non sunt, sed retinenda, ut celeberrimus Morgagnus, clarissimus Heisterus (b) merito instant.

Quaecumque igitur pars talem, tum habitum, tum carnem obtinet, qualem illae partes, quas veteres glandulas appellarunt, illam quoque partem inter glandulas enumerabimus. Quapropter ut huiusmodi partes glandulae nomine dignandae clarius, quam fieri potest innotescant, veterum glandulae considerandae sunt, quae fuerunt Pinealis, Pituitaria, Parotides, Thyroidea, Maxillares, Jugulares &c. ideo quaecumque partes his similes glandulae vocandae sunt;

D 2

notae

(a) Wolf. Logica. (b) Dissertatione de Glandulis.

notae vero quibus insigniuntur hae glandulae, ut alias partes veteribus incognitas ac glandulae nomen exigentes dignoscere possimus, perpendendae. Haec erunt primo: globulosa figura, licet irregularis, etsi contrarium sentiat Heisterus (a), qui ait: *Non ob globosam aut sphaericam figuram veteres glandulam appellasse, alias pancreas, thymum aliaque has inter non enumeravissent.* Cui difficultati occurrendum est. Pancreas, & thymum glandulas veteres appellavisse, eo quia glandularum congerie agglomeratarum, seu ex gibbosis corpusculis sola tunica inclusis constant; hinc recentiores huiusmodi glandulas conglomeratas denominarunt, has ab aliis distinguendo, quae conglobatae, seu simplices sunt.

Secundo: quia carnem, seu substantiam habent spongiosam, friabilem reliquo corpori dissimilem, plurimisque sanguiferis vasculis stipatam. Quibus notis simillimas nobis exponit Hippoc. (b) *Natura ipsis est spongiosa, sunt enim rarae et pingues, neque carnem habent reliquo corpori similem, neque aliud quid corpori simile, sed friabilem, et multis venis refertam.*

Modo examinanda esset glandulae structura, pro qua duo stant eximiorum virorum sententiae: Malpighii, & Ruyschii. Vult primus glandulam simplicem constare folliculo seu vesicula inter arteriae, & venae extremum interiecta, ex qua ductus excretorius egreditur, deinde per iteratas observationes glandularum conge-

riem in hepate detegisse asserit, immo totum hepatis parenchyma glandulosum, & lienis, renum, ac cerebri corticalem substantiam glandulosam statuit.

Asserit secundus glandulam nihil aliud esse praeter vasculorum congeriem membrana cinctam, quorum arterio-lae ductum excretorium emittant, proinde in hepate, liene, renibus ac cerebro per repetitas, ac penetrantes iniectiones, nil glandulosi, seu vesiculosi, sed tantum minimorum vasculorum congeriem in iisdem deprehendisse testatur.

Utriusque viri auctoritas, & fama plurimos traxit propriae sententiae sectatores, ita ut in duas sectas dividantur anatomici. Multas ac firmas asserere videtur Malpighius observationes, nec non eiusdem sectatores, inter quos doctissimus Boerhaavius, qui epistolam edidit titulo: *Opusculi anatomici de fabrica glandularum in corpore humano*; in qua possibilia, quae pro Malpighiana hypothese erui possunt argumenta producit. Eodem tempore altera exiit Ruyschii epistola propriam hypothesein propugnans, deinde ipse Ruyschius posterioribus litteris argumentis, ac obiectis Boerhaavianis valide respondet.

Quid ergo sentiam in hac re, scilicet qualẽ glandulae structuram, nec non praedictorum viscerum pronuntiare non auderem, quippe plures haesere clarissimi viri, inter quos celeberrimus ac immortalis famae Morgagnus (c) qui a Micheloto quaestus, sic respondit. *Movent enim me gravissimi anatomici Malpighii innu-*
merae

(a) *Ibidem* (b) *Lib de Gland.* (c) *Epist. ad Clariss. Michelotum 1718.*

merae eademque semper sibi constantes observationes. Verum una epistolarum 20, quae ad recensenda, ac edisserenda Valsalvae opera edidit, quaeque legi merentur, Malpighianam sententiam tueri videtur, nam & Valsalvae observationibus, propriisque ratiociniis possibilem vesicularem glandularum structuram ostendit, deinde obiectiones eidem opponendas refellit, ac illas a Ruyschii iniectionibus desumptas prorsus infirmat.

Ego vero tantummodo dicam; cum observationibus, ac experimentis ambo praefati viri suam hypothesein probare studeant, alterum illorum in suis observationibus deceptum fuisse censendum est, quapropter cum vere nimis fallaces nostri sensus, nec minimas, reconditasque naturae partes saepius, licet adiuvantibus microscopiis, perlustrare valeant, ratiocinii viam sequi satius erit. Vid. (a).

Considerandum igitur secretionem absque folliculorum ope contingere posse, quia revera pluribus in partibus manifeste fiunt, ut supra adduximus, videlicet in intestinis chylus, in testibus genitura, in sinibus cranii pituitosus humor, ideo cum proprium sit naturae brevioris viam sequi, seu per compendia operari, pleraeque saltem glandulae sine vesiculis, ac viscera succum aliquem secernentia eorum munus obire posse credendum est. Item secretioni supervacaneas fore has vesiculas vult Heisterus (b) qui ait: *Quando enim perpendimus,*

illud liquidum, quod folliculo, vel ductu excretorio iam haerere concipitur, cognoscimus quoque illud iam esse secretum, & non ibi demum secerni, proinde folliculum receptaculi tantum officio fungi, deinde concludit; Ergo in arteriis, & praecipue in lateralibus earundem canaliculis perfici necesse est. Cui consentit etiam Michelotus, qui lib. de separatione fluid. in corpore animali: *Ceterum convenit mihi cum eruditissimo Heistero, separationes fluidorum in animantibus, sine folliculis, sive vesiculis interiectis, & fieri posse, & revera plerisque in partibus ita fieri.*

Quapropter si adsint hae vesiculae tamquam receptacula secretorum liquidorum quemadmodum seminales vesiculae, ac vesica urinaria a natura constructa fuisse credendum est.

Quaecumque tamen sit glandulae structura, parum interest instituti nostri hoc disquirere, idcirco ad secretionum doctrinam nonnihil perpendendam me converto, nempe causam, seu modum investigando, quo ex sanguinis massa alioquin simplici, tot heterogenei succi separentur, quorum unusquisque per peculiaris viscera, glandulas, ac vasa constanter exit.

Quid multi ad id excogitarint praetereo, fermentorum enim hypothesis intra organa stagnantium, ac ingrediens liquidum commutantium a M. Hecquet (c) satis refellitur. Quemadmodum poristarum

D 3

idea,

(a) Bellin. Opusc. de bil. & Keil. de secret. animal. (b) Adenologia. (c) lib. de digestionem.

idea, qua organa fecernentia ex diversa meatuum configuratione donata, hunc vel illum succum admittant, cuius particulae meatibus congruentes, alium vero cuius dissimiles sint, repellant, haec a Domino Pitcarnio (a) insubsistens, ac improbabilis prorsus ostenditur.

Nonnulli vero putant, naturam rudimenta corporis efformando in quibuscumque secretoriis organis specificum succum collocasse, quibus appellens similis succus ex sanguinis massa facile adhaereat, ac commisceatur, cetera vero dissimilia progrediantur, cui hypothese favere videtur experimentum Bononiensis Academiae (b). Supponunt hi liquida fecernenda sanguinique innatantia eandem ac secretorum in visceribus remorantium formam nacta fuisse, quo super omittimus; verum liquidorum secretiones ex homogenearum partium cohaesione praecipue fieri, hoc est fluida, quae in organis secretoriis adsunt, ob partium similitudinem affinitatemque appellentes particulas allicere, & secum trahere, ceterasque repellere omnino suadere non possum, licet gravissimis viris haec arrideat sententia. Bernardus Connor Anglicus de secretionem animali haec habet: *Ratio cur quivis humor in sua potius glandula, quam in alia filtretur, non est quia similis est pori, ac humoris figura, sed molecule ex peculiari suorum elementorum proportionem, atque ex consimili textura sibi ipsis facilius uniri possunt* &c.

Deinde suam sententiam melius explicaturus celebre illud experimentum affert, quo oleum aqua prius affusum, ac spatula quantum fieri potest agitatum, ut intime admisceatur; si oleum ab aqua separare velimus chartae emporeticae in oleo prius immerstae porulos subibit idem oleum, ac aquam deferet; & vicissim si aquam ab oleo fecernere, emporetica charta aqua immersa, cunctas aquae particulas transmittet, ac oleum purum remanebit. Joannes Bernoullius idem sentit, ut in quibusdam epistolis legitur: *Ego vero judicarem secretionem illam in animalibus fieri ideo tantum, quia singulae glandulae tamquam filtra eo, quem fecernere debent liquore, in ipsa statim foetus conceptione imbuuntur, unde postmodum filtratio sponte ad vitae finem usque perdurabit, ob solam congruentium eiusdem liquoris particularum cohaesionem, qua fit, ut altera alteri eiusdem naturae facilius succedat, relictis illis, quae sunt liquoris heterogenei.* Doctissimus quoque Leibnizius & assentitur, & mechanicam adducit rationem (Epistola ad Mich.) nempe: *Cur liquores cognatis adhaerescant, multae esse possunt causae; atque inter alias harmonia consentientium vibrationum motuumve intestinorum; coniuncta enim similia in maius corpus, minus ab externis turbantur, cum minus habeant superficiem, et externa maxime per superficiem turbent.*

Aegre

(a) Dis. de circulatione sanguinis p. vasa minima. (b) T. 1.

Aegre itaque suadere possum; etenim bilem E. G. quocumque fluido commisceri experimur, saliva quoque, ac urina eadem bile commiscuntur, ac in icteri morbo quaecumque secretoria organa bilis ingreditur, & coinquinat.

Liquida vero, quae five glandulis, five visceribus secernuntur, eandem pene naturam, prius nancisci intra cruoris massam manifeste colligitur; nam si ex glandulis, aliisque organis secretoriis fermenta excludantur tanquam absurda, simplices meatus secretorii, licet eisdem vesiculas Malpighianas coaddamus, liquidorum naturam omnino commutare nequeunt. Praeterquam quod nos docet experientia primo in hepatis obstructione, cui Icterus saepius succedit, flavo bilis colore totam cruoris massam infici. Secundo ligatis canis emulgentibus arteriis paulo post materiam evoomit animal, quae urinam prorsus sapit.

Utriusque Phaenomeni ratio cuique constabit, si perpendat separanda liquida, E. G. bilis & urina, donec in sanguine innatant, seu antequam separentur, propriam naturam submersam ac latentem habere, quotiescunque vero, ceteris non interruptis secretionibus, haec, vel illa supprimatur; tunc suppressae bilis eiusdem proportio augebitur, seu cum ceteris fluidis multo maior erit in sanguine ratio; idcirco copiosiori, ac praevalente bile

coinquinatus sanguis ac lympham manifesta flavedine cutem inficiet.

Ut autem potior causa innotescat, ob quam secernenda liquida per peculiariora vasa, glandulas, atque organa constanter separentur, nec bilis per renes, nec per hepatis urinam unquam exeat; nonnulla consideranda sunt principia, quibus innixus etiam Dominus Antonius Michelotus suas praeclaras edidit de separatione fluidorum dissertationes.

Primo igitur considerandum: sanguinis partes, quasdam esse subtiles, alias crassiores, nonnullas viscosas, alias fluidiores, alias terreas siccas, seu salinas, alias oleosas.

Secundo: Secretorius meatus, quibusdam locis tenuiores, numerosiores, quam in aliis, ac ubique diversimode dispositos, & capillares arterias ad glandulas, vel secretoria organa spectantes, ubique abluere, non solum quoad diametrum, verum etiam quoad plicas, anfractus, ac tortuosas longitudines.

Tertio: Fluidorum motus in capillaribus vasculis tardus evadit, tum ratione resistentiae, tum maioris a corde distantiae, ideo viscosae sanguinis partes violentiam pati minime solent, & capaciores tantummodo meatus, quos facile ingredi possint, subibunt.

Quarto: Ubi plurimi arteriolarum anfractus, ac plicae, longioresque, ibi tardior fluidorum motus, ut ex Bellino, Cheyneo, (a), ac Miche-

(a) De separatione fluidorum praenotatione secunda.

Micheloto, ideo tenuioris materiae per laterales canaliculos effusio, exhalatio (a), proinde graviores salinas partes ibi magis decumbere & coacervari credendum est (b).

Horum principiorum face praeeunte secretionem mechanicam explorare, ac concipere non erit arduum.

Sit E. G. bilis quae ex sanguinis partibus salinis, oleosis, non sine phlegmate constat (c). Hunc itaque crassiorem succum, cum ceteris secretoriis vasculis angustioris diametri exclusus, ac repulsus sit, ad capaciores hepatis meatus maiori copia adire fas est, ex quo lente procedente salinae, sicuti graviores particulae, exolvuntur, ac veluti praecipitant, oleosae vero acriores fiunt; interim aquaeae, fluidioresque partes in laterales, ac subtiliores canaliculos pro maiori parte secedent; hinc pars crassior salino oleosa remanebit, quae bilem constituit. Haec bilis per ductum hepaticum (d) in vesiculam descendens, ac illuc stagnans exhalando crassior, amarior efficitur, ac profundiori flavedine tingitur, de qua Boerhaav. (e) sic habet: *Stagnando in vesica acquirere dotes bilis cysticae, forsan autem portionem amarescentem maxime fieri glandulis in membrana vesicae positis, arteriis cysticis irrigatis,*

ut in membrana meatus auditorii, quae tamen amaritudo in glandulis ipsis ex succo stagnanti, qui aqueam fluidioremque partem emittens salinas retinet, atque crassas; bilem vero salinae ac oleosae substantiae esseprehenditur, quia saponacea, ac absterfiva (f); ita ut maculis infectos maiori, quam sapo, celeritate pannos abstergat.

Seminis autem materia, praeterita animalculorum per hoc innatantium hypothese, ex sanguine, lympham, succoque nerveo constare videtur.

Arteriae feminales sanguinem ad pyramidale corpus deferentes, cum in capillaria vascula fere innumera dividantur, haec crassiorem sanguinis partem respuunt, ac tenuiorem admittunt intra testis substantiam delatura. Vasa lymphatica copiosissima lympham devehunt, nec non nervorum ramos ex rete abdominali succum, seu spiritum animale (g) intra exilissima illa vascula stillare credendum est, quibus in tubulis, seu vasculis mixtione facta semen paulatim perficitur. Haec enim mixtura cum lento admodum motu procedat, ex innumerabilibus plicis, ac anfractibus fluidorum celeritatem adeo minuentibus (h); (ex Hydraulicae legibus) quibus constant iidem tubuli, qui si explicen-

(a) Boerhaav. Oeconom. Animal. (b) Vid. dissert. secundam duarum, quae appendicis loco annectuntur operi sive libro, cuius titulus Exercitationes Anatomicae etc. Auctore Domino Lieutaud, quae refertur Act. Lipsiae an. 1743. (c) Boerhaav. Ibidem. (d) Laurentius Heisterus Compendio Anat. (e) Instit. Medicae de Oeconomia animal. p. 348. (f) Boerhaav. ibidem. (g) Vieussens Neurolog. T. 28. (h) Opusculo de Fermentis Propositione 40.

plicentur, ad tercentas ulnas florentinas extenduntur, ut animadvertit Bellinus, elastica fibrarum, vi, tum cremasteris, tum vaginalis, sed praecipue albugineae, quae testem arcte induit, robusta, ac nervorum ipsius plexus producta (a) in plures membranulas, veluti mediaстина testem dividente, (b) compingitur, fovetur, elaboratur; ita ut albescat, crassescat, ac in epididymidem eiusdem testis substantiae continuatum, vasa deferentia, ac vesiculas seminales ulterius perficiatur. (c)

Urina, quae est serum sanguinis, tenuiorem, volatilem acrioremque salem alcalino proximum continens, deinde oleum subtile, volatile, ac foetidum, terram quoque adeo tenuem, ut praedictis partibus intricata, ac subdivisa oculos effugiat, (d) cum sit fluidum, reliquo sanguine specificè gravius, vi cordis propinqua, ac valida fortiorum arteriarum elasticitate propulsum, nullo negotio urinarios renum meatus subibit; nam duorum corporum, quae eadem celeritate moveantur (ex mechanicis) maior gravioris est impetus, ideo maiorem superabit resistantiam, proinde ferrosae, sive urinosae particulae e crassiori sanguinis massa facile se extricabunt, tenuiores renum tubulos corpora pyramidalia construentes, ac rubros sanguinis globulos, utpote diametro maiores, excludentes, facile introibunt, nec non

magna celeritate secernentur, quemadmodum diurna nos docet experientia.

Quod de urinae, feminalis materiae, ac bilis mechanica separatione diximus, reliquarum prospectus nobis exhibet.

CAPVT X.

De flexilitate, duritie, ac elasticitate vasorum.

Quoniam vasa, licet admodum tenuia, ex aliis tenuioribus componuntur, quorum tunicae, seu membranae ex aliis quoque exilissimis constructae sunt, horum adeo minuta est divisio, ut Anatomes insignibus etiam microscopiis adiuta postremos divisionis terminos dignoscere nequeat.

Hic admirabilis vasorum numerus solidas nostri corporis partes tenuissimi voluminis esse demonstrat, quarum bases fibrillae sunt adeo exiles, ut nostros sensus omnino effugiant.

Quaecumque itaque vasa cum fluido repleantur a maximis usque ad minima, flexibilia esse debent, fluidae enim partes, (suapte natura) incohaerentes sunt, ac facillime mobiles, quamobrem vasorum tunicae, quae vasis minoribus secundum longitudinem, ac transverse decussantibus contexuntur, molles ac flexibiles experiuntur; hinc sequitur vasa sanguinem E. G. a corde

(a) Boerhaav. par. 646. (b) Graaf. par. 375. Schreiber.

(c) Boerhaav. par. 649. (d) Boerhaav. E

corde expulsum transmittentia, nempe arteriae, ac in earundem tunicas flexibiles irruentem expandi, ac dilatari, ex quo colligimus:

Cum sanguis sit mediocris quantitatis, ac satis fluidae naturae, mollia ac flexibilia percipiuntur vasa; maiores enim arteriae replentur quidem, sed non turgent, ideo eorum tunicae haud nimis, sed moderate distenduntur, nec vasa secundaria easdem tunicas construentia compressionem patiuntur, ex qua fluida in iis quoque retardantur.

Si sanguis vero nimis copiosus maiores, seu compositas arterias vehementer dilatando transversales eorundem tunicae fibras distrahat, ac vasa secundaria ex quibus contextuntur coarctet, ita ut in iis contenta liquida detineantur, tunc igitur duriores rigidaeque percipiuntur arteriae, quemadmodum in carpo deprehendere solemus. Eo magis vero si sanguinis globuli ex viscosioribus particulis, vel qualibet alia causa se arcte cohaerentibus componantur: ita ut parum ferositatis ac lymphae a sanguine secerentur; nam primo: huiusmodi sanguis parum fluidus densiorque lente per capillaria vasa sanguifera progreditur, ideo sanguini per vasa maiora excurrenti magis resistit, ex quo turgidae ac tensae percipiuntur ipsae arteriae. Secundo: ex lymphae inopia inania pene evadunt lymphatica vasa, quae sangui-

ferorum texturam necessario ineunt, quia vascula quascumque vasorum membranas, seu tunicas componentia usque ad minima, seu lymphatica decrescunt. Tertio: si lymphaticis ferosisque succis innata elementarium fibrarum rigiditas, ut (a) supra vidimus, addatur, haec minimorum vasculorum diametrum coarctat, ut illa congeneres succi difficulter ingrediantur, vel per illa tarde fluant, proinde citius ac facilius stagnet.

Quapropter cum solida quaecumque nostri corporis vasis constent, immo nil aliud sint praeter vasorum congeries, quae vasorum propriae sunt affectiones, solida quoque complectuntur.

Si sanguinis moles elasticis, ac resilientibus scateat globulis, ut habemus ex Leeuvvenhoeckio, elastica quoque erunt vasa, si partibus tenuissimis, volatilibus, ac elasticis abundet magnam elasticitatis vim nanciscentur nervorum tubuli, proinde tota solidorum compages elastica habebitur.

Qui huiusmodi fluida volatilia, ac elastica nacti fuerint, quae in maiori sint proportionem cum ceteris partibus, cunctis sensibus exquisite vigere fas est, expedite agere, ad iracundiam proclives, nec non alacris animi esse. Huiusmodi igitur temperamentum calidum, seu biliosum denominarunt Veteres.

Eorum vero, quorum praedictae partes volatiles feri, lymphaeque copia

(a) Cap. 2. huius.

copia coniunguntur, temperamentum calidum, & humidum appellabant. E contra, qui volatiliū, ac elasticarum partium inopes, ac moleculas rubram sanguinis partem constituentes fortiori nexu, ita cohaerentes nacti sunt, ut in serofos ac lymphaticos globulos difficiliter resolvantur, macilenti corporis habitu ut plurimum sunt, agendo tardigradi, atque cunctantes, vel perpendentes in deliberationibus se ostendunt. Quae saltem extrinsecae affectiones juxta veteres, frigidum, et siccum temperamentum exhibent.

Si vero volatiliū, ac elasticarum inopiae, aquearum ac serosarum partium colluvies coaddatur, vel praevaleat frigidum & humidum adest temperamentum.

Diversae corporis affectiones ex communi priscorum, ac recentiorum sententia diversos animi mores progignunt.

Inter antiquos Hippocrates (a) eleganter pronuntiat: *Anima eadem est in omnibus hominibus, corpus tamen uniuscuiusvis differt, anima semper sibi similis, et in maiore et minore non alteratur, neque per naturam, neque per necessitatem, corpus autem nunquam idem in ullo aliquo est, neque secundum naturam, neque ex necessitate, propterea quod passim secernatur in omnia, partim misceatur ad omnia.* Igitur unam eandemque animae incorruptibilem essentiam omnibus hominibus Co-

um senem adinuisse apparet, ideo maioris sapientiae, seu felicioris ingenii causam in hoc, quam illo homine, non animae essentiae, quae omnibus specificè similis, & eiusdem est naturae, sed ipsi corpori cui inest adscribenda est. Nam individuas tantum corporis affectiones considero, sicuti alibi Hippoc. optime ait. *Magni refert quali in corpore animi locati sunt, multa enim in corpore existunt, quae acutunt mentem, multa, quae obtundunt.* Galenus quoque (b) mores temperamentum exprimere demonstrat.

Inter recentiores Fridericus Hoffmannus (c) haec habet: *Quale temperamentum, qualis circulus sanguinis, et fluidorum in individuo, tales animi mores, inclinationes, et ingenii vires, quod corroborat Hippocratis, auctoritate, qui (d) inquit: Opinor inter omnia, quae in corpore sunt, nihil magis ad prudentiam conferre quam sanguinem, qui ergo cum in constanti habitu persistit, consistit et prudentia, sanguine vero permutato concidit etiam prudentia. Videmus id in temulentis per ebrietatem, ubi aucto repente sanguine percellitur animus, et in animo prudentia, fiunt praesentium malorum obliviosi, et futurorum bonorum spe beantur, quibus deinde addit: possem plura congerere, in quibus sanguinis permutationes animi quoque prudentiam permutant.* Et lib. (e) quo in hoc subiecto plerumque versatur, his

E 2

verbis

(a) Lib. i. de Diaet. (b) Peculiari libello. (c) Dissertatione phys. Med. XII. (d) Lib. de Flatib. (e) De Diaeta.

verbis prodit: Quando in corpore elementa temperamentum acceperunt sapientissimi sunt homines. Et sane quot mutationibus mens nostra afficitur, non solum nimio vini spirituosi haustu, quo sensus, ac intellectus obscuratur, verum etiam immoderata cibi repletionem, quae animi potentias adeo imbecilles interdum reddit, ut nec mente creare, nec recte concipere, nec ipsa voluntate uti homo valeat? Quemadmodum in acutis febribus, quae cerebri vasorum turgentiam, earumque fibrarum, ac tubulorum nimiam distractionem excitantibus, multae intellectus aberrationes illudentes, ac praeternaturales ideae, vaniloquia, ac deliria insurgunt, cui multum apte Democritus: (a) Ubi corporis habitus aegrotat, nec mens ipsa alacritatem habet ad virtutis meditationem, morbus praesens animum vehementer obscurat, & intelligentiam in consensum trahit. Item adiungit Hoffmannus, (b) Temperamentorum diversitates, animam diversimode afficere. Cholerici, inquit, qui sanguinem calidum tenuem in venis foveant, dum his celeriter per cerebri membranas circulat, disponit eius animum ad omnes celeres, praecipites, impetuosasque actiones E. G. ad iram, audaciam, impatientiam, temeritatem, rixas, vehementiam in amore, & odio, praecipitantiam in dictis, & factis seditionem, et quae sunt huius generis alia, quandocunque vero in melancholicis, sanguis crassior, spissior

per cerebri membranarum vasa impeditius, & difficilius, tardiusque procedit, in animo exsurgunt ideae cum tali specie motus, similitudinem quandam foveant, unde ipsi trepidi timidi, tristes sunt, tardi in expediendis negotiis, & in sententia dicenda perpetuo lenti, anxii, suspiciosi, diffidentes, et facile desperant de rerum successu etc. Aliter se res habet in iis corporibus, ubi fluores bene temperati fluidique blande; & sine ulla molestia, vel obstaculo fibras, & vasa pertranseunt, cerebrique sinus percurrunt. Talis sanguinis motus reddit homines securos nimia cura, angore vacuos, laetos, alacres etc. Deinde: sanguis vero nimia serositate abundans, & segniter circumvolutus pigros, somnolentos, otiosos, inertes, timidos etiam, et torpidos homines format.

Apta quidem, quae scribit Cartesius praetereunda non sunt (c). Animus adeo a temperamento et organorum corporis dispositione pendet, ut si ratio aliqua possit inveniri, quae homines sapientiores, et ingeniosiores reddat, quam hactenus fuerunt, credo illam in medicina quaeri debere. Porro diversam fluidorum copiam, & qualitatem, nec non diversum fibrarum, vasorumque tonum, varia hominum temperamenta constituere, dissimilibus inclinationibus, & affectibus animum percellere adeo verum est, ut in singulis subiectis sola aetatis mutatione experimur. Pueri enim otio, et negligentiae indulgent, ineptiis gaudent, dulcibus de-

(a) Epistola ad Hippoc. (b) loco citato. (c) Dissertatione de Methodo 3. 6.

delectantur; propterea quia istorum sanguis sero, lymphaque abundat, fibrae laxiores, vasorumque tonus et fluidorum copia, & fluiditate inbecillior.

In adultis vero ac maturis hominibus firmiores adsunt fibrae, crassior sanguinis compages, validiorque fluida impellendi vis. Quapropter hi diligentes, operosi, honorum cupidi, constantes esse solent, ingenio, mente, ceterisque animae potentiis perfruuntur.

Tandem senes ob tardiore sanguinis circuitum, tum ex crassiori fluidorum compage, tum ex nimia fibrarum duritie, vasorumque parum oscillantium rigiditate, somnum difficilius inire possunt; timore & avaritia facileprehenduntur, voluptates contemnunt, fastidiuntque maturo praediti iudicio.

Itaque concludendum restat cum doctissimo Hoffmanno, (a) liquidorum ac solidorum in corpore affectiones haud passive se tantum gerere respectu animae, ut ab earundem laesionibus semper absit, tutaque sit. Illae enim non solum corporis habitum, verum etiam mores alterare possunt, qui licet ab animae potestate pendeant, ipsa enim passionibus dominatur, tamen naturalibus propensionibus temperamento oriundis saepe obrui, ac pessundari contingit. De quo apprimè Malebranchius (b) qui animae passiones ab eiusdem naturalibus inclinationibus distinguit, il-

las nempe a corporis motionibus excitari, has vero a naturali affectu, quo ens supremum, summumque bonum anima prosequitur.

CAPUT XI.

De Nutritione.

Nostrum corpus praeter sensibiles evacuationes tenuiorem, volatiliemque materiam emittit, tum per cutis poros, (c) tum respirationis halitu per pulmones; tantaque tenuioris materiae est exhalatio, ut cum sensibilibus evacuationibus comparata multo maiorem habeat rationem.

Haec transpiratio non solum quibuscunque animantibus communis, verum etiam vegetabilibus, sicuti cuilibet corpori, quod partes fluidas contineat, exhalatio.

Eo maior vero in animantibus huius materiae subtilioris emissio per corporis superficiem contingit, quia fluida perenni gaudent motu, tum ex cordis momento, a quo proiciuntur, tum ex arteriarum constrictione, quia divisa, attrita, ac comminuta etiam per vasa minima progredi conantur.

Interdum accelerato fluidorum motu, ut ex laboribus, aestivo calore, cursu, vel ardentibus febribus evenit, crassiores quoque nempe ferrosae particulae per cutis meatus emittuntur, quia eadem secretoria vascula (d) ab arteriis subcutaneis

E 3

neis

(a) *Ibidem.* (b) *Livre cinquieme. Chapitre pr. T. II.* (c) *V. Santorii static.* (d) *Eustachius T. 22. 25.*

neis oriunda fluidorum impetu nimis dilatata crassiores feri moleculas, eorumque diametrum naturalem excedentes sudoris forma transmittunt (a), quarum plurima observavit Leeuwenhoeck adeo exilia, ut 125000. in unius fabuli vulgaris grano hiare supputet. Haud tamen inficior peculiaria sudoris vascula, siue organa adesse, glandulae scilicet miliares dictae, (b) quarum excretorii ductus per reticularis corporis foramina assurgentes patenti orificio sudorem eructant, quo valvula sub cuticula posita cava, orbiculari, ac ita elevabili (c) transmitti, & coerceri potest.

Praedictae itaque evacuationes tum insensibiles, cuiusmodi sunt cutaneae transpirationes, pulmonum halitus, tum sensibiles crassioresque, ut alvi feces, urinae, aliaeque minoris voluminis, vasa animalis ad interitum paulatim inanirent, nisi cibo potuque evacuationum reparatio a natura instituta fuisset.

Quotiescunque igitur vasa tum sanguifera, tum lymphatica, vel cuiuscumque generis propriam naturalemque fluidi quantitatem servant, corpus nutriri observamus, quare simplex corporis nutritio nihil aliud erit, quam vasorum cuiuscumque generis repletio, ac eorum, quae per evacuationes dissipantur, restitutio.

Dices, per vasorum repletionem solidarum partium vasa efformantium

nutritio non expletur, nec concipi potest.

Respondeo, ex dictis (d) satis constat, solida nostri corporis cum liquidis comparata, valde exigua, ac tenuia esse (e).

Quapropter licet concedam solidas particulas aliquando assiduo fluidorum motu deteri posse, tamen alias aliisque novas succedere per nutritionis opus mihi suadere nequaquam possum; nam hae solidae novaeque particulae, vel postquam cohaeserint, ac consolidatae fuerint avelluntur, vel ante cohaesionem, fluidorum mole pertranseunte, evelluntur; hoc quidem juxta motus leges contingere debet, sed antequam cohaereat pars, inter solidas non est enumeranda; illud vero non impossibile, sed rarum, alioquin, si solidae partes assidue renovarentur, nos nunquam prehenderet senectus, propterea quia flexibilitatem, ac elasticitatem frequenti instaurazione, seu renovatione, nunquam amitterent fibrae, in cuius amissione senectus consistit. Praeterea maculas pyrii pulveris accensione quaslibet supra corporis partes impressas fere nusquam evanescere, sed etiam si longaeva sit vita, corrupto post mortem, ac fatiscente corpore tantummodo extingui, ac deficere saepe observamus.

Solidas igitur partes renovari falsum esse evicimus, quia solidae partes evaporationi obnoxiae minime sunt;

(a) Boerb. Instit. M. p. 420. (b) Malpigh. observat. (c) Boerb. ibid. p. 424. (d) Cap. X. hui. (e) Boerb. ibid. p. 440. Heist. Anatomie.

sunt ; quare sola vasorum repletio nutritionem praestat, quod ex variis nostri corporis phaenomenis deprehendere nobis occurrit.

Qui E. G. fibrarum mollitie, ac laxitate donantur pingues fieri necesse est ; vasorum enim praecipue extremorum tunicae magis dilatantur, ac fluentium liquidorum vi, facilius cedunt, cui dilatationi, cum aequalis vasorum constrictio non sequatur, sed proportionem inferior, minor quoque materiae transpirabilis impetus, proinde maior oleosae substantiae portio exhalationis defectu retinebitur, quae adiposae membranae cellulas implebit ; secus vero qui fibras rigidas, vel summo gradu elasticas nacti sunt, macri corporis observantur, quia vasorum tunicae, vel parum dilatantur, utpote parum flexibiles, vel dilatatae ad fluida expellenda elastica vi pollent, idcirco maior erit transpirabilis materiae exhalatio, necnon substantiae oleosae consumptio, ob quam membranam adiposam exhausti fas est.

Qui motu excedente gravibusque laboribus se exercent, sicci corporis habitus esse solent, motus enim, vel labor eo magis, si praeter modum suscipiatur, solidorum vim, fluidorum celeritatem atque impetum auget, ex quo parum substantiae oleosae membranae adiposae cellulas inibit, paululumque his immorabitur, quia musculorum actione in vasa compellitur eadem substantia, frequentiori vasorum constrictione attenuatur, volatiliior redditur, ac per cutis poros facilius emittitur.

Similis hectica febre laborantium casus, in qua ex accelerato fluidorum motu nimium attritis eorundem moleculis, aucto calore, nutritius succus per cutaneos meatus traductus exhalabit, unde macies totius corporis.

Modus vero, quo crescit corpus ab embione usque ad foetus maturitatem, ab ortu usque ad totalem ipsius corporis magnitudinem, conceptu difficilior videtur.

Plerique autumant corporis incrementum per partium additionem fieri, fluidorum scilicet moleculae lymphaticae, praecipue natura oleosae, seu ramosae magna superficie donatae (a), solidorum interstitiis facile adhaerentes, quibus accedunt aliae terreae, quae solidorum elementa sunt, seu fibras construere videntur. Haec igitur moleculae, inquiunt (b), in vacua spatiola fibrillarum distractione facta, circulationis impetu intrusae, eadem instar cunei dilatant, quibus aliae succedentes appulsae fibrarum, vasorumque dimensiones augent ; quam hypothese nonnulli aspernantur, inter quos supra laudatus auctor Gallus, qui hanc esse solum imaginationis opus, ac decipiente mechanica niti, ait, ideo admiratione captus pergit, quomodo fibrae tum longitudinales, tum transversae ita distrahi poterunt, ut a se invicem recedant, ac separentur, nec non molles particulas vi cordis impulsas intra finem factum recipiant ? Quomodo adhaerescant usque quo durescant,

(a) *Anatomic d' Heister.* (b) *Boerh. Instit. M.*

rescant, nec interim fluidorum perfluentium colluvie deterantur? Quapropter vult incrementi opus haud perfici posse, nisi vasculorum prius complicatorum, clausorumque extricatione, ac repletionem, cuncta scilicet vasa, seu vasorum ramos, qui in adulto homine, etiamsi procerae altitudinis, inveniuntur, in eiusdem corpore primo conceptionis tempore, quo embrio nondum conspicua propriae speciei lineamenta assumferat, iam adessent, horumque successivam extricationem, ac repletionem corporis dimensiones augere. Admirabile gestantis uteri exemplum affert, quo ipse uterus in virgine, vel muliere nondum foecunda ovi columbini magnitudinem vix superans, post conceptionem mirum in modum augeat, & nonimestrem foetum, haud raro duplicem, quandoque etiam triplicem continere valeat, deinde post foetuum expulsionem ad primum quasi volumen cito redeat.

Elegans profecto speciosaque nutritionis, seu incrementi corporis idea, indissolubilibus tamen obnoxia difficultatibus; nam si cunctos vasorum ramos, quos in adultis conspiciamus, infantibus, foetibusque naturam impertiretur, iisdem fibrillis, seu iisdem solidis particulis, aequalis in utrisque esset solidorum massa, immo habita proportione ad molem corporis, indefinite maior, in his, quam in illis esset, ac tota incrementi moles, quam ab embrionis tempore usque ad iuventutis annos

assequitur nostrum corpus, in fluidis vasa extricantibus, ac replentibus consisteret; foetus vero, quorum vasa angustissimi diametri, adeo crassis tamen tunicis constarent, ut fluidorum molem solida procul dubio excelleret, quapropter solidorum in embrione ad fluida ratio indefinite maior esset, quam in adultis, quod falsum esse nemo est qui inficietur; nam embrionum mollior est textura, quam maturi foetus, foetus vero mollior, quam infantis, sicuti tenerior minusque consistens habitus corporis in infante, quam in adulto, & sic de ceteris aetatis gradibus usque ad senectutem, in qua partium corporis durities omnium maxima, quae a fluidorum inopia solidorumque coarctatione originem ducit, quemadmodum ex adverso mollities corporis in fluidorum copia vasa replentium, ac membranarum eadem vasa construentium tenuitate consistit.

Haec vasorum extricatio ad incrementum corporis confluere non inficior, quippe validum nobis exhibet argumentum praefata uteri observatio, qui nempe, ante conceptionem nostratis nucis magnitudinem vix aequans, post conceptionem mirum in modum expanditur, ut supra indicavimus, priori servata crassitie, deinde in parvam, pristinamque circiter molem redigitur: istud vero ut concederem, non illud profecto daturus essem: sine partium additione, seu absque succi nutritii cohaesione incrementum fieri.

Quamvis

Quamvis uterus ad continendum foetum insignem acquirat magnitudinem sola mediante vasorum expansione, quod crescente foetu, ac in uteri parietes undique nitente contingit, quia carnei, ac tendinei plexus vasa prius coarctantes paulatim extenduntur, vasorum diametri capaciores fiunt, ac appellentibus fluidis facilius cedunt, proinde maiori fluidorum copia admissa uteri cavitas absque parietum extenuatione dilatatur. Emisso vero foetu, adeoque interno cessante nisu, tendinei uteri plexus propria elasticitate, ac innata contrahendi vi rursus coarctantur, vasorumque diametri necessario constringuntur, proinde uterus ad pristinam ferme parvitatem, immixta fluidorum mole, viscerum imi ventris pondere nonnihil adiuuante, ac eiusdem muscutorum praecipue obliquorum ascendentium, descendendum, ac transversalium elastica vi valde comprimente restituitur.

Diversimode vero in nutritione, seu corporis incremento res se habet. Nullo sane modo ossium constructio absque partium alibilium additione ac adhaesione haberetur, nec unquam eorundem ossium accretionem sola vasculorum extricatione, ac expansione contingeret.

Ossium enim laminae nec durescere, nec firmam texturam assequi possent, nisi glutinosa substantia per arteriolas externo perioestio oriundas laminarum poros subiens (a) ibi con-

cresceret, cui arteriarum perennis compressio accedens, fibrae osseae extenduntur, proinde ossium crassities, ac longitudo augefcit (b).

Pilorum quoque elongatio absque succi nutritii additione, five cohaesione non haberetur, qui cum vasculis, porulisque constant, (c) nutritium eundem succum papillis nervis emissum suscipiunt, cuius particulae volatiliores advolant, crassiores vero aliae aliis apponuntur, & coalescunt, ideo capillorum elongatio paulatim fiet: servatur tamen tubulorum cavitas, sine qua nutritius succus permeare non posset, (d) quia eadem particulae summitatem attingentes, aliis a tergo succedentibus, per eorundem tubulorum axem pulsae vi adhaesionis extremis pilorum lateribus, seu limbis superinsident, atque agglutinantur.

Dices: fortasse intra folliculum five bulbum pilorum tubulos complicatos, ac ad talem longitudinem explicabiles, quemadmodum cunctos vasorum ramos in embrione, ac in semine totam plantarum licet procerae magnitudinis texturam contineri.

Respondeo: pili, postquam recisi fuerint, ad priorem longitudinem extenduntur, ac quoties recidunt, toties crescere non desinunt. Arbores quoque amputatis antiquioribus ramis novos emittunt; quae amputatio, si quolibet anno opportuno tempore perficiatur, eorundem ramorum

(a) *Anatomie d' Heister.* (b) *Clopton Havers.* (c) *Ruyfch. Leeuwenhoeck. Bidlous.* (d) *Boerhaav. Inst. Med.*

morum productio renovatur; ergo, tum in corpore humano, tum in vegetabilibus per solam partium nutritii succi appositionem accretionem fieri posse evincitur. Vasorum tamen congeriem, quam miro ordine in nostro corpore naturae Auctor disposuit, quaeque viscera, musculos, ossa, & cunctas totius corporis partes constituit, nec sola partium nutritii succi appositione, nec sola eorundem explicatione, ac dilatatione, sed ab utraque fieri colligitur.

Revera, ut mechanicus accretionis modus clarius percipiatur, praedicti vasorum ordinis (a) reminisci oportet.

Primo: Arteria magna, seu aorta, quae a corde incipiens omnium maxima in ramos numero indefinitos dividitur, qui sensim angustiores fiunt, ut unicum sanguinis globulum admittant, deinde in tenuiores abeunt, qui serum, ac rursus in alios, qui tantummodo lympham devehunt (b).

Secundo: eadem arteria aorta plurimis arteriolaris secundi ordinis per longitudinem, ac latitudinem excurrentibus, ac se mutuo decussantibus constructur, hi vero ex aliis tertii ordinis, & sic de singulis usque ad tenuissimas lymphaticas arteriolas. Itaque sanguis in embryone corde pulsus in aortae tunicas incidens easdem dilatat, cui dilatationi, licet per rensum constrictione sequatur, nihilo tamen minus

praevallet dilatatio, qua vascula secundi, vel tertii ordinis, quae veluti fibrae easdem aortae tunicas contexunt, exiliora admodum, flexibilia, ac languidiori elasticitate pollent, ex adhuc aquea glutinis natura elementares particulas in fibrillas imbecilliter colligante, tum maxime ex tenuiori sanguinis compage eadem vascula perfluente. Quolibet igitur cordis ictu repetitis aortae dilatationibus, minora quoque ac secundaria vasa, aortae tunicas construentia, distrahuntur, proinde maiori sanguinis quantitate sensim capaciores fiunt. Arteriolarum quoque secundi ordinis sanguine turgidae, cum distendantur, tertii ordinis vascula distrahunt, ita ut ipsae quoque dilatentur, maioremque fluidi portionem admittant. Arteriolarum tandem quarti ordinis, five minimae unicum sanguinis globulum traducunt eandem distensionem passae serosas dilatant, serosae vero lymphaticas, ideo a maximo usque ad minimum, humani corporis vasa fluidorum appulsui dilatantur, & vicissim a minimarum dilatatione maxima incrementum accipiunt. Vasa enim minima maiorum tunicas contextentia, partim secundum longitudinem diriguntur, eorumque axibus parallela sunt, partim secundum latitudinem eadem cingunt.

Priora igitur, cum fluidorum pulsu paulatim expanduntur, propriis axibus a se invicem recedunt, maioresque

(a) Cap. 2. huius. (b) Schreiber.

ioresque arterias dilatant, posteriora vero, nempe transversalia, eandem expansionem ineuntes ipsarum maiorum arteriarum tubos extendunt, atque elongant.

Concepto expansionis modo, ex quo corporis mensurae augentur, nutritii quoque succi partium additio necessario admittitur.

Vas minimum supponamus, simplicem, nullisque vasis, sed solis fibrillis, solaque elementari membrana in orbem ducta constans; istius vasis dilatatio, quae a conceptionis tempore usque ad accretionis terminum mirum in modum augetur, absque insigni fibrillarum elongatione fieri nequit, at fibrillae tam enormi elongatione capaces minime essent, sed disrumperentur, nisi fluidi particulae apponerentur, vel interponerentur; ergo humani corporis incrementum haud sola vasculorum dilatatione, verum, & fluidarum partium additione perficitur.

His praemissis colligitur, primo, sanguinem in embrione, cui in plurimas arteriolas ingressus prohibebatur, serosarum nempe, ac lymphaticarum, crescente foetu, ac in lucem edito, aucta corporis vasorumque magnitudine, multa quoque eorum permeare, quae prius serum, vel lympham tantummodo admittebant, ita ut serosae arteriolarum sanguineae evadant, lymphaticae vero sanguineis propiores, serosae, ex quibus rursus deducitur.

Secundo, vasis serosis, & lymphaticis, proinde sero, & lymphae infantes, ac pueros magis abundare, quam adulti, quod experientia nos docet; in sanguine enim puerorum vase collecto pars crassior copiosiori sero innatat, ac minorem cum eodem rationem habet, quam in adultis, color peralbus, carniarum mollietates id quoque comprobant.

Tertio, vasa lymphatica tenuissima, per quae tenuior lymphae pars transfluit, cum ad summum dilatationis gradum pervenerint; crassiores quoque, ac glutinosas eiusdem lymphae particulas admittunt, ex quibus paulatim cohaerentibus firmiorem tonum accipiunt, ceterorumque maiorum parietes, quas construunt, duriores reddunt ac firmant, verumtamen, cum glutinosarum partium cohaesio quotidie augeatur, vasculorum, seu fibrillarum durities eo maior evadit, quapropter, aucta impellenti cordi resistentia, simplices membranae vascula construentes non amplius distrahuntur, nec ipsa vasa, sive minima, sive maiora ulterius augeantur, proinde accretio sistitur, vigetque corpus, ut in iuventute ac virilitate; sed praedicta vasa minima glutinosae lymphae particulis sibi mutuo cohaerentibus paulatim obturantur, ac solidescunt, ideoque interclusa eorundem vasculorum nutritione partes exsiccantur, & hic est casus senectutis, quam mors consequitur.

CAPUT XII.

De salinis particulis humani corporis fluida afficientibus, ac nonnulla de partibus essentialibus sanguinem, ac cetera liquida componentibus.

Salinas particulas humani corporis fluidis inesse neminem latere arbitror, quod evincitur, tum ex alimentis salia continentibus, quibus vescimur, tum ex secretionum materia, sive fecibus, sive urina, saliva, narium muco, cerumine, bile praesertim fellea, ceterisque in quibus salinae particulae manifeste percipiuntur, tum ex sanguinis chymica analysi, nec non ipsorum animalium combustionem, ex quibus salium copia funditur.

Quodnam vero salium genus sanguini ceterisque fluidis permisceatur, acidum nempe, vel alkali, pro quibus innumerae ortae fuerunt disputationes, inquirendum est, quod ex sequentibus facile deducetur.

Urina per artem chymicam examinata quadruplicem substantiam exhibet. Primo: aquam simplicem insipidam. Secundo: salem, cuius pars maior tenuis ac volatilis, (a) minor vero fixa (b). Sal urinae nec acidus, nec alkalicus, sed ammoniacalis est, quia sal ammoniacalis inter sales neutros enumeratur (c). Sal urinae ignis vi facile alkalinus

evadit; Sal eiusdem fixus marini, ac muriatici salis, quo incessanter utimur, naturam sapit, ex alimentis ac potibus tamen, qui acidis, nitrosis, ac vitriolicis abundant, huiusmodi quoque salibus inficitur urina; quare nonnulli salem urinae naturalem, sive essentialem acido proximum experti fuerunt (d), quia cum aliis urinae salibus vehementi igne elicitis effervescebat, quemadmodum cum oculis cancerorum, creta aliisque alkalinis plurimis, minime vero cum acidis, etiam si fortissimis. Tertio: oleum valde volatile corruptioni obnoxium. Quarto: terram, quae ex praedictis substantiis ac jugi circulationis motu attenuatur.

Bilis quoque nonnihil salis continet, ita ut quidam auctores (e) eam definiant: salinam sanguinis materiam ac oleosam non sine aliqua phlegmatis portione. Sales vero bilis, nec acidi, nec alkalici naturam sapiunt; asserant quidquid volunt, van Helmontius de Graaf, & Sylvius, qui suam opinionem de alkali bilis cum acido succi pancreatici fulcturi, salem bilis alkalicum praedicant, illo praecipue innixi experimento, quo syrupum violarum extracto bilis affuso viridem colorem assequatur. Veruntamen hoc parum comprobat, quia ex acidularum aquarum affusione idem contingit, nec acidus quoque habendus est,

(a) Bellini Exper. (b) Tract. 1. Cap. 29. de Urina Verheyen. (c) Hoffmann Diff. Salium gener. Boerhaav. Chymia. Guglielm. de Salib. (d) Verheyen. ibid. (e) Anatomie d' Heister.

est, quia bilis extractum cum alkalico minime effervesceat, sed neutris salibus constat, sicuti cetera humani corporis fluida.

Bilis vero proprietates haec sunt: prima saponacea est substantiae, quod deducitur: quia maculas facilius abstergit, quam sapo, quia materias, quibus inest optime commiscet. E. G. oleum, qui aquae non commiscetur, addito sapone, vel bile, sal aqua conjungitur, deinde olei, & aquae commixtio perficitur. Secunda: bilis oleosa materia qua constat nimis acriores particulas amplexens retundit; docet enim Chymia, sales alkalicos, quo magis oleosa portione igne mediante nudentur, acriores causticosque fieri, addito oleo eorum acrimonia minuitur. Tertia: nervosam intestinorum membranam vellicat, lympham depromit, ac eorundem cavitationem lubricat, quod ex icteritiae effectibus manifeste evincitur; icterus enim alvi ficcitate ut plurimum coniungitur, quia bilis separatione suppressa, ac prohibito eiusdem ad intestina descensu fecibus vehiculum deficit. Quarta: resinosa esse, quia evaporato phlegmate, atque exsiccata, veluti pix inflammabilis evadit. Quinta: concretioni facile obnoxiam esse, ut vel tenuissimo existente calculo intra vesiculam felleam eidem cohaerere, ac lapideam molem paulatim construere; quoniam bilis in vesicula diutius retenta viscosa admodum evadit, si forte

ficca, licet minima adsit particula, veluti arenosa, haec basis calculi evadit.

Plures experti fuerunt, velleris, gossypii, aut sericum, vel quodcumque solidi corporis frustulum canis vesicae felleae inditum viscosae particulae illud circumambientes in verum lapidem coire. Hic vero lapis, sive calculus combustibilis est, ac urinario multo levius, ille enim aquae innatat, ac igni comburitur, hic vero submergitur, nec flammam concipit.

Succus Pancreaticus parum vel nihil continet materiae salinae, cuius qualitas ac quantitas, cum eiusdem succi inopia per chymicas operationes explorari nequeat, solo gustus organo libare hucusque potuerunt, quare plerique saltem recentiorum pro insipido habuerunt, qui talis mihi quoque visus fuit; sique nullo sapore donatum velis falsum dicerem. Quam deceptum itaque fuisse Sylvium, qui inter hunc, & bilem insignem effervescentiae motum ad chyli separationem, nec non attenuationem, & ulteriorem digestionem, ac cunctos fere morbos ex vitiosa horum miscella oriundos autumat, plane videtur.

Graafius qui in eadem est sententia, ait (a). *succum pancreaticum quandoque acidum, aliquando insipidum, nonnunquam austerum, saepius salsum, saepissime acido salsum offendimus*; sed ut praedictam effervescentiam melius probet, nonnulla Lau-

(a) In Tractatu de succo Pancre.

rentii Schuylii affert experimenta, qui primo in cane vivente succi pancreatici portionem hausit, atque collegit, quem acido austerum non solum gustu percepit, verum ex lactis coagulo, qui post huius succi permixtionem contingit, ita ut caseus efformatus fuerit. Secundo: Canis viventis intestinum duodenum prope ventriculum, & infra pancreatici orificii insertionem vinculo ligavit, ac post trium horarum spatium idem intestinum vinculis interceptum vehementer tumuit; Ex quo aperto, inquit, cum humore quodam eo contento flatus cum strepitu et crepitu, vapores, exhalationesque proruperunt; unde acris quidam foetor nares omnium feriebat, manifesto argumento non modo eo profuixisse tantam copiam bilis atque succi pancreatici, sed etiam in iis effervescentiam fuisse excitatam, non mediocrem tantum et blandam, qualis sine vinculis contingit, sed &c. Quod experimentum eodem cum eventu repetiit, ideo concludit: ne ipsa quidem impudentia de illius effervescentiae veritate dubitare possit.

Ad primum experimentum respondemus, fallax quidem esse, quia succi pancreatici aciditas, si unquam percipiatur, vel a stagnatione eiusdem succi, vel pressionis violentia originem ducit, sicuti Auctor ille Gallus (a) acriter contendit his verbis: *Ce suc est presque insipide, & s'il a quelque gout, c'est un gout salé, quelque experien-*

ce, qu' on fasse on ne trouve pas, qu' il soit alkalin, ou acide, les expériences, qui semblent prouver son acidité ne sont faites, que sur un suc, qui n' est pas recent, & qui est exprimé avec violence. Brunnerus antequam canis succum pancreaticum libaret, eius ductum per plures septimanas vinculo constrinxit, idcirco saporis non insipidi ex eiusdem stagnatione invenit. Verheyenius (b) in vacca pinguefacta ac pro usu eius familiae inactata, succi pancreatici portionem falsi potius saporis, quam acidi collegit, quae tamen falsedo, nisi ex diuturna stagnatione processisset, ut in praedicto Brunneri experimento, ex nimia fane contrectatione, ac compressione ortum duxerit, ut ipse fatetur his verbis: *Pancreas agitavi, ac compressi procedendo a parte tenuiori versus intestinum.*

Veruntamen aliqualem licet aciditatem concederemus in succo pancreatico, quomodo cum bile, quae alkalica non est, ut nuper vidimus, effervescentiam suscitare potis erit?

Secundo vero experimento, quo in intestino ligato fermentationem secutam fuisse arbitrantur Schuylius, & Graafius, decepti fuerunt, nam distentio, & tumescencia illa ex qua inde aperto intestino flatus cum strepitu, & crepitu proruperunt, non sine foetidis exhalationibus nares ferientibus, non a fermentatione ortum duxerunt, sed ab insigni aeris rarefactione, qui tanta

ta

(a) Anatomie d' Heister. (b) Tract. 1. Cap. 18. de succ. Pancr.

ta copia in eadem bile continetur. (a) Eiusdem aeris molecule viscerum calore rarefactae ab oleosa bilis substantia extricantur, & coeunt, auctaque tum mole tum elaterii vi intestini tunicas distendunt; huic adde horribiles convulsiones, quae in enormi animalis cruciatu excitantur, quaeque aeri sese expandenti contrahendo per aperturam vix factam eundem explodunt. Huius phaenomeni explicatio, an sit vera aliud Verheyenii (b) experimentum evidenter demonstrat, cuius auctoris verba sunt: *Siquidem in cuniculo, de quo paulo superius inveni humorem biliosum in intestinis rarefactum atque spumofum quodquidem statim imputavi illius effervescentiae ex congressu bilis cum succo pancreatico, licet ante, dum experimentum aggrediebar, de illa non cogitasset, verum rem penitus examinando adverti ductum pancreaticum implantari intestino longe infra ligaturam infimam, sive a ventriculo remotiorem, adeoque succum pancreaticum non potuisse infundi in partem intestini ligaturis interceptam, ac proinde nec misceri bili ibidem esistenti.*

Saliva nonnihil salis continet non volatilis, sed fixi. Celebris Drelincurtius ex salivae unciiis 20. salis fixi drachmas duas collegit, Verheyenius ex unciiis 8. drachmam feminis tantummodo salis fixi eduxit, quae inaequalitas, vel a subiecti diversitate, prout sani, vel infirmi,

vel a filtrationibus, ac transfusionibus plus, vel minus repetitis, quae ut purus exeat idem sal necessariae sunt.

Saliva aqueo liquori imprimis, deinde oleoso, mediante sale commixtis, plurimisque tenuissimis arteriolis, ac meatibus comminuta, atque attrita, paucaeque tandem materiae terrestri constat, quare saponaceae est naturae, quemadmodum praeter chymicas analyses naturalibus observationibus deprehendimus. Primo: salivam igne non concrecere, nec condensari, quia oleosae partes minutim divisae, ac attritae rarefaciente ignis calore leviores factae facile attolluntur, ac per aerem dissipantur, quod lymphae non contingit, cuius partes oleosae crassiores notabilem in fundo vasis concretionem relinquunt. Secundo: spumosa, ac bullas edens, quia cum oleosas habeat partes nonnihil viscositatis retinet, qua aeris particulae cohibentur, quae vero coeunt, ac se expedire conantes bullas ac spumam efficiunt. Tertio: saliva sani hominis nullum saporem affert gustui, quia sales intra oleosam, ac terream materiam absorbentur. In iis vero, qui morbo detinentur E. G. febre, praeternaturalis calor salium alkalizationem, sive acrimoniam promovet, idcirco varii ac depravati saporis capax redditur. Quapropter fallere possunt coniecturae, quae chymicarum operationum effectibus nituntur, hoc est

(a) Cap. 4. huius. (b) Tract. 1. Cap. XVIII.

est salium qualitates, qui vi ignis extrahuntur. Quarto: salivam hominis jeiuni deterisivam experimur; nam tunc purior est, quae cum saponaceae sit naturae saponis quoque effectus reddere, naturae consentaneum est. Quinto: saliva microscopio inspecta ramosas quasdam particulas in aqua natantes nobis exhibet; quae oleosam eiusdem substantiam constituunt.

Lacti quoque salis portio non dest. Verheyenius (a) ex lactis libra, chymia mediante, materiae durae, ac mediocriter siccae drachmas X, ex qua igne reverberii salis fixi non volatilis paulo plus scrupuli unius extrahit, terrae circiter drachmam semis, reliquum vero partim in oleum crassum, partim in spiritum, ac phlegma oleo densiori impraegnatum; Auctor tamen Galus (b) prae laudatus multo copiosiore salis quantitatem lactis analysi absque igne instituta, sola videlicet coaguli ac filtrationum ope extrahit: videlicet ex lactis libris tribus salis uncias 2. & $\frac{1}{2}$, quem nec acidum, nec alkalicum, sed neutrum invenit. Alkalicus vero, vel acidus sal, quem nonnulli in lactis analysi per chymiam extraxisse credunt, ignis assequitur, primus nempe ex siccae materiae calcinatione, sicuti nitrosi sales herbarum, vel alumen, cum sulphurea materia calcinantur, alkalici evadunt; secundus vero ignis saltem calore exprimitur. Haud equidem inficior

sales acidos, atque alkalicos lactis substantiae inesse, quod ex acrimonia infertur, quae, si per aliquod temporis spatium idem lac servetur, palatum afficit; nam acidae particulae oleosis atque alkalinis nondum coniunctae secernuntur, eorumque spiculis linguam ferunt. E contra, si idem lac in humano corpore summo gradu calefiat, flavescit, acris evadit, alkalinam qualitatem assequitur. Uterque igitur sal, acidus, & alkalinus per alimenta, quibus inferitur lactis substantiam conficientia init; haec tamen salium commixtio, oleosa praesertim interposita substantia nil praeter neutrum salem constituit.

Lactis microscopio inspecti natura (c) est globulorum congeries diaphano liquore innatantium sanguineis globulis dissimilium ratione inaequalis magnitudinis, qua inter se differunt, ac irregularis figurae, quae ad sphaericam accedit.

Materia vero multiplici constat lac, aquosa scilicet, pingui & oleosa, quae partim levior minusque glutinosa cremorem, seu butyrum constituit, partim gravior, ac tenax caseum efficit, denique salina, ac terrea.

Expenis praestantioribus succis a sanguine secretis, eiusdem sanguinis natura melius investigari posset, supra quam nonnullas, praesertim per microscopium institutas observationes, (d) attulimus, modo eiusdem partium componentium genus

ex

(a) *Tract. 1. Cap. XIII.* (b) *Anatom. d' Heister p. 325.* (c) *Ex Leenuvvenhoek.* (d) *Cap. 1. huius.*

ex peculiari per chymiam examine referimus.

Ex Roberti Boylei itaque experimentis, nec non ingeniosissimi Guglielmini (a) allatis colligitur: sanguinem esse fluidum, ex quo Chymiae ope extrahuntur, primo: sales diversae figurae & naturae, qui neutri appellantur, quorum plerique fixi, quidam volatiles, qui vero, sicuti et spiritus, licet ab eodem hauriantur, hos tamen ingenitos esse minime probatur, sed potius tanquam ignis effectus, qui sales volatilizat partes comminuendo, ut ipse Guglielminus avertit (b), qui haec habet: *Licet a sanguine, et sal volatilis, et spiritus hauriatur, non idcirco tamen eius praesistentia satis evincitur, cum in sale status volatilitatis a partium comminutione, et cum sulphuris laxiori combinatione resultet, quod uni ignis energiae saepius deberi &c.*

Diversa salium genera in sanguine deteguntur, etiam nullo ignis interventu; nam si vitrum sero infundatur, ac madefactum exsiccet, diversorum salium ramenta in eius superficie perspicientur, ut a celeberrimis Malpighio, & Guglielmino haud semel microscopio ostensa fuerunt. Haec salium ramenta vitriolica aluminosa, falso muriatica, nitrosa, nec non tartarea iisdem apparuerunt, & quibuscunque primigeniorum salium figurae, ac possibiles eorundem combinationes innotescant, patebit.

(a) *Dissert. de sang. natura.* (b) *Ibidem.* (c) *Ibidem p. 64.* (d) *Cap. 4 huius.*

Secundo: partes sulphureae, quae salibus associatae, & paucio phlegmate dilutae oleum componunt, docente Guglielmino: (c) ab oleo, quod a sanguine elicitur, nihil aliud concludi, nisi sulphurearum particularum in eo praesentia.

Tertio: pars terrea licet pauca, nam serum sanguinis postquam ignis calore exhalatus prorsus fuerit, albugineam ac glutinosam substantiam fundo vasis relinquit, quae iterata, & continuata ignis actione adeo induratur, ut osseas pellucidas, & cornu similes lamellas praesentet.

Quarto: aereae particulae, quae cum chylo advehuntur, quarum intra sanguinis moleculas existentia negare nemo potest (d).

Harum partium elementarium sanguinis, seu essentialium quantitas, & proportio, si Verheyenio credimus, huiusmodi per analysim chymicam inventa fuit: ex sanguinis uncis septem, aquae uncias quinque drachmas sex, olei tenuis drachmas tres, crassi drachmas duas, & scrupulos duos, terrae drachmas duas & ultra, salis pene drachmas duas.

Ex his itaque colligitur sanguinem nec acidum, nec alkalicum esse, idcirco nullam effervescentiam inire, sive cum acidis, sive cum alkalicis commisceatur, ac si degustetur jeiuno saltem animali neutrum sapit.

Caput.

CAPUT XIII.

De motu musculari, & animali.

Ut motus muscularis phaenomenon rite adeamus, primo musculorum structura, secundo eorundem actio perpendenda erit.

Musculus est pars organica arteriis, venis, & nervis constans, ex quorum diversa combinatione, ac proportionem, tendines, membranae, ac caro ipsius musculi resultat.

Tendo musculi extremitates ut plurimum constituit, caput scilicet, & caudam, caro, & membranae ventrem efficiunt, qui plures continet fasciculos peculiari membrana involutos (a). Hi fasciculi modo prismaticam secundum Boerellum (b) habent formam, modo hexagonam, quadratam, ac triangularem. Caro igitur ex fibris muscularibus, seu tendinosi rectis ac transversalibus, sanguiferis vasis ac lymphaticis intertextis componitur.

De hoc legi meretur Wyeri, Guglielmi, Muys (c) Dissertatio prima de carnis musculosae fibrarumque carnearum structura, quatenus sine vasis sanguiferis, nervis, atque membranis spectantur; in qua septimo capite illum de carnis musculosae compositione ex fibris, fibrillis, ac filis carneis ena-

tum systema illustravit, eiusque partes novis plurimisque observationibus perfecit, immo abdita quaedam, quae nec ipse Leeuwenhoekius armatis oculis invenit, vel saltem invenisse videtur (d), prout suas observationes perlegendo dignosci potest; ultima enim seu elementaria fila ex qua musculi fibrillae componuntur excellentibus microscopiis se affecutum fuisse putat.

Ultimae fibrae vero, sive fibrillae musculares, nil aliud sunt praeter nervi ramuli tenuioribus involucris donati, ac animali spiritu pleni (e), quod demonstratur.

Primo: nervos quemcunque musculum ingredi, sicuti arteriae & venae, ac per eiusdem corpus ita distribui, ut nullum inveniatur punctum in quo deficient. Secundo: nervi musculos ingredientes evanescunt, nec, ut alibi contingit, eorundem extrema in membranas abeunt, ac expanduntur. Tertio: quia licet appareant rubicundae carnosae fibrae, rubedo tamen ab affluxu sanguinis pendet, quo assiduo madefiunt; nam si aqua continenter effluenti per aliquod temporis spatium abluantur candidae ac tendinosi similes evadunt (f). Quarto: albo non solum colore fibris nerveis assimilantur, verum etiam forti tenacique consistentia, qua validae distractioni resistunt.

Tendo

(a) Boerhaav. de Geconom. an. par. 396. (b) Lib. I. prop. I. (c) Investigatio fabricae, quae in partibus musculis componentibus extat. (d) Leeuwenhoek in observationibus Transact. Philosoph. (e) Boerhaav. ibidem par. 395. (f) Boerhaav. ibidem.

Tendo nerveam consistentiam, ac offei ligamenti similem substantiam habere percipitur, ac licet angustioris sit diametri, quam ipsius musculi venter, tamen in tot fibrillas discerpitur, quot ipse musculus, seu venter (a), ita ut idem tendo ex muscularibus, seu carnosis fibris, quorum cavitate obtusa, ac restricta gracilescunt, ac in unum acutum corpus, fortius, duriusque vasculis sensibilibus destitutum coarctantur, oriatur, quae tamen vascula, quamvis oculos fugiant, per Ruyschianas iniectiones distincta, ac innumerabilia conspiciuntur (b).

Fibrae musculorum esse distractiles, ac contractili quoque vi praeditas esse supra vidimus, scissa enim contrahuntur, ac undulatam quasi superficiem acquirunt (c), molem quoque minuunt, quia proprios succos expellunt, hinc semper se contrahere nituntur, qui nisus non solum in vivo animali, verum etiam in mortuo, tametsi, imbecillior clare observatur.

Actio musculi in actuali contractione consistit, qua tendines ad se invicem accedunt, cauda scilicet, seu ille tendo mobiliori parti annexus ad caput, hoc est ad tendinem immota parte implantatum adducitur.

Tendines minime decurtantur, sed sola caro, seu venter contrahitur, durescit, pallet, ac tumet (d), quod visu, & tactu satis percipitur, quibus addenda maxima celeritas,

qua ad nutum voluntatis idem motus perficitur.

Alicubi vero utraque musculi extremitas est mobilis, nec habet proprie punctum fixum: sed reciproce se gerit, prout reciproca ipsius musculi actio, ita ut id quod prius fuit punctum fixum, modo mobile fiat, & vicissim, quod erat mobile, fixum evadat, ut in ferratis anticis, scalenis, ac nonnullis musculis abdominis.

Fibrarum ordo varius in musculis quibusdam, prout varia eorundem actio, quorum descriptio per-eleganter, ac diffuse apud Borellum videri potest.

Hinc perpendendae sunt sequentes observationes. Prima: ligato, vel reciso nervo cessat musculi actio, quemadmodum ligata, vel dissecta arteria. Secunda: contusa valde, plane obstructa, aut exsecta, vel quocunque modo laesa medullari cerebri substantia (e), voluntaria omnium musculorum aboletur actio, quemadmodum sensus, & memoria deficit, sed spontanei, & naturales musculorum motus, ut in corde, vasis, visceribus, ac respiratione adhuc perdurant. Tertia: e contra laesa medullari cerebelli substantia cordis motus, ac respiratio cito tollitur, proinde vita.

Ex his recte infertur cum Borello, fibras tantummodo carnosas musculi ventrem constituentes valida energia, qua contrahuntur vim

G 2

facere

(a) Boerb. *ibid.* (b) Ruysch. *Thef.* 1. 18. *advers.* 2. (c) Boerb. (d) Boerb. *Laur. Heister.* Borel. *Louver de corde.* (e) Boerb. *Laur. Heister.* *Anatom. d' Heister.*

facere ad agendum, ac pondera sustinenda, tendinumque motus ab earundem contractione pendere, quia iisdem tanquam manubrio fibrae ipsae alligantur.

Modo ipsius contractionis causam, in qua musculorum vis, & actio consistit, per observationum tramites exquiramus, ut juxta veram artis cogitandi legem ex noto ignotum deducatur.

Plurimae de motu musculari prostant sententiae, quarum expositio, multo minus confutatio, hic non convenit.

Contractio musculorum breviores reddit fibras, at breviores fieri nequeunt fibrae, nisi earum diameter augeatur, vel quocunque modo crassiores fiant. Crassities vero, vel sola earundem corrugatione oritur, ut voluit Schelhammerus (a), vel earundem expansione, quae hypothese Borellianae quodammodo convenit, Boerhaavianam quoque, aliorumque amplectitur.

Prima, seu fibrarum corrugatio, quae absque fluidi interventu contingere putant nonnulli, primae observationi repugnat.

Ergo secunda, videlicet earundem fibrarum expansio, contractionis erit causa efficiens, immo ex allatis observationibus, ac experimentis in musculorum actione manifeste deprehenditur.

Expansio fibrarum absque substantiae fluidae tenuissimae, nempe animalis spiritus, interventu fieri ne-

quit, quam revera intervenire ad fibras inflandas primo, ac secundo experimento evincitur.

Veruntamen haec fibrarum expansio non est libera, alioquin musculorum agentium tumescencia enormis esset, quandoquidem vix conspicua; hinc ex instantis materiae nisu, ac potentiae contrahentis (de qua mox infra) renisu durescit musculus.

Ad haec phaenomena explicanda harum fibrarum expansionis modum excogitavit Borellus, ac diffuse exposuit (b). Quibus ostendit fila tendinosa, & nervea contractili vi praedita ex pluribus machinulis longo ordine inter se connexis ad instar catenae necessario componi debere, proinde fibras musculosas similes catenis ex pluribus rhombis compositis, quae contrahi possunt ad instar arcus.

Redarguit Stenonis hypothesin, qui musculi actionem sola tensione fieri supponit, eo quia inflatio, seu molis augmentum, nec diminutio per eundem non observetur, quod prismatum exemplo rectangulorum, ac obliquangulorum aequalem altitudinem, ac basin, seu plana opposita aequalia habentium (c) probare conatur. Inde:

Immediatam fibrarum carnearum inflationem ex spiritu animali in cerebro, voluntate imperante, leviter commoto, ita ut eiusdem spiritus undulatio per nervos ad datum musculus propagetur, ibique aliquis

(a) *Analect. Dissert. VII.* (b) *Prop. 103. 104. 105. 106.* (c) *Borel. prop. V. lib. 1.*

cuius guttulae eructatio, ac expressio, quae sanguini commixto, tartarearum partium eiusdem sanguinis fermentativa insurgat ebullitio, (a) qua musculus tenditur, & contrahitur.

Huic similis Joannis Bernoullii hypothesis, qui in hac succi nervei commixtione sanguineas particulas dividi, ac divisas aereas moleculas emittere, quae coeuntes ebullitionem, ac dilatationem pariunt, arbitratur.

Coincidit huic quoque Keilii sententia, quo ad effectum, mutata tantummodo causa efficiente; nam aerearum particularum a massa sanguinis extricationem nervei spiritus attractione fieri autumat, ideo animalis motus phaenomenon per aliud obscurius explicare tentat; verumtamen huiusmodi ebullitio quocunque modo insurgat, quam improbabilis, ac insubsistens sit, demonstrare supervacaneum puto, quisque enim in rebus physicis etiam mediocriter versatus dignoscere potest.

Eo magis a vero quidem distat Willisii explosio, cui favere videtur Monsieur Chirac.

Quidam aeris exemplo per tenue cylindrum intra vesicam impulsus, cuius parietibus distentis longitudo contrahitur, ac magnum pondus attollere valet, carneas musculorum fibras vesicularum minimarum serie inter se connexarum constare iudicant, quae ab anima-

li spiritu illuc peculiariter impulsio inflentur, ex qua inflatione contractio; proinde musculi actio enascatur. Harum vesicularum existentiam per observationem microscopio factam promulgavit Leeuwenhoekius, postea in dubium revocavit; Borellus tamen carneas fibras igni expositas tumescere, ac veluti spongiosam substantiam ostendere asserit, quod Covvperus per mercuriales iniectiones observavit.

Harum vesicularum existentia, quamvis demonstrari nequeat, admittenda esset, si cunctis, quae in motu animali occurrunt, phaenomeni partibus satisfaceret, verum cum deficiat despici meretur. Satisfacit quoad momentum virium, quod in vesicularum inflatione haberetur. Quia sicuti in stateris ponderis momentum ad vim potentiae se habet reciproce, ut distantia, seu spatium, unius ab hypomochlio ad distantiam alterius (ex mechanicis) ita in vesica, cuius orificium valde angustum; momentum ponderis fundo vesicae appensi ad potentiam aere intrudentem in vesicam, se habet ut spatium notabile, quod percurrere debet aer vesicam inflans, ut per breve spatium appensum pondus elevetur, ad hoc ipsum breve spatium. Quapropter, facta cum musculorum vesiculis comparatione, idem sequetur effectus.

Harum vesicularum in minimas divisionem a natura institutam esse

(aiunt.) Primo : quia si vesicae musculi longitudinem aequarent enormis fieret in inflatione dilatatio, quae nimium spatium occuparet. Secundo, quia per magna spirituum quantitas ad eas implendas necessaria esset: sphaerarum etenim soliditas tanquam corporum similium sunt in ratione triplicata diametrorum, ideo soliditas vesiculae, cuius diameter unius lineae, aliae vesiculae, cuius diameter decem linearum erit pars millesima. Tercio, quia quo maiores essent vesiculae, eo maius temporis spatium ad pondus elevandum consumeretur.

Verum quomodo concipere possumus animale spiritum tanta celeritate tot vesiculas implere, quae cum adeo parvae sint, ut supponat Borellus, (a) eorum longitudinem non esse maiorem vigesima parte unius digiti, sed multo minorem esse probat eadem propositione, idcirco in cuiuslibet fibrae longitudine plurimae existerent, quae si per unicum tantum meatum, sive tubum, per quod inter se communicant, & colligantur impleri gradatim, & successive censeant, per longum sane tempus necessarium esset; si vero quascunque vesiculas peculiare habere meatus; istud musculari structurae a praefatis insignibus viris adhuc observatae repugnat; haec enim vesiculae post unam alteram (si adsint) per rectam lineam disponderentur, ita

ut quilibet vesicularum ordo fibram repraesentet.

Has igitur inter fibras vesiculis conflatas plurimae interessent fibrae non vesiculosae, sed perviae animale spiritum in easdem vesiculas deferentes, hoc sane ordine, ut inter duas praefatas vesiculares fibras tot excurrerent perviae fibrae tubulorum officium gerentes, quot essent vesiculae, ex quibus fibra vesicularis construitur, quae fibrae singulae peculiarem vesiculam ingrederentur, quo spiritum delaturae essent.

Sed huic fibrarum ordini adversantur tum observationes, tum ratio. Nemo unquam huiusmodi fibrarum ordinem penetranti licet microscopio cernere potuit. Borellus fibras carneas igni exponens tumidas, ac spongiosas sine distinctione observavit, cum tamen vesiculosae, quae multo pauciores essent ceteris tumidiore esse deberent.

Fibrae tantum vesiculosae in musculi actione contraherentur, ceterae vero, quorum numerus indefinite maior in plicas cogerentur, sed haec plura involvit absurda, ac nonnullis ex allatis observationibus omnino infirmatur.

Ad motus animalis phaenomenon rite expediendum his machinis adeo implicatis non indigemus, nec idealibus ebullitionibus, nec trochleis, quorum vices gerere sanguinis guttulas vult Baglivius. (b) Cum satis evictum, ac demonstratum

(a) Prop. 115. (b) Dissert. de Anat. fibr. de motu musc. &c.

tum fit fluidum nerveum primarium esse motus instrumentum, ac ultimas fibras carneas nil aliud esse, nisi nervorum productiones, quae perviae sunt sicut nervei ramuli.

Hoc nerveum fluidum, ad nutum voluntatis, maiori copia dirigitur ad illud musculus, qui parti movendae inseritur, proinde ad illos nerveos ramulos fibras carneas eiusdem musculi constituentes maiori copia fluere; verum cum ex fibris carneis exire difficulter possit, quia eadem utrisque extremis tendine, veluti manubrio colligantur, ideo regrediente quodammodo spiritu, qui praecedenti supervenerat, intumescunt, maiorem diametrum acquirunt, ac contrahuntur.

Dices: haec fibrarum dilatatio insignem musculi intumescentiam parere deberet, tamen, vel nulla, vel exigua apparet.

Respondeo intumescentiam adeo conspicuam non esse, imprimis quia alicubi innumeris fibris transversalibus connectuntur (a), quae eodem spiritu inflatae, & ipsae contrahuntur, prioresque seu longitudinales, veluti retium anuli colligant, atque constringunt, ita ut incise, ac membratim tantummodo intumescant; praeterea quia nervosis membranis continentur, quae spiritu illuc derivante propriam elasticitatis, seu contrahendi vim exercent, fibrarumque nimiam dilatationem cohibent, quae constrictio dilatatio-

nis nisi coniuncta eiusdem musculi agentis duritiem parit.

Insuper fibrarum transversalium, & muscularium membranarum munus est, subiectas arterias ita coarctare, & sanguinis progressivum motum illinc retardare, ut & vasorum intumescantiae nifus, a quo contrahendi vis pendet, augeatur. Hinc originem ducit ille musculorum dolor, qui insuetis laboribus, mollibus praecipue viris, supervenit, ac vernacula lingua (carne greve) appellatur, eo quia fibrae, vasa, ac membranae musculares prae nimia distensione violentam distractionem patiuntur, quam si postridie easdem actiones, vel eosdem tantummodo motus adeuntes non nihil renouent in gravem dolorem incidunt, a quo detinentur.

Dices: si fibrae musculares admodum dilatari non possent, exigua quoque esse deberet contractio, quare ad completum membri motum non sufficeret.

Respondeo: fibrarum dilatatio talis est, ut sufficientem musculi contractionem efficiat: licet enim membri motus extremitate sua, seu maiori a centro motus distantia magnum describat circulum, parti tamen centro viciniore parvulum sane describit, ideoque cum musculi moventis, ac se contrahentis cauda parte centro propiori implantetur, ut per breve spatium, seu parvum arcum in contractione describat, sufficit.

Musculi

(a) Borel. prop. 1. Cap. 2.

Musculi E. G. humeri cuncti praeter coracobrachialem, cuius cauda ad mediam eiusdem partem extenditur in capite humeri, vel collo finem habent; Deltoides scilicet, ac supraspinatus scapulae, infraspinatus, ac rotundus minor in collo humeri implantantur. Infra scapularis vero interiori capitis humeri regione inferitur, rotundus maior, aniscalptor, ac pectoralis tres, vel quatuor digitos sub capite humeri suis tendinibus, alligantur. Cubiti quoque musculi, ut biceps, qui tendine tereti infra radii tuberculi superius capitulum, tendine vero lato in membranam communem musculos in cubito sitos cingentem definit, brachialis internus mox infra capitulum superius ulnae tuberculi. Extensor longus, brevis, ac brachialis externus ad posteriorem, ac superiorem cubiti, sive olecrani partem tribus tendinibus coeunt, hos vero statim sequitur anconaeus.

Sic et femoris musculi, ut psoas magnus, iliacus in minori trochantere inseruntur, pectinaeus sub iisdem invenitur; Glutaeorum maximus infra maiorem trochanterem ad quatuor circiter digitos, medius vero, & minimus in eodem trochantere positi. Pyriformis ac gemini, tum superior, tum inferior in maioris trochanteris sinu, ceterique omnes, tum tibiae, tum aliorum artuum motui inservientes musculi, exceptis quibusdam abductoribus, vel adductoribus, qualis est

triceps, qui totae femoris spinae adhaerescit, sed hic cum femur adducat breviorē describit arcum, seu viam, quam ceteri musculi flexores ac extensores, quapropter hic centro motus, hoc est articulo ossis movendi propius implantantur, quod insignem eorundem musculorum vim ostendit, supra quam calculus instituit doctissimus Borellus, staterae sive vectis exemplo, cuius potentia inter fulcimentum, & pondus posita sit. (a)

CAPUT XIV.

De Digestione.

Digestio nihil aliud est, quam alimentorum ad nutritionem reparandam ingestorum solutio, quae tunc perficitur, cum ingestae partes sanguini, ceterisque fluidis optime commiscantur, assimilantur, ac distribuuntur.

Digestio igitur in ore incipit, cum cibus dentibus inciditur, comminuitur, saliva maceratur, deinde in stomachum descendit, ubi membrana villosa, rugosa, ac porosa humorem suppeditat ex plurimis glandulis (b) emanantem, qui tenuis, spumosus (c) spiritibus scatens non acidus, non alkalicus, sed leniter salus invenitur.

Idcirco quam erroneae sint ac mendaces qualitates ac proprietates a multis huic succo attributae, satis apparet; vis illa scilicet cibos prorsus dissolvendi, atterendi, atque in chylum

(a) Lib. 1. de mot. Animali. (b) Morg. Advers. 3. 6. (c) Boerb. de Oecon.

chylum reducendi, quae nisi causticis, vel corrodentibus liquoribus convenit (a).

Actio igitur huiusmodi succi salivae analogi (b) in maceratione, ac dilutione cibi consistit; ut facilius eiusdem cibi solutio evadat, quae ad ventriculi membranas multifario, ac peristaltico motu praeditas pertinet; hinc solidiores cibi (licet interdum masticatione, ac dentibus elapsi) in ventriculo perfecte digeruntur, quod ut intelligatur muscularis ventriculi structura examinanda.

Carnosa itaque ventriculi membrana convexa parte, quae cellulosa Ruysschii oleum suppeditante (c) tegitur, validis constat fibris, quae superiori orificio incipiunt, ac eiusdem cavitatem ambientes (d) orbiculari, vel saltem spirali (e) directione longitudinali axi perpendiculares ad pylorum progrediuntur, suaeque contractione ventriculi latitudinem arctant; concava vero parte, primo: fibris oblique excurrentibus, ac e sinistra regione versus fundum descendantibus, proinde agendo, & contrahendo longitudinem minuunt (f). Secundo: firmioribus quoque fibris praedictae ventriculi axi parallelis, quae pylorum amplexae, ac per dorsum unitae ad orificium superius ambiendum quoque pergunt; haec ipsius ventriculi ora

adducunt (g), si vacuus idem sit; si vero plenus, ac distensus claudunt. In pyloro vero valvula quoque plerumque adest, quae secundum Heisterum (h) orbiculari membrana duas fere, quandoque tres lineas lata orificium implente, crassiorumque partium egressum impediens constat.

Haec alia membrana cellulosa dicta, convexa parte cingitur (i) rursusque alia extima, superiori parte vasculosa, inferiori fibrosa, fibrisque secundum longitudinem excurrentibus, concava vero nervea tunica, quae cum villosa rugas efficit.

Postquam igitur cibus in stomachum descenderit, tum proprio pondere, tum salinis particulis, ac volatilibus, quibus commiscetur nerveam tunicam titillat, copiosiores spiritum animale in muscularem membranam accersit, ac peristalticus ipsius ventriculi motus excitatur, seu intenditur.

Cum tamen diversa sit intestinorum ac ventriculi structura, & officium, diversitas quoque effectus habetur, intestinorum enim materia peristaltico impulsu per cylindricum ductum non interrupto, vel intercluso itinere progreditur, sive tenuis, sive crassa sit; in ventriculo vero nisi satis attenuata fuerit, retinetur, folisque fluidis particulis egressus conceditur.

Quapropter cum multiplex sit eiusdem visceris motus, & compressio

ex

(a) Pitcar. Diff. de m. &c. M. Hecquet liv. 2. de la digest. (b) Cap. XII. huius. (c) Boerhaav. ibidem. Actio Vent. in ingest. (d) Willis lib. 2. Pharmaceut. (e) Santor. observ. anatom. (f) Will. l. 2. Tab. V. (g) Boerhaav. ibidem. (h) Compend. anat. Tab. 1. (i) Will. lib. 2. T. 3.

ex varia fibrarum directione pendens, variis ictibus contenta premit, ex qua incessanti compressione alimenta atteruntur, attenuanturque. Ad quod opus internae ventriculi rugae valde conferunt, quia ingestorum partes, alioquin elapsuras, remoratur, ictibusque, seu membranarum constrictionibus subiectas reddit, ut facilius dissolvantur.

Membranarum ventriculi vim ac momentum exacto licet calculo assequi nequeamus, haud leviter tamen attingere, ac concipere possumus ex Borelli propositionibus, nec non principiis Nevvtonianis ex ipsis Borellianis eliciendis. Statuit igitur Pitcarnius (a) musculorum potentias esse in ratione solidorum similium, seu ponderum (b) in quo omnino convenit Hecquetus (c), videlicet medium pondus musculi tertium pollicis manus articulum flectentis est granorum 122. eiusque potentia (d) libras 3720. aequat, ideo instituitur proportio, ut 122. grana ad libras 3720. ita se habebit pondus medium humani ventriculi, quod octo uncis aequalis consideratur, hoc est granis 3840. ad 117088. non ad 12951. ut legitur in Pitcarnio, cuius error nescio cui sit attribuendus, an auctori, vel typographo. Quae quidem immensa est vis lapidem molarem aemulans.

Hunc calculum mendacii accusat Astrucius, arguitque Pitcarnium commissi paralogismi (e). Distinguens

vim attrahentem rectam, qua musculi directe attrahunt, a vi premente, qua musculi circulares corpora, quae circumdant comprimunt; hinc demonstrare conatur, circularem vim compressivam ad vim directam non maiorem habere rationem, quam habet arcus infinite parvi chorda ad circuli diametrum, quae tamen propositio in Epistola ad eundem Pitcarnium sicuti, & alia obiecta refelluntur (f).

Ventriculi actioni valde confluunt musculorum abdominis, ac diaphragmatis vires comprimentes, cuius pondera in solidum considerata 15126. granis aequatur, proinde ex instituta proportione eorundem vires ad 461219, librarum pondus ascendunt; ergo alimentorum in ventriculo digestio succi gastrici maceratione tantummodo adiuvente, ipsius ventriculi membranarum triturationum nisu perficitur; ergo prima digestio a perenni solidorum motu pendet.

Quemadmodum profecto alimenta in stomacho, mediante solidorum motu atteruntur, ac praecipue ineunt digestionem, ita postquam fluidior, & albicans illorum pars e stomacho egressa fuerit, solidorum, seu cordis, & arteriarum motu attenuatio pergit, usque dum sanguineis particulis assimiletur.

Quoniam facta chyli a fecibus separatione per oscula intestinorum tunicis hiantia, eiusque in lactea vasa

(a) *Dissert. de motu quo cibi in vent. redig.* (b) *Borel. lib. 1. de motu anim.* (c) *Liv. 2. de la digest.* (d) *Borel. l. 1. prop. 126.* (e) *Tract. adv. eand sive dis.* (f) *Hecquet. liv. de la digest.*

vasa traductione (quae traductio aeris prementis ope fieri verisimile est, tum ipsum corpus ambientis, tum intestinorum cavum ingredientis, quemadmodum in tubo Torricelliano aere vacuo fluida ascendant, ita & chylus in eadem chylifera vasa, & ductum thoracicum fursum pellitur) ex fibrarum tunicas vasorum constrictum, nec non mesenterii membranarum, quibus inferuntur, alterna contractione eo magis comminuitur idem chylus, fluidiorque redditur.

Postquam vero sanguifera vasa ingressus fuerit eadem cum sanguine velocitate vehitur, a corde abit, reditque, compellitur, conquassatur, viscera pervadit, innumerabiles glandulas, ac tenuiora vasa capillaria permeat, ubique oscillantibus vasorum tunicis conteritur, comminuitur, ac traiciendis canalibus adaptatur (a); ita ut sanguineis particulis assimiletur, sanguinisque naturam acquirat.

Hunc assimilationis effectum pulmonum fabricam, actionemque praestare plerique recentiorum autumant, necnon id cuicunque suaserum esse puto, si pulmonum structuram, tum quoad vasa aerea (b) tum quoad sanguifera expendat (c).

Trachea enim ad quartam thoracis vertebra bipartitur, ac mox in

innumerabiles utrique ramos dividitur Bronchia appellatos ex anulis in principio cartilagineis, tamen imperfectis, ex ipsa trachea oriundis constantes, qui divisionis progressu in frusta, deinde ad extremos versus fines (d) cartilaginea indole deposita in minimas desinunt vesiculas (e) interstitia inter se communicantia relinquentes.

Sanguifera vero vasa, nempe arteria, & vena pulmonalis, ut bronchia dividuntur; Arteria statim ac a corde discesserit curvatur (f), dividitur, ac ubique bronchia comitatur, tandem extremis suis ramusculis circa vesiculas indefinitis anastomosibus inter se communicantibus, cum venarum furculis rete vasculosum Malpighii efformat.

Inspiratus aer vesiculas inflat, ob visceris calorem rarefcit, hinc membranae prius complicatae explicantur, vesiculae ex plana figura, elastico undique nitente aere distensae rotundiores evadunt, quapropter vasa sanguifera alternatim comprimuntur, chylosaeque particulae, quae irregularem figuram, ad sphaeroidem tamen accedentem (g) nactae sunt, rotundiores sanguineis globulis similem hos canales traiciendo acquirunt, ex qua ruber color optimo sanguini proprius (h), vide in actis eruditorum Lipsiae (i).

H 2

Ex

(a) Boerh. de Oecon. an. par. 200. (b) Ruysch. Thes. 3. Tab. 2. Th. 7. Ta. 3. Th. 10. Enslach. Tab. 15. Malpigh. Diff. de Pulmon. (c) Ruysch. Th. 3. Th. 4. Drake p. 2. Ta. 12. 13. (d) Boerh. ibid. (e) Laur. Heister. p. 127. Comp. anat. (f) Boerh. Pulm. fabric. & actio. (g) Leeuwenhoek. (h) Boerh. de Oecon. par. 200. Anatomie d' Heist. (i) An. 1742. Benjaminum Hoadly praelection. tribus de org. resp.

Ex reciproco igitur ac perenni inspirationis, ac expirationis motu, sed ex vasorum praecipue arteriarum undique oscillantium nisu, cordis quoque pulsu non intermisso, extraneae ac recenter admissae, quales sunt chyli particulae, homogeneam sanguini, ipsisque vasis adaequatam ac congruentem figuram nanciscuntur.

Hinc nonnullae inferendae sunt notiones medentibus perutiles, immo necessariae, quibus veram aetiologiam assequi iidem possint.

Si vasorum itaque oscillatio, expansio scilicet, & contractio, heterogeneas nempe chyli particulas conterat, attenuet, idcirco digestionem perficiat, quotiescunque eorundem vasorum oscillationes, numero, aut mensura deficient, vel augeantur, hoc est tardiores, vel frequentiores, latiores, & expansae, vel breviores arctaeque eadem digestio perturbabitur, chylosae particulae haud satis attenuabuntur, nec globulis sanguineis assimilari poterunt.

Tres itaque imprimis fibrarum, seu vasorum affectiones (utpote vasa fibris constructa) sunt potissimum considerandae. Primo: fibrae durities, & rigiditas, nimiaque tensio, secundo: laxitas, imbecillitasque, tertio: flexibilitas, ac resiliendi vis, in qua elasticitas consistit.

Fibra rigida, si de vasis sermo sit, eorum tunicas nimis duras parumque flexibiles reddit, ac sanguinis impetus minorem habet rationem

ad momentum resistentiae vasorum dilatandorum, quorum fibrae sint rigidae, quam illorum, quorum fibrae molles, flexibilesque; quapropter si arteriae, cuius fibrae flexibiles sint, dilatatio ad octo, E. G. vel decem lineas, plus minus, (pro ut ipsius vasis magnitudo) extendatur, si rigidae & durae vix quatuor E. G. vel quinque lineas pertinget; idcirco, cum pressioni, & flexioni aequalis sit resilitio, ac resiliendi vis, arteria, qui in dilatatione breve describit spatium, in restitutione, seu systole, breve quoque spatium percurrent; quin immo haec restitutionis lex corpora solum perfecte elastica amplectitur, sed fibrae durities imminutam vasorum elasticitatem arguit, igitur & lentior, tardiorque erit huiusmodi fibrarum post distractionem restitutio, proinde vasorum post dilatationem contractio; ergo multo minor impetus, seu momentum arteriarum ad sanguinem compellendum adeo necessarium, ut supra innuimus (a); nam impetus corporis moti est factum ex massa in celeritatem, ac momentum corporis percutientis (b), seu impingentis est factum ex vi simplici, qua idem corpus in principio movetur, in celeritatem, seu spatium, quod dato tempore describit, ex quo fit ut idem momentum mirum in modum augeatur.

Quapropter momentum arteriae post diastolem se constringentis erit

(a) Cap. 8. huius. (b) Borel, de Vi. perc.

erit productum ex vi contractionis seu resiliationis in celeritatem, hoc est spatiolum, quod dato tempore resiliendo describit; ideo quia ex demonstratis multo minus spatium describit arteria dura & rigida se contrahens, quam flexibilis, & elastica, aequali etiam supposita in utraque se contrahendi vi, si spatium primae eodem tempore percursum, sit E. G. dimidium secundae, erit momentum secundae duplum momenti primae.

Ergo fluida, seu sanguis multo minori vi comprimetur, chyli particulae difficiliter conterentur, ac globulorum sanguineorum figuram tardius acquirunt. (a) Quare ad minima capillaria vascula, tum viscerum, tum musculorum, vel quarumcumque nostri corporis partium delatae aegre permeando, eorundem vasorum infarctus, distensiones, phlogoses, inflammationesque contingent; praeterea cum in vasis, praesertim minimis, cordique distantibus necessaria sit sufficiens eorundem oscillatio ad traicienda fluida, (b) haec eo lentius progrediuntur, eoque magis obstructionis periculum imminebit.

Secunda fibrarum, seu vasorum affectio, atonia, seu laxitas, imbecillitasque digestionis omnino quoque se opponit, nam cum debilius est fibrarum tonus, vasorum tunicae fluidorum impulsui non renituntur, facilius cedunt, ac distrahuntur, nec distractioni compar est contra-

ctio, ideoque chylosarum partium compressio, attritio, comminutio aegrius continget, proinde a pepticae, seu malae digestionis sequuntur, tum primae quae in stomacho, tum secundae quae in vasis.

Quia fibrae muscularis tunicae ventriculi, si laxae sint, difficiliter contractionem ineunt, ac imbecilliter corrugantur, nisi alimenta sint tenuia, ac facilis digestionis, difficulter triturabuntur, ac ruditer solventur, ideo vel male soluta e ventriculo emittentur, languescunt pylori fibrarum contrahentium vi, vel diutius stomacho immorantia viscerum calore corrumpuntur, fermentescunt, acrimoniam acquirunt, ac ex prava eorundem partium corruptarum solutione aereae particulae extricatae coeunt, ideo aucta earundem elasticitate irruentes e ventriculo per oesophagum exeunt, ac in nidosos acidosque ructus abeunt. Hac tamen laxitate raro affici ventriculi fibras, sed frequentius rigiditate, & erethismo, ex quo pravae digestionis contingant, censet Hecquetus. (c) Et quidem supposito hoc membranarum, ac solidorum vitio, musculosa ventriculi tunica ob nimiam earundem fibrarum duritiem, ac tensionem ad alimenta comprimenda, atterendaque parum flectitur, motum suum peristalticum, hoc est reciprocam fibrarum longitudinalium, ac circularium constrictionem tardius exercet, immo in praeternaturalibus crispationibus

H 3

(a) Mazin. dissert. XI. de sanguifer. vi compressionis, quam sustinent particulae chyli a systole cord. & arter. (b) Cap. eod. hui. (c) Liv. 2. de la digest.

tionibus suspensa haeret. Hinc pravae stomachi digestiones, anorexiae, cibi fastidia, quae symptomata plures medicorum ventriculi atoniae, ac imbecillitati perperam attribuunt, cum revera ex earundem inertia, sed spasmodica contractione producta enascantur.

Idcirco pernicioso interdum methodo specificorum corroborantium, aromaticorum, acriorum, volatili-um, ac exaltantium, praevia medicamentorum solventium ex amar-
 ris, stimulantibus, irritantibus com-
 positorum, quae stomachi vitium
 sane augent, ut increpant Bagliv.
 (a) Hecquet. (b) Pitcarnius, utuntur
 medici.

Tertia fibrarum affectio est elas-
 ticitas, quae nisi modum excedat,
 fibras molles, flexibiles aequae ac
 resilientes arguit, ita ut vasa faci-
 le dilatentur, aequae ac contrahan-
 tur, ex qua reciproca dilatatione,
 ac contractione quatiuntur fluida,
 chyli particulae atteruntur, globulo-
 rumque sanguineorum figuram ci-
 tius assequuntur. Praeterea sanguis
 ad vasa minima perductus, ad quae
 cordis vis, nisi valde imminuta per-
 venire potest, oscillatorio eorundem
 motu compellitur, traiciturque,
 hinc promptae liquidorum separa-
 tiones, ordinatae ac congruentes
 evacuationes, totaque animalis oe-
 conomia admirabili harmonia prae-
 terit: nam et stomachus officium
 suum perbene praestat, quia mu-
 sculosa tunica flexibilibus ac elasti-

cis fibris constans reciproca juxta
 variam earundem directionem actio-
 ne, ventriculi modo longitudinem
 contrahit, modo latitudinem ar-
 ctat, modo ipsius parietes in ru-
 gas atque plicas, veluti undas crispat,
 quibus motibus varie comprimun-
 tur alimenta, ac conteruntur ad
 primam digestionem optime perfi-
 ciendam.

Hanc tamen elasticitatem non ra-
 ro excedentem experimur, quae ter-
 tiam fibrarum vitiosam affectionem
 constituit. Excedit modum elastici-
 tas, tunc cum pressione, & flexio-
 ne maior est resilitio; sanguine
 E. G. a corde pulso in arteriarum
 tunicas impingente earundem dila-
 tatio contingit, quam constrictio se-
 quitur, quae systolis limitem prae-
 terit, ac dilatationis rationem su-
 perat, ideo aucto impetu, ut supra
 innuimus, ex celeritate aucta, seu
 maiori spatio eodem tempore ab
 ipsis arteriarum tunicis se constri-
 gentibus descripto, fluida fortiori ni-
 fu compelluntur, ita ut maiori ve-
 locitate per ipsa vasa progredian-
 tur; hinc celerior sanguinis cete-
 rorumque liquidorum circulatio, vio-
 lentae, et immaturae separationes;
 liquida enim ex impetu adepto ca-
 pillaria viscerum vascula velociter
 traiciunt, ac per secretorias arte-
 riolas, sive glandulas (ut E. G. he-
 patis in quo bilis, veluti crassior suc-
 cus separandus, congruam humorum
 illuc circulantium tarditatem requi-
 rit) citius, quam par est praeter-
 vecta

vecta excretorios tubulos ineunt, ac succi male elaborati fecernuntur, bilisque tenuior, ferofior, oleosa materia ac falinis particulis inops; ita quandoque urinae copia ex huiusmodi solidorum ac fluidorum impetu excernitur, ceterarumque separationum idem esse potest casus; nam & liquidum animale ex sanguine maiori impetu ad cerebrum perducto, & illuc velocius prope-
rante in nerveos tubulos maiori copia descendit, quia copiosior tunc spirituum materia dato tempore sup-
peditatur, quae systolis motum, tum in corde, tum in vasis frequen-
torem facile suscitatur, in quo febris consistit, quove brevius, vel longius perdurante, breves quoque, & diariae, vel diuturnae accidunt febres.

Revera qui huiusmodi fibrarum, ac solidorum indolem nimis resilientem nacti sunt, ex levi etiam causa irascuntur, ac in vehementes animi motus facile rapiuntur, quemadmodum, & febribus valde obnoxii; quin immo cum irregularis, nec aequae distributa quandoque sit praedicta spirituum secretio, modo huc, modo illuc maiori copia irruunt iidem spiritus.

Si E. G. in artuum musculos motus convulsivi excitantur, si in viscerum nervos, vel crispationes quae liquidorum secretiones supprimunt, vel motus spasmodicos sive ataxias, quae praeternaturalem ac violentam eorundem expulsionem

pariunt, ut in renibus, E. G. quando urinae suppressionem, quandoque exuberantiam; in intestinis quando alvi ficcitates, quandoque diarrhoeas observamus, prima ex occlusis glandularum intestinalium ductibus excretoriis, secunda ex earundem glandularum crebra compressione, ob quam mucī violenter fecernuntur, ac per alvum frequenter eliminantur.

Alimenta in ventriculo ex earundem tunicarum inordinatis motibus ac crispationibus male triturrari, diutius retineri; ita ut corrumpantur, & acrimoniam adepti nerveas fibras vellicent, feriantque; hinc dolores, ac spasmodici ipsius ventriculi motus, qui si ad intestina propagentur tormina, ac cholerae excitantur, faciles quoque in his passionibus coeliacae, quia effrenis fibrarum muscularis tunicae motus alimenta nondum attrita ac digesta e ventriculo expellit, nec non per intestina protrudit tali violentia, ut chylus ipse lacteorum oscula effugiat, ac per alvum educatur.

Ob eandem fibrarum nimiam elasticitatem, & ataxiam, ob quam ventriculus nimis cito ac intempestive evacuatur, nonnullae quandoque contingunt morbosae affectiones, veluti Bulimos, seu fames canina, quae a saepius, vel nimis vacuo ventriculo oritur (a) nec non Pica, & Malacia, quae symptomata sunt ventriculi nimis vacui cum delirio melancholico.

Ex

(a) Pitcarn. elem. Medic. ph. 12.

Ex his, quae in hoc capite demonstravimus Corollarium sequens infertur: Digestionem scilicet, tum primam, quae in stomacho, ac si vis in tubo intestinali, tum secundam, quae in vasis perficitur, regulari solidorum motu praecipue fieri.

C A P V T XV.

De vitae ac mortis natura et causis.

Vita humana in progressivo ac circulari fluidorum motu consistit, qui a solidorum reciproca contractione, ac relaxatione pendet, ac proficiscitur.

Animal vivere incipit, tunc cum eius cor atque vasa moveri, ac oscillari incipiunt, ut in oviparis clare elucescit, cuius corculum se primis incubatus horis movens, ac pulsans observavit Lancisius, (a) Malpighius, aliique plurimi, de quo etiam celebris Hecquet. (b) Animalculum propria capsula inclusum oscillatorio mediante motu evadit, ac vitam assequitur; quotiescunque enim cordis vasorumque fibrae aliae aliis sibi invicem contranitentibus, prout varia eorundem directio, in motu excitantur, quod per foecundationem fit, perenne vitae pendulum ac perpetuus motus habetur.

E contra cordis pulsu quamprimum cessante, nec non arteriarum, ita ut fluidorum circularis motus deficiat moritur animal, cuius postea corrumpitur corpus.

Ergo fluida nostri corporis corrumpuntur quatenus quiescunt, quemadmodum in viventibus, vel ex vaporum scissura erumpens sanguis, ac stagnans, vel intra eadem, sive a tunicarum crispatione, sive propria crassitie, sive quacunque alia causa progredi impotens, si aliquandiu a motu circulari ferietur, putrescit, ac in saniem abit; ipsa quoque solida saniosis iisdem fluidis interdum inficiuntur, flaccescunt, ac corrumpuntur. Idcirco cadavera ex earundem partium componentium quiete, in qua mors consistit, primo putrescunt, ac organa per fibrarum dissolutionem corrumpuntur, deinde postquam fluidae partes exhalaverint in pulverem fatiscunt.

Per humani corporis naturam quid intelligendum sit, clare deducitur, nec inepte Aristoteles naturam in genere principium motus, & quietis definivit, nos quoque peculiarem corporis humani naturam nil aliud esse, praeter vim solidorum contractilem, quae fluidorum progressivi motus causa est.

Alternatim agunt solida, eorumque actio systoles, actionis vero intermissio diastoles appellatur, quae alternatio ad liquidorum circulationem, utpote necessaria ab auctore naturae constituta fuit; Cor enim nisi post systolem relaxaretur, sanguinique ab extremis redeunti ora aperiret, statim extingueretur circulatio, haud secus arteriae, si in continua contractione manerent, ipse

(a) *Lib. de motu cordis.* (b) *Liv. 2. de la digest.*

ipse sanguis in capillaribus vasculis cohiberetur, atque stagnaret.

Alternae huius actionis solidorum causam non ab alterno spirituum animalium influxu oriri, (a) sed ex ipsa solidorum structura pendere evincitur; sicuti cor ex vario fibrarum ordine, ac directione contractionis, aequae ac dilatationis capax est, ita & ceterae partes solidae, membranae nempe, ac vasa ob variam earundem fibrarum, quibus componuntur, directionem contrarios ineunt motus. Stomachus, & intestina reciproca fibrarum, tum longitudinalium, tum transversalium actione modo constringuntur, ac elongantur, modo dilatantur, ac longitudinem contrahunt, ita & oesophagus cum deglutit, lactei quoque ductus eodem alterno constrictionis, ac dilatationis motu chylum ascendere cogunt.

Partes musculosae, seu carnae fibrae oscillare manifeste deprehendimus, venae similiter huiusmodi motu sanguinis (aequilibrii vi alioquin ascendentis) celeritatem augent (b). Postremo in arteriis conspicua magis et insignis reciproca fibrarum actio se prodit. Circulares tamen arteriarum fibrae maiori absque comparatione vi donantur, quam ceterae secundum longitudinalem axem confuse, & oblique excurrentes, eo quia priorum impetui sanguinis resistere, & contrarii ad eiusdem circulationem promo-

vendam officium est, secundarum vero, quae arteriam dilatando prioribus obnituntur, ipsius sanguinis momento arteriae tunicas fortiter distendente maxime suffragantur.

Cum fibrae nostri corporis, five simplices, five compositae elasticae sint, (c) aliae agentes, seu propriam vim contractilem exercentes alias diversi ordinis trahunt, ultra punctum, quo aequilibrium inter se natae sunt, & quo praeterito attractae fibrae prius non agentes, postea excitatae in contractionem veniunt, prioresque a quibus trahebantur vicissim trahunt, ac secum ducunt. Stomachi, & intestinorum E. G. fibrae circulares, seu transversae se contrahentes longitudinales secum trahunt vel potius distrahunt, ex qua distractione harum elasticitas seu vis contractilis provocatur, ita ut & ipsae priores distrahendo vicissim agant, & contrahantur, quae reciproca fibrarum diversi ordinis actio in ventriculo, & intestinis peristalticum motum constituit, in corde ac vasis oscillatorium, a quo hominis cunctorumque animalium vita pendet.

Haec vis contractilis solidarum partium, quae a vi elastica pendet, vel ipsa est vis elastica, ex quadam intra eadem solida lateacente fluida substantia originem ducere fas est.

Substantia aqueo-oleosa, per quam elementares fibrillarum particulae cohaerent, ut vidimus, (d) ad hanc elasticitatem suscitandam minime valet.

(a) Cap. VII. huius de mot. cor. & XIII. (b) Cap. VI. huius. (c) Cap. 3 huius. (d) Ibidem.

let. Huius quidem medio fibrillae, quotiescunque distrahantur non rumpuntur, sed paulatim in pristinum statum restituuntur. Verumtamen hic de illa vi contractili, seu elasticitate loquimur, qua solidae partes distractae cito, summaque celeritate proprium tonum recuperant, immo sua sponte oscillant, ut in quibusdam nuper necatorum animalium musculosis partibus oscillatorium motum aliquandiu servantibus (a) observatur.

Haec igitur oscillandi vis, vel a sanguine solida perfluente, vel a fluido tenuiori, nempe animali spiritu fibras inflante, enascitur. Revera sanguis nonnullas particulas, quibus constat nonnihil elasticas nactus est, quales sunt globuli rubri, ut ex Leeuvvenhoekio, Schreibero habemus, qui compressi ex sphaeroide ellipticam, ablataque compressione priorem recuperant figuram. Praeter has aereae quoque, nec non illae, cuiuscunque generis sint, tenuissimae partes, quae animalibus spiritibus materiam suppeditant, vel ipsi sunt animales spiritus, qui sanguini insunt, quorum naturam elasticam esse, nemo procul dubio inficietur.

Vasa itaque huiusmodi fluido repleta (nisi praeter modum distendantur, ut in quibusdam plethoricis ex nimia eiusdem copia nervosum genus opprimente, quibus spontaneae lassitudines superveniunt, ut monet Hippocrates, (b) nec non re-

pentinae suffocationes) multo firmiter tonum ac maiorem elasticitatem assequuntur, quam aliquantulum exinanita, ac indigentia, ut in gravioribus haemorrhagiis, ac nimis generosis sanguinis evacuationibus contingit; nam sanguinis momentum vasa replentis maius est momento non replentis, quare idem sanguis, primo vehementiori impetu in arterias nititur, easque magis dilatat, cui dilatationi aequalis, ac proportionata sequitur systoles, quod innuisse videtur etiam Aristoteli, qui (c) haec habet: *Illa animalia quorum sanguis multis fibris & crassis refertus est, animosa, & furibunda sunt, solida enim omnia quando calefacta sunt vehementissime calefaciunt, ex quo fit ut tauri et capri animosi furibundique sint.*

Quod Aristoteles sanguinis qualitati attribuit, quantitati quoque adscribere debemus, ut etiam doctissimus censet Hoffmannus (d). *Non modo temperies et motus, sed et copia sanguinis animi dispositionem, et operationem varie modificat, & paulo post (e). Ita etiam in corpore nostro, alia vis in animum a motu sanguinis copiosi, alia a motu parcius redundat. Si cholericus sanguine abundat omnes eius actiones vehementiores, atque potentiores esse: quare maius robur, et vigor etc.*

Autopsia quoque id nos docet, ligata siquidem arteria illorum musculorum ad quos dirigitur, ac distribuitur,

(a) Cap. 6. huius. (b) Aphor. V. sect. 2. (c) Lib. II. de part. animal. (d) Lib. I. sect. 1. Cap. IX. pr. 32. (e) Schol. eiusd. prop.

tribuitur, cessat actio, sicuti & in nervi ligatura contingit; ergo sanguis ad solidorum elasticitatem fovendam nonnihil inservit.

Ceterum contrahendi ac oscillandi vim ex fluido sanguine ipso valde subtiliori, nempe animali, depromere fas est: etenim fibrillae nervae, quae solo eidem animali fluido perviae sunt, ipsasque membranas irretiunt, contexuntque, elasticae sunt, ac incessanter oscillant, quemadmodum musculosae partes animalium recenter mortuorum, (a) si stimulo afficiantur undosum inire motum passim observatur, ipsumque humanum cor, si adhuc calidum extrahatur, ad acus puncturam convelli, in pluribus quoque animalibus perfectioribus (ut eodem Cap. innuimus) etiam frustatim recisis absque stimulo idem motus per plures horas viget; ex animali igitur liquido utpote elastico, quem tubuli ac fibrillae solidorum continent, & a quo jugiter affluente implentur elasticitatem nanciscuntur.

Et sane cum proprium sit elastici corporis, quoties comprimatur, resilire, ac ad pristinam figuram, sive extensionem se redigere: vesica E. G. aere turgida, si per diametrum, vel quocunque modo comprimatur, flectitur, ac quasi complanatur, ablata vero compressione ad sphaeroidem figuram cito redit; haud secus compressis ac obtusis fibrarum ac tubulorum cavitatibus animali liqui-

do, non minus ipso aere elastico repletis, ad pristinam figuram rediguntur.

Sit E. G. arteria, tunc cum sanguinis impulsu dilatatur, eiusdem fibrae annulares distrahuntur, eorumque, licet exiguae, cavitates animale fluidum continentes angustantur, hinc idem spiritus compressus, ac vi extrinseca comprimente condensatus se expandendi vim facit, qua expansione eadem annulares fibrae agunt, & contractionem ineunt.

Idcirco musculosae plerumque animalium recenter mortuorum partes acu punctae contrahuntur, ac convelluntur ob elasticam vim, quam animalis spiritus illis adhuc hospitans tubulis exercet; quemadmodum per calorem cordis oscillatorius motus excitatur, quia idem spiritus intra fibras rarefactus earundem contractionem suscitatur, quae alterna est, quippe varius fibrarum ordo ac diversa directio, ob quam aliae aliis se invicem decussantes contrahuntur; exhalata vero spirituum materia, ut aliquandiu post animalis mortem contingit, ac relaxatis iisdem fibris systalticus motus nequaquam exsurgit.

Ligato nervo diaphragmatico, ac infra ligaturam diaphragma versus confricantibus digitis, (b) idem diaphragma amissum motum recuperat, confricatione vero aliquandiu perdurante visceris motus paulatim extinguatur, propterea quia spirituo-
sa substantia diaphragmatis fibras
inflante

inflante dispergitur, nervorumque tubuli evacuantur; hinc soluto vinculo tamdiu, ut novus spiritus descendat, ac si rursus ligetur nervus, ac digitis perfricetur prior redit motus.

Quapropter artus musculi, nisi antagonists sibi invicem contranitentibus a natura provisi fuissent, perpetua contractione devincirentur, alterumque ad latus tenderent, ut in paralyti affectis saepe observamus, praecipue in hemiplegiis, quas spasmi cynici, seu oris torturae comitantur, vel praecedunt; obstructis, vel quocumque modo relaxatis nervorum tubulis, qui ad alterius lateris musculos labiorum extenduntur, sive in ipsa eorundem propagine iisdem musculis coniuncta, sive eorundem radice, medullaris scilicet cerebri substantiae (ut rationi consentaneum videtur) portione, quae huiusmodi nervorum ramulis originem praebet. Tunc ex animalium spirituum aditu intercluso exhaustis nerveis fibris, amissoque tono, ac contrahendi vi alterius lateris musculorum E. G. dexteri, ita ut sinistri lateris tensis fibris contraniti non valeant, hi musculi priores ad se trahunt, labiaque ad sinistrum latus convelluntur.

Ceterae quoque convulsiones eandem agnoscunt originem, quotiescunque alterius lateris musculis praedictas ob causas minor, quam antagonists spirituum influxus imperiatur; hi elasticitate, seu vi contractili illis praevalentes, artus vel dorsum ipsum ad alterum trahunt latus, flectuntque, ut in Opisthoto-

nos, Emprosthotos evenit; Tetanos vero, si nimia ac praeternaturalis earundem fibrarum inflatio undique aequalis ex spasmodica crispatione spirituum egressum, sanguinisque interdum progressivum intra musculos motum sufflaminante, aequalis enim spirituum coagmentatio aequalem muscularium fibrarum contractionem parit, proinde una, & aequaliter tensis anterioribus, ac posterioribus utriusque lateris musculis, immotum rigidumque manet corpus.

Ex inaequali spirituum influxu, sive inaequali muscularium fibrarum inflatione oritur tremor, similemque ceteri convulsivi motus trahunt originem; ergo ex dictis concludere fas est: solidorum elasticitatem ab animalibus spiritibus fibras tum nerveas ac membraneas, tum carneas ac tendineas instantibus praecipue pendere, non exclusa sanguinis massa sui generis vasa implente.

CAPUT XVI.

De sanitatis ac morbi natura eiusque causis.

Quemadmodum vita in sanguinis, ceterumque humorum circulari motu consistit, qui ex solidorum reciproca contractione, & relaxatione proficiscitur, ita sanitas, quae vita est incolumis nullisque symptomatibus; quibus vel proxime, vel remote extinguí possit, contaminata, erit perfecta, temperata ac non interrupta liquidorum circulatio, ab aequabili, harmonica, liberaque solidorum oscillatione pendens, quae corpus vegetum

tum ad proprias ac consuetas actiones alacriter ineundas idoneum reddit.

Nullibi interrupta in sano corpore esse debet sanguinis aliorumque humorum circulatio, sed aequabilis, ut viscera cuiuscunque generis proprio muneri satisfaciant, existente E. G. in cerebro huiusmodi motu, quod, tamquam commune sensorium animae functionibus serviens, a natura constructum fuit, cuiusque in cortice, ac medullari substantia animalium spirituum separatio celebratur, sensus vigent, ipsaque mens ad intelligendum, ingenium ad excogitandum atque operandum aptum experimur, sicuti perbelle ipse Democritus, referente Hippocrate lib. de natura humana: *Augescit intelligentia praesente sanitate, at ubi corporis habitus aegrotat, neque mens ipsa alacritatem habet ad virtutis meditationem &c.*

Animalibus spiritibus sufficienti ac moderata quantitate in nervorum propagines descendantibus, tum viscerum, tum muscularium fibrarum tonus viget, cor fortes, sed ordinatas edit oscillationes, elasticae quoque arteriarum, ceterorumque vasorum tunicae impellenti sanguini mediocriter resistunt, ac post diastolem ad eundem compellendam satis constringuntur, musculorum vires adsunt, ac prompta eorundem actio, ideo sanus homo agilis corpore, facile incedit, consuetos labores aequo animo fert, tandem actionem, cuiuscunque generis sit, prout suum requirit munus alacriter suscipit.

In pulmone ob liberum sanguinis traiectionem, ac ob nervorum bron-

chia, & intercostales musculos repentium mollitiem, elasticitatem, ordinatosque contractionis motus libera habetur respiratio. Ventriculus ob tunicae muscularis robur, ac optimi succi gastrici promptam separationem alimenta atterit, satisque fluida reddit, intestinorum quoque officium in peristaltico motu consistens recte se habet. Ita ex facili ac libero sanguinis progressivo motu per vascula etiam minima cordisque impetui remotiora, quemadmodum in hepate ipsum sanguinem, plerumque e vena porta contiguisque visceribus, pancreate, liene prodeuntem, recipientem, optima, ac sufficiens bilis secernitur, necnon pancreaticus succus; idcirco prompta chyli a fecibus separatio, prompta eiusdem per oscula lacteorum assumptio, promptaque harum per bilis stimulum intestinale tubum afficientem, earumque cavitatem lubricantem, expulsio; quibus primae perficiuntur digestiones, sensibiles evacuationes tum fecum, tum urinae non deficiunt.

Cuncta viscera, glandulae meatus excretorii suum implent secernendi munus; nam optima sanguinis crasis partibus, debitam proportionem inter se ipsas servantibus, constat, serosa scilicet, & crassiori, seu rubra substantia, quae cum prima secundum Boyleum, Mazinum, Hoffmannum est in ratione sub sesquialtera, eiusque globulis, quibus constat satis elasticis, lubricisque capillaria vascula facile permeantibus. Serosa

fatis fluidis particulis, quibus intermiscentur tenuiores, sed glutinosae, nempe lymphaticae, omissis tenuissimis, quae animalibus spiritibus materiam suppeditant.

Non solum vero temperatus est sanguis ratione principii, seu partium componentium qualitate, ac inter se ipsas combinatione, sed etiam in quantitate, quae nec excedit, nec deficit, ita ut vasa impleat, non distendat, tono ac robore afficiat, non opprimat, immo eorundem elasticitatem, atque oscillationem provocet, quae secundum Mazinum (a) est in ratione homologa fluid. & solid.

Solidae quoque partes, nempe vasa, flexibiles, elasticae, utpote sufficienti spirituum copia inflatae, huiusmodi fluida in reactione compellunt, attenuant, chylique partes assiduo validoque renisu quatunt atteruntque, donec sanguineis globulis, sive serosis, sive rubris assimilentur; in quo secundae digestionis, quae in vasis fiunt, consistunt. Porro fluida sic attenuata, attritaque sat perspirabilis materiae tenuioris cutis porulis sub epidermide oblique patentibus praebent, quorum ora adeo subtilia, ut Leeuwenhoekius (b) 125000. intra vulgaris grani arenae spatium hiare supputet, corpusque sufficienter exhalat, quae exhalatio non solum in corporis peripheria celebratur (c), verum in ore, faucibus, naribus, oesophago, larynge, pulmonibus, ventriculo, intestinis, vesica, eiusque

exhalationis tanta est copia, ut juxta Sanctorii primi inventoris dogma cum ingestis fere 5. ad 8. proportionem habeat, ceterisque sensibilibus evacuationibus ut 5. ad 3. Quare homo sanus bene appetit, viribus pollet, placide dormit, pulsum habet ordinatum, nec nimis rarum, nec frequentem, nec exilem, nec nimis turgidum, faciem, ac totam cutem bene coloratam. Haec igitur praecipua sunt sanitatis signa, quibus opposita morbum adesse, vel proxime futurum indicabunt.

Quamobrem facies decolor, vel nimis colorata, vel obscura, corporis lassitudo, cibi fastidium, sitis, mentis opacitas, aliaque praesentis morbi erunt indicia; sed ad morbi definitionem transeamus.

Morbi definitio apud nonnullos legitur: naturalis in praeternaturalem statum mutatio, quae licet morbo conveniat, minime tamen generalem morbi causam explicat, nec claram morbi ideam nobis exhibet. Nec adaequatam censo Sydenhamii definitionem scilicet: *Morbum esse naturae conatum ad materiae morbificae exterminationem in aegri salutem omni ope molientis.*

Haec definitio peculiaris profecto est, ac febres tantummodo amplectitur, in quibus natura suos intendit motus, acceleratque, quod ex cordis, arteriarumque pulsu frequentiori manifeste deprehenditur; plures enim morbi absque naturae conatu fieri manifeste apparet; Apoplexia

(a) *Dissert. VIII. de Temperamentis Inst. M. par. 427.*

(b) *Transact. 106. 127.* (c) *Boerh.*

plexia scilicet, quae fit a cerebri vasorum, five sanguiferorum, five lymphaticorum, praeternaturali distensione animalium spirituum secretionem sufflaminante, vel alterutrum diaeresi, vel scissura, aut alia quacunque causa fluidi in eodem cerebro effusionem progignente, ob quam compressis medullaris substantiae tubulis spirituum descensus ad motus organa prohibetur, mens stupet, sensus aboletur, & motus deficit, a naturae conatu minime pendet, immo vera est eiusdem naturae in cerebro oppressio, quae si enormis, lethalem quoque morbum constituit.

Plures morbi pectoris, veluti asthma, five ficcum, five catharticum, hic a glutinosa lympa bronchiorum glandulas infarciendo, ac prae nimia congerie pulmonum vesiculas obruente oritur, quatenus aeris ingressus difficilior, tardiorque egressus, ille vero, nempe ficcum, a spasmodica intercostalium nervorum crispatione, ob quam pulmonares vesiculae coarctantur, ac intercostales muscoli in assidua contractione detinentur, aut paralyseos affectione, ob quam relaxetur pulmonarium vesicularum tonus, ac ipsorum musculorum actio deficiat, nec hi quoque sub hac Sydenhamii definitione comprehendendi possunt. Membranacei tumores, five polypodes vasis, vel cordis cavitatibus adnascentes, hydropes, tum universales, tum particulares, tumores cuiuscumque generis, necnon ulcera,

five viscera, five ossa, five partes musculosas, necnon cutaneas infestantia, aliique plurimi indefiniti morbi, quos nostrum corpus afficere passim observamus, in huiusmodi naturae conatu non consistunt, nec ab ipso procedunt. Si morbi itaque causam proximam, five immediatam pensitemus, veram eiusdem definitionem assequemur, quae profecto erit.

Animati corporis oeconomiae five vitalis, five animalis actio perturbata, qua posita, mala eiusdem corporis afflictio praesto est.

Adaequatam esse hanc definitionem neminem inficiari arbitror, cum claram morbi ideam nobis afferat, nullus enim morbus sane prodibit, absque actionum, five vitalium, five animalium perturbatione, & vicissim nulla subsistet harum actionum perturbatio, ac interruptus ordo absque morbi praesentia; quodcunque igitur has actiones perturbabit pro causa morbi habendum est.

Huiusmodi actionum ordo perturbari potest, quotiescunque morbifica causa solidorum, & fluidorum ordinatum, ac naturalem motum, five in una, five in pluribus corporis partibus commutet.

Solidorum fluidorumque motus perturbari potest ex mala, seu praeternaturali eorundem affectione, quae ipsa vel seorsim, vel coniunctim subeat. Solidorum affectio vel proficiscitur ab innata eorundem vitiosa structura (hic enim de internis, ac dispositivis morbi causis sermo est,) hoc est elementarium partium fibrillas componentium cohaesione (a), quae prout stricta,

vel

(a) Bagl. Schreiberus Hecqu. Hook.

vel laxa, robusta, vel debilis erit eadem fibrilla, vel a vitiosa fluidorum intra vasa percurrentium compage, ac diathesi.

Si ex vitiosa structura proficiscatur solidorum affectio, sitque ex nimia cohaesionis vi, rigidus, ac durus erit fibrarum tonus, hinc difficilis earundem flexio, nimiaque fluidis impellentibus resistentia, vasis enim utpote huiusmodi fibris constructis, idem est tonus; quare brevior minusque elastica erit arteriarum oscillatio, ac minor impetus, quo fluida impelluntur, ideo frequentes earundem tumefactiones, distensiones, quae a remorantibus lentiusque circulantibus fluidis oriuntur, quibus ipsae stagnationes, glandularumque sive excretoriorum ductuum obstructions succedunt, proinde partium chylosarum prava comminutio, trituration, quae ad vitalem ac naturalem corporis oeconomiam summe est necessaria.

Chylosae particulae ut capillaria, seu minima vascula permeare queant, sanguinis naturam assequi fas est, scilicet sphaeroideam figuram sanguineis globulis similem, aequalem, ac quodammodo laevigatam superficiem habentibus, ut praedicta minima vascula unicum tantum globulum admittentia, libere permeare possint, ad fluidorum circulationem non interruptam servandam, asperam enim sive minus laevigatam superficiem habentes facile invicem adhaerere possunt iidem globuli, ac nimis tenacem, viscosam sanguinis compagem efficere, quae ad minima vascula traducta, inflammationes, stagnationes, in glan-

dulis, meatibus secretoriis obstructions, infarctus parere solent. E contra si globulorum superficies vi solidorum polita, & ad sphaeroidem accedens, quippe rotunda est etiam vasorum cavitas, prompta eorundem traiectio ac motus progressivus non interruptus habebitur.

Insuper ut iidem globuli partem rubram constituentes, qui ex minoribus, nempe serosis invicem coeuntibus, resultant, sufficienti cohaesione construantur, ne ipsa pars rubra in serum solvatur.

Huiusmodi posita affectione spasticis contractionibus solida obnoxia sunt, quae ab inaequali spirituum animalium distributione oriuntur, eo quia fibrarum tonus nimis rigidus nervorum tubulos, modo hic, modo illic magis coarctat, ita ut eorundem spirituum influxum inaequalem reddat, quare contractis illinc, obtusisque vasorum cavitatibus circulantia fluida necessario remorantur, si rubra, inflammationes, si alba, rheumaticae affectiones contingunt, ex quibus iuxta loci diversitatem diversi quoque insurgunt morbi. In cerebro E. G. apoplexiae, comata, vertigines, mentis stupores, alique huius generis morbi; in pulmonibus rheumaticae affectiones, pleuripneumoniae, phthises, asthmata; in ventriculo cardialgiae, anorexiae, vomitus, apopsiae, dolores; in hepate morbi regii, hepatitides, scirrhusi tumores, oppilationes, ex quibus lentae febres hypochondriacae dictae; in mesenterio cacochiliae, glandula-

rum

rum infarctus, lymphae secretiones impeditae, proinde difficilior, ac minus prompta chyli traductio per vasa lactea, crassior consistentia; in intestinis, ex miliarium glandularum interceptis secretionibus, ex bilis inopia motuque peristaltico interrupto, alvi siccitates, stagnantium succorum corruptiones, quae tormina ac dysenterias pariunt: in utero fluida cunctanter circulantia occlusisque interdum vasis violenta eorundem distensio contingit, non sine membranarum ipsius uteri distractione; hinc ob nerveorum plexuum connexionem ac consensum, convulsivae affectiones, capitis dolores, mentis alienationes, sensuum stupores, epilepsiae aemuli; huc accedunt menstruorum suppressiones, quae plurimorum morborum radices esse solent.

Praeterea nimia fibrarum rigiditas vasorum resistantiam augendo angustiora eadem reddit: nam ab infantia usque ad juventutem crescere corpus passim observamus, quatenus vasa, & cuiuscunque generis tubuli dilatantur, atque elongantur, eorumque dilatatio maior, (a) quam systoles, quod contingit, quatenus molles flexibilesque sunt fibrae huius aetatis, ita ut quo molliores sint, ut in infantia esse solent, eo citius corpus augeat, lente vero in pueritia, lentiusque in adolescentia, quoniam fibrarum, vasorumque tonus rigidior, quo fluidis circulantibus resistunt eadem vasa, ac dilatationi

aequalis succedit constrictio, ideoque nec appellentibus succis meatuum diametri ulterius dilatari nequeunt, ex quibus inferre licet.

Qui huiusmodi fibrarum tonum nacti sunt, parvi corporis esse debent, nisi cor maiori systolis vi praeditum a natura consequantur, nec pingues, nec succosos, sed sicci temperamenti, atque habitus, quia ratio resistantiae solidorum, fluidorum vim superat, vasaque angustiora remanent; illa enim vasa, quae si mollibus fibris contexta essent quatuor datis E. G. mensuris diametrum aequalem in accretione nanciscerentur, ad tres, vel tantum duas extendi possunt; siquidem momentum contractionis in huiusmodi vasis fluidorum impetui praevallet, globulique sive sanguinei, sive lymphatici minori quantitate admissi eadem vasa parum dilatant, quapropter ob vasorum cuiuscunque generis angustiam, solidae partes cum fluidis comparatae rectam proportionem excedunt. Cellulae quoque adiposae, membranae, atque omenti paucam continent pinguedinem, quia se nimis contrahendo magnam illius partem excludunt, quae contractio, si talis evadat, ut minima, et simplicissima occludat vascula tenuiorem lympham continentia, quae partibus solidis, membranosis scilicet, nerveis atque tendinosis nutrimentum praebet; tunc eadem partes deficiente lymphâ praedicta eorum vascula influente,

(a) Cap. XI. huius.

ente, atque dilatante, in quo nutrimentum, & accretio consistit, labefactantur, ac contabescunt, eo magis si salino asperis vellicantibusque particulis stimulo irritanti afficiantur, quod tabes nervales constituit, seu atrophias infantibus puerisque adeo familiares, quia in his sicuti faciles quidem huiusmodi solidorum spasmoidicae contractiones, & convulsivi motus, quibus in affectibus verminosis, vel lactis male digesti corruptione saepe occurrimus, ita eadem vascula nutritiam lympham continentia, ex praedictis universalibus contractionibus, quae etiam timoris incussu haud raro excitantur, obtusa, atque clausa huiusmodi malorum proxima sunt causa.

Alterum solidorum vitium priori adversatur, ac in nimia villorum laxitate consistit, quae viscerum, membranarum, nervorum, ac vasorum cuiuscunque generis atoniam progignit, nec non ipsorum musculorum imbecillitatem. Haec laxitas a fluidiori, & aquosiori substantia elementares fibrillarum particulas colligante, imprimis oritur, ex qua nimis laxae cohaerent eadem particulae. Quare fluidorum impulsu magis, quam par est, dilatantur vasa, nec contractio dilatationi respondet.

Idcirco sanguinis crasis, quae ab elastica vasorum compressione pendet, male se habebit; nam chylosae particulae sanguineam massam ingressae imbecilliori arteriarum sy-

stole, haud sufficienter comprimuntur, atterunturque, nec rubrorum globulorum figuram, & consistentiam plerumque assequuntur, quapropter minimas arteriolas difficulter subeuntes huc illuc detinentur, viscerum canaliculos obstruunt, glandulas infarciunt; hinc liquidorum necessariae secretiones intercluduntur, veluti bilis in hepate, pancreatici succi in pancreate, & gastrici in ventriculo, ex quibus sequitur primo alimenta ibi satis macerari non posse, ad promptiorem eorundem solutionem, nec a ventriculo exeuntia satis dilui ad faciliorem purioris a fecibus separationem, nec in intestinis ex bilis inopia necessarius adest stimulus ad motum peristalticum concitandum.

Ventriculus cuius tunicae imbecillioribus fibris donatae, si nimia cibi, & potus copia ingeratur, ab huius pondere, ac volumine praeter modum distenditur, eiusque vis contractilis, utpote languidior facile obruitur; hinc ex opposita, & contraria causa idem sequitur malae digestionis effectus, in illis scilicet, quorum solida sunt rigida, ac ventriculi membranae erethismo saepe devinciuntur, ita ut diversimode flecti, coarctari alimentaue tritrandae circumplecti non possint, de quibus supra, (a) ac in his quorum ventriculus, ex fibrarum laxitate, atque atonia imbecillis, alterna fibrarum circularium, & longitudinalium valida contractione non potitur, perinde,

(a) Cap. XIV. huius.

perinde, nec ingesta satis conteruntur, quae vel in stomacho diutius immorantia, visceris calore corrumpuntur, nerveamque eiusdem tunicam, aut nimis distendendo, aut vellicando, molestia afficiunt, vel nondum satis contrita ad intestina traiciuntur, e quibus, vel cito eliminantur, si adfit praeternaturalis, ac inordinatus intestinalium tunicarum motus, ut in lien-teria ac coeliaca passione, quibus excrementa chylosa, aut cibi inconcocti eundem colorem, ac consistentiam habentes, ac ante deglutitionem, eiciuntur, vel ibidem aliquandiu remorantur, ac plicis valvulisque inhaerentes, ipsa mora pessimam induunt naturam, acuuntur sales, ac volatiliores fiunt, ipsamque nerveam tunicam feriunt, insuper cibi male digesti particulas scindunt, ex quibus aeris molecule ibi latentes, ac divisa extricantur, & coeunt; maioremque elasticitatem acquirunt, per quam se magis expandentes intestinale tubum violenter distendunt, ideoque huius spasmodicae contorsiones, tormina, rugitus, diarrhoeae superveniunt.

Huc pertingunt universales cacochymiae, tum sanguinis, tum lymphae ceterorumque succorum ab his prodeuntium, quae in quibusdam visceribus peculiari atonia laborantibus, non solum obstructions, verum etiam tumores progignunt; nam vis contractionis illorum vasculorum, cum sit imbecillis, nitenti fluido haud satis renititur, eo magis quia crudarum partium congeries earundem tunicas nimium distendit, quae

partes tum ob irregularem figuram, tum ob crassitiem, nec extremis arteriis in venas traici, nec secretorios ductus inire queunt; quamobrem fluidorum stagnationes contingunt, quibus aliquandiu perdurantibus, cum ex impedito progressivo motu augeatur vasorum distensio, tumores emergunt, qui si ex cruditatibus frigidis paucis, vel admodum fixo sale donatis in glandulis, five excretoriis canaliculis inhaerentibus exoriantur, frigidi, indolentes, ac scirrhosi evadunt, si vero multis, aut volatilibus salibus scateant, ac in arteriis sanguiferis praecipue fiat congestio, dolentes, lancinantes, ac inflammatorii fiunt tumores, qui in abscessus abeunt, quoniam acriores fiunt in stagnatione sales, ac scindendo tumoris suppurationem accelerant.

Obstructiones glandularum in articulis liquidum synoviale separantium, cartilagine, ligamenta ac musculorum tendines lubricans, articulares efficiunt dolores; remoratus vero sanguis in arteriis musculorum membranas contextibus progressivum illius a corde venientis motum impedit, ideo turgescunt eadem arteriolae, ac refluentes, & ad latera nitente sanguine, distenduntur non sine membranarum distractione, quae rheumaticos parit dolores.

Praeterea laxam sanguinis compagem in iis, qui universalem solidorum imbecillitatem nacti sunt, perspicimus, ex qua innumera quasi morborum myriades originem trahit.

Cachexia imprimis, quae pallidum, seu potius male coloratum reddit corpus, tumida mollitie affectum saepe cum febre, quia labefactato solidorum tono vascula, praecipue minima, valide constringi nequeunt ad fluida impellenda, quae nimis crassa rudibusque particulis conflata eorundem extremitates aegre permeant; quare lente procedens sanguis laxae compagis nimiam feri quantitatem e sinu suo dimittit, quia turgent vasa lymphatica, quibus si accedant cutaneorum meatuum infarctus, ac perspirabilis materiae prohibita exhalatio, insufficiens urinae excretio, sicuti ex imbecilliori cordis, vasorumque systole, a quibus ceteris paribus utraeque pendent secretiones, saepe contingit, feri copia augetur; haec vero non solum sui generis vasa, verum etiam lymphatica tenuiora, eorum diametrum vi propriae molis distrahendo, ac dilatando inflat, e quibus cum secedere nequeat per angusta orificia lymphae tantum permeabilia (a) universale oedema, hydropem anasarcam, vel leucophlegmatiam efficit.

Si vero mesenterii glandulis, hepatis, & lienis vasculosa viscera crudorum crassorumque fluidorum copia infarciantur (b) atque indurentur, non modo chyli in thoracicum ductum traectio intercipitur, non modo bilis secretio prohibetur, ac sanguis bilioso succo retrogrado coinquinatur, sed tum sanguinis, tum lymphae perturbatur directio.

Sanguis progressivo in venas transitu impedito regurgitans, vascula nimis distrahit, a quibus saepe discissis erumpit: in ventriculo per vasa brevia; unde cruenti vomitus; in intestinis per haemorrhoidales internas: unde fluxus hepatici dicti.

Lymphae autem in venas sanguiferas aditu intercluso lymphatica vasa his visceribus copiosa adeo inflantur, ut hydatides formet, quibus disruptis, (c) lethalem eiusdem lymphae in abdominis cavitatem profusio sequitur, quae hydropem ascitem constituit.

Pulmonum quoque atonia in plurimos pectoris morbos nos inducit; sanguine enim lente fluente per extrema vasorum pulmonarium, ob languidam arteriolarum systolem, stagnationis periculum imminet; lymphae quoque tarde in sanguinis massam redeundo tenacem viscosamque consistentiam acquirit.

Hinc pleuritides, pleuripneumoniae legitimae ac spuriae, seu catarrhales affectus pulmones obruentes, non sine tussi. Insuper vesicularum pulmonarium ob fibrae laxitatem fluidorum ponderi, ac nisi parum resistentium vasa nullo negotio turgent, proinde tumores fiunt, qui corrupti in vomicas, abscessus, vel tubercula abeunt.

In capite gravativi dolores, soporosi affectus cuiuscunque generis corizae; hinc e quadam cerebri fibrarum

(a) V. Cap. 3. huius. (b) Hoffmann. Med. rat. Syst. lib. 3. p. 67. (c) Gal. Cap. 7. Aph. 55.

brarum medullarium parte, maiori & peculiari atonia laborante, animalis spiritus secretio intercipitur, ac nervi, vel spinalis medullae tractus ex eadem procedentes exinanuntur, proinde nervei plexus ex ipsis medullaribus partibus syderatis oriundi animali spiritu defraudantur, quod paralytica reddit membra. Praeterea a sanguine ceterisque liquidis lente circulantibus per vasa minima scorbuticae affectiones insurgunt; Salinae enim particulae facilius secedunt, utpote graviores delabuntur, ac membranosis partibus huc illuc defiguntur, & coagmentantur, hinc dolores rheumatici, arthritici, qui scorbuticos saepe aggredi solent.

Haec salium coagmentatio, si in tenuioribus membranis, ac vasculis fiat, quemadmodum in gingivis, harum disruptio, ac laceratio sequitur, quae prae aliis symptomatibus eundem morbum comitatur. Cruoris massa ab horum salium aggerie coinquinatur, crasis destruitur, rubri globuli asperi fiunt, lymphae oleosa substantia depravatur, ac salinis spiculis redundans acrimoniam, vel salsedinem contrahit, quae cum nutritioni inepta sit, extenuatur corpus, vires languent. Sanguis ita coinquinatus cutaneis arteriis haerens, ob vasorum laxitatem, propriamque diserasiam secretoriorum meatuum orificia, licet angustiora, violenter permeat, ac sub epidermide extillans maculas plerumque atras efficit.

Quapropter in huiusmodi morbo affectis, si levis etiam ac fortuitus contingat vulnus, ex quo cutanea tantummodo vasa feriantur, quemadmodum in cucurbitulis scarificatis, ulcera prodeunt incurabilia, ut in nonnullis observavi, qui inscio, vel annuente medico, cucurbitulas sibi applicari voluerunt; his profundae plagae supervenerunt, quae aegros ad sepulchrum sectatae sunt; Fluidorum namque diathesi depravata laxoque vasorum tono scissarum partium unio, atque cicatrificatio fieri nequit, immo prope vulnus grumescens ac stagnans sanguis, & lymphae corrumpuntur, ac dehiscunt plagae.

Ex his, quae vitiosa solidorum structura ad morbos progignendos, quam maxime apta diximus, colligi fas est, plurimos, immo plerisque morbos solidorum vitio, nisi immediate, saltem mediante fluidorum affectione ab hoc contracta, oriri (a).

Fluida per se ipsa inertia solidorum impulsu moventur, eorumque qualitas, textura, ac crasis a cordis, & arteriarum systole forti, vel debili, rara, vel frequenti, a vario membranarum tono, ac diversa minimorum vasorum viscera constituentium symmetria, ac structura pendet, quae prout maius, vel minus solidorum momentum supra se ipsa, maiori, vel minori impetu moventur, prout maior, vel minor frequentia, tarde, vel celeriter circu-

K 3

lationem

(a) Hoffmann. Med. Syst. I. 3. cap. 6.

lationem absolunt, ita a diversa vaporum elasticitate, amplitudine ac symmetria, diversimode atteruntur, attenuantur, longam, vel brevem in visceribus moram trahunt, ex quibus varia liquidorum crasis, varia terrearum partium sales componentium coagmentatio, proinde varia salium fluidis innatantium figura, & copia.

Sint duo subiecti, quorum temperamenta dissimilia; hi licet eadem victus ratione utantur, etiam ab infantia, prorsus diversam, immo inter se oppositam liquidorum naturam nanciscuntur. Ipsi infantes, licet eorum corporis habitus idem, vel parum dissimilis ob fibrae molliem videatur, eiusdem nutricis lacte etiam simul nutriti, ut gemellis interdum accidit, quorum matres sive amore, sive inopia ambo collactat, diversam fluidorum crasim, consistentiam, ac vitium consequuntur, quod a diversa morborum indole, quibus obnoxii sunt, ac temperamenti natura clare evincitur.

Dices: quasdam fluidorum affectiones, hoc est praeternaturalis salium copia, & qualitas, quibus interdum scatent fluida, quibusque nonnulli morbi proficiscuntur, scilicet: Impetigines, herpeticae affectiones, elephantiasis, cancrofi tumores, a peculiari solidorum vitio, structura atque motu procedere rationi non est consentaneum.

Respondeo: haec salium copia, ac qualitas, vel ab utero matris originem ducere arbitraris, vel a

victus genere. Si ab hoc quis inficiabitur? Quoniam epulae multo sale, vel plurimis aromatibus conditae; quae tum fixis, tum volatilibus salibus abundant, ideo chylus his salibus scatens sanguinem ceterisque fluidis salium exuberantem copiam impertitur.

Verumtamen etiam ii, qui ab eiusmodi epulis cupediisque se abstinere, ac simplici, & frugali utuntur mensa, praedictos ineunt morbos, qui a copia salium, quibus sanguis, & lymphae abundant, progigni autumant.

Tunc igitur salium copia ab utero matris ortum habuisse dices, quotiescunque matris huiusmodi salinis particulis infecta sint fluida; propterea quia gestationis tempore haec ipsa, cuiuslibet sint generis, foetus nutritioni, & accretioni inserviunt.

Quis tamen credet has salium particulas ab edito foetu non solum servari, verum etiam multiplicari, ita ut crescente corpore eadem proportionem salium copia augeat, atque adulti corporis fluida, aequae ac in foetu coinquinantur? Quod cum sit absurdum, res sane sic se habebit; Posita huiusmodi salium in nuper editorum liquidis copia, haec crescente corpore, ac fluidorum mole per alimenta, quae ingeruntur, augecente, diluetur, habitaque ad ipsam fluidorum molem ratione, valde minuetur, quoniam sicuti adulti hominis corporis pondus, cum infantis pondere comparatum vigesies facile superat, eadem quoque, vel saltem

saltem proxima huic erit fluidorum proportio, proinde salium quantitas quae infantis fluida nimis inficiebat, in adultum corpus delata adeo maiori fluidorum copia commiscetur, ut temperata evadat, vel a temperie parum dislet; ergo partium salinarum copia, si adsit, quae fluida nostri corporis inficiat, per quas acrimoniam, vel falsedinem sapiant, a vitiosa solidorum structura, atque oscillatione plerumque oritur.

Quotiescunque enim nimia fibrae rigiditas adsit; ita ut vasa, praesertim minima, nimis lentam concisamque oscillationem edant, vel morbosa eiusdem fibrae atonia, ob quam momentum solidorum imbecillius, ac fluidorum momento inferius, nec vasorum distensionis respondeat resilitio ad fluida in abditos viscerum, vel remotos glandularum etiam cutaneorum canaliculos impellenda adeo necessaria; tunc eadem fluida per haec vasa lente progredientia ficas, ac terreas particulas utpote graviores facile deponunt, quae coeuntes sales fixos constituunt (a), quorum species diversa, prout varia earundem partium elementarium cohaesio, ex qua figurae, & angulorum diversitas prodit.

Ex plantarum quoque natura validum argumentum promere fas est, quo salium copia, atque species a diversa solidorum structura, tono atque motu pendere evidenter osten-

ditur. Herbae diversi generis, quae in eodem agro, immo in eadem, ut ita dicam, terrae gleba feruntur, vel sponte nascuntur, diversi saporis edunt succos; quaedam amaras E. G. quaedam acres ac corrosivos, quaedam insipidos, prout diversam salium copiam, atque speciem continent (b). Hos itaque sales herbarum, quantitate, ac specie diversi, a dissimili herbarum structura ortum ducere, quis neget, quotiescunque eadem terra foveatur illarum semen, eademque alimenti materia crescant?

Quid de plantis arboreis dicemus, quae licet enormis magnitudinis, parvulo emittuntur semine, eorumque moles in eadem terraeducta diversis juxta speciem scatent succis, ac varii saporis, & odoris edunt fructus? Admirabilis sane videtur infitionis effectus; Virgae enim etiam si multae, singulaeque ex diversae speciei arboribus recisae in folius plantae truncis huc illuc inferantur, quaecunque virgarum propriae speciei incrementum suscipit, ac peculiare edit fructus, qui tum colore, figura, & magnitudine, tum odore, & sapore a propria specie nullo modo recedunt; diversa igitur salium quantitas, & qualitas ex uno, & eodem alimento, sive succo colligitur, si idem succus per varias tubulorum congeries diversae magnitudinis, consistentiae, ac directionis traiciatur.

Concludendum itaque est vitia fluidorum, quae a causis tantummodo

(a) *Gugl. de n. Sal. Hoffm. diff. de Sal.* (b) *Bel. de Sal. Plant.*

modo intrinsecis ac dispositivis emergunt, plerumque a nimis laxo, vel rigido solidorum tono, vitiosa vasorum textura, symmetria, ac magnitudine originem trahere.

Mala, quae intrinseco, & conaturali fluidorum praecipue vitio repeti possunt, ea sunt, quae a nimia plethora exoriuntur, attamen non sine solidorum vitiosa dispositione.

Inter veteres, morborum originem ex repletione recte animadvertit Hippoc. uti apparet (a). Deinde Celsus optime admonet (b) his verbis: *Si plenior aliquis & speciosior, & coloratior factus est, suspecta habere debet bona sua: & (c) ea corpora, quae more athletarum repleta sunt, celerrime & senescunt, & aegrotant.*

Sanguis copiosus vasa distendit, eorumque momentum facile superat; idcirco illa tollitur proportio in qua aequilibrium inter solida, & fluida consistit.

Arteriae sanguine nimis turgidae se satis constringere nequeunt, eisdemque impulsu violenter dilatatae debita celeritate, ac impetu non resiliunt; quapropter sanguis ab earundem systole in capillaribus vasculis a corde remotioribus minus compellitur, ubi maior vis elasticae necessitas ad progressivum motum sustinendum, lente movetur, sanguinique a tergo venienti magis resistit; hinc illius momentum tum ratione massae, tum ratione resistentiae, ob quam

regurgitat, ac repercutitur, cor magis gravat, eique magis resistit; qui praeter modum dilatatur, ac distenditur, idcirco palpitantes eiusdem cordis, immo ex diuturna distensione, ventriculorum, vel auricularum aneurismata. (d) Praeterquam quod idem cor copioso, ac percusso sanguini magis dilatatus ratione elasticitatis, qua pollet, vehementiori systole in ipsum sanguinem irruit, qui in arteriis praesertim proximis fortiori impetu impingens earundem tunicas distendit, ac distrahit, ita ut circulares fibrae interioris praecipue tunicae scindantur; unde enormis ac permanens succedit dilatatio, ac lethale aneurisma (e)

Sublato itaque inter solida, & fluida aequilibrio, atque oppressa a nimia fluidorum copia solidorum vi, sanguinis circulatio necessario retardatur: (f) haud satis atteritur sanguis, eiusque partes nec minuuntur, nec idoneam figuram acquirunt, sed crassiores factae ad morbosam cacochymiam disponuntur; nam tum ex retardatione progressivi motus, tum ex globulorum crassitie huc illuc facile stagnationes contingunt, praesertim in abdominalis visceribus a cordis potentia remotioribus, ubi minor per se sanguinis velocitas, quia ut ex Anatomia discimus, sanguis e ventriculo, toto intestinorum anfractu, mesenterio, pancreate, & liene per venae portae

(a) 3. Aphor. l. 1. & lib. 3. de dieta lib. 2. de morb. (b) lib. 2. cap. 2. (c) lib. 1. cap. 1. (d) Lanc. d. m. Cor. p. L. Bonet. Sepulcr. Anat. (e) Lanc. ibidem. (f) Hoffmann. Cap. VIII. l. 3. Med. syst.

portae ramos, quae oscillatorio motu pene destituitur, educitur, ac per innumera hepatis vascula traici debet.

Si sanguis huiusmodi per difficilem praedictae venae portae tractum ad hepar in ventriculi, vel intestinorum membranas regurgitet, ibi subsistit, vasa distendit, ac inflammatorii dolores excitantur, vel enormes haemorrhagiae, quae si ex vasis brevibus, per vomitum, si iliacis, seu haemorrhoidalibus internis, per nigras et cruentas evacuationes, se produnt, quibus si accedant succorum in glandulis stagnationes earumque ob acrimoniam in iisdem contractam vellicationes, spasmodicae contractiones excitantur; in hepate ob lentum ipsius sanguinis progressum, ac transitum ex eiusdem venae portae ramis in venam cavam, faciles stagnationes ac hepatitides, vel ex heterogenearum partium crassitie secretorum bilis ductuum, vel si maior, glandularum bilem secernentium infarctus, qui viscosam nimis ac salinis partibus saturatam eandem reddunt, quod etiam Hippoc. recte monet: (a) *Sanguis cum abundat valetudinem vitiat, quia bilis acida, et amara &c.*

In liene quoque, si sanguis per exilia eius vascula lente progreditur, maiorem visciditatem, & crassitiem contrahit; hinc non solum ipsius lienis tumefactionem, verum etiam hepatis obstructionem prog-

nit; docente Heistero, aliisque recentioribus; sanguinem e vena splenica canum aliorumque animalium incisorum effluentem, saepius tenuem, floridumque esse, nunquam vero reliquo sanguine venoso crassiorem; idcirco huiusmodi sanguinem ad reliquum crassum ex ceteris visceribus ad hepar influentem fluidiorem reddendam, & ad obstructiones eiusdem hepatis praecavendas a natura destinatum esse arbitrantur. Non tantum vero in imi ventris visceribus, sed etiam in reliquis, thoracis, ac capitis.

In thoracis visceribus, quoniam pulmonares arteriolae sanguinis copia nimis distenduntur, eorumque extrema oscula in lymphatica vasa dehiscencia adeo distrahuntur, ut eidem sanguini violenter nitenti transitum praebeant, qui e propriis vasis egressus in tenuiora protruditur subtiliori fluido, nempe lymphae destinata, e quibus cum difficulter exeat, utpote crassior, eorundem turgescenciam, ruborem ac phlogosim parit, quam dolor ex fibrarum membranacearum distractione necessario comitatur. Haec vero si in pleura, vel pulmonum superficie pleuram ferientia contingant, pleuritidem, quae pulmonum, vel pleurae erysipelas est, efficiunt, si in internam ipsorum pulmonum substantiam, pulmonias, si in diaphragmate, paraphrenitides.

Non solum sanguinis stagnationes ex vitiosa ipsius plethora, sed etiam lymphae

(a) *Lib. de Sanit. tuenda.*

lymphae subsistentia. Quoniam haec a venis sanguiferis, per quas ad sanguinem redit, ob earundem turgentiam sanguinisque crassitiem, ac lentorem excluditur, glandulisque E. G. bronchialibus, vel pericardii obtusis, atque obstructis reiecitur; hinc nimis inflantur lymphatica, ex lymphae regurgitante ac stagnante; unde pulmonum oedema, asthma cum levi febricula et tussi progignens; vel a nimia distensione disrumpuntur, si in pericardio ipsius pericardii hydrops emergit (a) cum assidua cordis palpitazione, vel saltem oppressione, ob quam languidiores edit systoles, articularumque pulsus debiliores, & exilis diametri percipiuntur.

Si in thoracis cavitate, ipsius thoracis hydrops cum asthmate, decubitus horizontalis impotentia, & ad latus vergente corpore, sensibili aquarum supra diaphragma undulatione.

Insuper plethoricorum sanguis, propter tardiores eiusdem progressum ac pessundatam solidorum vim, terreas particulas, utpote graviores, facile deponit, quae ope glutinosarum partium, quibus abundat idem sanguis, lateribus vasorum, vel cordis antris cohaerent, atque aliae supra alias stratae membranosae efficiunt productiones, (b) a quibus diversimode implicatis cellulosa, ac membranosa corpora insurgunt polypodes appellata, quorum indicia sunt, (c) imprimis ingens praecor-

diorum angustia, molesta cordis palpitatio, contracti pulsus, inaequales atque intermittentes, lipothymiae; nec vero symptomata maiori violentia aggrediuntur, si polypo affectus, vel motu, vel labore sanguinis circulum acceleret, quae postremo universale corporis oedema excipere solet.

Dissimiles tantum ratione loci in capite emergunt per plethoram morbi; retardato enim sanguine in cerebri membranis, arteriolae turgent, ac maiorem dilatationem subeunt, ex qua ipsorum fibrae distractae lancinantes capitis dolores referunt; si vero ulterius condensetur sanguis in nonnullis praedictorum vasorum, ita ut recta per axem via sanguini intercludatur, reflexionis impetus necessario augetur in articularum latera sanguinis nifus vehementior fiet, atque spasmodica meningum contractio insurget, cerebrum coarctans, spirituum secretionem perturbans, eorumque fluxus inaequales, ac vehementes reddens; ideo febres cum enormi delirio, convulsivis capitis membrorumque motibus, vigiliis incessantibus, quae phrenitidem constituunt, excitantur.

In ipsa cerebri substantia sanguis copiosus tenues eiusdem arteriolas distendit, eorumque elasticitatem, utpote imbecilliores opprimit, idcirco lente progrediente crassiores, ac male attriti globuli, difficulter permeantes adhaerent, ac obstructions

(a) *Lanc. d. m. c.* (b) *Malpigh. Lanc. ib. pro. 38.* *Alex. Macop. pecul. dissertatione.* (c) *Hoffm. Cap. VIII. Tom. 3. Med. Syst. rat.*

ctiones pariunt, sanguis vero illuc affluens progressivo motu intercepto regurgitat, ac obstructa vascula enormiter inflat, quae interdum disrumpuntur, citamque, & repentinam eodem erumpente mortem afferunt, vel solo pondere, ac dilatatione medullares cerebri tubulos comprimit, spirituum separationem atque influxum prohibet; unde fortes, ac saepe lethales apoplexiae nascuntur, si cerebri sanguifera vasa plerumque obstructa, & undique valde turgida sint; si vero peculiari tantummodo regione obstruantur, ac turgescant, paralytes fiunt, quae ad illa pertingunt membra, quorum nervei ductus obstructae cerebri regionis propagines sunt.

CAPUT XVII.

De reciproca solidorum vi, resistentia, & aequilibrio.

Non solum inter liquida & solida aequilibrium praestandum est, verum etiam inter solida, & solida, sine quo oeconomiae tum vitalis, tum animalis actiones perturbantur.

Non solum determinata sanguinis, & liquidorum quantitas esse debet, ut ait Bagliu. (a), ne si excedat, impulsui nimis resistat (ut in plethoricis, ac succi plenis contingit) vasa nimis distendat, earumque elasticam vim obruat, ita ut se satis constringere ad ipsa impellenda liquida non possint, de quo

superiori capite egimus, ne vero si deficiat, solidorum contractilis vis liquidi contenti proportionatam resistentiam superet, quod in nimia sanguinis evacuatione non raro observatur, in qua convulsivi motus superveniunt, quia imminuta sanguinis quantitate vasa implente ac membranosis nerveisque plexibus resistente, hi in contractionem abeunt. Insuper cum inaequalis saepe fiat sanguinis intra vasa imminutio, eorumque inaequalis depletio, musculi, quorum vasa pleniora, ceteris antagonisticis praevalendo convulsivis attractionibus artus movent, ac viscera afficiunt, monente Hippocrate (b). *Ex repletionem vel inanitionem convulsio fit.* Praeterea vasorum nimiam repletionem, vel inanitionem sanitati obesse idem animadvertit Hippocrates (c).

Verum aequilibrata & reciproca esse debet solidorum vis, ac momentum, quo fluida impelluntur; cordis E. G. systaltica vis cum arteriarum resistentia proportionem servare necesse est; Arteriae enim praecipue maiores, ipsique cordi proximae, quae vehementiorem sanguinis impetum sustinent, si imbecilliores circularium fibrarum tonum natae sint, praeter modum distrahuntur, nec distractioni respondet contractio, ideo in praeternaturalem dilatationem abeunt, quam non raro interioris tunicae scissura, & laceratio sequitur, quae verum aneurisma producit.

L 2

E con-

(a) *Spec. lib. 1. d. Fib. m.* (b) *Secl. VI. aphor.* (c) *De Vict. acut. n. 21. 258.*

E contra, si duriori earundem fibrarum consistentia donatae sint arteriae, ac necessaria mollitie destituantur, sanguinis impulsui parum flectuntur, proindeque ex minori celeritate, ac spatio, quem se restituendo describunt minori impetu resiliunt tunicae; itaque cordi resistentia augetur, tum flexionis defectu, quo debitam sanguinis quantitatem in sufficienti dilatatione recipere non valent arteriae, ac sanguis corde explosus difficulter progreditur, interdum regurgitat, ac reflectitur, ita ut ob spatii angustiam eiusdem cordis ventriculi contento sanguine prorsus exonerari nequeant; ideo praeternaturali pondere gravatus cor frequentiores, ac vehementiores edit systoles, quae molestis palpitationibus percipiuntur; tum ob imminutam elasticitatis vim in ipsis arteriarum tunicis, qua sanguinis velocitas augetur, cordisque impulsui suffragatur; vis enim cordis per se insufficiens esset ad extrema saltem vascula sanguinem tali impetu propellendum, ut ex arteriis in venas, ex glandulis in excretorios ductus migrare possit; idcirco ex concisa arteriarum systole lente procedens sanguis minori quoque celeritate per venas ad cor redit, ad cuius appulsum, utpote imbecillio-rem minus dilatantur cordis ventriculi, cumque juxta mechanicae legem actioni respondeat reactio; cor sicuti elasticum corpus, quo maiorem distensionem patiatur, eo fortiori vi se restituet, quo minori, leviori

quoque momento resiliet; dilatationi igitur ventriculorum respondebit constrictio, quae si debilis, vel brevis, ac interrupta, debilis quoque, & concisa erit constrictio.

Cordis quoque auriculae a sanguine minori impetu appellente minus ac lentius expanduntur, proinde in validam contractionem excitari nequeunt, qua eorundem ventriculorum oscillatorio motui adjuvatur. Insuper, quo crebrior erit arteriarum oscillatio, eo frequentior erit cordis systoles. Hoc luculenter confirmatur ex vehementi incessu, intenso ac longo sermone, vel alio quocunque laborioso motu ac nisu, quibus violenter agunt muscoli, hi arteriarum systolem sollicitant, quae sanguinis ad cor reditum accelerant, proinde frequentior fit ipsius cordis expansio, non minus ac systoles, intensior respirationis motus, ac tota fluidorum massa velocius circulationem absolvit.

Ut igitur aequalis, non interrupta fiat eorundem fluidorum circulatio, neque cor praeternaturali pondere gravetur, proportionata ac reciproca esse debet vasorum, atque cordis elasticitas, seu contrahendi vis.

Non solum vero necessaria vasorum cum corde momenti proportio, verum etiam vasorum cum vasis, tum eiusdem, tum diversi generis.

Primo, inter vasa eiusdem generis aequilibrium adesse oportet; E. G. Arteriae sanguiferae, nisi concordem tonum ac elasticitatem nanciscantur,

tur, vel fervent, circulationis harmonia perturbatur; Puta enim quosdam arteriae aortae ramos, seu propagines peculiari atonia, & laxitate laborare, eorumque tunicas facilius, quam ceterorum sanguinis impetu dilatari, non autem aequae resilire posse. Cum sanguis a corde pulsus undequaque indifferenter currat (a); Aequalis erit eadem posita resistentia illius distributio, & aequali a corde distantia aequalis cursus, sed ubi minorem resistentiam inveniat, illuc tendit, ac maiori quantitate dirigitur, vasa implet, a quibus prae nimia distensione oppressis sufficiente contractionis vi non impellitur; hinc stagnationes morbiue inflammatorii insurgunt.

Illa itaque viscera, vel partes quaecunque, quorum vasa sanguifera laxiori fibrarum tono nactae sunt, peculiaribus subiacent morbis. Si cerebri E. G. vasa, quibus corticalis substantia plerumque construitur, (b) imbecillioribus, quam par est, fibris consent, nec debitam cum ceteris viscerum vasculis elasticitatis ac consistentiae proportionem servant, affluenti sanguini minus resistentia facillime turgescunt, ac deficiente elastica vi, qua eidem sanguini dilatanti contranuntur, plus fluidi accipiunt, quam traducant, ideo inevitabiles capillarium arteriarum obstructions, quas vel inflammatoriae ipsius sanguinis stagnationes comatosas ac lethargicis affectionibus

originem praebentes excipiunt, vel eorundem vasorum scissurae sanguinisque effusiones, quae lethales apoplexias cum repentina morte afferunt.

Facile ex his concipies diuturnorum capitis gravaminum causam, quibus nonnulli vexantur, ac difficulter curantur, quia laxato vasorum tono tumescunt, cerebri arteriolae, quae anfractus praeternaturali diastole distrahunt, ac medullares tubulos comprimunt; si vero in eiusdem cerebri membranis exquisitiori sensu donatis haec contingant, dolorosas in earundem fibrarum membranacearum distractione affectiones, nempe cephalaeas, perpetitur caput.

Ii, quorum capitis vasa imbecillioris sunt toni, habita cum ceteris vasis proportionem, levi etiam accedente externa causa capitis affectibus obnoxii sunt. E. G. Si caput soli exponant, vel hyemali tempore ad ignem accedant, ubi aliquandiu immorentur, vel etiam si tantummodo cubiculum ineant, cuius ambiens igne calefactum sit, cito eorundem faciem colorari, ac rubesceri observamus, ipsique de nimio capitis aestu ac dolore conqueruntur. Si febre quoqueprehendantur, morbus ad caput tendit, praesertim si continua, illucque impetum facit, quod eiusdem capitis doloribus, vigiliis, quandoque delirio, ac lethali sopore manifeste evincitur, quia sanguis ab arterio-

L 3

lis

(a) Bagl. p. iii. Spec. p. l. de Fi. Mot. (b) Ruysch. Thes. anat. & Epist. 12. Vieussens in nouo vasorum system. Bergerus in Physiol.

lis, five cerebri, five membranarum inferiori elasticitatis vi praeditis minus compellitur, ibique haeret, atque turgescit.

Si pulmonum, vel pleurae vasa imbecillioris sint toni, habita ad caput ceterisque visceribus comparatione; in pulmonibus quoque, vel pleura plerumque morbi contingent; violenti nempe incessus, vel laboris occasione, in qua respiratio frequens ad sanguinis motum per vasa pulmonaria accelerandum, ut aequali velocitate, ac illi per aortam & venam cavam proficiscatur, ac ut ad frequentiore sinistri ventriculi diastolem promte e vena pulmonari in eundem ventriculum traducatur. In huiusmodi casu, cum arteriae pulmonaris ramuli imbecilliores sint, sanguinique a corde vehementer proiecti reniti non valeant, praeter modum inflantur, ac distenduntur, tardeque in venas migrante sanguine; saepe inflammatoriae stagnationes, ac pleuripneumoniae insurgunt.

In anni temporum pariter mutationibus, cum ex rigida praecipue hyeme ad vernum tempus transitus fit, eo magis si intempestive calidum, tunc, imminuto ambientis aeris pondere ac compressione, interinae aeris particulae nostri corporis fluidis innatantes (a) rarefiunt, immo ipsi cruoris globuli, utpote elastici, nonnihil dilatantur, idcirco tota eiusdem sanguinis massa in maiorem molem expanditur, quae vel

vasorum tunicas laxioris texturae nimis distrahens discindit, erumpitque; unde haemoptyses, vel e propriis vasis in aliena, nempe lymphatica, eorum oscula irruitionis impetu distrahens ingreditur. Haec vasa cum multo angustiores sint diametri, quam sanguifera, eadem proportionem, quae inter sanguineos globulos & lymphaticos existit, aegre admodum ab iisdem pervadi possunt, quare stagnante sanguine tumet, phlogosim, ac erisipelas efficiunt, quae, si in pulmonum superficie pleuram ferientia, pleuritidem cum punctorio lateris dolore constituunt, si vero intra bronchia ac pulmonares vesiculas, pulmoniam gignunt. Praeterea si aliquandiu stagnet sanguis, nec progredi valeat, aucta intumescitiae moles visceris calore brevi corrumpitur, ac in abscessum, five vomicam degenerat.

Huiusmodi aequilibrii necessitas inter viscerum elasticitatem plurimis observationibus confirmatur; si quis enim morbis E. G. pectoris, plusquam semel corripiatur, facillime in hos morbos, five pleuritidem, five pleuripneumoniam, leviter etiam accedente externa causa, incidit, ac non raro diuturnis, immo lethalibus affectionibus detinetur, quia reiteratis stagnationibus, ac distractionibus vasorum, imbecillior eorundem tunicarum tonus redditur, nec non bronchialium glandularum elastica vis imminuitur, ob quam lymphæ, five succus humectationi

(a) *Cap. 5. huius.*

mectationi bronchiorum verifimiliter inserviens (a) diutius retentus earundem intumescuntiam parit, quae aeris liberum ingressum, atque egressum per bronchia impedit; unde dispnoea, vel asthma humorale progignitur, interdum vero ipsa vasa lymphatica ex intrusis ob eandem causam crassioribus sanguinis particulis obstruuntur, ac prohibito lymphae traiectu inflantur, quod lethale pulmonum oedema constituit.

Praeterea si quis in terram procidat, vel in durum aliquod corpus vehementer offendat, contusa pars tumet, eo magis vero si ossea musculari tantummodo integumento tecta, quales sunt cranii partes, vel tibiae, vel cubiti, quae statim in tumores etiam duros sublevantur. Hoc quidem ex eo procedit, quod vasa contusa laxantur, ac ubi maior contusio, ibi maior laxitas, ingentiorque tumoris magnitudo, qua propter cum in praedictis osseis partibus gravior fiat contusio, quippe ossa multo magis resistunt, quam ceterae partes, vasaque inter duo corpora dura, hoc est inter eos, & obiectum offensio- nis, impetu sibi invicem occurrentia, vel alterutro in alterum incidente valde colliduntur, ac laxantur, proinde inflantur, ac enormis fit tumor, quod ut praecaveatur, panum, vel chartam aqua frigida madidam applicare solent etiam empirici, experientia edocti, cuius auxilii vis

in fibrarum relaxatione auferenda consistit. Frigoris enim proprium est constringere, ac condensare, idcirco laxatae tunicae frigidi corporis applicatione nonnihil corrugantur, ac roborantur, ne fluidorum appulsui nimis cedant, ac in tumorem dilatentur.

Internae quoque partes ab externis collisionibus saepe laeduntur, quia interna viscerum vasa valde concussa distrahuntur, ac dilatantur, fluidaque contenta demissa vi compellunt, ita ut stagnationis periculum immineat. Quare capitis ac pectoris concussionem periculosiores sunt ac facile lethalia pariunt apostemata, quae quandoque paulatim fiunt, ac post multum temporis prodeunt, quia tum cerebri, tum pectoris vasa, seu pulmonaria tenuioris sunt consistentiae ac elasticitatis, levique causa laxantur, ideo fluidorum momento obruti, vel sensim in tumores dilatantur, ex quibus apostemata, vel disrumpuntur liquidorum eruptione, ex quibus lethales apoplexiae, aut haemoptyses.

Veruntamen pravi hi confusio- num effectus, si gravi cum dolore contingant, a nervorum crispatione non raro excitantur; nam partes membranaceae exquisito sensu praeditae, si in durum corpus offendant, spastico interdum dolore prehendantur, ex quo earundem fibrarum corrugatio, nec non nervorum, quorum propagines sunt, contractio,

vafa

(a) Heister anat.

vasa vero, quae eisdem partibus membranaceis irretiuntur, coarctantur, ac valde imminuto eorum diametro, fluidorum progressum impediunt, quibus vero inflantur, ac distenduntur, unde tumores insurgunt; hoc autem ad subsequens pertinet.

C A P V T XVIII.

De miro partium nostri corporis consensu.

Inter nostri corporis partes magnum adesse consensum, seu mutuam actionum conspirationem, & compatiendi necessitatem, quis neget? Hoc etiam primae aetatis medicos animadvertisse liquet; Docente Hippocrate celebribus illis verbis: *Consensus unus conspiratio &c.* cuius phaenomeni causa in corporeae structurae qualitate posita est.

Fluido vasculosam esse nostri corporis machinam satis patet, qua diversi generis fluida jugi, & continuo motu per diversae magnitudinis ductus, & cavitates in orbem feruntur.

Si itaque nonnulla corporis vasa comprimantur, eorumque diameter angustetur, illuc fluentia liquida regurgitant, quo minor enim vasorum diameter, atque capacitas, eo minor fluidorum copia dato tempore traicietur. Cum igitur affluentia liquida ad vasa compressa, tardius ac difficulter traducantur, quam per libera, & non compressa, ad haec eadem properare maiori co-

pia, ac maiori celeritate percurrere, ut eorundem quantitas eodem tempore circulationem absolvat, necesse erit.

Idcirco, si quaedam nostri corporis vasa obtusis diametris, vel quacunque alia causa obstructis, a fluidis permeari nequeant, non solum seipsa ab iisdem fluentibus inflantur, verum etiam cetera, finitima praesertim, ac sibi mutuo respondentia, maiorem impetum sustinent, quia maiorem eorundem fluidorum copiam recipiunt, ac transmittunt.

Praecordiorum E. G. vasa obstructa ac inflammata, vel vomicae, seu abscessus pondere compressa genarum rubore se manifestant, quia descendente aorta non nihil gravata, ac se difficilius expandente maior sanguinis copia per carotides, tum externas, tum internas ascendit, quorum ramulis tumefactis faciei rubor oritur.

Eandem ob causam, si vasorum notabilis aggeries obstructatur, ac fluida saltem rubra ibi stagent, ut in quibusdam inflammationibus, veluti pulmonum, hepatis, aliisque, febris excitatur; propterea quia canalium quantitas per quas fluere solet sanguis, minuitur, eorumque notabilis pars obstructa eidem sanguini transitum occludit, vel difficilem reddit; igitur sanguinis massa, quae dato tempore a corde ad corporis partes, & a partibus ad cor restitui debet per canales numero minores, maiori celeritate, atque impetu percurrere necesse est, quae celeritas in reciproca erit proportionem cum summa sectio-

sectionum orificiorum canalium liberorum in statu sano, ac cum summa sectionum canalium in statu morbi, in quo notabilis eorundem pars obstructa sit. (a)

Ut autem fluidorum celeritas augeatur, solidorum quoque impetum, a quo ipsorum fluidorum motus omnino pendet, intendi necesse est, qui impetus in praedictis casibus a refluxu sanguine excitatur, quia sanguis in vasis obstructis stagnans superiori sanguini a tergo venienti resistit, qui regurgitans vasa distendit, eorumque oscillationem inagis provocat, cordis quoque vi magis resistit, eiusque ventriculos gravat, ita ut per elasticorum corporum legem ipse cor vehementiores ac frequentiores edat systoles, quibus arteriarum dilatationes respondent, & ita progressivus sanguinis motus acceleratur.

Si e converso quorundam viscerum, vel glandularum vascula, atque ductus secretorii maioris sint diametri, vel laxioris fibrae, quam proportio requirit, copiosae nimis ibi contingent secretiones, quae ceteris materiam subtrahendo eas parciores reddent; ergo, & in secretionibus, immo & in evacuationibus mutuus adest consensus.

Et sane generalis est canon in mathematicis: (b) quantitates diversi generis fluidorum per quaecunque orificia dato tempore ef-

fluentium eam inter se habere rationem, quae ex simplici componitur sectione orificiorum simul sumtorum, & celeritatum, quas e foraminibus effluentia habent eadem fluida; tamen horum nostri corporis secretorum velocitas rite determinari nequit, monente etiam Micheloto, (c) qui ait; *Liquorum ex sanguine erumpentium celeritates frustra quaeri cruoris per arterias pulsif celeritate, et densitatibus tam cruoris, quam liquorum ex eo manantium incognitis.*

Praeterea huiusmodi velocitatem ignoramus, non solum ob variam liquorum e sanguine emanantium inaequalem a corde distantiam, & densitatem, verum ob diversam vasorum directionem, quam partim rectam, partim obliquam ac in multos anfractus convolutam naturae auctor constituit.

Densitas fluidorum pondus augens, eadem posita vi, qua ipsa fluida impelluntur, augebit, vel minuet (prout maior, vel minor) velocitatem; velocitates autem sunt in ratione reciproca subduplicata densitatum (d), id est earundem radicibus quadratis reciproce proportionales, si vasorum sectiones sint aequales, propterea quia fluidorum momenta; eadem posita vasorum sectione, sunt in ratione composita ex simplici densitatum, & duplicata velocitatum (e); attamen in sanguine,

(a) Mariot. trait. du mouvements des Eaux. Wolfii Elementa Hydraulicae Cap. VI. Corol. 1. 220. (b) Jacob. Hermannus Phoron. l. 2. Cap. 9. pr. 30. (c) Ibidem p. 119. (d) Michelot. p. 120. (e) Wolfii Elem. Hydr. Cap. VII. de percussione fluidorum.

sanguine, liquoribusque a sanguine oriundis tenacitas, atque crassities consideranda esset, propter quam plus vel minus fluidi sunt hi liquores, ac maiores vel minores patiuntur fricationes, consequenter, ut animadverit idem Michelotus, nonnihil deceptus fuit Pitcarnius, (a) canones traditurus pro liquorum excretorum quantitatis comparandis in locis aequae a corde distantibus, neglecta eorundem liquorum crassitie, quae diversam efficit celeritatem.

Licet igitur aequalis supponatur a corde distantia, aequalis etiam fluidorum densitas, variae ductuum obliquitates atque convolutiones considerandae essent, quibus eorundem fluidorum motus admodum retardatur. Bellinus (b) velocitatem liquidi per tubum valde subtilem ad tercentum ulnarum recte extensum comparat cum velocitate eiusdem liquidi per eundem canaliculum ad quatuor mille, & octingentas semidigitalis longitudinis plicas inflexum, cuius altitudo semidigiti quoque altitudinem non excedat, ac celeritatem primi, seu recti canalis ad celeritatem secundi, seu convoluti esse, ut numerum plicarum, hoc est ut 4800. ad 1. scripsit, quod tamen sine demonstratione enunciat, ac si de liquido perfecte fluido haberetur sermo, pro erronea prorsus habenda esset propositio; constat enim ex hydraulica liquidum perfecte fluidum plicatum tubum eadem velocitate ac rectum percurrere.

Multum quidem velocitatis sanguinem, utpote liquidum haud perfecte fluidum, sed crassamentosum, nec non liquores ab ipso oriundos amittit in canaliculis plicatis, prout maior vel minor plicarum numerus, maior vel minor canalium diameter, quoniam e perangustis aegrius evadit liquidum, quam latioribus, maiori quoque, vel minori celeritate, prout aspera, vel laevigata interna superficies, nec non rotundae, vel angulosae eorundem canalium plicae, quae cuncta, una cum crassitiei liquorum perfluentium gradibus, ratione assequi nequimus, sed sola experientia nos instruere capax esset, quam tamen intra animale corpus perficere minime datum est.

Sat igitur nobis erit eam dignoscere veritatem, quae licet neque ad mathematicas leges redigi, neque calculatoria methodo determinari queat, eam tamen abstracte demonstrabimus, nempe.

Quo ampliora peculiarium secretorum ductuum orificia, eo maior, five secernendi, five excernendi liquoris copia habebitur,

Si renales tubuli E. G. vel ob naturalem laxitatem, vel ob aliam diuretici impellentis causam praeter modum aperiantur, praeternaturalis urinae copia excernetur, propter quam ceterae excretiones, praesertim cutis, five sudor, five insensibilis transpiratio data proportionem

(a) *Dissert. de circ. S. p. vasa min.* (b) *Opusc. de ferment. pr. 40.*

tione minuentur, & vicissim cutis meatibus dilatatis, ut saepe evenit, vel in morborum acutorum crisi, vel aestivo calore, vel hypocaustis copiosus sudor emanat, qui materiam separationis renibus aufert. Alvi quoque copiosae, vel frequentes deiectiones, ut in diarrhoeis, quae a labefactato glandularum intestinalium tono, earumque secretoriis, et excretoriis ductibus nimium expansis proficiscitur, sudorem, & perspirationem imminuunt, & quo maior sit fecum evacuatio, eo minor perspirabilis materiae quantitas ad poros cutis defertur, quemadmodum ex Hippocrate celebribus illis verbis habemus: *Cutis densitas alvi laxitas, cutis laxitas alvi densitas*; Quare huiusmodi excretiones altera alterius vicem gerit, naturaque altero praedictorum emissariorum orbita per alterum exoneratur.

Si quidem oclusis cutaneis meatibus, vel ob ambientis aeris prius calefcentis intempestivam mutationem, vel ob spasticam fibrarum tendinearum eiusdem cutis strictionem, a pravo liquore intus vellicante, ita ut perspirabilis materia detineatur, intestinales glandulae aperiuntur, & copiosiore alvi evacuationis materiam suppeditant, quemadmodum si sudor repellatur, repulsi feri per renes ad vesicam traiciuntur, & vicissim aucto sudore, vel perspiratione deficit urina, quod saepe nobis occurrit, saltem cum

ab hyemali ad aestivum tempus transitus fit; etenim urinae quantitas, si cum potu comparetur, maior sane, quae hyeme excernitur, quam quae aestate, quoniam aestivus sudor, vel perspiratio hyemalem superat, de quibus satis apte celeberrimus Sanctorius (a).

Adeo naturalis harum separationum consensus videtur, ut nisi una, vel plures alterius defectui suppleant, seu quaedam organa secretoria, nisi ab obtusis aliis repulsam materiam transmittant, morbi contingunt.

In ipsis quoque morbis mira haec conspiratio elucescit; nam si qua parte, vel viscere vehementi dolore, vel inflammatoria stagnatione laborante aliam deinde partem invadat idem morbus, prior affecta pars saepius sublevatur, ac in secunda firmatur. Non raro quidem inflammatoriae thoracis affectiones, sive pleuritides, sive pleuripneumoniae cum tussi, cruento sputo, ac spirandi difficultate, acerbis capitis dolore ac inflammatoria meningum, vel cerebri stagnatione superveniente, evanescent, peiori quidem aegri discrimine, de quo Hippocrates (b) a *pulmonis inflammatione phrenitis malum*. Sic et angina superveniente lateris dolore ac pectoris inflammatione evadit. Insania quoque, si eidem Hippocrati credamus, sive melancholica, sive maniaca, ut recte interpretatur Luca Tozzi, (c) varicibus, vel haemorrhoidalium va-

M 2

forum

(a) Stat. (b) Aphor. Sec. VII. (c) Comment. Aphorif. Sec. 6. XXI.

forum tumefactione solvitur; Maniacos vero hydrope, ac dysenteria quandoque prehendi observavit idem senex, qui (a) ait: *A furore aqua inter cutem, vel intestinorum difficultas, bonum.* Si cuti & oculorum phlogosi seu ophthalmia laborantes diarrhoea, de qua: (b) *Lippientem alvi profluvio corripere bonum.*

Non semel vidi dysenteriam in arthritidem migrare, aliquando in hepatitidem, frequentius vero in hydropem siccam commutari. Hos plurimosque alios morbos in alios converti, & ab aliis omnino solvi quotidiana nos docet experientia, cuius phaenomeni rationem affert praefatus insignis senex celeberrimis verbis: (c) *Morborum omnium unus et idem modus est, locus autem differentiam facit.* Videlicet; cum humanum corpus liquidis ac solidis, nempe vasis ipsa liquida continentibus, constet, & utraque in statu sano aequabili ac proportionato motu moveantur, (d) vasa scilicet oscillatorio quo dilatantur, ac contrahuntur, liquida vero progressivo ac circulari, quotiescunque horum motuum interruptionis, vel perturbationis causa, in qua morbus consistit, (e) ex uno in alium locum transferatur, essentia morbi commutatur, ac altero exsurgente, alter saepe recedit; si vero per quodcunque organorum secretoriorum materiae traiciundae aptorum eliminetur, omnino extinguatur morbus.

Hanc morborum vicissitudinem, & actionum conspirationem, quae

ad vitalem oeconomiam spectant, a fluidis inter se communicantibus, non absque solidorum ope, pendere satis evincitur.

Admirabilior tamen ac intellectui reconditus est solidarum partium consensus, qui in nervosis praecipue partibus elucescit, de quo Et-müllerus, (f) consensum proprie dictum, ratione saltem nervorum, triplici modo fieri autumat: *Consentiunt, ait, partes nerveae triplici modo, nempe, primo quatenus fibrae nerveae sunt continuae, qua ratione imminente vomitu tremit labium inferius, vel secundo, quatenus sunt contiguae, quarum ratione calculus vesicae subinde stimulum infert alvi, & tenesimum excitat, quia collum vesicae, & intestinum rectum invicem incumbunt, sic affecto stomachi orificio sequitur singultus; tertio, consensus partium fit ratione connexionis mediantibus funiculis nerveis, qua ratione consentiunt renes, ureteres, & intestina, stomachus & caput.* Sed priusquam consensus rationem exaremus, nonnullos eiusdem effectus evolvam.

Vehementes animi motus, licet incorporei actus, nervorum genus ita afficiunt, atque commovent, ut animales, ac vitales actiones omnino perturbentur. Timor, qui a Cicerone (g) *metus mali appropinquantis* definitur, si formidabilis sit, cerebri medullarem substantiam eiusque tubulos valide coarctat, quos animalis spiritus difficulter permeat,

(a) *Aph. V. Sect. VII.* (b) *Sect. VI. Aphor.* (c) *Lib. de flat.* (d) *Vid. Cap. XVI. huius.* (e) *V. Cap. idem huius.* (f) *Tom. 2. p. 36.* (g) *4. Tuscul.*

meat, ac nervosas partes inaequaliter influit, ex quo tremores enascuntur, vel interdum omnino intercipitur, hinc deficiente solidorum motu ex repentina spirituum suppressione, repentina quoque mors evenit, quod non raro magna formidine captis occurriffe legimus. Ira, atque odium praeternaturales in nostro corpore motus excitat, (licet animi tantummodo affectiones) vehementiores spirituum ad nervos irruptionem, unde motus involuntarii insurgunt, cordis, & arteriarum pulsus frequentiores fiunt, fluidorumque circulantium celeritas augetur. Libidinofae cogitationes, pravique consensus, quamvis ideales tantummodo, & incorporei actus sint, aliquos mere corporeos producant effectus; nam corpora nerveo-spongiosa penis inflantur, vasa sanguifera obstringuntur, praecipue venae, per quas cum redire nequeat, atque intercludatur sanguis, eiusdem penis intumescantiam, erectionemque gignit.

Extrinsecas vero, & a sensibili corpore affectiones solam corporis partem ferientes, totam eiusdem oeconomiam perturbant. Gravis capitis contusio, a qua cerebrum non nihil concutitur, ac nervorum radices commoveantur, servata licet earundem partium textura, labitur corpus, sensus abolentur, deficiuntque vires; praeterea etiam sola corporis, & capitis commotio, qualis si in gyrum circumagatur, vel tantummodo circumambulet corpus, ut iis, qui nondum assueti calcatorias machinas, vel serica aedificia circummovent. Non-

nulli quoque illorum, qui mare, fluctibus praecipue agitatum, navigant, vertigine, nausea, vomitu, viriumque languore vexantur.

Parva quidem materia nervorum papillas insolita quadam motione afficiens praeternaturales motus excitare valet. Tabaci fumus ore haustus capitis dolorem, nauseam, faciei pallorem, & animi deliquium in non assuetis producit. Odores ex moscho, zibetho nonnullisque floribus suaviter, sed acute olentibus, quamquam per tenuissima effluvia olfactoriam narium membranam, eiusque nerveas papillas percellant, horrenda symptomata foeminis, quarum nervea textura rara, & ataxiis obnoxia concitant, spirandi nempe angustias, suffocationes, syncopes, sensuumque abolitiones, quae foetidis exhalationibus naribus admotis sedari solent. Ita veneficae, quamvis exilissimae particulae, si intra nerveas fibrillas demittantur, dira & lethalia insurgunt accidentia; ut E. G. in morsu viperas, vel canis rabidi, in quibus facta a dente continui solutione ad easdem nerveas fibrillas pertingit venenum, horribiles spasticae contractiones, convulsivi motus, spirandi angustiae, urinae suppressiones, inquietudines, mentis alienationes insurgunt. Horum quidem symptomatum proxima causa praeternaturalem esse nervosi generis affectionem, commotionem scilicet, ac crispationem nervearum fibrarum ipsis vasorum tunicis insitarum manifeste liquet, non sangui-

nis, nec lymphæ, nisi secundarie; venenosus enim succus, qui tenuiores habeat particulas exiguaeque sit molis e viperae gingiva decidit, in sanguinis massam traductus nihil infert mali.

Hoc evidenter probatur doctissimi Redi experimentis, atque observationibus, quibus refert, nonnullos homines aliquoties virus e viperis collectum deglutivisse absque ulla, vel levi noxa, quamquam illud, utpote fluidum tenuioribusque particulis constans, in sanguinem per chylicos ductus traduci credendum sit.

Huiusmodi partium nervearum consensus solidi corporis extrinseca læsione magis eminet, si Chirurgi lanceola nervum, vel tendinem venae sectione feriat, non solum dolor acerbus, sed ex contiguis nervorum ramis crispationem ineuntibus ac sanguifera vasa constringentibus inflammatorius tumor, acuta febris, aliaque superveniunt accidentia, quae, nisi aegro cito succurratur, gangraena, ac sphacelus excipiunt.

Plures vidi, atque audiavi ex clavi cuspide in planta pedis, ac in vola, & digitis manuum acicula, vel spina punctos, de quibus plura apud Hildanum exempla (a) leguntur, acutis doloribus tumores, febres, & interdum sphacelum supervenisse.

Non dissimilia ex causticorum ad emissaria aperienda incongruo loco

facta applicatione interdum notantur accidentia. Ingentem brachii tumefactionem, ac dolorem usque ad humeros, & pectus, non sine febre, observavit Hoffmannus (b) in foemina, cui causticum ad excavandum fonticulum applicatum fuit. Vesparum morsus, sed potius punctura, quae ex earundem aculeo fit, quamcumque corporis partem invadat, acutum dolorem cum tumefactione excitat, sed si membranosas, ac tendineas partes, graviora concitat pathemata, quae praeter ocularem experientiam in pluribus medicorum observationibus comperimus. Has inter celebrari merentur illae, quas Hildanus affert (c). Robustum juvenem ob puncturam in dexteram genam prope minorem oculi canthum acceptam, ingenti post acutum dolorem inflammatione, deinde ipsius genae gangraena prehensum fuisse, & (d) Foemina in brachio prope carpum a vespa puncta dolore cum lipothymia correpta fuit, qui non solum circa partem affectam, verum etiam per totum fere corpus extendebatur, efflorescentibus etiam vesiculis, limpidis sero repletis. Ea quoque admirabilis videtur ipsius Hildani (e), quae varia narrat symptomata, quibus puella ob vitreum globulum in auris meatum illapsum vexabatur; acerbam in affecto latere hemicraniam, brachii stuporem ad pollicem usque, & indicem, coxae, & tibiae

(a) Cent. 5. obs. 2. (b) Lib. 3. med. syst. nat. p. 51. (c) Cent. 8. (d) obs. 87. cap. 4. (e) Cent. 1. obs. 4.

tibiae usque ad pedem, deinde ipsius brachii atrophiam, convulsivos motus, menstruorum suppressionem, siccam tussim; his vero omnibus in globuli extractione soluta prorsus fuit.

Non est praetereunda sternuti causa, quae si interna, a tenuiori scilicet sero, sive ichore olfactoriam narium membranam titillante, si vero extrinseca, volatili, & acri substantia eandem membranam leviter percellente (a), ex hac, quamquam levi irritatione, nervi intercostalis propagines, qui per thoracem ac diaphragma expanduntur, nec non spinalis medullae nervei ramuli, qui ad intercostales musculos distribuuntur, in consensum trahuntur, idcirco inchoata suspenditur respiratio, donec aer pulmonibus interclusus se rarefaciens pulmonares vesiculas ac thoracem admodum dilatat; magnam verodilatationem antagonistarum ope violenta subsequens eiusdem thoracis constrictione, vehementi corporis concussione ac sonitu aerem expellit.

Non minorem vero internarum nervosi generis partium consensum experimur, quotiescumque eadem heterogeneis, acribus ac pungentibus particulis, sive fluidis, sive solidis laedantur.

Supra laudatus Hildanus insignie affert exemplum cuiusdam foeminae, quae postquam aciculam inopinately deglutiverit, intolerabili ventriculi dolore cruciari coepit, de-

inde in auctam, & ardentem incidit linguae ariditatem, aliaque symptomata, postea in phrenitidem, & horrendas tum colli, tum artuum convulsiones, modo in effrenos totius corporis motus irruebat, ita ut a robustis hominibus cohiberi non poterat, modo in languores, ac lipothymias delabebatur. Huic succurrit idem auctor emollientibus, oleosis, ac diluentibus, donec aciculam expulisset, post huius egestionem omnia conquieverunt, ac sanitati restituta fuit.

Non multum dissimilis est venenorum effectus sive mineralium, sive ex vegetabilibus desumptorum, quorum particulae valde acutis angulis constantes, & causticae, nerveae ventriculi tunicae rugas efficiendi haerentes, terebrant, atque corrodunt, uti ex veneno interfectorum cadaveribus, quorum internae ventriculi, quandoque & intestinorum tenuium membranae ulceribus, muculisque lividis laesae observantur, manifeste evincitur.

Haec tamen laesiones tam celeris mortis causa esse neutiquam possent, nisi horrendas illas, ac spasmodicas totius nervosi generis contractiones excitarent, quae enormes cardialgias, assiduos vomendi conatus, praecordiorum anxium dolorem, singultum, artuum attractionem, perpetuum mingendi stimulum, sitim intensam, febrem, inaequales ac intermittentes pulsus, frigidos sudores, lipothymias, aliaque dira

(a) Sylvius d. M. T. cap. 23.

dira symptomata, quae nisi prompta arte mulceantur, in lethalem syn-
copem definunt; nam ex huiusmo-
di spasmodicis contractionibus, co-
arctatis atque occlusis ventriculi,
& intestinorum vasis, sanguinis mo-
tus intercipitur, ac stagnat; unde
inflammatio, & gangraena, quae prae-
dictis in lividis cadaverum ma-
culis deprebenditur, de quibus lu-
culenter egit Wepferus. (a).

Similis quoque est purgantium,
saltem validorum operatio, quae
acutis, ac penetrantibus spiculis ner-
veam intestinorum tunicam velli-
cant, nervorumque mesentericorum
plexus in consensum trahunt; qua-
re glandulae intestinales maiorem
secum copiam excernunt, quia pro-
ritatae se frequenter constringunt,
& quia maior ex superiorum ner-
vorum commotione secum materia
in ipsas derivatur, intestinaque tum
purgantium vellicatione, tum fe-
cum secretarum stimulo peristalti-
cum eorundem motum accelerant,
eorumque expulsionem sollicitant:
saepius vero in stomacho, si vehe-
mentioris sint naturae, propriam vim
exercent, hinc violenti vomitus,
cardialgiae, lipothymiae, extremo-
rum contractio, frequentes pulsus,
convulsiones, ceteraque symptoma-
ta, quae a venenis excitari solent.

Nec valde differunt accidentia,
quae a succis pravae texturae, cor-
ruptisque cruditatibus in stomacho
delitescantibus exoriuntur; huiusmo-
di enim succi interdum ventricu-

li glandulis coagmentati aucta mo-
le, qua recipientia vascula disten-
dunt, auctoque irritamento, ab iis-
dem glandulis in visceris cavitatem
eructantur, ac violentos vomitus
producunt, impetuosas alvi deiectione-
nes, dolores, praecordiorum anxie-
tates, spasmodicas artuum contra-
cturas, frigidos sudores, febrem,
contractos pulsus, & alia, quae
cholerae efficiunt.

Hypochondriaci mali radix, quae
pro maiori parte in male affecto
ventriculo posita est, eiusdem cum
universo nervorum genere affinita-
tem, ac sympathiam ostendunt;
quorundam enim ventriculus laxio-
ri textura, fibrarumque tum mu-
scularium, tum nervearum atonia
afficitur, quapropter cum ad ali-
menta conterenda se satis constrin-
gere nequeat, haec ibidem diu im-
morando saepe corrumpuntur, ac
molestis stimulis nerveam membra-
nam irritando eandem commovent,
ac perturbant, ita ut ope paris octa-
vi, et intercostalis propaginum ad
cerebri medullarem substantiam, ex
qua iidem nervi enascuntur, ac
thalami nervorum opticorum lo-
cati sunt, producat commotio,
unde vertigines sympatheticae, gra-
vativi capitis dolores, animi moe-
ror, virium languores, inquietudi-
nes, ac vitiosae in sensoris percep-
tiones. Admirabilis est suffusio,
quam narrat Lommius (b), a sto-
macho dependens: intermittit, si
prius gravatus stomachus exonere-
tur,

(a) Lib. de Cicuta aquat. (b) Lib. 2. observat.

tur, ac revertit, si rursus cruditatibus opprimatur; vicissim vero capitis, ac cerebri labores ventriculū afficiunt; hinc Baglivius (a); hunc inter caput, & ventriculū admirabilem consensum perpendens ait: *Qui laborant animi pathemate potissimum corripī solent morbis ventriculi, ut inter cetera observavi in moerentibus, qui conqueruntur primo de languore ventriculi, mox inappetentia, oris amaritie, cruditatibus, flatibus &c.*

Non solum animi pathemata, sed & intensae mentis applicationes, ac labores, vel in scientiarum exercitio, si litteris dediti, vel in negotiis, si mercatores, vel alio munere occupati ventriculū debilitant, contractorium earundem fibrarū muscularium motum suspendunt, ideo alimenta haud sufficienter triturantur, perinde acidae cruditates, viscosorum succorum congeries eiusdem ventriculi glandulas infarciētes, gastrici succi separationem impediētes, & coinquinantes emergunt.

Nonnulli vero talem ventriculi structuram nacti sunt, ut eorum fibrae, sive musculares, sive nerveae facile in vehementes ac convulsivos motus, seu ataxias excitentur. Qua propter si ingestorum quantitas nimia sit, vel acido-acribus, sive aromaticis, sive alius naturae salibus abundet, praecipue vero si composita haec nerveam ipsius ventriculi tunicam diversimode titillando, ac vellicando peristalticum eorundem

motum in confusum, inordinatum, ac praeternaturalem vertunt. Hinc cibis, vel antequam apte solvatur, stomacho eiicitur, ex quo chylus sufficienti attritione non comminuitur, in sanguinem delatus cruditatum materiam exhibet, ipsamque cruoris massam coinquinat; quae cruditates, seu rudes particulae, cum globulorum sanguineorum figuram difficulter assequantur, abdominis visceribus inhaerescunt, glandulisque praesertim ventriculi, & intestinorum hospitantur, quae, si duerae, seu salinae sint, scabra superficie, acutisque angulis donatae, nerveas earundem glandularum fibrillas feriunt; unde nervosa ipsius ventriculi, & intestinorum membrana diversimode contrahitur, ac muscularibus fibris contrahitendo peristalticum, atque ordinatum earundem motum perturbant, hinc in alimentorum solutione, aereae particulae extricatae in tubo intestinali coeuntes saepe intercluduntur, proinde flatus cum ventris rugitibus, plerumque perpetiuntur; praeterea ex familiaribus huiusmodi irritamentis ope octavi paris, & intercostalis propaginum, quae non solum intestina, & ventriculū amplectuntur, verum ad cor pulmones, ac cerebrum, immo cuncta cavitatum viscera se extendunt, multiplex videtur morbus, pluribusque in locis saevire observamus.

In capite scilicet diurnos dolores, vertigines, moestitiam, vigilias,

(a) Pagin. 565.

lias, & gravioris morbi metum. In thorace spirandi difficultates, cum intercostales ramuli inferius versus imum ventrem contrahuntur, & costarum elevationem ad inspirandum necessariam impediunt, pulmonares vesiculas angustant, adeo ut minori aeris quantitate sint capaces. Cordis quoque motus perturbatur, quia ob praedicta imi ventris irritamenta, ac paris vagi, & intercostalis ramulorum crispationem naturalem ventriculorum cordis diastolem coercent, interdum & vasorum maiorum a corde exeuntium, veluti aortae dilatationem, ideo eiusdem cordis oppressiones, & angustiae, & a sanguine regurgitante palpitantes, nec non pulsum inaequalitates, & intermittentes.

Aliquando vero uterque locorum simul infestatur, capitis scilicet, & thoracis viscera; hinc artuum tremores, languores, lipothymiae, pulsus imbecilles, ac deficientes.

Non minorem cum ceteris imi ventris visceribus ventriculi consensum experimur. Irritamenta; quae a calculo vesicae felleae exoriuntur, quippe eadem vesicula ad extranei corporis expulsionem orbicularibus fibris se ipsam a fundo ad collum contrahit, quem calculus adire cogitur, sed si maioris sit molis, ac diametri, quam ipse ductus choledochus, illic haerescit, acutisque angulis nerveam tunicam feriens, dolores, ac spasmodicos ventriculi ad vomendum conatus progignit, quemadmodum & renales calculi intra pelvim, vel etiam ipsis ure-

teribus haerentes, hunc ipsum vomendi actum suscitant.

Intestinorum quoque irritamenta, quae a vermibus nerveam tenuium intestinorum membranam arrodentibus, vel quocunque modo irritantibus fiunt, huiusmodi quasi universalem consensum demonstrant, superiores enim partes, praesertim caput visus hebetudine, nasi extremitatis pruritu, sternuto, vertigine, delirio, somnolentia, aurium tintu, epilepsia, interdum pectus dolore pleuritidem mentiente, tussi, cordis palpitatione, saepe vero totum nervorum systema molestat, tremoribus convulsivis, artuum motibus, ac spasmis cynico.

Insignis tandem est consensus ventriculi, & intestinorum cum manibus, & pedibus; nam in gravioribus tum ventriculi, tum intestinorum doloribus, saepe manus, ac pedes contrahuntur, & vicissim stomachi nausea, & vomitus manus in aqua frigida mergendo sedatur, & nudis pedibus super frigidum pavementum ambulando, aut stando, stomachi, & intestinorum dolores excitantur, ut quotidiana nos docet experientia.

Non sunt praetereundi dentitionis effectus, quoniam etiam dentis eruptio, quae gingivae laceratione, sive apertura fit, non solum febres, vigilias, convulsiones, sed & ventris termina alvi ut plurimum fluxu producat, cuius feces, ut notat Hoffmannus, virides sunt, & corrosivae, eo quod, inquit, a spastica harum partium subdolore, contractione,

tractione, ingesta diu retenta ac-
fiant, & corrosivam indolem acqui-
rant (a).

Hystericæ affectiones ab hypo-
chondriacis parum profecto diffe-
rant, quamobrem e simili causa ex-
oriri credere fas est.

Plerique medicorum, quibus prae-
est Willisius, uteri consensum ad
totum fere nervorum systema ex-
tendi procul dubio arbitrantur, ex-
perientia imprimis edocti, qua foe-
minae uteri vitio laborantes, five or-
dinario menstruum tributo, five in
puerperio lochiis defraudatae, vel
intempestive suppressae, vel utero
gestantes hystericis affectionibus tor-
quentur, secundo, quia seniores,
illae scilicet, quae jam dudum men-
struis excretionibus valedixerunt, hu-
iusmodi morbis obnoxiae esse non
solent.

Putant itaque a sanguine, vel
lymphâ ex vitioso vasorum uteri
tono stagnante quaedam fieri irri-
tamenta, per quae ipsius uteri mem-
branae contrahuntur, ipsiusque ner-
vorum propagines percelluntur, ac
proritantur; unde motus spasmodi-
ci, qui modo caput epilepticis af-
fectionibus, quae sympathicae di-
cuntur, vel deliriis, ac stuporibus
corripit, modo thoracem formida-
bili suffocatione, modo stomachum
convulsivo vomitu, & intestina bor-
borygmis, ac ruginibus, & iliacis
quandoque passionibus. Interdum &
renes, si Sydenhamio credamus,

(b) nephriticos proximos men-
titur, nec ipsa vesica ab eiusdem
invasionibus immunis est, cum Ischu-
ria, & dolore afficiatur, ac si cal-
culum includeret.

Nonnulli vero huiusmodi morbi
sedem in utero adesse minime sua-
dentur, quos inter Hoffmannus (c) &
Sydenhamius (d). Primus, distinguit
morbi sedem, quam nullo modo ef-
se in utero censet, a sede causae
morbi, quam ab utero male affecto
progigni verisimile est. Uterus li-
cet interno motu tonico provivus
sit, nervosis tamen partibus, nec
abundare, nec exquisitae sensatio-
nis esse autumat; nam si talis ef-
set, inquit, neutiquam summas il-
las, saepius a gemellis, distensiones
in gravidis, item tumoribus, & ex-
crescentiis intra eius cavitatem,
ipsamque substantiam prognatis sine
summa molestia, & vitae periculo
ferre posset; neque gravissima illa,
quae saepius eveniunt, symptomata
nervosis, ac membranaceis praeci-
pue partibus, quae communes ei-
dem utero nervos habent, sed po-
tius a sanguine ab utero refluxente,
ac in iisdem partibus restagnante ori-
ri vult.

In eadem fuisse sententia etiam
Hippoc. per auctorem nuclei Hip-
poc. demonstrat (e), qui haec habet.
*Refluens sanguis ab utero, & pre-
mens septum transversum, retractio
utero praefocationem, in caput irru-
ens insaniam, epilepsiam, catoche,*
N 2 *apople-*

(a) Lib. 3. Med. system. sect. 1. Cap. V. (b) Dissert. epist. p. 447. 448. (c) lib. 3.
Med. syst. sect. 1. Cap. V. (d) Ibidem. (e) Cen. III. Aph. 44.

apoplexiam &c. Praecipuam vero pathematum hystericorum sedem, ac proximam causam in ventriculo, ac intestinis collocat; nam, inquit, *anxiae illae, constrictiones, & angustiae circa praecordia, dolores cardialgici, qui ad dorsum ubi sinistrum ventriculi orificium porriguntur, palpabilis stomachi circa scrobiculum cordis inflatio, continuae eructationes, nausea, & ad vomendum proclivitas, borborygmi, tormina, convulsionem intestinorum instar globi, animi defectio, pulsus celerior, contractus, vel plane intermittens, &c.* quae perpetuae fere passionis hystericae sunt symptomata, nil certe aliud subindicant, quam nobilissimum, & ex praecipuis sensibilem maxime partem, ventriculum nempe, esse affectam. Praedictam itaque efficientem spasmodorum causam a solo sanguine in ventriculi vasa copiose irruente repetit, quae eadem nimis distendens nerveam ipsius ventriculi tunicam distrahit, & convulsivas affectiones gignit.

Secundus, nempe Sydenhamius convenit cum Hoffmanno negativa propositione, non esse scilicet hysterici morbi sedem in utero, (a) sed discrepat aliquantulum in positiva sententia; hic enim ad spiritus animales non rite dispositos, nec firmos, ac se inordinate moventes proximam eiusdem morbi causam refert.

Utramque igitur horum auctorum opinionem excutiamus, ac non-

nulla hysterici morbi pathemata perpendendo eius radix clarius, quam fieri potest detegatur.

Uterum esse partem adeo exquisitae sensationis, ut antiqui, plurimique recentiorum arbitrati sunt, probari nequaquam potest; primo: autopsia, quia non multis nervorum plexibus donatus invenitur, secundo: per experientiam, quia enormes fere distensiones, & compressiones, ut in gravidis binos, quandoque trinos foetus gerentibus, quae licet paulatim, sensimque augescant, si huiusmodi gauderet sensu, acerbis doloribus cruciaretur; insuper in laborioso partu, in quo vel ipse uterus, a naturali, & centrali sua directione recedit, vel saltem eiusdem orificium, vel sursum, vel deorsum, vel ad latera vertitur, ita ut extra vaginae axem aperiat, aut foetus ob malam figuram difficulter egrediatur, obstetricantis manus intra ipsius uteri cavitatem foetum revertentem, dirigentem, ac violenter trahentem, etiam uncinorum, aliorumque instrumentorum ope ferre non posset mulier, nec placentae uteri saepe fundo adhaerentis extractionem.

Repugnat igitur uterus adeo exquisitae sensationis esse, ut levi etiam accedente irritamento praefatas convulsiones, ac saeva gignat pathemata, quae in hystericeis observantur; idcirco haec utero non attribuit Hoffmannus tamquam causae proximae, & efficienti, sed tantummodo-

(a) *Ibidem.*

tummodo occasionali, & dispositivae. Si menstruorum E. G. fluxus supprimatur, minuatur, aut protrahatur (sit vero ab uteri structura, vel a sanguinis crassitie) refluus ipse sanguis ab uteri vasis in illa ventriculi, & intestinorum, aliarumque partium sensibilibus, ac nervosarum irruit, ac distendit; unde dira illa exoriuntur symptomata, quae universum saepe corpus affligunt. Verumtamen huiusmodi explicatio cunctis phaenomeni partibus non satisfacit.

Primo, quia plures foeminarum, quae his affectionibus vexantur, ordinato, ac sufficienti menstruorum fluxu gaudent.

Secundo, quia haec symptomata menstruorum tempore, vel in principio, vel in statu, vel in fine tantummodo aggredi deberent, tunc enim uteri vasa sanguine turgent, ac nisi satis depleantur, facile idem sanguis ad interiora repellitur, sed extra hoc tempus multae indiscriminatio invaduntur.

Tertio, nonnullae, quarum vasa sanguifera, licet plethora turgeant, nec menstruorum periodo satis exonerentur, hysterice affectionibus minime molestantur, sed tantum iis symptomatibus, quae nimia plethora producere solet.

Ex quibus colligere debemus:

Refluens sanguis ab uteri vasis, praedicta licet pathemata concitare capax sit, cum tamen haec iis etiam foeminis, quibus huiusmodi refluxus

occasio deest, contingant, & e contra in iis, quibus refluere sanguis ab uteri vasis ob praedictas causas deberet, non contingant, alia exquirenda praecipua huius phaenomeni causa.

Hanc non inepte quidem excogitavit inclitus Sydenhamius (a) eam in spirituum animalium ataxia reponendo; etenim, si phaenomeni circumstantias rite pensitemus, has nil aliud esse, praeter violentas, atque inordinatas nervorum motiones huc illuc saevientes, inveniemus, quae ab inaequali animalium spirituum distributione, & in hanc, vel illam partem irruitione oriuntur; unde organorum, & viscerum functiones pervertuntur.

Utrum vero horum motuum spasmodicorum, & inaequalis animalium spirituum distributionis origo, sit debilius spirituum crasis, ut Sydenham existimat, vel potius nervorum systematis imbecillitas, ac rara compages, ut magis consonum mihi videtur, modo demonstrabimus.

Ex hac enim imbecilli, & rara compage, etiam si levem compressionem patiantur nervei tubuli, utpote nimis flexibiles, facile obtunduntur, vel spirituum influentium nisu dilatantur. Tubulorum autem compressio, & obtusio fluidum nerveum excludit, vel eiusdem refluxum parit, unde inaequalis ipsius fluidi distributio, & in ceteros nervorum ramulos impetuosior dilata-

tio maiorem in hanc, quam in illam partem fluidi nervei quantitatem accersit, ac inter nervorum propagines aequilibrium tollit; siquidem quae maiori spirituum copia inflantur, aliis, vel vacuis, vel minus turgidis praevalet; hinc crispationes, ac spastici viscerum, ac membranacearum partium motus insurgunt, qui hystericarum affectionum myriades efficiunt. Propositionis veritas magis eminebit, si nonnullas tantummodo phaenomeni circumstantias expendamus.

Primo, huiusmodi morbi, qui hystericorum nomine veniunt, maribus quoque communes, & familiares sunt, ac tantummodo denominatione differunt, nempe hypochondriaci, ut obnixè asserit supra laudatus Sydenhamius (a) his verbis: *Si affectiones hypochondriacas vulgo dictas, quas splenis, aut viscerum, nescio quorum, obstructioni imputamus cum mulierum hystericarum symptomatibus conferamus, vix ovum ovo similius, quam sunt utrobique phaenomena,prehendemus.*

Causam vero, propter quam foeminarum numerus ab hoc morbo correptarum multo maior sit, quam marium, foemineae profecto temperiei, rariori, & imbecilliori corporis habitui attribuendum erit. Quis enim nescit mares fortiori corporis habitu donatos esse; quippe nec ad fletum, nec ad risum tam facile moventur, ut foeminae, nec levi

ex causa moerore, & timore, ira, & miseratione, odio, & amore prehendantur. Hypochondriaci vero, qui tales fiunt, vel ob innatam habitus corporis imbecillitatem, vel ob assiduas mentis applicationes, vel ob animi pathemata, vel denique ob nimium veneris usum, quippe ex his fibrae musculares segnes evadunt, vasorum elasticitas imminuitur, tubulorum nerveorum tonus laxatur, eorumque diameter fibrillis subsidentibus angustatur, ac fluidi nervei libera traiectio impeditur, ex quo inaequalis eiusdem influxus; hinc membranosa viscera, utpote nerveis fibris pro maiori parte constructa, praecipue ventriculus & intestina, robur amittunt, inordinate moventur, nec attritionis officio satisfaciunt, quae hypochondriacum morbum constituunt.

Inter pathognomonica vero signa, monente Sydenhamio, tum hypochondriaci, tum hysteric morbi, sunt urinae tenues, ac limpidae, ut aqua fontana, nec non copiosae, quod a nervorum erethismo, & inaequali oscillandi vi oritur, quemadmodum, & pravae digestionis, quae per flatu nidosos, acidosque dignoscuntur, quamvis moderata sit commestio, & appetitus conveniens.

Inordinata haec nervei systematis actio ob inaequalem spirituum influxum in illis affectionibus satis deprehenditur, quibus modo huc, modo

(a) *Ibidem.*

modo illuc violentae, & acerbae contractiones contingunt, aut in stomacho cum intolerabili dolore, ac vomitu, quae affectio a Sydenhamio colica hysterica (a) appellatur, aut ex ventre inferiore in fauces ascendens, vulgo *uteri strangulatus*, aut denique in aliqua pericranii parte peracuto, & punctorio dolore, ac si ferreo clavo, vel terebra perforetur, & ideo *clavus hystericus*.

Quandoque ad ipsum cerebrum appellit, & tractus medullares impetuoso spirituum refluxu nonnihil quatit, ac dimovet; unde vertigines, deliria; vel ipsius cerebri sinus constringendo, ac cervicales venas, sanguinis descensum nonnihil impediunt, hinc turgentia vasa cerebri anfractus comprimendo sensuum stuporem, ac leves, seu temporaneas apoplexias gignit.

Si ad thoracem, pulmonum dilatationem impediens suffocationem minantur, quae pro uterina suffocatione passim habetur.

Admirabilia sane videntur illa accidentia, quae ab odoribus nonnihil acutis in quibusdam foeminis huic morbo obnoxiiis excitantur; acuti nempe capitis dolores, mentis, ac sensuum stupores, praedictae suffocationes, ac pene universales musculorum convulsivi motus.

Haec odorum quidem phaenomena validam huius propositionis demonstrationem porrigunt; acutae enim volatiles olentis corporis par-

ticulae olfactorios nervorumplexus penetrant, eorumque tubulis animalem spiritum repellunt, qui huc illuc delatus absque ordine, & distributione ad cetera nervorum paria, tum capitis, tum ipsius spinalis medullae oriundas irruit, qui utpote rarioris texturae, imbecilliorisque consistentiae, eiusdem impetui non resistunt, sed turgentes contrahuntur, & convulsivos edunt motus.

Foeminae profecto rusticae, quarum vita in laboribus ducitur, aestivo soli, aequae ac brumali frigori se exponunt, solo pane, & pulmento fere vescuntur, duri corporis sunt, ac durae fibrarum texturae, nunquam, vel raro hysterico morbo vexantur.

Ita robusti homines, & qui artes laboriosas exercent, veluti baiuli, fabri, sive lignarii, sive ferrarii, maxime vero rustici, qui battilla, aratra, & ligones tota die tractant, aeris intemperiei, calori, & frigori se exponunt, cibusque agrestibus vescuntur, nunquam, vel rarissime in hypochondriacas affectiones incidunt; ergo hystericus, & hypochondriacus morbus minime inter se differunt, nisi ratione subiecti, maris nempe, & foeminae; ergo uterque a nimis rara, & imbecilli nervosi generis compage, cuius tubuli facile comprimuntur, obturantur, spirituique, vel rarefacto, vel inaequaliter irruenti non resistunt, & inflantur, exoritur.

LIBER

(a) *Ibidem.*



LIBER II.

SECTIO I.

DE FEBRIBVS CONTINVIS, ACVTIS, ET SIMPLICIBVS.

CAPVT I.

De Febre in genere.



Febrem, cuius abditam naturam plurimi exploraturi propriam mentem fatigarunt, modo excutere conabimur.

Innumeras quidem de febre definitiones, quot sunt auctores, qui universalem medicinae pathologiam, vel ipsarum febrium theoriam pertractarunt, habemus, quas referre, & expendere nimis longum esset.

Ut adaequatam febris definitionem exhauriamus juxta Boerhaavii praecepta (a), illa considerata sunt phaenomena inter plurima, quae febrem comitari solent, quibus praesentibus febris semper adest, & vicissim iisdem remotis eadem quoque abest.

Febrium praecipua haec sunt accidentia, nempe horripilatio, calor, pulsus frequens, cui nonnulli celeritatem addunt, sed praedictis pulsus frequentia in febre constantius est; nam eadem sine frigore interdum aggredditur, ac sine horripilatione, &

e contra frigus, & horripilatio sine febre, quandoqueprehendit, calor ipse interdum deest febre praesente, tum externus, qui manu percipitur, tum internus, qui aegrum non latet. Hunc vero saepe etiam sine febre experimur. Non ita tamen de pulsus velocitate, seu frequentia res se habet; etenim nec febris sine pulsus frequentia, nec pulsus frequentia sine febre invenitur.

Per velocitatem, ac frequentiam pulsus illam intelligo, quae peculiari subiecto imprimis praeternaturalis est, quia nonnulli frequentiorum arteriarum pulsum a natura consecuti sunt, quam alii generatim, secundo, quae non a causa accidentali, nec temporanea producitur, veluti incessu velociori, aut qualibet alia corporis actione laboriosa; aut iracundia, aut denique violenta animi passione, quibus conquiescentibus etiam pulsus ad naturalem oscillationem redit. Verum illam intelligo pulsus velocitatem, cuius proxima, & dispositiva causa intrinseca est, nec a praedictis causis

(a) *Aph. de cogn. & cur. morb.* 302.

caussis accidentalibus proxime dependens.

Igitur praeternaturalis huius velocitatis proxima causa erit & ipsius febris. ^b Velocitas pulsus, cordis quoque velocitatem arguit, nec non totius arteriarum systematis, quibus communicant, non solum sanguiferarum, verum lymphaticarum (a).

Praeterea cum arteriae cuiuscunque ordinis membranis, nervorumque propaginibus cohaereant, irretiantur, ac in eorum contextum distribuuntur, membranosi quoque, ac nervei systematis frequentior oscillatio, proinde, & solidarum totius corporis partium motus acceleratio. Huiusmodi vero motus solidorum aucta celeritas non a sanguine vasa percurrente, nec lympham producit; haec enim ab ipsis solidis motum accipiunt (b) docente etiam Baglivio (c): *Fluida supra, & infra nesciunt, sed undequaque currunt indifferenter, prout hinc inde impelluntur*, sed ab eorundem solidorum elasticitate nimis provocata.

Dico solidorum, & fluidorum acceleratum motum, quia solidorum oscillatio accelerari nequit, quin fluida solidis contenta ex frequentiori eorundem solidorum ictu crebrius compellantur, ita vicissim fluida celerius moveri nequeunt, quin vasa celerius oscillent; cor E. G. frequentius se contrahens dato temporis spatio maiorem sanguinis quan-

titatem e sinu suo proicit, & singulis cordis contractionibus singuli eiusdem sanguinis jactus respondent, proinde tot sanguinis projectionibus, tot arteriarum diastoles, in quibus pulsus frequentia consistit.

Id circo sanguis in febre breviori temporis spatio suam circulationem absolvit; Lympha, quae ab eiusdem sinu emergit, in peculiare arteriolas maiori impetu impelletur ob auctum tum sanguinis affluentis, tum arteriarum oscillantium nisum; animalis quoque spiritus maiori impetu medullares cerebri tubulos ingreditur; proinde cuncti liquores a sanguinis massa fecernendi ad suos ductus secretorios velociori motu properabunt.

Ergo universa corporis fluida per propria vasa accelerato motu procedent.

Praeternaturalis vero vis, solidorum elasticitatem laceffens, erit ipsius febris causa efficiens, cuius natura modo exquirenda est.

Cum universae nostri corporis partes ad haec duo redigantur genera, liquida nempe (d), & solida, hoc est contenta, & continentia, sequitur solummodo contenta, seu fluida solidorum elasticitatem laceffere; nam solidis partibus, nec sibi invicem impingere, nec ullam actionem contra se ipsas intendere datum est, nisi contento fluido mediante. Cor E. G. in arterias nisum

(a) Vid. Cap. 7. lib. 1. & 8. (b) Vid. Cap. 8. lib. 1. (c) Prop. III. Cap. VIII.
(d) Vid. Cap. I. lib. 1.

sum suum exercere nequit, nisi sanguinis ope, intra quas eundem jactat, & arteriarum diaholes a celeritate sanguinis a corde proiectedi, quae ab ipsius cordis momento pendet, & ab eiusdem sanguinis massa, hoc est a rectangulo, seu facto massae in celeritatem (quod impetum liquidi circulantis constituit) producit.

Causa igitur proxima, & immediata solidorum elasticitatem provocans erunt liquida in vasis contenta: modum vero, quo liquida eorundem solidorum elasticitatem nimis provocent, nunc explorare curabimus.

Multiplicem quidem causam, & originem habere potest hic modus, quamvis per se unus & idem, demonstrabitur.

Sanitatem in libero, & aequali fluidorum motu progressivo consistere, jam animadvertimus; (a) ergo in febre, quae inter ceteros, quibus natura opprimitur, frequentior est morbus, progressivus fluidorum motus capillaribus saltem vasculis intercipitur.

Quotiescunque nonnullae fluidorum partes ex quacunque causa vasorum parietibus nonnihil inhaerent, atque ad stagnationem propendeant, eorundem tunicas magis distendere debent, eo quia ultra procedere nequeunt nisi suum ex impetu accepto contra vasorum pa-

rietes exercent, aliaeque subsequentes, cum pristina saltem celeritate progredi non possint, motu quodammodo reflexo ad latera nituntur, vasa praeter naturam distendunt, eorumque elasticam vim magis provocant, ita ut vehementiori renitantur systole, quae tamen ex fluidorum quasi stagnantium resistentia perfici nequit, quapropter vasa contentum fluidum omnino expellere, nec se ipsa satis exonerare valent, hinc maiorem eiusdem fluidi portionem a corde recipientes, quam transmittere possint, violentam, & crebriorem distensionem patiuntur, cui crebrior, & violentior ipsorum vasorum contractio respondet, ideoque frequentior, & velocior eorundem solidorum oscillatio.

Cor quoque suum motum accelerat, ac frequentius contrahitur, primo, quia eiusdem motus cum arteriarum oscillationibus pene synchronus esse debet. Secundo, quia prohibito, vel saltem interrupto fluidorum progressu eorundem refluxio, & regurgitatio contingit, cordique resistentia augetur, ita ut totum sanguinem ventriculis contentum difficulter expellat; idcirco magis gravatae, atque distensae eiusdem fibrae, ac parietes, utpote valde elasticae, frequentius, ac intensiori vi resiliunt; unde frequens & vehemens cordis systoles, cui frequens, & velocior arteriarum saltem maiorum pulsus respondet, qui pathogno-

(a) Vid. Cap. XVI. lib. I.

pathognomonicum febris signum exhibet.

Haec febris in genere theoria pluribus observationibus illustratur, primo: tumores, qui in externa peripheria insurgunt, saltem, si inflammatorii, febrem excitant, & quamvis mole parvi sunt, ut furunculi, a sensibili febre comitantur, cuius phaenomeni rationem facile assequimur, si huiusmodi tumorum naturam investigemus, quae sane nil aliud est, praeter vasorum cuiuscunque generis, sed praecipue arteriolarum sanguiferarum ingens distensio, plerumque a cruore illuc congesto, ac ex quacunque causa stagnante, nerveas fibrillas & membranas irritante, (de qua ad hoc non pertinet investigatio), quae vasorum, & praecipue venarum diametrum coarctans sanguinis reditum prohibet, & crescente jugiter congestione ob assiduum ipsius sanguinis appulsum vasa ita dilatantur, ut in tumorem eleventur. Accurrens interim sanguis e corde veniens stagnantis sanguinis obicem inveniens ad arteriarum latera reflectit, quae cum vehementer distendantur, membranarum, quibus irretiuntur distractio non sine acerbissimo dolore efficitur, dolor vero, vicinarum saltem partium nervulos spasmodica crispatione afficiens, maiorum etiam vasorum diametros constringit; quare aucta sanguini, tum ex intercluso tramite stagnantis liquidi intra tumorem, tum ex an-

gustatis vicinarum partium vasis, resistentia, revertit, ac maiori vi contra vasa nititur, ex quo & cordis, & arteriarum elasticitas provocatur, ac intenditur; unde febris.

Huiusmodi tumores, quos crebro suppuratos ire experimur, cum suppurationi proximi sint, diris doloribus, ac vehementiori febre aegrum afficiunt (monente Hippocrate celebri illo aphorismo) (a) quam postquam ad maturitatem pervenerint, quia in praefatis tumoribus sanguinis ex arteriis in venas aditus adeo intercluditur, ut illius stagnatio nunquam solvi possit, quapropter sanguinis a tergo impellentis impetus augefcit, ac arteriolas magis distendit, ex quo dolores lancinantes insurgunt, crispationes ad vasa maiora pertingunt, proinde cor, solidaque omnia proritata vehementius, ac velocius oscillant, saevitque febris.

Non solum vero tumores intrinseca, & dispositiva causa enati, sed etiam extrinseca, & accidentali, quales a gravi contusione ori solent, maxime si in parte ossea, solo scilicet integumento tecta, si illius naturae sint, ut suppurationem non effugiant praenarrata pariunt symptomata, quae a febre, necessario excipiuntur.

Ita & vulnera, praesertim si profunda cum vasorum etiam conspicuorum abscissione, nervearumque

(a) Sect. II. Aph. XLVII.

propaginum, tendinum, aut membranarum laceratione, unde acuti dolores, notabiles crispationes, quae vasorum diametrum coarctant, sanguinis quetranfitum intercludunt, ideoque vasorum ingens dilatatio, quibus febris supervenit, eo quia ex vasis, tum abscissis, tum spasmodica crispatione obtusis sanguis regurgitat, maiori impetu in arterias nititur, cordique resistantiam auget.

Idem quoque evenit in fracturis, ac luxationibus, in quibus vasa sanguifera ossibus fractis, vel luxatis adhaerentia directionem nonnihil mutant ex recta, E. G. in obliquam, tendines violenter distrahuntur, acuti dolores accedunt, non sine spasmodica fibrarum nervearum eadem vasa angustante contractione, a quibus febris producitur. E simili causa pulsus velocitas, & frequentia oritur in cursu, vel violenta quacumque actione, & labore, a quibus, eam pendere nisi constaret, febrem adesse facile imposeret.

Nam in huiusmodi laboriosis actionibus muscoli, proprio munere fungentes, transversales contrahunt fibras, five nervosas, (a) five tendineas, vasaque sanguifera in eorundem substantiam perreptantia, & intra musculares membranas inclusa stringuntur, ac sanguini pertranseunti magis resistunt; ad cuius progressivum motum (utpote necessarium, non solum ad universa-

lem circulationem, verum etiam ad musculi actionem, & vim fulciendam, quae perenni sanguinis affluxu indiget, ne in ipsis deficiat) cor suas intendit vibrationes, ac frequenter oscillat, arteriarumque pulsus accelerantur.

Igitur febris, seu solidorum, ac fluidorum acceleratus motus continget, quotiescunque inter fluida, & solida aequilibrium tollatur, seu illa reciproca momenti proportio, qua solida agunt in fluida, & vicissim fluida reagunt, ac renituntur in solida, ob quam proportionem ordinata, aequalis & completa solidorum fit oscillatio, fluidorumque progressivus motus aequalis, non interceptus naturali celeritate expenditur.

Tollitur huiusmodi aequilibrium, modo vitio solidorum, modo fluidorum, modo utrorumque. Vitium solidorum, vel in atonia, ac praeternaturali imbecillitate consistit, quippe eorundem fibrillae elementares nimis aqueo, ac parum tenaci glutine coniunctae (b) laxae cohaereant.

Aut nervei tubuli necessaria animalium spirituum quantitate defraudantur, ex qua nec impleri, nec turgescere queunt; unde nervorum plexus, ac membranarum, proinde universi solidorum systematis, quod ex praedictis constat, laxitas, & imbecillitas producitur.

Accedit etiam qualitas eorundem spirituum, qui si parum elastici, vappidis

(a) Vid. Cap. XIII. (b) Vid. Cap. 3. lib. I.

vappidis humidisque particulis obruti, debitam rarefactionem nerveos ductus inflantem, eorumque tonum efficientem inire nequeunt.

Verumtamen huiusmodi solidorum vitium dispositivae tantummodo causae ad febrem, non proxima, esse posse videtur; solidorum namque atonia, si universalis, plurimas fluidorum morbosas affectiones parere jam demonstravimus; nisi enim sanguis a valida imprimis cordis systole impellatur, ac talem impetum acquirat, ut arteriarum resistantiam superet, easque ad illud punctum dilatet, in quo magna resiliendi vis excitatur ratione elasticitatis, hic tardiori motu procedet, arteriolisque capillaribus, si-ve viscerum, si-ve peripheriae facile haerebit.

Arteriae vero, quarum elastica resilitio locus est, non solum ut idem sanguis novum impulsu accipiat ad progrediendum, in vasis praecipue minimis, ad quae cordis momentum vix pertingit, quia ab eodem remotiora, ac sanguis accepti ab ipso corde impetus plus amittit, quo maiorem invenit resistantiam, quae maior est in data proportione distantiarum, si vasa sint similia, aequalia, & aequali fibrarum tono donata: (crescit enim sanguinis per arteriarum tubos protrusi resistantia ratione contactuum particularum eiusdem, quae quo magis a corde distat, eo maior fit eorundem contactuum numerus pro-

pter longiorem tuborum internam superficiem, quam excurrendo perfricant) verum etiam, ut eadem particulae, si crassiores, ac naturali mole excedentes, elastica arteriarum constrictione comminuantur, si irregularis atque angulosae figurae, atterantur, laevigentur, ac sphaericam figuram, (a) vasorum configurationi similem, molemque eorum diametris, per quos traduci debent, accommodatam ac ceteris sanguineis globulis aequalem, acquirant.

Praeterea sicuti sanguis tribus globulorum generibus constare jam supra animadvertimus cum Leeuwenhoeckio, Boerhaavio, & Schreibero, rubris nempe, (b) serosis, & lymphaticis; rubri enim ex serosis, serosi ex lymphaticis invicem cohaerentibus construuntur, ita nisi a valida arteriarum oscillantium compressione serosiori E. G. globulorum pars in alios maiores compingatur, rubri globuli ab illa proportionem deficient, quam cum serosis habere debent, aut saltem ex serosis particulis haud perfecte compactis rudem nanciscuntur figuram, canalibus traiciendis parum aptam.

Experimentum superius adductum (c) has varietates satis illustrat, nec non diurna nos docet experientia; sanguis humanus e vena extractus, licet interdum mox post extractionem sine ulla, vel pauxilla feri quantitate in vase appareat, si tamen aliquandiu fervetur, praesertim in loco tepido, per integrum

O 3

nempe,

(a) Vid. Cap. XIV. lib. 1. (b) Vid. Cap. I. lib. 1. (c) Cap. 2. lib. 1.

nempe, vel plures dies plerumque in serum fatiscit, eo quia serosi globuli rubros componentes, cessante solidorum vi, qua coguntur, proprio pondere disiunguntur, decidunt, ac in serum abeunt.

Sanguinis vero molecule ita rudes, cum ad minimas sui generis arteriolas perveniunt, quarum diameter unius tantum molecule capax est, difficulter traicientur, immo facile haerebunt, quia globulis serosis, ex quibus componuntur, laxè cohaerentibus maius spatium occupant, nec complanatam habent superficiem, nec sphaeroideam figuram, sed inaequalem, & irregularem, proinde canalibus, a quibus traduci debent, parum accommodatam.

Praeter quam quod debili pollentes elasticitate eadem arteriolarum, licet ab huiusmodi moleculis distendantur, languidiori contractione resiliunt, nec ipsas debita saltem celeritate propellere valent, ideoque illarum circulatio lente admodum procedet; quare, cum sanguinis particulae ex repetitis perficiantur circulationibus, ac traiectionibus, praesertim per vasa minima unicum eiusdem globulum admittentia, in quibus ab oscillante, ac circumpremente vi compinguntur, sphaeroideam figuram, & complanatam superficiem assequuntur, imperfecta plerumque habebitur sanguificatio, & a diurno chyli in sanguinem ingressu saepe crudarum, seu male at-

tritarum partium copia augebitur, quae praedictis arteriolis facile haerebunt, glandularumque secretorios meatus infarcient; unde morbosae obstructions, ac lentiores (a), quae si ad plures vasculorum congeries deferantur, illaque occupent, fluidorum progressus interceptetur, refluat sanguis, vasaque magis distendent; cor vero, & universa solida maiori fluidorum refluentium pondere, ac nisu gravata, & provocata frequenter oscillant, in quo febris consistit.

Vel vitium solidorum in nimia positum est fibrae rigiditate, cuius elementares particulae denso, ac tenaci glutine cohaerent (b), haec quidem per oppositam causam suo muneri deficiunt, quippe, cum valde durae sint eadem fibrae, fluidorum nisi parum flectentur, vasaque brevem, & concisam edent vibrationem; ideo solida minus, quam par est, momentum supra fluida exercent, etenim impetus cum ex rectangulo massae in celeritatem resultet, ut supra innuimus; pro massa vis solidorum elastica, seu potentia resiliendi accipiatur, quae cuilibet corpori elastico propria est, & talis, si perfecte elasticum sit corpus, ut momento corporis impingentis, aut prementis aequalis sit; unde actioni aequalis est reactio. E. G. si corpus elasticum, vel durum tantummodo, in aliud perfecte elasticum immobile incidat, eadem velocitate, ac impetu, quo impingit,

(a) *Bellin. de febr. in genere.* (b) *Vid. Cap. 3. lib. I.*

impingit, renisus vi etiam repellitur, ac reflectit, quia elastici corporis partes ab incidente intrusae eadem vi, qua pulsae fuerunt, renituntur, & quo maius fuerit earundem partium intrusio, & compressio, eo fortior quoque resiliendi vis. Hoc posito, sic ratiocinamur.

Quo maior fuerit fibrarum arterias contextentium rigiditas, ac durities, eo minor fiet ab impulsu sanguine in arteriae latera impingente tunicarum extrusio, & dilatio, ideoque minor resilitio, seu debiliior sese contrahendi actus, proinde minus ratione elasticitatis arteriarum momentum supra fluida.

Erit quoque minus ratione celeritatis, quae ex spatio, & tempore, quo ipsum describitur, resultat; spatium vero, quod huiusmodi arteriae describunt in diastole, brevius est, cum scilicet eadem ab impellente sanguine distensionem patiuntur; ergo brevius, & in systole, qua vi propriae elasticitatis in pristinum statum rediguntur; ergo minor erit impetus etiam ratione celeritatis, quia dato aequali temporis momento, quo arteria pulsatur, illa quae rigidis constat fibris pulsando minus spatium, quam arteria flexibilis, & elastica describit.

Similiter res se habet in chordis musicalibus, quarum nimis tensae pulsanti magis resistunt, ac breviores edunt oscillationes, quam mediocriter tensae, quae idcirco aërem expansiori vibratione quatien-

do graviolem, quam aliae sonum producant.

Quapropter praedicta vasa minori impetu in fluida agunt, ac praecipue sanguis in arteriis a corde remotioribus debiliore vi conteritur, tardiusque, impulsus defectu, ex iisdem arteriis in venas migrat.

Hinc primo, eiusdem sanguinis particulae homogeneam, & naturalem figuram difficulter acquirunt, quae, nisi repetitis arteriarum ictibus, a quibus compinguntur, ac incessantibus traiectionibus per vasa minima, a quibus circumpremuntur, indui potest; igitur ex iis plurimae, antequam globulosam figuram assequantur, si asperam nonnihil, vel acutis angulis refertam superficiem habeant, facile sibi invicem adhaerebunt, atque crassiores efficient moleculas, quibus abundans sanguis extremas arteriolas infarciat.

Huiusmodi cohaesiones naturales quidem in sanguine sunt; quotiescunque enim per phlebotomiam extractus in vase stagnet, coagulatur. Non autem intra sani hominis corpus, quia illuc perenni motu in gyrum agitur; idcirco in iis, quorum solidae partes satis elasticae sunt, praedicta globulorum adhaesio, quae crassiores, & morbosas constituit partes, raro eveniet.

Nam in huiusmodi subiectis arteriae maiori elasticitatis vi donatae ictibus validioribus sanguinis globulos, modo in hoc, modo in illud

illud latus jactant, quorum nonnulli, licet in mutuo sint contactu, ac proxime adhaesuri, cum tamen in earundem arteriarum latera inaequaliter impingant, ratione diversae superficiei, diversa quoque esse debet ex mechanicis linea reflexionis, quam describunt, ac diversus angulus, ideoque globulos, diffracta eorundem cohaesione, divelli necesse est.

In iis vero, quorum solida tensa, rigida, ac imperfecte oscillantia, huiusmodi vitiosae partium sanguinis cohaesiones nullo negotio contingunt, ac impetus defectu, quem ab arteriis accipiunt, difficilius solvantur.

Propterea lente procedet etiam sanguificatio, seu partium extranearum, quae quotidie ex alimentis in stomacho digestis per destinatos ductus in cruoris massam ascendunt, assimilatio; Chyli enim partes, sanguineis globulis comparatae, rudes, asperaeque sunt, ac valido indigent solidorum momento, ut deferantur una cum sanguine per vasa non solum maiora, & conspicua, sed etiam per extremas arteriolas unicum sanguinis globulum admittentes, per quas sufficienti celeritate traici debent, ac satis brevi temporis spatio circulationem absolvent, quae pluries repetita eisdem chyli moleculas sanguineis globulis assimilant, ac perfectam sanguificationem implet.

Dico primo, satis brevi temporis spatio absolvi debere; nam chy-

lus quasi perenni affluxu ad cruoris massam deferitur, etiam in iis, qui temperanter vivunt, & bis tantummodo die vescuntur; quoniam autopsia nos docet per plures a pastu horas lacteos ductus chylo turgere, ac conspicuos esse; igitur vix consumpta, seu delata chyli in sanguinem materia, quae E. G. post prandium elaboratur, illa coenae subsequitur. Quare nisi satis celeri circulatione chyli moleculae cum sanguine deferantur, earundem assimilatio, ac in sanguinis naturam commutatio diu protrahetur; itaque cruor rudibus chyli moleculis paulatim totus referciretur, quippe cum illius portio concocta in secretionibus quotidie, immo jugiter insumatur, rudis & inconcocta massa secretionibus minime idonea remaneret; unde extremorum vasculorum obstructions, glandularum infarctus, ac totalis fluidorum cacochymia, proinde febris.

Secundo, haec chyli particulae valida indigent solidorum oscillatione, ut nimis crassae comminuantur, asperiores, angulisque refertae conterantur, ac complanentur, denique tenuiores & serosiores, si proportionem excedant, compingantur, ac in globulos rubros coeant, ita ut fluida, seu potius globuli diversae speciei, ac magnitudinis cruoris massam componentes, nempe rubri, qui crassiorem, serosi, qui fluidam, ac lymphatici, qui tenuissimam eisdem partem constituunt, datam, ac naturalem proportionem servant.

Cum

Cum igitur deficiens sit in solidis tam necessaria oscillandi vis, & impetus ob innatam eorundem tensionem ac durtiem, chyli particulae male attritae, & comminutae irregularem figuram, seu vasorum cavitatibus prorsus dissimilem minime deponunt, ac facile inter se cohaerentes in maiores crescunt moleculas, quarum diameter cum extremarum arteriolarum diametro maior fiat, easdem permeare nequeunt haerent, ac stagnant; praecipue vero huiusmodi cohaesio in tortuosis viscerum anfractibus contingit, in quibus lente progrediuntur fluida, utpote a corde remotiora, veluti in hepate, quod parum sanguinis ab arteriis ad idem pertinentibus, sed plerumque refluxum a viscerum adiacentium parenchymatibus, pancreatis, lienis, ceterumque per venae Portae ramos recipit, huiusque ad glandulas, sive vasa secretoria crassior, & oleosa sanguinis portio perveniens pro bilis materia a natura destinata ibidem diu haeret, atque partium agglutinarum mole augescendo difficilior eiusdem per secretorios ductus eliminatio redditur.

Quapropter bilis, si prorsus intercluso per proprios ductus exitu pene tota refluat, ac in venam cavam migrando totam sanguinis massam coinquinat, fiet simplex icterus; at si eiusdem bilis portio vasculis congesta diu stagnet, ac refluere difficulter possit, febris icte-

rum comitatur, primo (a), quia stagnans bilis visceris calore rarefascens vasa adeo tumefacit, ut eorundem tunicae distensae arteriae ramulos comprimant, sanguinisque progressui obstant, secundo, quia obstructis plerisque venae portae ductibus, sanguinis ad eosdem appulsi ingressus prohibetur, a quibus refluens in proxima vasa impetum facit, quae eorum elasticitate provocata vibrationes intendunt, accelerantque, donec exonerentur, febrisque insurgit.

Quod de hepate diximus, etiam de iis visceribus, glandulis, meatibusque excretoriis ipsius peripheriae intelligimus, sed haec ad peculiare potius febrium essentias, de quibus infra; modo ad solidorum vitia sive affectiones redeamus, quarum potestremam in nimia elasticitate collocamus.

Non solum itaque solidorum imbecillitas, ac laxitas, quemadmodum tensio, ac rigiditas, verum & nimia elasticitas inter febris causas (b) agnoscere debemus, hoc tantum discrimine, nempe praecedentes affectiones tamquam remotae, seu dispositivae febris causae considerandae, prostremae vero non solum inter dispositivas, sed etiam inter proximas reputandae.

Huius propositionis veritas elucescet, si aequilibrii necessitas inter solida, & fluida (c) expendatur, quotiescunque enim hoc auferatur, illico naturalis oeconomia se incondite

(a) Vid. Cap. IV. lib. 1. & Cap. XII. (b) Vid. Cap. XVI. lib. 1. (c) Vid. Cap. XVII. lib. 1.

dite gerit, ut supra vidimus, praeunte nobis plurimorum auctorum face.

Si igitur solidorum elasticitas nimia sit, maius erit vi elasticitatis eorundem momentum supra fluida, quam horum massa vi inertiae, seu ratione resistentiae requirat.

Cum solidorum elasticitas a vi contractili pendeat, immo ipsa sit vis contractilis, vasa, quae sanguinem a corde proiectum, ac in eius latera impingentem accipiunt, post dilatationem vehementius contrahuntur, ita ut momentum contractionis maius sit momento dilatationis ratione celeritatis, seu spatii, quod breviori tempore se contrahendo describunt; idcirco sanguis a resilientium arteriarum ictibus vehementiorem impetum acquirat.

Data propterea occasione augmenti velocitatis solidorum, quod aut in violentis corporis actionibus, veluti in cursu, & laboribus praesertim infuetis, aut vehementibus animi motibus, pavore, & iracundia excitari solet. Tunc fluida, ac praecipue sanguis vehementiori tum cordis, tum arteriarum vi impulsus maiorem impetum acquirat, quo vel extra propria vascula in aliena tenuiori fluido traiciendo destinata, nempe serosa, aut lymphatica, osculorum resistentiam superans intruditur, a quibus cum difficulter admodum se extricari possit, ob eorundem oscillationem nimiam distensione interceptam, ac per se ipsam sanguiferarum arteriarum multo languidiorem, diu haeret, ac stagnat, unde phlogoses, ac in-

flammationes, quae si in notabili vasorum aggerie, aut in membranis, ac exquisito sensu praeditis partibus fiant, inflammatoriae, acutaeque febres insurgunt, cum essentiali illius visceris, in quo contingunt, affectione, puta in capite, cerebro, & meningibus, a quibus febres cum vehementi delirio, seu phrenitides, lethargici affectus; in faucibus, & trachea anginae; in thorace, pleura, vel pulmonibus pleuritides, vel pulmoniae, aliaeque viscerum, partiumque organicarum affectiones, quae febrem excitant.

Huiusmodi sanguinis intra lymphatica vasa irruptiones in ophthalmiis manifeste apparent, in quibus alba oculi tunica admodum rubescit, ac tumet, quia lymphatica eiusdem vasa per album, aut saltem diaphanum humorem in naturali statu continentia a sanguine invaduntur, atque incongruis eiusdem, ac multo maioris diametri particulis distenduntur, ac turgent, ita ut, quae prius oculos laterent, admodum conspicua fiant.

Non solum vero e propriis vasis egressus sanguis, ac in lymphatica intrusus haeret, ac stagnat, sed etiam in ipsis arteriarum extremitatibus, quae sanguinei globuli, nisi singuli permeare possunt; nam cum impetus eorundem globulorum in eadem vasorum sectione excurrentium aequalis sit, donec per arterias plurimum globulorum capaces excurrant, horum nonnulli aequalem a corde distantiam servare, ac ad extrema vascula aequali motu simul progredi poterunt.

poterunt, sed cum ad illa perverint, quorum diametri unum tantum globulum admittunt, si ex vehementi circulationis impetu bini E. G. globuli in eadem se intrudant, ibidem haerebunt, quia arteriolae praedictae, quo magis ad extremitatem accedunt, ob conicam figuram, quam nactae sunt, angustiores fiunt, quod animadvertit etiam Bellinus (a) : *Si ad principium canalıs contineatur liquidum erogandum per alios canales successive ex lateribus eiusdem canalıs derivatos, quo magis in longum protrahitur canalıs, erit semper magis angustus*; idcirco eadem prope extrema orificia seminus dilatabunt, & globulorum ad aequalem ab ipsis orificiis distantiam perductorum nisui omnino resistent; quare nec illos, nec ceteros a tergo succedentes traicere poterunt, sed ab his omnino occludentur arteriolae, ut monet idem Bellinus (b) de canalibus minimis loquens : *Magnum semper imminet periculum occlusionis, quae ex hoc ipso, quod liquidum per ipsos fluit, continget, & ex eo fit validior, quo vis fluxus fuerit intensior, & liquidum ipsum fluens est illud ipsum, quod occludit.*

Igitur si vascula occlusa plura sint, notabiles sanguinis stagnationes, eiusque refluxus, a quo necessario febres excitantur.

Haec dispositivae sunt ad febrem causae, quae a nimia solidorum elasticitate saepius gignuntur; huius-

modi tamen solidorum affectio proxima ipsius febris origo, & fomes esse potest.

Posita namque in nonnullis vasculis sanguinis stagnatione, vel etiam circulatorii motus tantummodo retardatione, ita ut refluat nonnihil sanguis, ac solidorum vi contractili resistentiam parumper augeat, eadem cito ad intensas, ac frequentes vibrationes provocantur, quas a solidis mediocriter elasticis haud tam facile expectare debemus; ergo immoderata solidorum elasticitas tum dispositiva, tum proxima febris causa esse potest.

Fluidorum quoque vitio febris oritur, quod vel in quantitate, vel qualitate censendum est. In quantitate, si fluida nimis copiosa sint, Arteriae E. G. maiori, quam in naturali statu sanguinis quantitate replebuntur; cum vero eiusdem crassiss in naturali statu perseverare supponamus, in praeternaturali sanguinis copia maior quoque animalium spirituum, quemadmodum, & ceterorum ab eiusdem sanguinis finu discernendorum liquidorum materia continebitur, ideoque copiosior ad cerebri tubulos eorundem spirituum quantitas appellet, nec non copiosior erit secretio, ex qua nerveae fibrae iisdem spiritibus magis replentur, quibus & villi solidorum scattentes, maiori elasticitate, ac fortiore contrahendi vi pollent. Cor autem, qui ex villis contractilibus construitur, validius contrahetur, & P 2 sanguinem

(a) De mot. bil. Prop. 27. fig. 4. 5. 6. 7. 8. (b) Prop. 26. de mot. bil.

sanguinem vehementius proiciet; unde ipse sanguis ex massa, atque celeritate aucta in arterias maiori impetu impinget, easque distendet, quae cum elasticae supponantur ex animalium spirituum copia, qui in cerebro fecernuntur, quibusque inflantur, aequali renisu sanguinem repellent, eiusque progressivum motum, praesertim in capillaribus, accelerabunt; hinc citius sanguis ad cor redet, auriculas inflabit, ac ventriculos crebrius ingredi cogetur, idcirco elastica cordis vi crebrius proritata frequentius idem oscillabit, proinde frequentior sanguinis in arterias proiectio, cui synchrona earundem diastoles, pulsum frequentem reddit, sanguisque progressivi motus velocitatem auget, quod febrem constituit.

Nimiam igitur, sanguinis quantitatem proximam febris causam esse posse ostendimus; modo & remotam, ac dispositivam saepe fieri videbimus; nam excedens quantitas qualitati vitium affert, a qua postea febris oritur.

Vitiatur vero qualitas sanguinis ex nimia quantitate, quotiescunque aequilibrium inter solida, & fluida, inter vasa sanguifera, cor, & ipsam cruoris massam auferatur; videlicet si haec ita augeatur, ut systalticae cordis vi nimis resistat, eamque suffocet, quod tunc evenit, cum arteriae ita replentur, ut totum sanguinem a corde proiectum data celeritate transmittere nequeant; ideo maior fluidi copia accepta, quam traiecta, sanguini a corde pulsi, & ipsas arterias ineunti viam intercludit, qui

refluere cogitur; nisi ab intensiori eiusdem cordis systole propellatur.

Interim prae nimia fluidi copia vasa tam enormiter distenduntur, praecipue, quae tenuioribus tunicis donata, ac intra molliora viscera perreptantia, veluti in cerebro, cuius moles anfractus vasorum distensionem parum resistunt, haec ab iisdem inflatis, ita comprimuntur, ut spirituum secretio sufflaminetur. Quare consueti, vel saltem necessario, & cruoris massae proportionali eorundem influxu orbantur solidae partes, & arteriarum sanguiferarum tunicae laxioris fient toni, nec sanguinis momento resistere, aut contraniti valebunt; ex impetu enim illius e corde venientis praeter modum dilatabuntur, sed minime adaequata erit eorundem constrictio; quapropter sanguini necessarius arteriarum impulsus deficiet, quo mediante progreditur, praecipue per vasa minima a corde remotiora, ad quae eiusdem momentum vix pertingit, nec progredietur illa data celeritate, quae ad naturalem circulationem requiritur, nec ipsius molecule satis atterentur, tum ob circulationis per extrema vascula segnitiam, tum ob languidiorem arteriarum systolem.

Chyli particulae in sanguinem delatae aegrius comminuentur, ac laevigatam rubrorum globulorum figuram difficulter assequantur; hinc prava fit sanguificatio, ipsaeque cruoris massa rudibus, male attritis, asperisque moleculis contaminatur, quae ad minima vascula, ac secretorios,

torios viscerum meatus perductae facillime haerent; Arteriolae vero cum praeternaturali fluidorum pondere obrutae haerentes moleculas expellere, & ad progressivum motum restituere non valeant, viscerum infarctus, & obstructions, quae in imo ventre febres lentas, diuturnas; si vero intra thoracem, aut caput, acutas, ac inflammatorias pariunt; ergo exuberantem fluidorum copiam, non solum tamquam proximam febris causam se gerere, sed etiam tamquam dispositivam, ipso- rum fluidorum texturam depravando, eorumque proportionem pervertendo, procul dubio evincitur.

Alterum fluidorum vitium in qualitate collocatum, a quo febrem oriri posse censemus, explorare conabimur.

Vitiosa fluidorum qualitas, vel a praeternaturali solidorum tono, vitiosaeque vasorum symmetria exoritur, vel ab ipsis eorundem fluidorum principiis, partibusque componentibus, sive ingenitis, sive receptis. Quaecunque tamen sit morbosae fluidorum qualitatis origo, aut solidorum vitium, ut naturae consentaneum esse supra mechanice demonstravimus, aut ipsa fluidorum ingenita principia, aut extraneae receptae partes, modo nil aliud praeter coniunctam eorundem affectionem, a qua febris producat, examinabimus.

Eo quia fluida nostri corporis a sanguine cuncta procedunt, huius

morbosae affectiones perscrutandae sunt, quas ut melius concipere datum sit, eiusdem proprietates, seu naturales affectiones memoria recolendae sunt, de quibus jam supra; (a) quadruplici enim fluidi genere constare sanguinem ibidem animadvertimus, crassiori nempe, quae partem rubram, minus crassa, quae serosam, subtiliore, quae lymphaticam, ac postremo tenuissima, & volatili, quae animalibus spiritibus materiam praebet; prima, a globulis crassioribus, qui ex minus crassis, sive serosis in unum coalitis (b) componuntur, resultat, secunda, a minus crassis, quae ex tenuioribus, nempe lymphaticis, simul quoque coeuntibus.

Primum itaque vitium in non-naturali praedictarum fluidi specierum sanguinem constituentium proportionem esse poterit; tunc cum E. G. crassior & rubra pars serosiori, vel lymphaticae superemineat vel e contra deficiat, aut illis obruatur.

Hoc quidem eveniet (si in solis fluidis causam exquirere velimus) cum serosae moleculae adeo laevigatam superficiem, ac rotundam figuram nactae sint, ut difficulter cohaereant, illud vero, si minus rotundam magisque angulosam figuram, aut viscosam superficiem, qua nullo negotio ad crassiores globulos efformandos conglutinentur; in primo casu serosa, & lymphatica rubrae, & crassiori; in secundo pars crassior, & rubra serosae, & lymphaticae

phaticae praevalebit; uterque vero excessus animale, & vitalem oeconomiam adeo perturbare potest, ut febris producat.

Si enim pars crassior superabundet, tunc sanguis necessario feri vehiculo destituitur, cuius proportionem, ac datam cum crassiore parte rationem supputavit Boileus, qua deficiente solidis impellentibus magis resistit, quia sicuti liquida, quo magis tenuibus, solutisque particulis constant, eo fluidiora sunt, faciliusque excurrunt, & e contra, quo crassioribus angulosis, aut glutinosis moleculis, minorem fluiditatis gradum possident, ac lente moventur; quia liquidi fluidioris moleculae tenuiores sunt, vel saltem laevigatae superficiei, & ad rotundam figuram accedentes, ita ut minorem inter se contactum exerceant, nec glutinosae sunt, quare se cotangentes nullo negotio disiunguntur, ac diffluunt.

Liquidi vero minus fluidi partes numero maioribus punctis se mutuo contingunt, utpote scabra superficiei, aut angulosa figura donatae, invicem cohaerent, & eo difficilius solvuntur.

Quare eorundem augetur cum mole superficies, & contactus occasio, quo ipsae (si de sanguine loquamur) internam vasorum tunicam circulando perfricant; insuper ad minima vascula perductae, a quibus, nisi singulae recipi possunt, cum difficulter disiungantur, aegrius quoque traicientur.

Ergo ubi crassior sanguinis portio serosae, & lymphaticae praevalcat, maiore ex aucta resistantia so-

lidorum vi ad eundem sanguinem propellendum, ac in circulatorio motu sustinendum opus est: idcirco posita eadem solidorum vi, & momento in duobus subiectis, quorum sanguis diversam consistentiam, & crasim nactus fit; unius nempe crassam, cuius partes inter se facile, & stricte adhaereant, alterius vero tenuiorem, fluxilioremque, cuius moleculae solutae, & incohaerentes sint, illae minori celeritate per propria vasa, praesertim minima, in quibus maior partium sanguinis cum interna illorum superficie contactus, & perfricatio fit, excurreret; hic vero maiori celeritate, breviorique temporis spatio suam circulationem absolvet.

Ex quo sequitur in crassiori sanguine extraneas partes tarde attriti, comminui, tardiusque in eiusdem naturam converti posse, quia ex repetitis circulationibus, ac traiectionibus per vasa capillaria hoc idem assequitur natura.

Hinc sanguis crudis, ac male attritis moleculis saepe refertur, & cacochymus evadit, necessariae separationes deficiunt, tenuiores, ac volatiles sanguinis partes intercluduntur, ideo minor spirituum animalium copia per cerebrum feceretur, ac solida perenni eorundem spirituum affluxu nonnihil defraudata naturalem elasticitatem, quam nimis crassas ipsius sanguinis partes attenuare queant, amittent.

Intercipiuntur cutaneae secretiones; primo, quia transpirabilis quoque materia intra viscosas, ac ni-

mium cohaerentes sanguinis particulas devincitur; secundo, quia lente progrediens sanguis intra cutanea vascula secretoriorum oscula momenti defectu pandere non valet; siquidem nos edocet observatio, mediocriter accelerato sanguinis motu, ut in incessu, nos copiose perspirare, quemadmodum in Sanctorii statica nunquam satis commendata admoniti fuimus; haec igitur transpirabilis materia, quae tenuis, ac volatilis est, intus detenta paulatim augefcit, ac interno calore, quo diutius in cruoris massa retinetur, eo magis rarefcit, vasa tumefacit, ac distendit, ipsumque sanguinem e propriis vasis in aliena, veluti lymphatica compellit; eo quia cum diversae sit specificae gravitatis, ac sanguineae partes, ipsis admixta quiescere nequit, sed inaequali impetu progrediens totam massam agitat, & inordinatam spirituum secretionem producit, ex qua nerveae fibrae suas contractiones intendunt, ac frequentant. (a)

Aut haec transpirabilis materia ad nerveas, five capitis, & spinalis medullae, five ventriculi, & intestinorum, five ceterorum secretoriorum ductuum membranas deferatur, ibidemque nonnihil immoretur, ac stagnet, acrior fit, easque vellicando eorundem spasmodicas crispationes ciety quibus coarctatis vasorum diametris, sanguinis progressus interceptitur, quod eiusdem refluxus ad interiora consequitur, cordisque, &

arteriarum systalticus motus ob auctam fluidi egredientis resistantiam intenditur, acceleraturque; unde febris.

Ceterum quoque liquidorum separationes minuantur, parum bilis E. G. separabitur, quia sanguis crassior parum lymphae e sinu suo emittens lymphatica vasa pene exinanita relinquit; hinc lien, qui ob vasorum lymphaticorum copiam ad crassiorem sanguinis partem, hepatis secretorios ductus ingressuram, diluendam destinatus videtur, prae lymphae inopia proprio officio destitutus est, ac bilis materia eiusdem lymphae vehiculo destituta in extrema venae portae vascula admodum lente properabit, ac per bilarios porulos aegre traducetur.

Quapropter bilis non solum modicae erit quantitatis, verum, & vitiosae qualitatis, quia nimis crassa, parumque oleosa intestinorum cavitatem lubricare, nec peristalticum eorundem motum proritare, nec chyli feces praecipitare, nec illius tenuiori parti sales volatiles impertire valebit; unde vapipidior chylus, insipidus, crassamentosus, ac facile coagulabilis; interim huiusmodi bilis materia ab osculis secretoriis repulsa in extremis venae portae ramulis haerebit, ac totum hepatis parenchyma infarciet, & aliquandiu stagnans, visceris calore acrior facta, hepaticos nerveos plexus stimulo afficiet, sanguinisque illuc appellentis refluxus producet,

ex

(a) *Bel. pr. 2 de feb.*

ex quibus lentae, sed diuturnae febres, hepaticae dictae, oriuntur.

Quod de hepatis infarctu, & obstructione indicavimus, etiam de aliis, praesertim imi ventris visceribus, intelligere debemus; etenim si praedictum crassitiei, & auctae cohaesionis inter partes sanguinem componentes vitium existat, etiam ceterorum liquidorum bile subtiliorum inopia aderit, nec non praeternaturalis crassities, quae vitali oeconomiae non levia afferunt damna.

Inops E. G. ac minus fluidus pancreaticus succus, nec chylum satis diluere valebit, stomachi glandulae paucum, & tenacem succum emittent, quo saepe, etiam se exonerare impotentes infarciuntur, ac morbosa obstructione laborabunt; quare imminuto gastrico succo, ac viscoso reddito, non solum alimentis necessarium deest menstruum, quo macerantur, ut a muscolari ventriculi tunica, facilius atterantur, ac solvantur; verum adeo crescit infarctus, ut praedicta tunica, & nervea opprimantur, eorumque peristalticus, et triturans motus sufflaminetur; ex quo pravae digestionis, & anorexiae.

Praeterea huiusmodi succi glandulas infarcientes diuturna stasi acrimoniam acquirunt, quoniam salinae particulae sulphureis commixtae, & colligatae extricantur, ac suis angulis nerveam membranam vellunt, quae in spasmodicas ab contractiones, ex quibus non solum dolores, verum occlusis vasorum

diametris sanguinis circulatio ibidem intercipitur, proinde febris.

Saepe vero ex iisdem glandulis huiusmodi viscosa, & acris materia turgescens, cum per secretorios ductus exire nequeat, refluens in venas migrat, quae sanguinis massam paulatim inficiendo, tamquam extraneus, ac heterogeneus succus febrem inducit.

Ita, & intestinales glandulae praedictis viscosis, acris succis infarctae naturalem, fluidumque liquidum in intestinale tubum, quem lubricare debent, non eructant, ex quo sequitur; peristalticum eorundem motum segniorum evadere, & alvi feces tardius descendere, quod alvi siccitatem producit.

Illae quoque mesenterii, quas chylofera vasa pertranseunt, viscosa tantummodo materia repletae chylo ascendenti nihil illius succi, quo eundem fluidiorem reddere solent, impertiri possunt; unde crassiores factae ipsius molecule, ac facile coagulabiles sanguinem adunt, cui commixtae crudarum, atque glutinosarum partium aggeriem multiplicat, quae huc illuc delatae minimorum vasculorum diametros occludendo febres pariunt.

Vel a materia diuturna stagnatione acredinem adepta infarciuntur eadem mesaraicae glandulae, quae nerveos plexus vellicando in spasmodicas crispaturas ipsum mesenterium inducit, nec non intestina, hinc ventris intumescencia, flatus, ac borborygmi, sed & intra cruoris massam ingressa, huc illuc delata nervosum, ac membranosum genus infestat, quae sympto-

mata

mata mesaraicae febres consequuntur (a).

Ad articulos quandoque fertur, ac synoviales glandulas obstruit, quae ad cartilagineas articulorum superficies lubricandas destinatae sunt, vel musculorum tendinibus consistit, eorumque in vasis stagnans fluidi illuc pertranseuntis motum impedit; unde refluxus, & in eorundem vasorum latera vehementior nisus, qui tendineas fibras distrahens acerbis interdum doloribus afficit, non sine febre, quae symptomata arthritidem, vel rheumatismum constituunt. Huiusmodi sanguinearum partium vitiosa cohaesio pulmonibus saepe infesta deprehenditur. Nam cum in eorum vasculis, utpote exilibus, eadem molecule comminuendae, ac subdividendae sint, si ex cohaesionis vi disjungi nequeant, in iisdem facile haerent, arteriasque occludunt, ita ut progressui sanguinis obstant, quod pulmonias efficit.

Ii quorum sanguis crassioribus, ac inter se stricte cohaerentibus moleculis constat, lymphae, primo, inopiam experiuntur, quae ad solida irriganda, nutritionem reparandam, ac universa sui generis vascula replenda necessaria, quapropter arescunt fibrae, eorumque flexibilitatem ad oscillandum necessariam amittunt, atque arteriolae rigidiores factae fluidis circulantibus magis resistunt, nec satis dilatantur, nec apte se constringendo eadem fluida compellunt.

(a) Baglivus.

Viscera, glandulaeque, quarum aliquem succum secernere officium est, debita lymphae quantitate, quae proprios secretorios ductus humectare, & ad eorundem succorum commeatum lubricos reddere, defraudantur, quare obstructionibus, ac stagnationibus saepe afficiuntur; pulmonum E. G. vesiculae lymphae inopia haud satis irrigatae arescunt, atque crispantur; ideo intertexta vascula constringunt, eorum longitudinalem axem tortuosam, ac pluribus flexibus sinuosam reddunt, in quibus maiorem invenit resistantiam sanguis, qui, utpote crassior, lente progrediens nullo negotio haeret, quare inflammatoriis affectionibus pulmones subiacent.

Hoc idem in cerebro, eiusque membranis excogitare possumus, quotiescunque lymphatici humoris defectu arescant fibrae, obtusiores fiant vasorum cavitates, eorumque flexionum, & plicarum numerus augeatur, quod fit cum meningum tendineae fibrae contrahuntur, & cerebri anfractus rigidiores evadunt.

Non solum vero inops lymphae, sed etiam viscosa censenda est, propterea quia ipsius sanguinis vitium, a quo procedit, nanciscitur. Haec igitur in propriis vasis diutius, quam par est, immorabitur, tardiusque in cruioris massam, unde exierat, redibit, liquida secernenda in vasis secretoriis parum diluet.

Sanguis E. G. venae portae ramulis per abdominis viscera distributis

Q

butis receptus, & praecipue, qui ex liene emanat, in quo vasorum lymphaticorum copia diluitur, ac rutilum colorem adipiscitur, minus fluidus, ac minus coccineus ad hep- par deferetur, quo vel crassioris consistentiae fiet bilis, vel intra se- cretorios ductus, & ad ipsius ve- nae portae radices sufflaminabitur, obstractaque vasa febris consequitur.

Huiusmodi lymphæ etiam gastri- cum succum viscidiorē reddit, qui ventriculi glandulas saepe infarci- ens ingesta alimenta macerare, & ad solutionem disponere non valet, im- mo ipsas ventriculi tunicas, siue ponde- re, siue tensione a triturationis officio cohibet; Praeterquam quod intra eas- dem glandulas diu stagnans acrimo- niam quandoque acquirit, quæ nerve- as fibrillas stimulando spasmodicas ipsius ventriculi crispationes suscitât; hinc febres anxiosæ cum vomitu, cardialgiis, aliisque stomachi affectio- nibus, quæ ob eiusdem cum corde connexionem, octavo pari mediante, a quo plexus stomachicus efficitur, cor ipsum in consensum trahunt.

Pulmonum quoque glandulae vi- scosiores succum ad bronchia hu- meclanda destinatum emittent, a quo per secreteorios meatus aegre traiciente saepe obstruuntur, ac in- tercluso exitu, alio jugiter appel- lente in praeternaturalem molem dilatantur, in quibus, si diu idem stagnaverit, ita induratur, ut in sic- ca tubercula eas commutet, quæ, internam bronchiorum membranam exquisito sensu praeditam irritando,

tusses, aeris ad pulmonares vesicu- las transeuntis aditum angustando, inspirandi difficultatem pariunt, nec non, pulmonicos plexus crispando, pulmonica vasa coarctant, sangui- nisque traiectionem impediunt, a qui- bus regrediens ipse sanguis, oscilla- torium cordis, & arteriarum mo- tum sollicitat, ideoque febris exo- ritur, quæ assidue phthisim comitatur.

Tenaci componentium sanguinis partium cohaesioni adversatur vi- tiosa solutio, seu earundem partium incohaerentia, qua optima sangui- nis crasis destruitur. Modo scilicet cum elementares rubrae sanguinis partis molecule debili vi cohaereant, ac in serum facile solvantur; ipsæque serosae in lympham dehiscant.

In capillaribus igitur canalibus unicum sanguinis globulum tradu- centibus, in quibus lente progred- itur idem sanguis, serosae mole- culæ, quæ coeuntes rubros san- guinis globulos construunt, a se in- vicem secedentes in ipsum serum satiscunt, quare plures crassiorum, & rubrarum sanguinis partium ita solutæ lymphaticorum porulis sub- iectæ evadunt, quos ineuntes a san- guiferis venis, quas subire deberent, recedunt, & ita lymphæ, vel serum nimia quantitate exuberat, ipsius quippe cruoris cum massa compa- rata maiorem rationem habet, quam in statu naturali habere debeat.

Turgent lymphatica vasa, eo quia lymphæ plus recipiant, quam trans- mittant, cuius copia solidas partes obruens eorundem tonum laxat, ac imbe-

imbecille reddit. Insuper ex longa intra vasa lymphatica mora condensatur, ac secretoriis glandulis viscosam praebet materiam; quapropter frequentes fiunt rheumaticae affectiones, arthritides, bronchialium glandularum infarctus, & catharrales pulmonum affectiones, quae a febre lenta, lymphatica dicta, saepius comitantur.

Huc accedunt pravae digestionum ob solidorum universalem laxitatem, qua etiam ventriculi peristaltica vis labefactatur, tum ob impuram illorum liquidorum secretionem, quae ad digestionem inferviunt, gastricus scilicet succus iners, & phlegmaticus, qui ingesta alimenta solvere, sive macerare non valet; bilis quoque nimis fluida, tenuis et aquosa, sulphureis, & oleosis partibus indigena; ex quibus nec satis atteritur chylus, nec satis volatilibus particulis commiscetur; proinde sanguis crudus, ac male attritis partibus coinquinatur, viscerum, ac praesertim hepatis, canaliculi obstruuntur, ipsaque lympham naturalem amittit texturam, & subflavo fluentis bilis colore inficitur, quae symptomata febris, ac vera cachexia excipiunt.

Praeter fluidorum crassitiem, aut nimiam eorundem fluiditatem; prima, quae a forti cohaesione, vi, qua fluidi componentes particulae sibi invicem adhaerent, ac difficulter solvuntur; secunda, quae a val-

de debili eiusdem cohaesione, qua compositae molecule nullo negotio dehiscunt, peculiarem quoque harum partium naturam, & affectiones scrutare debemus, quae in genere sunt; figura, magnitudo, & densitas. Haec quidem particularum sanguinis elementarium proprietates pensitandae, per quas eadem particulae inter se essentialiter differunt, quibusque sanguis diversam naturam, sive crasim nanciscitur. In his itaque comprehenduntur.

Oleosae five sulphureae sanguinis partes, quae a celeberrimo Guglielmino (a) in fixas, & volatiles distinguuntur; his phlegmaticae & aquosae, terreae & siccae, denique salinae, in quibus fixae, & volatiles considerantur, accedunt, quarum essentiae per chymicam analysin dignosci potuerunt (b).

Sanguis igitur, licet fluidum pene aqueum sit, nam in naturali tepore servatus in aquam, sive in liquorem ad ignem non coeuntem dissolvitur, (c) ac in balneo destillatus septem fere octavas aquei liquoris emittit; nonnullae tamen diversae naturae molecule commixtas habet, quales sunt praedictae.

Primo, oleosae, quae in partibus ramosis, & implexis consistunt, nec non levioribus, & minus sibi invicem adhaerentibus, quam aqueae particulae; idcirco oleum levius est aqua, corporibusque magis adhaeret, cuius particulae ab eorum su-

Q 2

perficie

(a) Lib. de salib. (b) Verheyen, tract. i. Cap. IX. ex sangu. Boil. exp. chym. Gugliel. ibid. (c) Cap. i. lib. i.

perficie prius madefacta difficulter abraduntur, siquidem illa diutius madida perdurant, quam si in aqua demersa fuissent.

Secundo, terreas, & ficas, quae in sanguinis analysi destillatione peracta in cucurbitae, vel retortae fundo superest; haec materia (a) ignis vi elicit prius oleosa, & salina tamquam fex nigerrima, rara, levis, ac foetens observatur; quae postea, si igni aperto tradatur, nigritiem amittit, ac terra alba se exhibet, in qua nihil salis fixi, sive alkalini, sive acidi reperitur. (b) Marinus utique cibus assumtus haud raro invenitur, qui per angustos vasorum nostri corporis meandros jugiter traductus, ac illorum elastica vi quodammodo elaboratus, naturalem mutat texturam, seu configurationem, ex quo, summo igne cum propria terra destillato, nonnihil acidi extrahi poterit.

Tertio, salinas, quae simul cum oleosis per destillationem in retorta eliciuntur, in quibus delitescunt, & quae ex unione, in genere, resultant plurium corpusculorum elementarium planis superficiebus ad invicem inclinatis, ac solidam figuram praestantibus constantium (c)

Haec salis in genere definitio adaequata quidem videtur; nam salibus tantummodo competit, & ad eorum affectiones explicandas nos conducit, quales sunt.

Primo, liquabilitas, quippe sal in fluida substantia demersum lique-

scit, ac in partes tenuiores subdividitur; quo maior vero fuerit menstrui subtilitas, vel ad ignem effervescentia, eo citior, et perfectior salis fiet solutio, quia in primo casu menstrui tenuioris particulae in eiusdem substantiam se intrudunt, & puncta contactuum molecularum salinum corpus constituentium penetrando, propria gravitatis vi instar vectum easdem disiiciunt, quod, nisi ex planis superficiebus constarent eadem molecule salis componentes, minime contingeret; corpora enim per planam superficiem unita multo minori vi disiungi possunt, quam si ex scabra, & sinuosa superficie compacta sint, quia in his numero maiora sunt contactus puncta ratione superficiei, quae aequali posita longitudine & latitudine, scabra maior est plana, ac laevigata, proinde vi divellenti magis resistit.

Secundo, sapor, qui a moleculis planis superficiebus in angulos desinentibus donatis, ac gustus sensorium penetrantibus oritur, quoniam solidi anguli, (d) nisi ex variis planis se mutuo secantibus effici possunt; nam sicuti in plana Geometria pro axiomate habemus: duabus rectis spatium non describi, ita in solidorum doctrina, nec duo, nec tria plana ad solidum corpus constituendum sufficere, sed saltem quatuor necessaria esse.

Tandem peculiarem figuram nascas esse diversorum salium componentes particulas, a qua essentialis

(a) Boerhaav. op. chym. Proc. CXIX. (b) Boerb. ibid. (c) Guglielm. de sal. Dis. Phys. Med. (d) Gugl. Dissert. Phys. Med. de sal.

tialis eorundem salium differentia pendet, nos docent observationes (a).

Si cinis alicuius plantae, vel alicuius mixti calx in aquam ad ebulliendum mittatur, ut vulgare lixivium comparètur, & liquor deinde filtretur; praeterea si igni rursus ad evaporandum tantummodo exponatur, donec cuticulae species in eius superficie appareat; postea ab igne remotus in locum frigidiusculum traducatur, non multos post dies concretos sales fundo, vel parietibus vasis adhaerentes inspiciamus, qui crystalli a chymicis nuncupantur, quorum figuram constanter observavit in quatuor salium generibus solutis idem Guglielminus, videlicet in marino, vitriolo, alumine rupeo, & in nitro. Salis quippe marini crystallos cubicas observavit, vitrioli parallelepipedas rhomboideas, aluminis rupei octaedricas, & nitri prismaticas, quarum basis plerumque hexagona. Conspiciam horum salium figuram crystalli maiores, quae a fodinis educuntur, nobis exhibent, in quibus ob perfectum crystallizandi modum, tum diuturno artificum exercitio, tum vasorum capacitate forte lixivium efficitur, ex quo eiusmodi emergunt crystalli pellucidae perfectae figurae, ac talis magnitudinis, ut eorum diameter duos, tres, & etiam plures digitos adaequet. Idem schema, quod in his maioribus crystallis, etiam in minoribus, quae in ipsis officinis per pauciores quan-

titatis lixivii evaporationem colliguntur,prehenditur.

Et de hoc quisque certior fieri potest, si praedictos sales in aqua solvat, ac solutionem microscopio inspiciat; siquidem easdem salinorum corpusculorum crystallos efficientium, & aqua innatantium figuras imprimis minimas, deinde in maiores coeuntes cernet. Praeterea, si eiusdem solutionis quibusdam guttulis limpidum vitrum aspergatur, in ipsis lente exsiccatis easdem figuras ope microscopii deprehendet.

Ergo concludendum est cum supra laudato Guglielmino (b), cum expositis observationibus liqueat salis muriatici componentes particulas esse cubicas, vitrioli parallelepipedas rhomboideas, aluminis octaedricas, & nitri rectum prisma hexagonae basis repraesentent; quin immo, cum eandem semper fervent figuram, nec unquam alterius propriam alter sibi assumat, scilicet; nitri particulae nunquam octaedricum, vel cubicum schema, aluminis nunquam parallelepipedum, aut prismaticum acquirant, concludendum, inquam, huiusmodi salium essentialium differentiam, quae a Guglielmino primigeniorum nomine distinguuntur, in praedictis peculiaribus eorundem elementarium particularum schematibus consistere.

Ceteri vero sales, si in crystallos concrecant, quamvis nihil certi in suis configurationibus statuere possimus,

Q 3

(a) Bell. gust. org. Guglielm. ibidem. (b) Ibidem.

possimus, angulorum tamen protuberantiam, nec non superficierum planitiem evidenter conspiciamus; ergo sales in genere, proinde etiam, qui in sanguine existunt, ex unione plurium elementarium corpusculorum planis superficiebus ad invicem inclinatis, ac solidam figuram praestantibus constant.

Explicata primigeniorum salium natura, varias combinationes, quas salinae particulae nostri corporis fluidis innatantes inire queunt, proinde effectus, qui ex varia eorundem combinatione emergere, quibusque nostrum corpus diversimode affici solet, facile concipiemus.

Nam colligimus: Primo, salinas elementares particulas in sanguine, ac per universam fluidorum massam diffusas coire, & coagmentari non repugnat.

Secundo, huiusmodi salinarum partium coagmentatio facile habebitur, sicuti ex praefatis crystallizandi modis manifeste deducitur, quotiescumque eorundem stagnatio, vel etiam motus retardatio contingat.

Tertio, stagnabunt eadem particulae, vel earundem motus imminuetur, tunc cum ipsa fluida, in quibus innatant, vasis haereant, aut multum celeritatis amittant.

Quarto, haerent quandoque fluida, ac saepius retardantur, tum in glandulis, tum in vasis minimis, in quibus ob maiorem in perfricando resistantiam, & a corde distantiam, nec non ductuum obliquitatem lente progrediuntur, cuius morbosae stagnationis, vel motus im-

minutionis causa multiplex esse potest; praeternaturalis, nempe ipsorum fluidorum crassitudo, quae ex vitiosa elementarium (si de sanguine loquamur) eiusdem molecularum adhaesione oritur; vel inflexibili, ac nimis dura solidorum textura, qua sanguifera vasa parum oscillant, vel tandem peculiari nervosi generis crispatura, qua eadem vasa coarctantur, fluidisque circulantibus viam intercludunt.

Quinto, ex varia elementarium particularum sales nostri corporis efficientium figura, diversa quoque dictorum salium textura, & essentia pendere evincitur.

Sexto, diversi horum salium anguli membranosas, ac nerveas partes diversimode pungendo, ac penetrando fibrarum parallelismum maiori, vel minori distractione tollunt, proinde corpus varie afficiunt, ergo ex salium diverso schemate dissimiles nervosi generis contractiones, ac motus spasmodici, qui vasorum diametrum coarctando sanguinis regressum producant. Sanguis vero a corde veniens, cum progredi nequeat, arterias distendit, & ita cordi, & vasis resistantia augetur.

Huc accedunt ex inaequali sanguinis ad cerebrum appulsu inordinatae spirituum secretiones, quae solidorum elasticitatem modo augent, modo minuant, sed eorundem motum oscillatorium frequentiores reddunt, quibus febris immediate supervenit.

Igitur, si fluidorum stagnationibus praecipue salinae partes incremen-

tum

tum accipiant, frequentius in lymphâ, quam in sanguine hoc eveniet; hic enim velocius movetur, quam illa, quia cordi propinquior, atque vehementiori arteriarum elasticitate compulsus; idcirco crebriores lymphæ, quam sanguinis stagnationes experimur, potissimum in capite, & pectore; plerique enim catharrales affectiones, sive capitis, quæ coryzas, sive pectoris, quæ rheumata constituunt, nisi frequenter, saltem aliquando prorsus effugere nequeunt, imo nonnulli catharralem materiam, quam expectorant per os transeuntem sapidam, utpote salibus refertam, gustu percipiunt, quia lymphâ bronchialibus glandulis aliquandiu detenta, ac stagnante salinae particulae in illa contentae coagmentantur, ac in maiores moleculas sensu non latentes, ac in linguae papillas ferientes excrescunt. Non raro etiam lymphaticus liquor, qui ex glandulis, sive caruncula lacrymali exuberat, ut in epiphora, vel e naribus percolatus falsedinem manifestat, quemadmodum qui in herpetica affectione e cutaneis glandulis emergit, praecipue in exedentium genere salinis inficitur particulis, quorum anguli, adeo acuti sunt, ut porulos, per quos scaturiunt, scindant, atque integumenta, quæ assiduo affluxu madefaciunt, erodant.

Non solum lymphâ, sed etiam ceteri liquores, qui e sanguinis massa secedunt, ac in minimis vasis secretoriis, sive glandulis non raro consistunt, vel saltem retardantur, salinas congerunt particulas, quæ in maio-

rem molem coeuntes gustui se manifestant, ac membranofum genus anguloso schemate feriunt. Si E. G. bilis, quæ inter cetera liquida a sanguine provenientia tardiori motu progreditur, non raro huiusmodi salinis corpusculis nervoso, ac membranoso systemati infestis scatet, praesertim vero illa bilis portio, quæ in cystide hepatis colligitur, quæ amaritiei aliam per hepaticos ductus ex ipso hepate prodeuntem valde superat, quia bile intra vesiculam stagnante salinarum eiusdem particularum coagmentatio fit, quæ amaritiem acuit, ideoque a bile fellis nomine distinguitur.

Ita & gastricus succus, si crassioris texturae fit, ut stomachi glandulis diutius immoretur, elementaribus salium moleculis invicem coeundi occasionem praebet, quæ mole aucta salina corpora membranarum fibrillas percellere aptas multiplicat. Haec si in praeternaturalem magnitudinem excrescant, & minimorum vasculorum diametros superent, fluidis ad illa appellentibus, sive ingressum, sive exitum prohibet; quare necessarius alimentorum solutioni idem succus intercipitur.

Praeterquam quod eadem salina corpuscula, si acutos angulos affequantur, quibus membranarum fibrillas feriant, nervorum plexus tum stomachi, tum intestinorum in spasmodicas contractiones inducunt, a quibus quandoque tormina, ac ventris rugitus, quandoque lipothymiae, ac sympathicae vertigines, ut saepe etiam febres, quæ a per-

turbaot

turbato animalium spirituum influxu, ac solidorum ex fluidis regredientibus provocata elasticitate necessario insurgunt.

Expenfis causis, tum proximis, a quibus febris immediate pendet, tum dispositivis, sive internis corporis affectionibus, a quibus progignitur, modo extrinsecæ, & procatacticæ considerandæ essent, quæ humanum corpus ad febrem disponunt; verumtamen has, de febribus peculiariter agendo, nonnihil evolvere poterimus.

CAPUT II.

De Febre Ephemera.

Quoniam febres, vel sub continuarum, vel intermittentium genere comprehenduntur, de his separatim agere ordo requirit.

Continuas itaque imprimis excutiamus, quas in continuas, simplices, & compositas dividere expedit; simplex nempe, quæ singularis est, sive continuo crescens, sive decrescens, sive æqualis, & homotona sit; composita vero, quæ ex continua, & intermittente resultat, vel saltem periodum habet, seu manifestam exacerbationem, & remissionem.

Ex simplicium genere febris diaria imprimis obviam venit. Accidentia, quæ febrem ephemeram comitantur, quibusque huius essentiam dignoscimus, sunt: accessio, ut plurimum sine frigore, aut horrore, vel tremore, vel, si aliquando levi horripilatione fiat, hæc cito evanescit, pulsus liber, & æqualis et-

iam in principio, in statu vero mediocriter frequens, ac nonnihil plenior, licet quandoque debilior, sed semper æqualis, & constantem ordinem, sive æquale inter pulsationes temporis spatium servat; calor naturali quidem maior, tamen non mordax, nec adeo molestus, sed mitis etiam in statu. Urinae vel naturales, vel a naturali colore non multum recedentes, interdum crudiores, & albæ, seu aquosæ. Dolor capitis, si adsit, levis esse solet, sitis vel nulla, vel non molesta, sæpe cum madore, ac sensibili evaporatione, quæ sanorum sudori similis videtur, declinat, spatium vero vigintiquatuor, vel triginta ad summum horarum extinguitur.

Febris ephemera a causa procatactica, seu extrinsecæ, & evidenti excitari solet E. G. ex animi affectibus, nimio corporis labore, sive violenta actione, aut frigidiusculo aere perspirationem prohibente.

Si a violenta animi passione, veluti ira producat, vel violenta corporis actione, veluti cursu, vel prohibita transpiratione, dissimilia erunt febris accidentia ab illis, quæ animi moerore, tristitia, aut corporis lassitudine oriuntur.

Primo enim casu, nempe in violentis animi, aut corporis passionibus, aut prohibita transpiratione solidorum elasticitas maiori impetu provocatur, idcirco vehementior pulsus, frequentior, nec non plenior, ac sensibilibus æstus percipitur, urinae quoque rubicundiores, ac sitis præsto sunt.

Secundo

Secundo, vero casu, nempe corporis lassitudine, aut vigiliis, in quibus animalium spirituum copia emittitur, ac dissipatur, aut animi tristitia, & moerore, quibus eorundem spirituum secretio ob tubulorum nerveorum, ac cerebri medullaris substantiae contractionem intercipitur, (a) solidorum elasticitas imminuitur, idcirco languidior, minoris diametri, vel etiam contractus pulsus perferitur, urinae tenuiores, & aquosae, oculi concavi, & facies decolorata; quemadmodum declinat saepe ephemera cum madore, sive humida transpiratione, & per hanc morbus judicatur; ita nisi haec, cum necessaria sit ad eiusdem febris solutionem, obtineri possit, vel ob nimiam plethoram cutanea etiam vascula distendentem, vel ob quamcumque causam peripheriae meatus constringentem, in aliam vehementiorem febrem degenerat ephemera, vel saltem in longiorem, quae perdurat, donec materia febrilis expellatur, solidaque praeternaturalem velocitatem, atque impetum deponant.

CAPUT III.

De Syncho.

Protrahitur itaque praedicta febris, nisi intra diei spatium necessariam crisin praestet natura, ac solidorum praeternaturalis impetus compescatur, ad tres, quatuor, ac

septem quandoque dies iisdem symptomatibus, ideoque a nonnullis ephemera plurium dierum, passim vero synochus appellatur, cuius accidentia eiusdem quidem naturae sunt, sed intensiora; sensibilibior nempe calor, urina crassior, & rubundior, capitis dolor, aut gravitas, faciei, ac universi corporis rubor, ac plene inflatio, somnus saepe profundus, respiratio gravis, pectoris angustia, pulsus turgidus, frequens, vehemensque, sed aequalis.

Huiusmodi febris, quae aequali passu a principio ad finem usque progreditur, a veteribus (b) triplex ordo reputatus fuit, in quo recentiores quoque conveniunt, (c) nempe febris, vel eundem gradum toto durationis tempore servat, & acmaistica dicitur, vel continue crescens vehementior evadit, & epacmaistica, vel decrescens mitior fit, & paracmaistica vocatur. Praeter enarratos tamen alius deprehenditur ordo, qui plerisque febribus sive essentialibus, sive symptomatibus communis, incrementum scilicet, status & declinatio.

Non dissimiles ab iis, quae ephemeram producant, sunt synochi simplicis causae, quarum extrinsecas jam superius attigimus.

Intrinsecae vero, & dispositivae erunt, plethora imprimis, juvenilis aetas, in qua solidorum elasticitas maior, fluidorumque rarescibilis natura; si utriusque igitur generis acciden-

(a) Boerb. Praelect. Acad. cum notis Alb. Haller. lib. 4. (b) Gal. de febr. (c) Bell. de febr.

cidentia extrinseca, & intrinseca concurrant, febris synocha simplex facile exurgit; corpore vero E. G. incalescente ab insueto labore, cursu, violentaque, aliquandiu perdurante actione rarescunt fluida, nec non cor, & vasa celerius, & frequentius oscillant, quare cutaneae secretiones promoventur, & ad maiorem transpirationem idem corpus disponitur, cui, si porulorum cutis obtusio, & contractio ex aere frigidiusculo, aut interna fibrillarum nervearum spastica crispatura superveniat, transpirabilis materiae via intercluditur, quae stagnans, aut regurgitans vitalis oeconomiae ordinem perturbat.

Anni quoque tempestates, si variabiles sint, harum febrium causae procatacticae saepe sunt; tunc enim caloris, aut frigoris gradus valde inaequales experimur, quod a ventorum diversa natura, modo, ex septentrionalibus, & glacialibus, modo australibus, & humidis plagis prodeuntium, ac sibi invicem praevalentium pendet; in his enim nostri corporis fluida, modo rarefiunt, modo condensantur, aereae particulae, quae nostris fluidis commiscentur, praecipue sanguine, (a) hyemali frigore, boreali, & rigido flante vento, ratione aequilibrum, quod inter externum, et internum aerem servatur, condensantur, minusque spatium occupant; e contra praevalente australi, utpote calidiori, humidisque vaporibus sca-

tente, aereae molecule cruoris massa contentae rarescunt, quae fortiorum elasticitatem adeptae eo magis dilatantur.

Augetur itaque sanguinis moles, ac vasa turgescunt, immo ita distenduntur arteriae, ut ad propellendum sanguinem vehementiori vi se contrahere necesse sit; cor quoque ex aucta sanguinis mole maiorem diastolem passus fortiori systole eundem impellit, qui praeternaturali impetu in arterias impingens, elasticam earundem vim ad oscillandum provocat, primo, vehementius, deinde etiam frequentius; nam cum vasorum sive arteriarum systoles sit diastole proportionalis, nisi naturalem elasticitatem amiserint arteriae, ideo, aucto sanguinis in arterias impellentis impetu, auctaque earundem arteriarum dilatatione, vehementior quoque ipsarum constrictione sequitur, ex qua sanguis velocius progreditur, citiusque ad cor redit, cuius ventriculos ad eundem recipiendum frequentius aperiri necesse est, quare etiam frequentius constringi; ideo crebrior sanguinis proiectio, cui crebrior arteriarum pulsus respondet; proinde febris.

Sanguinis plethora, si sit innata, & connaturalis a vasorum sanguiferorum magnitudine pendet, nec non a fibrarum membranacearum flexibilitate, qua mediante eadem vasa ad magnam eiusdem sanguinis quantitatem recipiendam dilatantur;

(a) Vid. Cap. 4. 5. lib. 1.

latantur; naturali vero plethorae etiam accidentalis coniungitur, quae vel a prohibita transpiratione, vel consueti menſtruorum, aut haemorrhoidum fluxus ſuppreſſione, alvi diuturna ſtagnatione, vel tandem alimenti, & potus nimia ingurgitatione oritur.

Huc accedit animalium ſpirituum copia, qua nervei tubuli inflantur, ac totius nervoſi, & membranofi ſyſtematis fibrae fortio- rem elaficitatem acquirunt, ex qua cor, & vaſa maius momentum ſupra ſanguinem exercent, eiusque circulatorii motus velocitatem augent.

Sanguis itaque maiori velocitate, atque impetu progrediens in capitis arteriolas vim faciet, quae, ſi praefertim laxiorem fibrarum tonum naſtae ſint, inſignem diſtenſionem patientur; hae arteriolae, ſi membranis irretitae ſint, earundem fibrillas in diſtenſione diſtrahent; hinc acuti, & lancinantes capitis dolores exſurgunt. Si vero cerebri propriae ſint, utpote tenuioribus tunicis donatae, ſanguine rarefacto praeter modum turgent, ac dilatantur, ideoque corticalem eiusdem cerebri ſubſtantiam, nec non medullares tubulos comprimentes ſpirituum animalium ſecretionem, atque influxum ſuſflaminant; quare nunc gravativi capitis dolores, ſomni profundi, mentis ſtupores, agendi impotentia, & laſſitudines, frequentior, & gravior reſpiratione, quae pene in omnibus, ſaltem acutis

febris, occurrit; quippe reſpiratione, cum ad progreſſivum ſanguinis motum in pulmonibus neceſſaria ſit, quo celerior fiat eiusdem ſanguinis motus, eo celerior quoque, ſeu frequentior erit inſpiratione. Quapropter, ut ſanguis e pulmonibus ad cor reſtituatur, illa celeritate, quae frequentioribus cordis oſcillationibus proportionalis ſit, celerio- rem evadere reſpirationem opus eſt (a).

Niſi vero intercoſtales nervi ſatis copioſo ſpirituum influxu redundent, quemadmodum ex nimia vaſorum ſanguiferorum diſtenſione cerebri medullarem ſubſtantiam opprimente, ac eorundem ſecretionem intercipiente, non raro in huiusmodi febris evenit, ſpirandi diſcultatem experitur aeger, conaturque coſtas crebrius elevare, ac pulmones dilatare, ut ſanguis accelerato curſu in pulmones deſcendens eadem velocitate ad cor redire poſſit.

Symptomata, quae ſynocho ſimplici coniuncta ſunt, ab iis, quae ſynochum, paſſim putridam appellatam, comitantur, non differunt, niſi per intenſionis gradus, ut etiam Bellinus docet; (b) intenſior igitur calor in febre ſynocha ſecundi generis, quia vehementior ſolidorum motus, ac rapidior ſanguinis circula- tio; urinae rubrae & craſſiores, quia ſanguis maiori impetu per arterias emulgentes ad renes propulſus ſecretoria eorundem tubulorum

R 2

oſcu-

(a) Boerhaav. Prael. Acad. in prop. inſt. cum Not. Hall. lib. V. (b) de febr. p. XIV.

oscula violenter dilatât, ut non solum partem aqueoserosam, quae naturalem urinam, verum etiam rubram & crassiusculam, quae magis coloratam, & opacam reddit, eadem subire fas sit.

Non raro etiam parcior fit urina febre saeviente, & quia tali velocitate excurrit sanguis, ac tali nisu ab arteriis compingitur, praecipue vero, si viscosioribus abundet partibus, ut serosae a crassioribus aegre secernantur, sed simul cohaerentes sanguifera vasa rapidiori motu percurrendo, ex arteriis in venas migrent, & ipsa oscula secretoria pertransire, & effugere cogantur.

Praeterea, sicuti pleraeque secretionum non sine imminuta progressivi motus fluidorum velocitate obtineri possunt; idcirco ad has celebrandas (a) minima vascula elegit natura, in cuius meatibus, tum ob diametri angustiam, tum ob sinuositatem anfractuam fluida appellentia maiorem inirent resistantiam, ac tardiori motu secretoria versus progredierentur; nimis accelerato igitur sanguinis motu salivales glandulae, sive linguales, sive palatinae, & pharyngeae ceteraeque ad fauces humectandas destinatae naturalis succi inopiam patiuntur, ob quam ipsae partes arescunt, ac sitim producant.

Cutaneae quoque glandulae, sive secretoria cutis vascula diaphoresim expletia durante huiusmodi accelerato fluidorum motu consueta tran-

spirabili materia destituuntur; unde arescit ipsa cutis, nec perspirat; interdum tamen ex aucto fluidorum impetu transpirationis meatus a crassiori materia, nempe sero, invaduntur, ac sudor emergit, qui tamen, utpote violentus ac subtilis, crisin minime affert, sed pro irritato saepius habetur.

Ille vero, qui praevia solidorum vehementer oscillantium remissione educitur, quod in decretoriis diebus plerumque occurrit, criticus est, ac febrem solvit, vel saltem lenit; quandoque haemorrhagia supervenit, vel narium, vel haemorrhoidum, (b) vel aliarum quarumlibet partium, quae si copiosa sit, febrem ut plurimum extinguit, ac sudoris, vel urinae vicem gerit; tunc enim sanguis, qui violento motu in arteriolas impingens, eo magis si eiusdem ingressus in venas nonnihil impediatur, eorundem tunicas adeo distendit, ut ipsae abrumpantur, ac per scissuras erumpat. Post largam vero effusionem, cum sanguinis moles admodum minuatur, momentum, quod contra solida exercet, pariter imminuitur, vasa minus distenduntur, neque cor obruitur, animales spiritus moderata quantitate separantur, & ad partes nerveas naturali impetu fluunt. Quare solidorum vehementior ictus, & provocata elasticitas compescitur; ideoque febris paulatim sedatur. Si praedicta crisis, aut per sudorem, aut per

(a) Boerb. Prael. acad. & c. lib. 2. (b) 2. Bell. ibid.

per haemorrhagiam non succedat, ne febris in alium morbum commutetur timendum est; nam praefata velocitate excurrentis sanguis a solidorum praeternaturali vi proiectus facile e propriis vasis in aliena irrumpit E. G. in lymphatica, e quibus exire difficulter potest ob diametri angustiam, cui addendum, ob earundem vasculorum imbecillem elasticitatem, quae eundem sanguinem excutere non valet; hinc phlogoses, & inflammationes, quae in visceribus, ac vasis rariorem texturam nactis eveniunt. In pleura E. G. aut pulmonibus pleuritidem, & pulmoniam, in capitis membranis phrenitidem, in cerebro comatosos, & lethargicos affectus produciunt.

Haec vero capitis inflammatoriae affectiones, deliria, convulsivos motus, artuum tremores, aurium tinnitus, aliaque coniuncta habent symptomata, quae, ne dicam vulgo, verum nonnullis medicorum, huiusmodi morbum malignam febrem reputantium, imponunt.

Interdum vero ab eodem sanguine irruente adeo inflantur vasa lymphatica, ut in tumores eleventur, sive in visceribus, atque cavitatibus, sive in partibus musculosis, ac in abscessus abeunt, eo quia sanguis violenter ingressus, cum egredi nequeat, diuturna stagnatione corrumpitur, continentia vascula jam flaccescentia disrumpit, proinde effusus in sanies vertitur.

Qui abscessus, si interni sint, ac in nobilioris usus visceribus enascantur, mortem plerumque affe-

runt, praecipue si in capite, in quo viae defunt, unde sanies devehatur, & in quo levis etiam materiei stagnantis, aut effusae compressio lethalem apoplexiam parere potest.

Quandoque synocha febris in aliam acutiorem febrem degenerat, quae caupon, seu febris ardens appellatur.

Itaque cum rationalis curatio proximam, & dispositivam morbi causam respiciat; utramque expendere debet medicus, ne in desumendis indicationibus decipiatur, atque noxia eliciat remedia, quae febrem potius exasperent, quam leniant, ac in deteriore morbum aegrum inducant.

Erunt igitur in febre synocha adhuc exposita curatoriae indicationes, seu naturae aegrotantis indigentiae, si ad praedictas morbi causas animum advertamus; primo, sanguinis molem minuere, ut cordis, & vasorum distensio auferatur, solidisque omnibus nonnihil resistentiae subtrahatur, quo peracto ipsa solida ad sanguinem compellendum se apte constringent, ac utrorumque momentum ad necessarium aequilibrium redigetur; secundo, sanguinis rarefactionem, quam fieri potest, compescere; tertio, fluidorum, ac solidorum impetum cohibere, ut naturalis, placida, nec interrupta fiat circulatio.

Harum facium lumine illa eligi poterunt remedia, quae ad febrem extinguendam opportuna sunt. Quod ad chirurgiam spectat:

Venae sectionem fere semper huiusmodi febres postulant, qua mi-

noni, vel larga copia sanguis extrahatur, prout maiores, vel minores plethorae gradus, maior vel minor vasorum distensio.

Haec imprimis mediante arteriae pulsu innotescet; Diameter enim arteriae, quae ad carpum manu prehenditur, si adsit plethora, magnus erit; secundo loco ex temperamento, seu sanguinis in febricitante connaturali praedominio; tertio, ex aetate juvenili, aut virili.

Eo maior vero erit phlebotomiae necessitas, si respirandi gravitas observetur, si vehementes pulsus vibrationes, & ipsius arteriae durities percipiatur, tunc enim magnae vasorum plenitudinis indicium erit, qua sanguis in arteriis minimis difficulter progreditur, atque cor exuberanti eiusdem mole gravatus, ac distensus se exoneraturus, vehementiores edit ictus, ex quibus ipsae arteriae praeternaturali impetu oscillant, ideoque stagnationis, aut eruptionis periculum imminet, ut supra per mechanicas leges demonstravimus.

Item si qua pars nobilior saeviente febre doleat, aut quocumque modo peculiariter laboret. Si caput E. G. gravi dolore, sive acuto, & lancinante, sive obtuso, & opprimente afficiatur, vena secanda est, etiam si viribus destitutus, videatur aeger, dummodo vitales actiones minime laedantur, ac pulsus turgidus, rigidiorque persentiat, immo operatio confestim celebranda, ne spirituum animalium separatio in cerebro prorsus sufflaminetur, quod ex

vasorum sanguiferorum turgescencia corticalem illius substantiam comprimente exoritur.

Vel si aeger spirandi difficultate, aut cordis palpitatione, & oppressione conqueratur, aut cerebro suspiret; ad venae sectionem veniendum est; nam haec sanguinis sive cor, sive pulmones obruentis indicia sunt; hic quidem coronaria vasa ita distendit, ut cardiacos nervorum plexus comprimant, aut pulmonicas arteriolas, ita ut vesicularum cavitates occupent, eorumque elasticitatem infirmant, proinde aeris tum inspirationem, tum expirationem non nihil impediunt.

Quemadmodum si hypochondria tumeant, aut doleant, quia tunc intra hepatica, & gastrica vasa, praesertim vero portae ramulis, lente progreditur, & ad stagnationem disponitur.

Ex his, quae de synocha febre exponimus, colligere fas est; primo, cautius fore, etiam si summae plethorae signa non appareant in huiusmodi febribus, sanguinem mittere, quoniam eadem inflammatorias stagnationes, nisi proximas, saltem remotas portendunt.

Secundo, haec febres capitis inflammatione, delirio, atque convulsionibus, ut non raro evenit, vel thoracis, aut hypochondriorum inflammatione supervenientibus saepe in mortem, aut per Gangraenam, aut abscessum desinent, nisi abscessuum materia exitum inveniat; tunc merito culpandus erit medicus, qui sanguinis missionem prorsus omiserit, vel sufficienti quantitate, vel repetita

repetita venae sectione non extra-
xerit.

Tertio, inanis erit timor quorundam medicorum, quo a venae sectione in his febribus se abstinere, ne scilicet febris ex genere malignarum sit, in quibus ad magnum piaculum refertur sanguinis missio; nam si rationalis esset huiusmodi malignitatis timor, a quacumque continua febre etiam gravi, & essentiali inflammatione coniuncta, cuiusmodi sunt phrenitides, angina, pleuritis, pulmonia, & hepatitides, aut alia nobilioris visceris inflammatio, exularet phlebotomia, quoniam febrem malignam interdum cum inflammatoria pectoris affectione, sive legitima, & sanguinea, sive spuria, & catharrali coniungi praxis nos docet; saepissime vero cum delirio, & convulsionibus, quae cum phrenitide communia sunt, sed de illa febrium malitia, illisque circumstantiis, quae phlebotomiam prorsus excludunt, & quae a perito, sapientique medico dignoscenda sunt, inferius agemus; ideoque, si praedictae febres inflammatoriae, seu essentialibus inflammationibus coniunctae phlebotomiam poscant, ut in parte affecta stagnationis periculum removeatur, etiam synocha febris, quae sanguinis plethoram, vel saltem rarefactionem arguit, phlebotomiam ut plurimum requireret, ne in aliqua debiliore parte decumbat natura, ac lethalem sanguinis stasim, aut eruptionem producat.

Cucurbitulae scarificatae proderunt, si dorsi aut universae corporis superficiei dolor adsit, tamen venae sectionis effectus praestare difficulter poterunt, etiam si aequalis, ac in illa sanguinis fiat extractio, cucurbitulae enim minima tantummodo vasa evacuant, in quibus lente progreditur sanguis, ideoque scarificatus parum resistentiae imminuit eidem sanguini e vasis maioribus provenienti, proinde nec ipsa vasa maiora contenti fluidi pondere sublevare, & a nimia distensione liberare, nec a parte affecta ipsum sanguinem vergentem revellere valebit.

Venae sectione vero cum vase maiori sanguis extrahatur, ac celerius effluat, ipsum e corde venientem in arterias exeunti sanguini proximas maiori quantitate derivat, ex hydraulicae legibus.

Quapropter universae arteriae citius turgescere sanguine exonerantur, unde resiliunt, ac prius imminutam vim, qua ad propellendum sanguinem se contrahunt (a), recuperant; praeterea medici officium erit, locum, in quo vena secanda sit, disquirere; quoniam laborantis partis diversitas venae quoque secandae diversitatem expetit, de qua aureus ille tractatus D. Silva legi meretur, qui in primis saltem sanguinis missionibus, praesertim in plethora, remotarum partium venam secare tutius esse asserit, & mechanice demonstrat, ut ex affecta

(a) Hecquet. livre 2. de la dig.

ita parte, ad quam sanguis inclinat, devolvatur. Si caput praecipue doleat, somnolentia, stupore, aut vigiliis, & delirio, aut quocumque modo affici animadvertamus per venam pedis sanguis emittendus erit, per quam a capite necessaria materiae stagnantis, vel illuc maiori impetu appellentis revulsio obtineatur.

Posito enim trito illo principio, ex hydraulicae quoque legibus depromto, sanguinem illuc velociori motu procedere, quo minorem ineat resistantiam; cetera quoque eodem nitentia cito assequimur.

Sanguine e vena pedis effluente vicina vasa quodammodo exinanuntur; ergo sanguini, ex arteriis vicinis descendentis resistantia imminuitur; ergo maior illius portio ad illas arterias, crurales nempe, & iliacas, proinde maior, ex aortae descendens trunco data proportionem, quam ad carotides, & vertebrales fluat.

Quare capitis arteriae imminuta sanguinis copia detumebunt, ac minorem distensionem patientur. Hinc amissam elasticitatem, & contrahendi vim recuperantes lentescunt sanguinem impellent, eiusque progressum motum accelerabunt, ideo inflammatoriae stagnationis periculum, & occasio removebitur.

Quod de capitis affectione diximus, etiam thoraci applicare possumus, ceterisque visceribus. Si thorax laterali dolore pleuritidem, vel pleuripneumoniam ostendente aggrediatur, remotior venae sectionis lo-

cus eligendus erit, seu ille, quo sanguinis inclinatio commutetur, & aliorum deferatur. E pede igitur sanguis extrahetur, nisi fortasse dolor infimas costas occupet; tunc enim e brachio sanguinem extrahere tutius erit, quoniam inflammatio, vel inflammationis periculum in articularum ramulis, aut infimarum intercostalium, aut diaphragmaticarum praemonstratur, quae a descendente arteriae trunco originem ducunt; idcirco venae sectio in pede, quae maiorem sanguinis quantitatem in eundem arteriae truncum descendantem, & ad infima vasa derivat, evitanda, sed in brachio utenda, ut necessaria revulsio obtineatur; e contra si dolor ad superiores pectoris partes ascendat, ad venam pedis confugere debemus, propterea quia sanguis lentior in arteriis, seu ramulis intercostalium superiorum, thoracicarum, bronchialium, aut mammariarum, quae a trunco superiori aortae immediate, vel mediantibus axillariis exoriuntur, existit, ideoque a venae sectione in brachio abstinendum est, ne sanguis ad superiora vergens maiori copia ad praedicta obstructa vasa efferatur.

Praeter sanguinis missionem, quae venae sectione, aut cucurbitulis celebratur, alia quoque per hirudines sese offert, quae perutilis quidem esse potest, facta prius vasorum depletione, si eorundem vasorum plethora, ac tumescencia dignoscatur.

Cetera vero remedia, quae ad chirurgiam spectant, quemadmodum

dum pharmaciae regimen, quod in his febribus opportunum, immo necessarium existimamus, mox cum de febre ardente egerimus, expendemus.

CAPVT IV.

De Febre ardente.

Ardentis febris coniuncta symptomata, per quae ab aliis acutis febribus dignoscitur, sunt primo, intensus, atque urens calor absque remissione, ex quo aegri praecordia refrigeraturi aerem frequenter inspirant, ac expirant, nullo modo quiescere possunt, sed incessanter se jactant; siti inextinguibili exuruntur, quam, etiam si crebris potibus retundere studeant, eam vix per momentum lenire possunt.

Haec duo peculiarissima quidem sunt, ac pathognomonica legitimi causae signa, quae in ceteris acutarum febrium speciebus, praedicto saltem summo gradu, non afficiunt.

Accedunt quoque alia, quae, licet continuis, & acutis febribus communia sint, in hac tamen plerumque observantur; pallidae ventris deiectiones, urinae flammeo rubore tinctae, difficilis respiratio, lingua arida, aspera, ac interdum nigra, ventris dolores, vigiliae.

Febris ardens legitima septem diebus terminatur, nisi in mortem definierit, ut senibus plerumque con-

tingit, monente Bellino (a), aut iis, qui frigida tempestate hac febreprehenduntur.

Proximam, & internam huius febris causam nonnulli veterum, inter quos Galenus, bilem esse autumant, quae modo in universis corporis vasis, modo in peculiari viscere, ut stomacho, jeiuno intestino, aut alicuius partis musculis putrescat; hic a Sennerto de confusione merito arguitur, primo, quia universalem, ac particularem causam constituere videtur, cum particularis causam, qui ventriculum, intestina, & pulmones, aut alia viscera, aut musculos infestans nil aliud sit, quam inflammatoria illius visceris, aut cuiuscumque partis affectio, quae peculiari nomine definitur, nempe inflammatoria ventriculi colica, & intestinorum, pleuritide, pleuripneumonia, aliisque, prout laborantis partis diversitas requirit.

Propterea ardentem febrem cum tertiana exquisita comparat, cuius accidentia similia quidem sunt, cuiusque causam in vitiosa bile passim reputabant veteres; inquit enim (b): *exquisita febris ardens cum omnia alia servet exquisitae tertianae indicia eo solo differt, quod neque cum rigore incipit, neque ad infebricitationem desinit* (c). Tertiana febris ab ea, quae ardens nominatur humore faciente non differt, utraque enim a flava bile fit, differt autem, quod febris ardens habet in venis una cum sanguine flavam bilem redundantem, & ebul-

(a) De febrib. (b) 2. de Cris. Cap. 6. (c) lib. 4. aphor. 59.

Et ebullientem, tertiana vero eandem bilem habet in totum corpus delatam, Et motam. Hippocratis auctoritatem affert, qui (a) ait, *febris ardens fit, cum venulae tempore aestivo exsiccatae acres, Et biliosas, quae tenues sunt, trahunt ad se humiditates, quas ichores vocant.*

Non inepte profecto super huius febris causam excogitavisse veteres, praesertim magnum Hippocratem, fatendum est, qui primus fuit, cuiusque inventum Galenus amplificavit; nam ille ab acribus, & biliosis ichoribus causam excitari putavit.

Huiusmodi itaque succos solidas partes irritantes ardentes febres genere evincitur, si eiusdem symptomata rite pensitemus; bilis itaque, si propriae texturae vitium contrahat, quod in venae portae ramulis, nonnihil haerendo, haud raro contingit, praecipue si salinis partibus natura volatilibus abundet; haec enim particulae lentefcente liquido, quibus innatant magis coagmentantur, viscerisque calore ex diuturna mora attenuatae, & a crassioribus eiusdem bilis partibus extricatae acriores, & magis volatiles sunt, quae postea in sanguinem delatae, & ad glandulas, capillariaque vascula membranarum, ac musculorum perductae, easdem membranas, nervorumque papillas per acutis angulis feriunt, ex quo nervi plexus spastica crispatione capillaria vascula coarctando sangui-

nis progressivum motum intercipiunt; hinc vasorum distensiones, fluidorum regressus, quae aegrotantis inquietudines, corporisque jactationes inducunt; tamen praeter bilem, seu bilis particulas acriores factas aliquoque succi, quorum textura non dissimili modo vitiata sit, ardentis febris causa esse possunt.

Inter cetera vero transpirabilis materiae secretoriis peripheriae meatibus obtusis retropulsa, quod saepe occurrit, frequenter etiamverno, & autumnali tempore, rarius vero hyeme, rigidaque tempestate, si ferventissimo solis aestui diu corpus exponatur, si diuturnis laboribus fatigetur, velociori incessu, & cursu calefiat, ita ut sanguis, spiritusque animales valde rarefiant, fluidaque omnia praeternaturali velocitate per vasa ferantur, & ipsa secretoria, praesertim cutis, peracto impetu subeant; idcirco copiosi sudores ac transpirabilis materiae ad peripheriam copiosus affluxus, quibus cruoris massa humidis partibus spoliatur.

Interim, si frigescente aere, vel alia causa eutanei siphunculi repente occludantur, ipsa transpirabilis materia ad eodem appulsa sufflamminatur, ac si aliquandiu stagnet, utpote salino-sulphureis partibus constans, acrimoniam acquirit, quoniam salinae particulae antea divisae invicem coeunt, ac maiorem acquirunt molem, figura non mutata, seu planis superficiebus in acu-

tos

(a) 4. de Vict. rat. in acut.

tos angulos desinentibus, qui nerveas fibrillas feriunt.

Hae particulae huc illuc delatae, ac in capillaribus vasis nonnihil haerentes membranosam illorum tunicam stimulo afficiunt, eorundemque elasticitatem provocant; unde frequentior arteriarum oscillatio, qua sanguinem a circumferentia ad centrum aucta celeritate, atque impetu impellitur; hinc maiori copia dato tempore ad cor appellens eorundem diastolem proinde, ac systolem sollicitat; insuper eadem salinae particulae, cum ad villos cordis per coronaria vasa pervenerint, cardiaci plexus fibrillas proritando ad frequentiores, vehementioresque contractiones idem cor alliciunt.

Haec necessario consequuntur insignis pulsus frequentia, celeritas, ac vibratio, violenta sanguinis circulatio, urensque calor; nam sanguine tali impetu excurrente eiusdem molecule vehementiori, ac frequentiori nisu in arteriarum latera impingunt, maiori vi reflectunt, atque invicem collidunt, in capillaribus quoque arteriis saepius, ac velocius traiectae magis perfricantur, rarefiunt, caloremque praeter modum augent; praeterea ita rapido motu sanguis ex arteriis in venas migrat, ut secretoriorum oscula praeterfluat; idcirco lymphatica vasa consuetam lymphae quantitate orbantur, ex qua ariditas tum membranarum, tum musculorum, viscerumque.

Deficiente igitur lymphæ, quae partes humectando sanguinis aestum temperare queat, urens perferitur calor, qui acerbis irritamentis coniunctus assiduam inquietudinem, & iactationem producit, vel quia musculi per convulsivas contractiones moventur, animalibus spiritibus, absque ordine influentibus, vel quia urente calore aegri vexati modo in hanc, modo in illam lecti partem se convertunt, ut sibi refrigerium captent.

Intensa sitis, quae linguae, & faucium siccitate oritur, quemadmodum totius corporis, in quo sensus ariditatis, & caloris; ut monet Bellinus (a), percipitur; siccitati vero linguae etiam asperitas coniungitur, quia papillae nerveae, ac villi e reticulo linguali assurgentes salivae inopia exsiccantur, atque indurantur, suisque apicibus seiunguntur, ideoque asperam linguae, superficiem efformant, quam si digitus attingat pungentium aculeorum, sive dentium sensum apprehendit, non secus, ac si supra carminatorii pectinis dentium summitatem leviter ducatur.

Feces aerugineo, nigroque colore tinctae apparent, quoniam bilis, a qua colorem accipiunt, ex aquei liquoris inopia flavum, ac dilutum colorem assequi non potest, ideoque admodum crassa, adusta, & ad nigrum colorem vergens separatur. Ita & alii succi glandulis intestinalibus, & ventriculi contenti aqueis

liquoribus destituti, a quo siccae, salinaeque particulae eisdem commixtae diluantur, his praevalentibus acrimoniam acquirunt, nerveasque ventriculi, & intestinorum fibrillas vellicant, unde stomachi dolores, ventrisque morsus, & cardialgiae oriuntur, quae omnia modo recensita internum calorem, inquietudinem, & sitim augere solent.

Praeterea cum sanguinis massa ita rapido motu excurrat, in cerebrum, eiusque membranas impetum facit, eorumque arteriolas ita distendit, ut distrahantur fibrae, & acuti capitis dolores febrem comitentur, cerebri quoque medullares tubuli, ac fibrillae ex lymphae defectu arescunt, & in rigida tensione perdurant, a qua assiduae vigiliae pendent.

Quandoque vero eadem fibrae, ex impetu fluidorum, tremulo, atque inordinato motu moventur, ut diversae species, ac ideae in mentem excitent ab iis, quae externa obiecta sensoriis mediantibus exhibere debent, ideoque desipientiae, ac vaniloquia audiuntur.

Respiratio frequens, difficilis; primo, quia magna sanguinis quantitas ad pulmones influit, ob summe auctam in circulando eiusdem velocitatem, idcirco ad promptum ipsius ad cor reditum crebra respiratio ne opus est, ne in pulmonaribus vasis stagnet; haec vero naturae opere succedit, eademque causa, qua cordis systoles frequentior, & vehementior redditur, crebro respirare nos cogit.

Difficilem quoque experimur, quia admodum ratefactus sanguis, ac magno impetu pulmonares arteriolas ingrediens eas distendit, vesiculasque circum undique premit, angustatque, ita ut maior aeris nifus ad illas explicandas requiratur, quapropter thoracem magis dilatare conatur aeger.

Urinae rubrae, quae a Bellino flameae nuncupantur, quia rubro diaphanae, crassaque carent materia; nam ob sanguinis velocitatem, atque impetum, eiusdem tantummodo serum rubris, sed duris mobilioribusque particulis saturatum urinarios tubulos ingreditur. Huiusmodi urinae nec corrumpi, nec in matulae fundo quidquam deponere solent, etenim eiusdem particulae tenuiores, oleosaque materia spoliatae invicem cohaerere nequeunt. Attenuatur vero oleosa sanguinis pars exurente febris calore, dissipaturque, ita ut etiam urinae hac ipsa destituantur; corruptio namque, aut sedimentum in urinis nil aliud sunt, quam unio quarundam molecularum eisdem innatantium, quae unio mediante oleosa, glutinosaque substantia, qua scatent, efficitur, ideoque crassiores factae, densiorem, & opacam reddunt urinam, quarum nonnullae, cum graviores evaserint, in matulae fundo subsident, idcirco in his, ceterisque acutis febribus, urinae corruptiones, ac sedimenta boni ominis sunt, quia solidorum effrenem motum nonnihil remissum indicant, nec non laxatam renalis plexus urinarios ductus, seu papillaria corpora coarctantis

stantis tensionem; nam huiusmodi fluidorum, ac solidorum impetu perdurante, aut eorundem meatuum angustia, nisi tenuiores, ac siccae moleculae tamquam per filtrum secretae cum urina exire queunt, remisso vero utrorumque motu, aperitisque meatibus, crassiusculae moleculae, & quae nonnihil viscofae, & oleosae substantiae retinent, per quam unionem facile subeunt, ac in fundo vasis subsident, dimittuntur; idcirco primae tenuiores vehementi solidorum nisu expulsae irritae habentur, & immaturae, ac remotam esse crisin ostendunt; secundae vero, quae nonnihil sedato naturae tumultu, remissaque eorundem solidorum ataxia, maturae considerantur, ac morbi iudicationem, aut proximam indicant, aut portendunt.

Cum igitur huiusmodi febris legitima, seu peracuta sit, septem diebus plerumque evadit, si vero nimis indensa, spuriaque ad undecimum, & quartum decimum protrahitur.

Per sudores ut plurimum solvitur, qui, si post quartum diem appareant, pulsibusque non rigidis nec vibrantibus futuram proxime crisin ostendunt; si vero ante quartum prodeant, pulsuum tensione, ac vibratione perdurante inanes sunt, quoniam ex vehementi naturae impulsu eliminantur. Praeter sudorem etiam urina larga copia emissa ardentis febris solutionem non raro

affert; aliquando per deiectiones ac vomitus evadit, interdum etiam per abscessus, qui, si ad externas partes deponantur, plerumque aegri salutem, si vero ad internas cavitates & viscera, plerumque mortem afferunt.

Periculum, quod in ardente febre occurrere potest, duplex animadvertitur; primum, ex impetu, quo sanguis per vasa excurrit, e quibus facile erumpiere intra cavitates, aut in aliena vasa traduci potest, qualia sunt lymphatica, ideo lethales effluxus, inflammationes, abscessus oriuntur, secundum vero, quod solida exurente calore, ac lymphae defectu, qua irrorari solent, flexibilitatem, ac nutrimentum amittant, & arescant; quapropter vasorum diametri coarctati sanguinis progressivo motui obstant, qui cum ab ipsis difficulter traiciatur, exitialis stagnationis periculum imminet, aut regressus adeo impetuosus, ut vitalibus partibus resistantiam augeat, cordisque momentum paulatim obruat, unde suffocatio, & mors.

Ex hac pariter solidorum ariditate convulsiones insurgunt, quae pessimi ominis, immo vicinae mortis indicia sunt, quemadmodum a Prospero Alpino monemur, qui (a) ait: *Perpetuo in adultis in febris convulsiones sunt malae, omniumque maxime in ardentibus, quod hae ardentis febres veluti ignis nervos siccent, ac perniciosas convulsiones faciant.* Galenus quoque, (b) si vero ex febr-

S 3

(a) lib. III. Cap. VIII. (b) lib. IV. aph. 35.

febris adurentibus totum corpus exsiccetur, & nervis deinde ex siccitate convulsio accidat maximum est malum, & pene insanabile. Hippocrates (a) haec pronunciat: In acutis febribus convulsiones, & circa viscera dolores fortes, malum, eo peiores vero declarat, quae corpore languente fiunt. (b) In febre non intermittente, si labrum, vel oculus, si ve palpebra, aut supercilium, vel nasus pervertatur, vel non videat, vel non audiat, jam debili existente corpore quidquid horum evenierit, mors proxima est. Sicuti se observasse narrat in historia uxoris Dromedae (c).

Cura itaque ardentis febris eo collimare debet, quod solidorum impetum compescere queat, ut minus rapido motu sanguis per vasa excurrat, item acriores bilis particulas sanguini immixtas, ac in minimis vasis haerentes retundere, aut quascunque alias sulphureo-salinas membranofum, ac nervosum systema irritantes temperare, quod remediis refrigerantibus, diluentibus, temperantibus, sedativis, ac paregoricis perficere debemus.

Si vasorum constet plenitudo, aut per pulsum, aut corporis habitum, aut per aetatem, aut denique vivendi morem per phlebotomiam erit imminuenda, quae semel, aut pluries adhibenda, prout gradus plethorae requirit; nisi enim sanguinis plenitudo minuatur, ac solida maiorem distensionem patientur, & ad violentiores, crebrioresque contractiones deter-

minabuntur; insuper succedentibus minimorum vasorum constrictionibus ex spasmodica nervorum, ac membranarum crispatura illic lentescet facilius sanguis, quia copiosus, atque stagnabit, evidente aegri periculo (d).

Praeterea quo maior sit sanguinis copia, eo sensibilis fit calor, quia crescit materia caloris. Cetera quoque remedia ex chirurgiae fonte desumpta, quae superius pro synocho indicavimus, hic etiam convenire evidens est. Clysterum nempe usum ex lacte, vel hordei decoctione paratorum addito butyro, & saccharo, prout mos est, non solum ad alvum laxandum, ac naturam per intestinales glandulas ad morbosam fortasse materiam praecipue biliosam excernendam invitare, verum etiam ad imi ventris viscerum calorem temperandum, atque humectando, & emolliendo ariditates, & crispationes leniendas perutile quidem esse experimur. Monente Hippocrate: in morbis exustis omni quarta hora clyisma alvum diluens subdere. Praeterea etiam ob experimentum Boerhaavianum, quo iniecit per alvum diluentia, & oleola, & maximam partem vidit abire per venas mesentericas, & lacteas ad (e) sanguinem; ita & universalesunctiones, quae cutis reticulum crispatum laxent, porulosque secretorios patefaciant, ut vias, per quas natura salutes expulsionem inire possit, occlusas non inveniat.

Quoad

(a) Sect. IV. Aph. 66. (b) Sect. IV. Aph. 49. (c) 1. Epid. Aegr. II. (d) Vid. Cap. 3. huius. (e) Acta erud. Lips. 1745.

Quoad remedia interna e pharmaciae finu eruenda, quam necesse sit temperantibus, ac diluentibus uti remediis, unusquisque, si harum febrium naturam perpenderit, etiam si in mechanicae studio leviter imbutus, comprehendet. Quapropter fortiora purgantia hic prorsus abdicanda, sed etiam a mitioribus, & lenientibus abstinere debemus, nisi in principio, ac turgente tantummodo primarum viarum apparatu, quoniam utilitas, quam afferre potest solutivum medicamentum in huiusmodi casibus cum detrimento comparata multo inferior erit.

Nam cum ardentis febris causa, de qua hic sermo, in primarum viarum, seu cavitatum apparatu non consistat, sed in universo vasorum praecipue sanguiferorum, parum materiae febrilis subtrahet solutivum medicamentum; e contra magni admodum detrimenti erit fortasse istud, si intra sanguinem per chylicos ductus traducatur, ut quidam volunt, si per solam intestinalem fistulam transiens actionem suam exerceat; si in sanguifera vasa traducatur, ut aliqua saltem portione subtiliore hoc fieri credendum est, suadet enim ratio, atque experientia; prima, quia quodcumque per os deglutitur, si liquidum, si solidum medicamentum, dummodo in tenuiores particulas solubile sit, osculorum lacteorum diametro intestinis hiantium minores, absorberi quidem poterit, quemadmodum chylus; secunda vero, seu experientia, quia mulieribus lactan-

tibus non raro accidit, cum ipsae haud monitae paulo post assumptum medicamentum suis infantibus lac praebuissent, hos medicamenti effectus plurimum evacuando expertas fuisse; ergo ipsius medicamenti notabilis saltem portio prius sanguine, deinde lacte commixta infantibus deglutita fuit, ideoque purgantia ad sanguifera vasa perveniunt.

Hoc posito suam actionem prius in ipsam cruoris massam exercebit, quoniam, cum medicamenti particulae sint diversae specificae gravitatis, magnitudinis, ac figurae a sanguineis moleculis, idcirco diversum motum seu celeritatem, & directionem solidorum impulsu accipient, quae easdem sanguinis moleculas varie agitare, commovere, proinde rarefacere poterit; deinde etiam in solida, in quibus praecipue agit, quia eiusdem purgantis particulae, si salino-terreae, & fixae, si salino-sulphureae, & oleosae ad intestinorum vasa, atque glandulas perductae nervei intestinorum plexus fibrillas stimulo afficiunt, quae se diversimode contrahentes, tum vasa glandulis finitima nonnihil coarctando ad contentum liquidum ad glandulas propellendum, tum glandulas ad illud in intestina eructandum cogunt, atque sollicitant; quamobrem ex membranosi, ac nervei plexus irramentis contractiones huc illuc propagantur, ac fere universum nervosum genus animalium spirituum refluxu commovetur, unde vehementior, & crebrior cordis, & arteriarum

teriarum impulsus, ac maior molecularum sanguinis attritus, proinde calor.

Pars vero, quae per solam intestinorum fistulam transit nerveam earundem membranam vellicando, primo, feces illuc contentas peristalticum motum promovendo eliminat, deinde ipsas miliares glandulas proritando, secernendos succos accersit, atque mulget. Quae actione in praedictam nerveam tunicam exercita, non dissimiles commotiones propter insignem membranosarum partium consensum excitantur.

Optimo igitur jure Hippocrates observationibus edoctus (a) nos admonet: *In acutis passionibus raro, & in principiis, medicinis purgantibus uti, & hoc cum praemeditatione faciendum*, cui etiam Galenus (b) subdit huius moniti rationem quodammodo reddens, *circumspectum* inquit, *fuisse Hippocratem in eiusmodi purgationibus, quoniam non minimum imminet periculum in morbo acuto male uti medicamento purgante, cum omnia id generis sint potentia calida*. Alibi, universum corpus turbare, & agitare asserit; lib. vero quos, quibus, & quando purgare conveniat: veneni naturam sapere, ait, quia venenorum effectus, in gradu licet remisso, nobis portendit, stomachum subvertit, & nauseam provocat, intestina vellicat, excitat tormina, fauces exsiccat, aestum affert, cordis, & arteriarum mo-

tum accelerat, perturbatque, & omnia fermenta depravat; Celsus quoque lib. 8. cap. 10. *Solutiva medicamenta mali succi esse, & ventriculo inimica*.

Praeter purgantium, intempestivus quoque expansivorum, & exaltantium non ininus, quam alexiteriorum usus.

Quam inopportuna, ac perniciofa sint, in huiusmodi febribus, si ve ardentibus, si ve synochis praedicta remedia, si proximam earundem causam respiciamus, manifeste apparebit; haec enim, cum in vehementiori, ac velociori fluidorum, & solidorum motu consistat, a quacumque vi eorundem solidorum elasticitatem provocante, quaecumque remedia, quae solidorum elasticitatem magis allicere, atque fluida magis rarefacere possunt, ipsam febrem augebunt, & acutiorem reddent; ergo tamquam perniciofa considerata sunt; insuper fluida adeo vehementi impetu excurrentia in aliena vasa se intrudent; sanguis E. G. lymphaticas arteriolas subdit, in quibus, cum propter crassiores eiusdem texturam traici nequeat, haerens, ac stagnans phlogoses, ac interna erysipelata producit, alique succi a sanguine oriundi in extranea secretoria circulationis impetu protrudentur; hinc irritae parumque conferentes separationes, quia crudis, & male attritis iisdem succis fiunt; Alvi E. G. deiectiones nimis subtiles, ac flavo

(a) *Aph. 24. Sect. 1.* (b) *in Comment.*

flavo colore tinctae, quoniam miliares glandulae a serosa colluvie obrutae naturales feces secernere nequeunt, sed ipsam serosam materiam magna copia emittunt, quae ab immaturae bilis profluvio saepe tingitur, sudores quoque vel interrupti, vel inanes, nec judicationem praebentes; cutis enim secretoria crassioribus sanguinis particulis circulationis impetu quandoque occluduntur, ideoque sudor intercipitur, quandoque vero serosa colluvie invaduntur, copiosumque, sed inanem nullo aegri levamine reddunt sudorem.

Huiusmodi itaque in febribus exaltantia, cordialia, & sudorifera excludenda erunt, contra quae acriter instat his verbis Hecquetus (a). *En pareil etat se comprennent les affreux evenemens de cordiaux, de sudorifiques, & de semblables drogues, parceque agitant le sang, le gonflant a force de le rarefier, & ainsi le font bouffer, ils l'empêchent de s'ouvrir pour lacher la matiere de la sueur, qui tiennent confondue parmi les autres suc.* Praedicta remedia his tantummodo casibus convenient, in quibus labitur natura, vel imbecilli solidorum tono, vel ex diuturna morbi fatigatione, quod ante septimum diem non evenit; atqui legitima causon intra septem dies absolvitur; ergo in hac exaltantia remedia non conveniunt; si vero spuria sit, & ultra septimum, vel nonum diem protrahatur, quo

tempore ex dissipata animalium spirituum copia, sanguinisque massa imminuta solidorum elasticitas languescit, exaltantia, & expansiva ad hanc fovendam, & sustinendam perutilia erunt.

Praeterquam quod materia febrilis secernenda, tunc disposita, & ad exitum parata censenda est, praecipue quia canales nonnihil laxati, fluidorumque copia notabiliter imminuta, ut monet Luca Tozzi (b) his verbis; *Hinc duo videntur in universum exigere ad coctionem promtamque humorum purgationem, viarum scilicet laxitatem, & humorum extenuationem.* Id nos animadvertere voluit Hippocrates, quemadmodum (c) manifeste colligitur: *concocta medicari, atque movere non cruda;* nec solum de purgantibus intellexit, verum etiam de quibuscumque remediis, quae humores rarefacere, solida stimulare, & corpus agitare solent, ut sapienter interpretatur Fuchsius, & idem Tozzi; verbum enim movere genericum est, & quaecumque remedia, quae impetum facere possunt, amplectitur.

Tutius erit igitur alkalinis, & nitratis uti, qualia sunt oculi cancrorum, corn. C. pp., dens apri, sanguis hirci, conchae, aliaque huius generis, quibus nitrum depuratum jungere optimum erit, quod plerisque celeberrimis practicis in usu est. Alkalina enim huiusmodi, utpote levia, insipida, & volatili

(a) Liv. de la digest. T. 1. (b) In Commen. aphor. pag. 61. (c) Lib. de humor. lib. 4. de sanit. tuend. cap. 5. denique aph. 22. sect. 1.

volatili parte destituta, nitro coniuncta, vehementem solidorum oscillationem, eorumque acceleratos, ac frequentiores ictus mulcere, nimiam sanguinis rarefactionem compescere, & utrorumque provocatam elasticitatem cohibere valent, ex quibus aliquam corporis refrigerationem, ac exurentis caloris temperiem expectare licet.

Hic quoque perutiles erunt immo necessariae emulsiones ex seminibus frigidis maioribus, papaveris, lactucae & similibus, serum lactis bubuli, aut caprini, sive naturale, sive depuratum, vel etiam destillatum, quoniam haec suis aqueo-oleosis particulis solidas partes arescentes, atque tensas lenire, & humectare, ac molliores reddere, cruoris massam humidis particulis destitutam irrigare, & acres, stagnantesque succos diluere solent, ut illa irritamenta auferantur, vel saltem leniantur, quae vasorum oscillationem accelerare, & vehementiores reddere, ac in universum membranofum, & nervosum genus spasmodicas crispationes inducere possunt, quibus iactationes, inquietudines, & vigiliae exoriuntur. Proficientia quoque esse poterunt paregorica remedia caute, & opportuno tempore adhibita, post quantum scilicet diem, vel saltem non ante quantum; tunc enim concocta, vel concoctioni disposita cum esse soleat materia, iisdem paregoricis fibrarum tensionem remittendo, porosque secretorios laxando, & aperiendo natura ad separationem allicitur, quae, si praecclusae adhuc essent viae, ob-

tineri non posset; praeterquam quod in pervigiis somnum inducendo infaturatur natura, ac vehementior solidorum motus nonnihil sedatur.

Hanc igitur methodum in ardentibus febribus persequi fas erit, tum legitimis, quae in septima judicantur, tum spuris usque ad septimum, post quem ad nonnulla expansiva, & sudorifera progrediendum plus, aut minus fortiora, prout aegri status, ac pulsus se ostendet, aut natura ad hanc, vel illam secretionem disponitur.

Expansiva, quae ad rem faciunt, plurima sunt, quae inter: C. Cer. phil. Bezoard. minerale, Stib. diaphor., quibus vel succinum, aut nitrum cum aliquota camphorae parte semper adiungerem, juxta Hoffmanni documenta, ut praedicta expansiva sedantium quoque officium gerant, nervorumque crispationes huc, illuc enascentes mulceant.

Convenire hic extracta plantarum amara, & sudorifera nonnulli arbitrantur, qualia sunt Card. B., scabiosae, & alia similia, quibus tamen in adestis temperamentis, iisque, quorum fibrae admodum tensae percipiuntur, cavere debemus, quoniam haec easdem fibras calescentibus stimulis afficientia magis contrahere possunt, ac minimorum vasorum diametrum coarctare, ut sanguinis progressivo motui admodum resistent, eidemque stagnandi occasionem praebent.

Alia quamplurima, quae locum habere possunt, expansiva praetereo, tum ex solidis pharmacis, tum

tum ex liquidis, nempe, aquis destillatis, & simplicibus sudoriferis, veluti Card. B., scorzonerae, spirituosioribus, veluti ex citro, & theriaca, aliisque compositis, ac ipsis spiritibus, tincturis, atque elixiribus, quae caute adhibenda sunt, & de quibus jam prostant praescriptionum formulae, eo quia fucosae remediorum enumerationis, quae ad ostentationem potius, quam ad utilitatem perscribitur, me magnopere taedeat (a).

CAPUT V.

De Febre maligna.

Febrem malignam illam vocandam esse, censeo, quae adeo pravae, & deleteriae indolis est, ut non solum vitalem facultatem perturbet, ac male afficiat, verum etiam animalem feriat, ac prosterneat; unde ceteris febribus supra descriptis periculosior, a qua aegri difficilius evadunt, saepiusque intereunt.

Symptomata, quae in malignae huius febris diagnosin nos conducunt vitalibus, atque animalibus organis admodum infensa esse satis constat; sunt enim summa virium prostratio, de qua primis etiam morbi diebus conqueruntur aegri, ita ut ex se ipsis ad assidendum in lecto corpus erigere non sine labore possint; nec pedibus consistere, nec incedere valeant; dorfi, & lumborum acerrimus, ac pene ulcero-

sus dolor, proinde inquietudo, & jactatio, pulsus exilis ut plurimum diametri, languidus, admodum frequens, inaequalis, & contractus, interdum rarus, vel saltem parum frequens, modestique caloris, respiratio in nonnullis rara, in aliis frequens, utrisque vero gravis, & difficilis, vigiliae incessantes, vel somnolentia, & stupor, dormiendo somniant, ac in moesta, & lugubria somnia plerumque incidunt, quae medico, & adstantibus enarrare solent.

Praeterea plures, vix clausis ad quietem, & somnum sibi captandum oculis, quibusdam spectris molestantur, aut lugubribus, ut occisionum, ruinae, & casus, aut aliis imaginationibus, praecipue ad proprium munus spectantibus, ita ut, si fabri, in propria officina adefse, malleum, ferram, vel asciam tractantes sibi videantur; si mercatores in propriis tabernis mercari, vendere, metiri merces, vel de praetio differere, & contendere, & sic de aliis, qui artes, munera, aut officia quaecunque gerunt; aurium tinnitus, surditas, vaniloquia, desipientiae, ac stabile delirium; urina saepe tenuis, ut plurimum naturalem colorem exhibens, sanorumque simillima.

Quarto, quinto, aut septimo maculae prodeunt, pectore praesertim, dorso, & lumbis, quae a figura culicum morsus repraesentantes cucullares, & petechiae vocantur,

T 2

varii

(a) Jac. Drachei de abusu remediorum compositorum Orat. Vid. Acta Er. Lips. 1745.

varii coloris, aliquando rubrae, aut flavorubrae, aliquando vero lividae, ac subobscurae, seu punicei coloris conspiciuntur; fitis primis morbi diebus saepe intensa, postea evanescens, non enim de fiti amplius queruntur aegri, licet fauces sicciiores fiant, linguaque arida; nullius interdum mali molestiam accusant praeter languorem; musculorum fibrae, ac tendines huc illuc convelluntur, ac contrahuntur, ex quibus pedum, & crurum tremores, & subsultus, manuumque jectigationes; hinc quidam festucas colligunt, lintea, aut stragula digitis complicant; Sub auribus parotidales glandulae non raro tumescunt, indurantur, atque tumores parotides dictos efficiunt.

Haec praecipua sunt malignae febris symptomata, quorum si plura compareant, de eiusdem praesentia nos certiores reddunt.

Si vero horum pauca tantummodo in febribus notari, atque dignosci possint, febris malignitatem suspicari, non autem credere, neque accusare licebit.

Hic tamen animadvertendum, quantopere decipiantur nonnulli medici, vel potius medicastrum, qui plures acutas, & continuas febres pergravibus symptomatibus comitatas cito malignas pronunciant, contraque inanem morbi malitiam totum opus dirigunt, haud notabili aegrorum damno, ac interdum exitio.

Credat quidquid velit ignarum vulgus has peracutas, & perniciosas febres malignarum generis esse, ut solet, praecipue si eisdem laborantes intereant, contra quem, praedictosque medicos, valde increpant nonnulli summae auctoritatis, & doctrinae viri, inter quos Baglivius (a). *Hoc imaginarium malignitatis nomen imperitia medicorum peperit, petulantia vulgus fovet, credit enim vulgus quoscumque rapit febris, perimitque a malignitate illius semper perire: credunt id plures etiam medicorum &c.*

Nos autem, ne a recto tramite huiusmodi febres medendi discedamus, adaequatam morbi ideam nobis instituire debemus, supra quam tota curae basis construenda erit, quod ut melius assequamur, nonnulla excutienda sunt praeiudicia quorundam medicorum, quae medicinam exercendo ingenioli mei imbecillitas detegere potuit.

Quidam, si ad febricitantem accedant, cuius pulsum valde celerem, ac frequentem percipiant, notabili carniuum aestu, acerrimo, & lancinante, vel quandoque gravante capitis dolore, dorsi, & lumborum, totiusque corporis ambitus ligamine, & cruciatu, inquietudine, jactatione, & vigiliis, ardenteque fiti, statim de febris malignitate admodum dubitare incipiunt; si vero ulterius procedat febris, eiusque accidentia, prout in statu morbi contingere solet, id est linguae siccitas,

(a.) *Prax. Med. lib. 1. pag. 33.*

citas, vaniloquium, & delirium, tunc pro maligna omnino apprehendunt, ficcas idcirco cucurbitulas ad malignitatem melius explorandam, adstantibusque periculorum ostensione patefaciendam praecipiunt, quibus si subter nonnullae appareant rubrae efflorescentiae, pro maculis petechialibus accipiuntur, atque venditantur, cum nihil aliud sint praeter phlogoses sanguinisque lentescitiae.

Vel accidentales, & ab ipsis cucurbitulis productae; nam cutaneae venulae ab iisdem cucurbitulis, intra quas caro elevatur, ita comprimuntur, ut sanguini redeunti viam intercludant, arteriolae vero, utpote durioribus tunicis donatae, ac penitiores, appellenti sanguini transitum minime prohibent; quapropter ad earundem arteriarum extrema, & venarum principia jugiter perveniens sanguis, nec ab iisdem venis traiectus, easdem inflat, quae turgentes cutem obscuram, aut purpureo colore tinctam exhibent; hinc, intercluso per venas exitu, in lymphaticas arteriolas vim facit idem sanguis, atque intruditur, quae arteriolae cum heterogeneae, ac parvi diametri sint ratione eiusdem molecularum, praecipue rubrarum, eundem transvehere nequeunt; unde phlogoses, & rubescentes molecule ex ipsarum cucurbitularum applicatione ortae.

Vel ab ipsa febre, ipsiusque sanguinis circulantis impetu, quo in aliena vasa traducitur, exoriuntur.

Pulsuum vibrationem, diametrum & duritiem parum curant, minime-

que perpendunt, & a venae sectione se abstinere malignitatis metu, etiam in principio, immo in his febribus venam secare piaculum reputant; quam miseranda aegri pernicie, quisque mechanicae medicinae etiam mediocriter gnarus, & sana praxi imbutus satis comprehendet.

Cuius enim generis sunt hae febres, quaeso; nisi synocharum putridarum, aut ardentium spuriarum ad gradum inflammatorium evectae, quotiescunque alicui visceri inflammationem, & stagnationem minantur?

Inter viscera tamen, quae huiusmodi inflammationibus subiacent, pulmones sunt, cerebrum, eiusque meninges, quod nobiliori eorundem officio tribuendum est; videlicet:

Pulmonaria vasa, si pulmones imprimis consideremus, sanguinem a corde immediate accipiunt, maioremque sanguinis impetum, quam pleraque alia viscera juxta canonem Pitcarnianum sustinent; propterea quia tanta velocitate excurrit sanguis per pulmones, ut tota cruoris massa, quae dato tempore ab arteria magna per universum corpus distribuitur, ac per venam cavam redit, illo eodem tempore tota, inquam, per solos pulmones transire debet; unde calculus institui posset, resultans ex ratione composita sectionum plurimorum arteriae aortae ramulorum cum arteriae pulmonaris ramulorum sectionibus, ac sanguinis hos perfla-

perfluentis celeritate cum eadem, qua per illos aortae excurrit (a).

Quapropter maiorem in aestu febrili acquirente sanguine celeritatem, eo maiorem in huiusmodi acutis febribus impetum pulmonaria vasa accipient; hinc non raro evenit plus sanguinis a corde ad pulmones impelli, quam a pulmonibus ad cor traiciatur, quod non solum spirandi difficultatem, & anhelitum, verum etiam lipothymias & syncopes, quotiescunque a pulmonibus ad cor nimis pauca sanguinis quantitas traducatur, ita ut sinistrum ventriculum satis dilatare non valeat, vel etiam palpitaciones, & angores, si ob liberae traiectionis defectum in pulmonibus sanguis quandoque refluat, ventriculoque dextro eundem in pulmonarem arteriam propellenti nitatur, ac maiorem in modum resistat; quo impetu superata eorundem elasticitate, seu vi contractili nimium dilatantur, nec dilatationi respondet contractio; idcirco sanguis ex arteriae pulmonaris ramulis tenuissimis in venas aegre permeabit, seu illa data celeritate, qua in ipsum arteriae truncum descendit, cum in venas migrare non possit, evenit, ipsum sanguinem ad extremas arteriolas propulsum eisdem sanguini a tergo venienti resistantiam facere, ex qua lentescitiae ac stagnationes, quas pulmonum inflammationes consequuntur.

Secundo loco cerebrum, quia sanguis illuc insigni velocitate ascen-

dit; nam a sinistro, ac fortiori ventriculo impellitur, nec non recta, vel saltem minus obliqua directione, quam ad alia viscera tendit, quoniam carotides in principio curvaturae aortae enascuntur, cordi propinquiores sunt, ac propria orificia ipsum sinistrum ventriculum quasi e conspectu, seu per quasi rectam lineam respiciunt.

Praeterea cerebrum adeo molle, friabilisque substantiae est, ut nullo alio viscere comparandum sit, ideo huic a natura tenuioribus vasis, quorum molliores ac flexibiles tunicae, prospectum fuit.

Accelerato itaque sanguinis motu in acutis huiusmodi febribus, ipse sanguis maiori impetu in cerebri arterias nitetur, eorumque dilatationem praeter modum augebit, quod dilatationis augmentum a pluribus causis pendere potest, primo, a vehementi cordis systole sanguinem propellente, secundo, a cruoris massa, tertio, ab arteriarum cerebri tono magis, aut minus debili, quarto denique, ab impedimento in arteriolarum extremis haerente, quod earundem diametrum occludat, vel saltem coarctet, ac sanguis illuc appellentis progressivum motum ita intercipiat, ut ipse subsistat, & reliquum subsequenter refluere cogat; hic in vicinas arteriolas impetum faciet, easque distendet, ex quo praeternaturalis arteriarum cerebri dilatatio.

Primae

(a) Mich. de Sep. fluid.

Primae igitur causae, nempe cordis vehementiori systole, quae in acutis febribus manifeste evincitur, si secunda, nempe copiosi sanguinis moles addatur, cerebri arteriae praeternaturalem dilatationem necessario inibunt, quae eo maior evadet, si arteriarum cerebri tonus imbecillior fit, ac momento sanguinis impar, quod tertiam constituit causam, aut arteriolarum extrema pene occlusa sint, quod quarto loco consideravimus, vel fibrillarum nervearum crispatione ipsarum arteriolarum diametrum angustante, vel ob ipsas crassiores sanguinis moleculas earundem cavitatibus haerentes, ut illius transitus ex arteriis in venas prohibeatur, vel saltem retardetur, praedictae exoriuntur vibrantes arteriarum oscillationes, ac turgescitiae, quae cerebri inflammationes constituunt, vel portendunt; quare obtusi capitis dolores, & surditates, quae a compressa per vasorum inorbose tumefcentiam cerebri substantia pendunt; huiusque medullares fibrillae ex nimia vasorum distensione, & calore tensae naturalem elasticitatem amittunt, externorum obiectorum impressionibus diversimode capaces, & praeter naturam susceptibiles fiunt.

Unde impedita spirituum separatione animalis potentiae languores, vaniloquia, deliria, ac stupores.

Praeterea vehementioribus arteriarum pulsationibus agitatae eae-

dem medullares fibrae impetum quoque iisdem animalibus spiritibus communicant, qui in musculos inaequaliter, ac sine distributione influentes artuum tremores, tendinum subsultus, atque iectigationes pariunt.

Colligendum igitur, primo: illos, qui febre praefatis symptomatibus stipata pereunt, sanguinis in cerebri vasis stagnationes passos fuisse, quemadmodum autopsia plures, atque follicitos edocuit medicos, inter quos Dom. Silva (a).

Auctor de iis febribus loquitur, quae vulgo pro malignis habentur, idcirco ipse quoque denominatione vulgi utitur, sed has ab illis, seu vere malignis, & contagiosis distinguit. Postquam nonnullas attulerit rationes, quibus a cerebri inflammatione pendere hasce febres ostendit, ad autopsiam se convertit, atque asseritur (b): *Mais l'ouverture des cadavres nous instruit d'une manière plus sûre. Elle fait voir, que le cerveau de ceux, qui meurent de la fièvre maligne, est toujours rouge, gorgé de sang enflammé, que sa substance, & que les tuniques, qui l'envelopent, sont parsemées d'un nombre surprenant de vaisseaux pleins de sang, & beaucoup plus sensibles, que dans l'état naturel, que ces parties sont souvent dans un état de suppuration, & ramplies d'abcès, lorsque le malade a résisté long temps à la violence du mal.*

Item existimat diversum harum febrium gradum, leniorem, vel intensiorem

(a) Lib. de S. Miss. (b) Ibidem p. 190.

tenfioſiorem ſymptomatum perniciem ab inflammationis diverſitate, ratione ſitus, extensionis, aut etiam qualitatis, V. G. phlegmonofae, eryſipelatoſae, aut etiam oedematofae pendere, inde concludit, ſeu indicationes deſumit. *Sur ce principe il eſt evident, que dans la fièvre maligne toutes les attentions d'un Médecin prudent doivent ſe réunir pour détournier le ſang, qui monte à la tête, à faciliter la circulation de celui qui y eſt porté, à procurer le retour de celui qui y croupit. Or ce n'eſt, comme nous l'avons prouvé, que de la ſaignée du pied qu'on peut &c.*

Colligendum ſecundo: neceſſariam eſſe phlebotomiam in genere, in ſpecie vero venam pedis ſecandam, haec enim duabus indicationibus ſimul ſatisfacit: hoc eſt ſanguinis plethoram imminuit, nec non a cerebro laborante ipſius ſanguinis inclinationem revellit, & ad inferiora convertit, ex quo cerebri arteriae nimia ſanguinis, a qua diſtenduntur, copia liberatae elasticitatem, & vim contractilem ad ipſum ſanguinem e corde venientem propellendum, atque lentefcentem ciendum, eiſque progreſſivum motum excitandum recuperant.

Hic quidem brevior, & tutior eſt modus obſtructa vaſa reſerandi, quo niſi utamur, dum eorundem vaſorum plenitudo adſit, ut plurimum de aegri pernicioſitate, & fato ſpectatores minime inſontes erimus, eo quia ſolidorum vim a fluidorum

momento oppreſſam, & devinctam, omiſſa congruente ſanguinis evacuatione non ſolvimus, vaſorumque phlegmonofam, aut eryſipelatoſam, vel quovis modo inflammatoriam ſtagnationem fieri non impediverimus, vel ſaltem idoneo remedio impedire non ſategerimus.

Quod ſi phlebotomia in huiusmodi febribus plethora coniunctis unquam contemnenda ſit, ex hoc tantummodo erit, quia ad cerebri inflammationem arceſcendam eadem non ſuffecerit, illa ipſa, vel ſaltem non diſſimili ratione, qua ceterae eſſentiales inflammationes, ſive pectoris, ut pleuritides, & pleuripneumoniae, ſive abdominis, ut hepatitides, aut ventriculi & inteſtinorum, quae in lypirias abeunt, vel ipſius capitis magis conſpicuae, quales ſunt membranarum cerebri, phrenitides ſcilicet, ab eadem phlebotomia interdum minime curantur, eo quia ſanguinis ſtagnationes eiſ ſunt naturae, ut nec a plethorae imminutione, nec ipſius ſanguinis revulſione, aut etiam derivatione ſolvi datum ſit.

Omiſſionis crimen circa venae ſectionem in hiſ febribus, plerumque ab illis perpetratur, qui & aliud in pharmacorum regimine committere ſolent.

Mos itaque eſt apud praedictos medicos purgante medicamento indifcriminatim curam inchoare contra Hippocratis monitum, contraque medicinae rationalis leges, a quo, ut caveamus, nobis vehementer hortatur Baglivius (a). *In principiis febrium acutarum*

(a) Prax. Med. Lib. 1. pag. 31.

acutarum cave a purgantibus, cave pariter a remediis nimium volatilibus (de quibus mox) crudo namque existente adhuc morbo, vel educes, quae educenda non sunt, vel augebis febrem, vel jugulabis aegrotum.

Sed de purgantium in acutis febribus abusu infra egimus (a).

Purgante vero medicamento propinato statim alexipharmaca, & validiora expansiva praescribunt, ut febris malignitati, inquirunt, anticipate occurrant, eique quam fieri potest resistantiam faciant; Alexipharmacis vero cordialia, atque volatilia remedia aquis spirituosiss, & empyreumaticis subdunt, ut futuris naturae languoribus indulgeant, proximumque, ut aiunt, sanguinis coagulum impedian, & animalium spirituum secretionem non interceptam servant.

At quidem perperam, qualem enim putant esse horum expansivorum, volatilium remediorum effectus, nisi sanguinem ex accelerato per febrem motu jam rarefactum magis rarefacere, vasaque jam turgida magis expandere? Quae pulmonibus, aut cerebro, prout viscera inter cetera obnoxia, inflammationem minitantur; in iis bronchiales vesiculas occupando, & coarctando inspirandi difficultatem pariunt, in hoc vero medullarem eiusdem cerebri substantiam ita comprimunt, ut secretorii tubuli non nihil obtundantur, spirituumque animalium secretio intercipiatur, ac

medullarium fibrarum tonus opprimatur; unde lipothymiae, virium prostrationes, mentis stupores, ac surditates.

Qualem & illorum, & cordialium, & spirituosorum actionem, nisi volatilibus eorundem, & acutis angulis constantibus particulis viscerum, & vasorum nerveas fibrillas invadere, vellicare, ac penetrare, & uno verbo stimulo afficere? Ex quo provocata, & aucta naturali elasticitate eadem vasa, vehementius oscillant, ac maiore vi in fluida nituntur? Item propter insignes ex ramulorum paris vagi plexibus consensum, huius fibrae ob maiorem animalium spirituum derivationem tumescunt, violentius contrahuntur, ac maiorem supra sanguinem momentum acquirunt, ideoque fluidorum, & solidorum motus eo magis acceleratur, ac natura in orgasmum excitatur, non sine formidabili aegri periculo.

Nam sanguis violentiori impetu ad extrema sui vascula propulsus, puta in cerebro, vel in lymphatica eiusdem intruditur; unde phlogoses, ac internae erysipelae, vel tanta copia impulsus, quanta a venis recipi, aut ex earundem extremarum arteriolarum angustis in venas traduci nequeat, inflammatoriae stagnationes, ac phlegmonodes oriuntur, quae deliria, convulsiones, tremores, ac jectigationes pariunt, hae vero in lethalem soporem, seu lethargiam desinunt.

Huiusmodi

Huiusmodi cordialium, & sudoriferorum usum perniciosissimum esse acriter contendit Hecquetus (a). En pareil età se comprennent les affreux evenemens des cordiaux, des sudorifiques, ou des semblables drogues, parceque agitant le sang, le gonflant a force de le rarefier, & ainsi le faisant bouffer, ils empêchent de s'ouvrir pour lacher la matiere de la sueur, qui tiennent confondue par mi les autres sucs.

Deinde rationem reddit. Mais ces maux pretendus si terribles pour l'avenir etant bien entendus, & ramenez aux manieres, & aux loix de l'economie animale, ne se trouvent etre, que les effets d'un sang mal distribué poussé au hazard, ou impetueusement par l'exces d'une systole dereglee des arteres, qui poussent vers les capillaires plus de sang, qu'il ne peut s'en ramener. Hinc Stahlia nam commendat methodum, qua in acutis huiusmodi febribus ad sanguinis circulationem liberam reddendam, solidorum effrenem impetum cohibere, & sedare student.

Sed & illa legi merentur monita, quae in suis epidemicis constitutionibus habet celeberrimus Sydenham, qui (b) ait: *cardiaca vero quod spectat, quoniam usu mihi compertum est, eadem propere nimis exhibita non contemnendam noxam inferre, vena scilicet nondum secta, metuendum est, ne materia cruda adhuc existens in cerebri membranas &c. aut pleuram de-*

cumbat, ideo curae mihi semper est, ne cardiaca exhibeantur, dummodo vel nihil omnino, vel parum sanguinis emissum, nullaue alia insignior evacuatio facta fuerit, aut aeger aetatis vigorem nondum exegerit: neque enim video quorsum sanguis eius per se satis locuples ulterius in ipsius perniciem ditesceret. Locuples autem, atque opulentus satis est, neque succendiculis eget quamdiu evacuationes insignes calorem eius insitum non prostraverint. Huiusmodi aegris domi nascuntur cardiaca, & quae foris adduntur frustranea sunt, aut etiam damnosa.

Illi itaque, qui rationalem medendi methodum profitentur, ab expansivis, & sudoriferis, volatilibus, & cardiacis in huius naturae morbis se abstinere debent, nisi languescantibus viribus tenues pulsus percipiantur, ac solidorum elasticitas ob dissipatam animalium spirituum copiam, sanguisque volatiliores particulas imminutas, deficiat, cui post septimum (praecipue si exuberantibus, & diurnis separationibus operetur natura) prospiciendum est; secus vero praedictis remediis utentes perniciosam reddunt febrem, quae ratione symptomatum pro maligna habetur, sed vere maligna non est, aegrumque in vitae discrimen ducunt, ut ab eodem Sydenhamio arguitur (c). E febribus, inquit, e malignarum classe nonnullas vulgo reponi, cum indomita symptomatum saevitia, quae huic

opinionem

(a) T. I. liv. de la digest. 39. (b) Pag. 62. feb. cont. An. 1661. 62. 63. 64. (c) Const. Epid. An. 1665. 66. pag. 115. c. II.

opinionem patrocinari videtur non a venosa morbi indole, sed a Therapæia perperam administrata proficiatur &c.

Proinde ad temperantia diluentia, & sedativa confugiendum erit, primis saltem morbi diebus, seu ante septimum, ac quotiescumque de sanguinis plethora, aut notabili rarefactione certiores simus, quod turgido, expansoque pulsu, corporisque habitu nobis innotescit, quemadmodum si vehementior solidorum motus, non sine fibrarum erethismo, rigiditate, atque spasmodicis crispationibus, quod ex eiusdem pulsus vibratione, & tensione, capitis, aut praecordiorum doloribus, anxietate, corporis iactatione, & vigiliis, aliisque deprehendere nobis datur.

Propterea celebris Stahl, eiusque discipuli ad sanguinis circulationem expediendam toto opere incumbunt, cunctaque illorum remedia ad hanc indicationem collimant; vel enim sint alkalina, refrigerantia, & nitrata, haec sanguinis effervescentiam, nimiamque rarefactionem temperant, cohibentque; vel diluentia, quae sanguinem fortasse nimis crassum fluidiorem reddant, ac feri copiam augendo serosa, & lymphatica vasa repleant, aut repleta servant, ut solidorum tonus flexibilis remaneat, fluidorumque traicendorum nifui obediant vasa; vel tandem sedativa, & anodyna, quae nervearum fibrarum tonum laxando spasmodicas membranarum, ac vasorum

crispationes tollant, ut eorum diametri circulantibus fluidis satis pateant; praeterea vehementiorem cordis systolem, & provocatam universi solidorum generis, praecipue articularum, elasticitatem leniant, atque compescant, ne sanguis praeternaturali vi proiectus e propriis vasis in aliena detrudatur, proinde phlogosum, ac stagnationum periculum amoveatur.

Hoffmannus quoque in eadem, ac Sydenhamius sententia huic opposita methodo utentes redarguit (a).

Male hoc in casu omissa in principio venae sectio, & pessime in corpore plethorico data volatilia cum regimine aestuoso, quibus facillime inflammatio in cerebro concitata, deinde paulo infra (b), sed in quibus aut aegri, aut medici culpa sanguinis missio neglecta. & usurpata calida bezoardica, hi longe gravius, & diutius decubuerunt, delirio, & assidua vigilia affecti sunt, quandoque exanthema purpuraceum, & febris saepe ad decimum quartum diem magna institit vehementia, quin fuerunt, qui accedente purpurae albae, aut petechiali exanthemate interierunt plane.

Magna tamen huius methodi perniciēs mox evidentius patebit, cum de febris vere malignae, & contagiosae curatione agemus, in qua phlebotomiam haud penitus excludi; sed interdum necessariam esse ostendemus; incongrua quoque, ac prava alexipharmaca calidiora, atque volatilia remedia, quae si in-

U 2

discrimi-

(a) *Med. syst. T. IV. sect. II. de feb. acut. pag. 180. 181.* (b) 181.

discriminatum adhibeantur, saevio-rem, ac periculosiorem reddunt morbum. Modo eo, unde discessimus redeamus.

Quid sit febris maligna, seu qualis proxima eius causa, & mechanismus ab illo febrium acutarum distinctus, ut maiorem in praxi lumen assequi possemus, exquirendus esset, quod cum perdifficile sit opus, magnaue medicorum ingenia fatigaverit, nos tantum, reconditumque phaenomenon aperire, utpote incapaces, nonnullas tantummodo ex ipsius febris malignae effectibus, ac symptomatibus ratiocinando veritates depromere conabimur, quae ad morbi ideam, ac medendi methodum illustrandam multum conferre poterunt.

Pulsus frequentiam, & celeritatem, quemadmodum calorem, & aestum, aliaque accidentia, quae ceteris febribus communia sunt, hic praetermittimus, quia haec morbi characterem minime exhibent, eorumque gradus, & intensio in huiusmodi febribus varii sunt; nam in aliquibus malignis, quae fortasse peioris sunt naturae, pulsus non admodum frequens, in aliis mitior quoque calor, quam in ardentibus non solum, sed etiam in synochis, licet malitiae gradus aliquanto maior esse possit ceteris eiusdem generis, in quibus aegri magis calefant.

Consideremus itaque imprimis virium prostrationem, quam ipso fe-

bris initio experiri solent aegri; huius vero originem ut eruamus, nonnullae veritates sunt ponderandae.

Primo, virium prostratio nil aliud est, quam musculorum ad animale motum inservientium languida vis, & actio.

Secundo, musculorum vis, & actio tum a sanguine eorundem arterias distendente, tum ab animali spiritu illorum nerveas propagines, & tubulos influente (a) pendet; ergo virium prostratio in malignis febribus, vel a sanguinis inopia, quae musculares arterias distendere non sufficiat, vel, si naturalis ponatur sanguinis quantitas, ab intercepta animalium spirituum secretionem, ex qua nervei tubuli satis inflari queant, originem habebit.

Tertio, febris maligna, praecipue pestilentialis, cum virium prostratione illos facilius aggreditur, quorum corpora succiplena, & plethorica sunt; ergo virium prostratio in his febribus non sanguinis inopiae, sed spirituum animalium interceptae separationi, vel prohibito per nervos influxu attribuenda erit.

Quarto, spirituum separatio intercipi, seu diminui potest, vel ex viscosiori sanguinis crassi, in cuius sinu tenuiores animalium spirituum particulae inhaerentes arctae devinctae ad secretoria cerebri vascula subeunda difficiliter extricantur, vel a vitiata secretoriorum organorum dispositione, ac symmetria.

Quinto,

(a) Vid. cap. 3. lib. 1.

Quinto, vitiabitur eorundem organorum symmetria in huiusmodi febribus, aut a sanguine copioso, & rarefcente quo cerebri vascula turgescencia medullarem substantiam opprimunt, sinuum, ac tubulorum cavitates obtundunt, vel ab ipsius medullaris substantiae fibrillarum contractione, eorundem tubulorum diametrum angustante, quibus minor spirituum materia traiciatur, nec non membranarum cerebri, praesertim piae matris, quae intra corticalem substantiam penitus se insinuans, atque eandem in tot lobos, sive segmenta dividens, arteriolarum extremitates huc desinentes (a) se crispando coarctat, quare minor tenuioris, ac volatilioris sanguinis portio ad secretoria spirituum organa appellit, ideoque minor spirituum quantitas secerne-
tur.

Haec secretoriorum organorum affectio, si universalis sit, ac cerebrum, aequae ac cerebellum amplectatur, non solum animalibus viribus destituitur aeger, sed etiam vitalibus, eiusque pulsus imbecillis percipitur, quia cardiacorum nervorum plexibus naturali spirituum copia defraudatis, cor languidiores edit systoles, tunc vero in lipothymias, nec non syncopales affectus adducitur (b).

Si vero particularis sit eadem affectio, ac cerebrum magis, quam cerebellum, aut hoc potius, quam illud obstringat, vel animales vi-

res vitalibus, vel vitales animalibus praevalerunt, immo, si peculiarem ipsius cerebri, ac medullaris substantiae partem magis invadat, quae his vel illis musculis, his vel illis artubus pro animalium spirituum distributione inserviat, illius artus stupor, atque paralyfis contingit, si cerebri hemisphaerium hemiplegia, seu dimidii corporis paralyfis, quae accidentia in malignis febribus non raro observantur.

Harum vero contractionum in membranosis partibus causa excutienda esset, quae procul dubio a materia extranea intra corpus deducta, atque insinuata, irritante, pravaeque texturae, vel intus vitium, aut corruptionem nacta, repetenda est; verum de ipsius natura mox infra agemus.

Virium prostrationi affinis est mentis stupor, aurium tinnitus, & surditas ratione originis; nam mentis stupor est cerebri affectio, qua medullaris substantiae fibrillae, ac secretorii tubuli nimis laxati, aut rigidiores facti naturalem elasticitatem amittunt, parumque oscillant, ita ut lucide mens non cogitet, vel uno tantummodo imaginationis obiecto mens absorbeatur, externorumque sensuum impressiones nil, aut obscure percipiat, quod tum a sanguiferorum corticalis substantiae vasorum turgescencia, & expansione, tum cerebri membranarum contractione medullarem substantiam comprimente exoritur; va-
forum

forum autem cerebri turgescencia in malignis febribus, plerumque non solae plethorae attribuenda, sed ipsius membranosi, ac nervosi systematis spasmodicis crispationibus, quae vasa sanguifera coarctando, ac progressivum sanguinis motum impediendo eorundem dilatationem portendant; nam praefata accidentia malignae febris etiam illos, quorum sanguis proportionatam quantitatem non excedit,prehendere observamus.

Ex iisdem nervosis, ac membranosis crispationibus organi auditorii arteriolae coarctatae, a sanguine sub acutiori angulo nitente vehementius pulsant, tympani membranam, ac nervi auditorii propagines leviter percellunt, unde aurium tinnitus.

Haec vehementior pulsatio, si ad cerebri quoque arteriolas extendatur, ita ut medullaris substantiae fibrillas, & tubulos concutiat, mens in perceptione, & iudicio decipitur, quia de illis iudicat obiectis, illorumque ideam sibi repraesentat, quorum impressiones ipso cerebro receptae iis commotionibus a praedictis arteriolarum pulsationibus in medullarem substantiam excitationis similes sunt; hinc delirat aeger, cui delirio somnia praecedere solent extraordinaria, ac interdum phantasmata, aut vaniloquia, propterea quia medullarium fibrarum cerebri commotiones initio leviores sunt, nec continuae, ideoque tunc inania verba a se prolata, ipsaque phantasmata dignoscit aeger, ac si eundem alloquamur ad rem respondet, postea vero augescente fe-

bre, vel saltem febris malitia, vehementiores fiunt, ac incessantibus in eadem cerebri parte praedictis commotionibus, continuum experimur delirium.

Ex istiusmodi cerebri affectionibus inordinatae spirituum separationes, inaequales eorundem per nervos influxus, ac distributiones emergunt, quae convulsivos artuum aliarumque partium motus, tremores, iectigationes producant.

Praeter caput, seu cerebrum, eiusque membranas, etiam ad alia viscera, & artus, & ad quascunque nervorum, ac membranarum propagines perveniunt, ac extenduntur contractiones; in dorso quidem, ac lumbis, quorum musculorum membranae, ac spinae vertebrarum nervi adeo contrahuntur, ut vasorum sanguiferorum diametri obstringantur, per quae sanguis intercepto progressivo motu revertitur, atque eidem a corde venienti resistantiam facit; unde maior ipsius sanguinis in arterias nisus, impetuosa dilatatio; idcirco praedictae musculares membranae, quibus eadem arteriae irretiuntur violentam distractionem patiuntur, non sine acerrimo illarum partium dolore, ac ligamine, de quo adeo queruntur aegri, praesertim in principio, ac pro ipsius malignae febris prodromo passim habetur.

Ad cutaneos nervos, ac membranas cum perveniant, extrema vascula sanguifera spasmodice afficiuntur, venulae scilicet, seu venarum principia, utpote laxioribus tunicis

tunicis donatae facillime ex iisdem crispationibus coangustantur, atque occluduntur, sanguinique remeatus prohibetur, arteriolae vero maiorem ad se contrahendum stimulum accipiunt, ac sanguinem tanto impetu propellant, ut e proprio sinu in alienos, & secretorios tubulos traiciatur, nempe illos, quae per poros cutis ascendunt, ac aliud reticulum praeter Malpighianum efformant (a), eorumque osculis cuticulae immediate subiectis eructatus rubras constituit maculas, quae modo rubescentes, modo purpureae, ac subobscuri coloris apparent, prout densior, vel fluidior sanguinis crasis, serosiores, aut crassiores eiusdem stagnantis moleculae.

Praeter sanguinis, etiam lymphae stagnationes, quod in parotidalibus glandulis praecipue evenit, observamus, quoniam quinti paris ramulis se contrahentibus serosa, sive lymphatica vasa salivae materiam afferentia, ac secretoria earundem glandularum ita constringuntur, ut ipsam salivam ad communem ductum non traducant, ac lymphae reliquae ad sanguinem redeuntis traiectionem impedian.

Ob similem nervorum spasmodicam crispationem urinae parum coloratae, quandoque crudae feceruntur, quia coarctatis tubulorum fasciculis in conos, ac papillas definientibus, angustatisque secretoriis ductibus, serosior, ac lymphatica tantummodo sanguinis portio eos-

dem pervadere potest, licet aucto eiusdem sanguinis in circulatione impetu crassior, atque colorata, ut in ceteris acutis febribus apparet, esse deberet. Colligitur

Primo, haec, ceteraque symptomata malignae febris coniuncta spasmodica nervei, ac membranosi systematis crispatura exoriuntur, quae caput, ac cerebrum praecipue afficit, deinde, & alia viscera, ac pene universa organa invadit; unde non solum animalem potentiam prosternit, verum, & vitalem, progressivum sanguinis motum in minimis vasis intercipiendo, labefactat.

Secundo, praedictas spasmodicas crispationes ab aliqua causa irritante produci necesse est, quae nervos, ac membranas stimulans, penetransque, vel earundem fibrillas violenter distrahens animalis liquidi refluxum pariat, ac cerebri medullarem substantiam ita feriat, dimoveatque, ut eiusdem fibrarum tonus subvertatur, ipsorumque animalium spirituum secretio, ac distributio perturbetur.

Cuiusnam autem naturae sit haec irritans materia, qualis nempe consistentiae, & crassitiei: tenuioris, aut crassioris, fixae, aut volatilis, inquirendum restat, quod a sequente malignae febris phaenomeno forsitan eruere, ipsorumque symptomatum adhuc expositorum consideratione magis illustrare poterimus.

Phaeno-

(a) *Anatom. d' Heister.*

Phaenomenon in eo consistit, quod maligna febris contagiosa sit, qua aegrotans eos, qui in eodem cubiculo aliquandiu immorantur, vel ad ipsius lectum frequenter accedentes, ac officium aliquod pro infirmo praestantes facile inficiat, & ab illis in alios ferpat, nisi caute erga ipsos aegrotantes procedatur.

Haec itaque infectio, nisi aere mediante, communicabitur, quotiescunque materiam sane tenuem, ac volatilem ex malignantis corpore exhalantem, sive e pulmonibus per expirationem, sive e cutaneis porulis per transpirationem recipiat idem aer.

Tenuissima, & volatilis haec materia, quia e tenuissimis porulis fecernitur, ac una cum transpirabili eliminatur; deinde quia per ambientem effusa in adstantium corpora se insinuat; vel enim salivae commixta per deglutitionem in stomachum descendit, ut arbitratur Hoffmannus, & ad intestina tenuia progreditur, in quibus gastrico imprimis menstrualis succo se immiscens, cuius naturam nonnihil spirituosam, & elasticam facillime pervertit, deinde pancreatico & bilioso, quorum fluidas, & oleosas quoque partes coinquinat, postea cum praefatis, & alibilibus succis mesaraica vasa in sanguinem defertur.

Vel mediante inspiratione bronchia ingressa pulmonaria vasa penetrat, ac in humoralem massam traducitur, eamque inficit eo citius, & facilius, quam per stomachi viam; nam in hac miasmatum malignorum vis cavitatum succis, quibus prius immiscetur ante-

quam vasa subeat, ceu saliva, gastrico liquido, pancreatico, & praecipue bilioso, cuius substantia oleosa, obtunditur, atque hebetatur, quemadmodum & chylo, praesertim si stomachus jeiunus non sit, & alimentorum massam nondum expulerit, tunc enim eadem miasmata, illa pulve non solum liquidas, sed crassiores, & feculentas partes continente merguntur, & obruuntur.

Praeterea, & ventriculi muscularis, seu peristalticus motus, quo ipsa alimenta conteruntur, ac liquefcunt, eorundem peracutam figuram retundunt, atque volatile cohibent; hinc est quod nonnulla venena ex animalium genere, licet mortifera sint, si per vulnus inferantur, deglutita minime noceant; cuiusmodi sunt viperarum succus veneficus, qui intra vesiculam earum gingivae supra dentes adhaerentem continetur. Hic quia in viperae morfu peripheriae vascula dente perforata immediate ingreditur, adeo saeva parit accidentia, nisi cito aegro succurratur, ut mors praesto sit. Secus vero si deglutiatur, ac per longam alimentorum viam in sanguinem deferatur, quia succis ad digestionem inservientibus commiscetur, ac ventriculi trituratione conteritur, nullam infert noxam, quemadmodum doctissimus Redi expertus est.

Periculosum itaque erit per inspirationem malignae febris contagium communicari, nec refert pulmonum vesiculas aere impervias esse, ut cum plurimis vult Pitcair-

nus;

nus; nam quorundam spirituum evaporationes per pulmonum viam sanguinem subeunt.

Hoc manifeste experimur spiritu therebintinae. Si enim prope patulum vas hunc liquorem continens, praesertim in loco clauso tantummodo respiremus, & aliquandiu immoremur, quin ullum deglutitionis motum exerceamus, urna, quam paulo post reddimus hunc spiritum redolet; ergo volatiliores, & spirituosae illius partes pulmonares vesiculas permeant, ac intra fluidorum massam transferuntur. Quod & de malignis miasmatibus contagium inferentibus intelligere debemus.

Praeter summam tenuitatem, ac volatilem naturam, quae in materia proximam malignarum febrium causam efficiente detegimus, summam quoque elasticitatem, rarefcentiam, & acrimoniam deducimus, sine quibus multiplices illae cerebri affectiones, totiusque nervei systematis spasmodicae crispationes, quae malignam constituunt febrem, ut supra demonstravimus, expectandae non essent; quod ut magis pateat, sic ratiocinandum esse arbitror.

Quaecunque pars organica nostri corporis contrahi nequit, nisi fibrarum diameter, per quas contrahitur, & quae crispantur, nonnihil dilatetur (a); ita ut fibra se contrahens quantum de longitudine amittit, tantum latitudinis acquirat; dilatantur vero fibrarum, sive nervearum, sive membranacearum dia-

metri, tunc non solum cum fluido contento eadem magis distenduntur, quod vel a maiori animalium spirituum copia ipsas influente, vel praeternaturali eorundem expansione, & rarefactione oritur.

Causa, propter quam maior animalium spirituum copia in aliquam partem devolvitur, vel est in capite, quoties ille medullarium tubulorum plexus, qui affectae eidem parti prospicit, & illuc spiritum emittit, praeter modum contrahatur, atque oscillet, quod idiopathicam constituit convulsionem.

Vel extra caput, si nervea, aut membranosa pars ex quocumque irritamento, stimulo, aut laesione, ita afficiatur, ut animalis spiritus e fibris laesis repellatur, ac in vicinas refluat, haec magis turgent, ac dilatantur, proinde aliis irritatis magis praevalent, ruptoque inter fibras virium aequilibrio, laesa pars contrahitur, atque crispatur, quod sympathico spasmodicum efficit affectum.

Igitur si convulsivae affectiones, quae malignam febrem comitantur, pro sympathicis habeantur, maligna materia, a qua excitantur, irritamento, seu stimulo, vel rarefactione praedictas solidas partes afficiet; si vero idiopathicae ex cerebro oriundae censeantur, eadem quoque mechanica fieri probatur. Ut enim in medullares tubulos maligna materia agere possit, vel eorundem fibrillas peracutis

(a) Vid. Cap. XIII. lib. 1. de motu musculari.

tis eius particulis feriet, ac penetrabit, earum parallelismum tollet, easque a se ipsis divellet; quare contrahi eosdem tubulos, & animalem spiritum maiori vi exprimere necesse est, qui nerveos ductus istinc enatos turgefaiet.

Vel rarefacta eadem materia utpote tenuissima, & elastica medullares tubulos commovebit, & ad vehementiores oscillationes provocabit; unde inaequales spirituum eiectiones, atque impulsus, ex quibus contractiones, atque convulsivi motus insurgent.

Praeterea cum tenuissima sit contagiosa materia, & quoscumque perexiles nostri corporis porulos subire capax, rarefactione, suiue expansione magis, quam stimulo, & vellicatione perniciem inferre credendum est; nam quo exilior sit partium ferientium moles, eo minor quoque fibrillarum divulsio, parumque sensibilis dolor, aut irritamentum.

Quapropter ut in humoralem massam penetraverint contagiosa miasmata, quippe heterogeneae naturae cum sanguine, eius globulis difficulter commiscantur, vel commixtae facilius extricantur, deinde in moleculas coeunt. Hae moleculae, sicuti diversae specificae gravitatis a sanguineis globulis, diversum quoque a solidorum oscillatione impulsu accipiunt, ac diversa ab illis celeritate progrediuntur, vasorum extremitatibus nonnihil immorantur, ac per secretorios ductus in glandulas, minimaque vascula membranosis partibus inhaerentia migrant; interim in-

testino corporis ex fluidis circulantibus calore agitantur, atque rarescunt, rarecentes maius spatium occupant, vascula distendunt, a quibus membranae vehementer distrahuntur; huc accedunt ex laceffitibus membranarum eorundem crispationes, quae ad maiora vascula, & sanguiferas arterias extenduntur, earumque diametros coarctando, sanguinis progressivum motum intercipiunt; Unde eiusdem refluxus, ipsarumque arteriarum violentae dilatationes, ac pulsationes, quae praeter febrilem orgasmum membranosi generis distractiones, lancinantes, & ulcerosos totius dorfi & lumborum dolores febris malignae prodromos pariunt.

Ad caput maiori celeritate praeditae moleculae efferuntur vi aequilibrarii, qua sanguine, utpote leviores, ascendendo minorem resistantiam inveniunt, & cum ad extremas cerebri arteriolas pervenerint, intestino quoque sanguinis, ac visceris calore rarefactae easdem arteriolas distendunt, quae turgescunt ipsius cerebri substantiam opprimunt, ac spirituum separationem impediunt, quod universalem corporis lassitudinem, capitis gravamen, mentis stuporem efficit.

Turgentium arteriolarum distensio, si in cerebri quoque membranarum, acutum capitis dolorem gignit, si in solo cerebro, obtusum, huius enim fibrillae, sicuti molles, ac flexibiles non adeo exquisito sensu donantur, ut illae; idcirco utrarumque fibrillarum distractio, & divulsio diverso percipitur dolore.

In medullaris substantiae tubulos se infinuans varia opprimit, ac perturbat sensoria ratione loci, in quo maior fit rarefcentia, & distensio; in illa regione E. G., quae nervis auditoriis originem praebet, aurium tinnitum, surditatem producit, in alia quae nono nervorum pari spiritum subministrat, loquendi difficultatem, ac linguae torporem.

Sicuti vero tota medullaris substantia plerumque opprimitur, a qua non solum capitis nervi, qui ad viscerum, praecipue elasticitatem, & officia interserviunt, verum etiam spinalis medullae, quae ad animale motum, & ad respirationem nervos impertit: ideo summa virium prostratio, & ad se movendum impotentia, spirandi difficultas, imbecilles pulsus, exigui diametri, lipothymiae interdum in syncopes desinentes, aliaque dira symptomata, quae non solum animale potentiam, verum etiam vitalem solidorum vim prosternunt, observantur.

Haec tamen malignae materiae rarefcentia appellente sanguine maiori vi in arterias nititur, quae vehementer, sed alternatim dilatatae medullares fibrillas commovent, eorumque parallelismum tollunt; quare plures in eadem substantia, ac spiritu ipsius tubulos replente impressiones fiunt, saepe similes illis, quas externa obiecta excitare solent, proinde aegri imaginativa fallitur illa apprehendens, quae non sunt, vel diversimode, ac sunt percipiens, ita ut mens quoque perperam iudicet, atque deliret.

Quo maior fuerit arteriarum cerebri elasticitas, eo maior ipsius fibrillarum commotio, ac vehementior spirituum impulsus, ex quo effrenes convulsivi motus, saevioraque deliria.

Varia cum sit, & inaequalis medullarium tubulorum compressio, inaequalis est quoque animalium spirituum influxus, ob quem muscoli huc illuc contrahuntur, atque antagonistae vicissim agunt; unde iectigationes, ac universales tremores, artuum, capitis, maxillae inferioris, labiorum, ac palpebrarum.

Per cerebri vias nervorum tubulos invadit, fluidum nerveum inficit, ac per totum fere corpus diffunditur; hinc suarum particularum asperitate, ac prava natura a nerveo succo diversa nervorum fibrillae irritantur, eo magis quia ab huius materiae particulis febrili calore se expandentibus inflantur, ac divelluntur, praesertim ubi nervei ramuli in membranas desinunt, qua expansione, & irritamento contrahuntur, & extrema vascula sanguifera coarctant, praecipue venulas, ita ut sanguinis per ipsas reditum prohibeant.

Sanguis vero aliquandiu illuc stagnans, utpote coinquinatus, facilius corrumpitur, ideoque spasmodica arteriolarum vi compulsus per secretoria cutis sub cuticula eiicitur, qui quo magis stationarius, aut corruptus, eo lividiores efficit peticulas.

Phaenomena itaque adhuc exposita, & alia malignam febrem constituentia

stituentia proximam, & efficientem eiusdem causam praedictae naturae esse satis demonstrant.

Malignam febrem a pestilentiali plerique distinguunt; harum vero differentiam in sola malignitatis intensione nonnulli collocant, qua dira symptomata ipsam febrem pestilentialem comitantur, ac morbum plerumque mortalem reddunt.

Alii pestilentialem non solum per intensum malignitatis gradum, verum etiam per epidemicam constitutionem a maligna simplici diversam esse volunt, eamque in prava aeris constitutione oriri putant.

Utrove tamen modo consideretur, ac distinguatur pestilentialis a maligna febre, utriusque eiusdem naturae proximam causam esse manifeste deducitur, propterea quia omnino similibus symptomatibus coniungitur.

Licet a diversa extrinseca causa, aut occasionali oriri possit, quae omnibus communis sit, qualis est vitiosa aeris constitutio, quae febrem epidemicam reddit, febrilis nihilominus materia eadem possidet principia, & affectiones, quibus & maligna simplex excitatur; cuius accidentia a pestilentialibus non differre, nisi per solam intensiorem evincitur.

Quamobrem ubi intensior symptomatum vis, eo magis deleteria malignae substantiae qualitas, quae in maiore volatilium partium tenuitate, penetrante figura, ac rarefcentia consistit, quae violentiores pariet vasorum distensiones, membranarum distractiones, & acutiora irritamenta; has

vero nervosi generis crispationes solidorum ictus, & auctus sanguinis impetus necessario consequuntur.

Equidem in his febribus pestilentialibus adeo impetuosae sanguinis haemorrhagiae superveniunt, ut aegros in lipothymias redigant, aut tam copiosae evacuationes, sive alvi, sive sudoris, quae symptomatae sunt, nec non perniciem, colliquamentum, & mortem plerumque portendunt.

Malignae febris proxima causa paucis exarata, nunc dispositiva, & procatactica expendenda esset, seu modus, & causa, qua ipsa maligna materia fovetur, ac generatur, quod ut melius assequamur,

Considerandum, primo, malignam febrem etiam in iis excitari, qui nullo modo ex alieno contactu, aut infectione contaminati fuerunt, ex quo manifeste apparet malignam materiam nostro corpore effici posse, ac ex nostrorum fluidorum portione, cuius textura depravatur, ac corrumpitur, prodire.

Secundo, quamdam adesse analogiam inter animalium veneficos succos, ac malignam materiam, quae hominem in febrem eiusdem nominis inducunt; nam hominibus ex huiusmodi animalium veneno captis non dissimilia occurrunt symptomata, E. G. in viperarum morfu, praeter tumorem partis affectae, vel etiam totius corporis, praeter pustulas ficas, & nigricantes vulnerati membri, febres superveniunt bilioso cum vomitu, ardente siti, stranguria, mentis stupore, tremoribus,

tremoribus, haemorrhagiis, spirandi difficultate, lipothymiis, sudoribus frigidis, aliisque symptomatibus, quae in maligna quoque febre experimur.

E. G. Bufonum veneno universalis corporis tumor, ac pallor superveniunt (a), accedunt-nausea, vomitus, febris acuta, anhelitus, vertigo &c. Ita, & tarantorum symptomata interdum adeo similia sunt, docente Baglivo (b), iis, quae in maligna febre observantur, ut nonnulli malignam febrem pro tarantulae veneno acceperint: *Generaliter loquendo, inquit, symptomata tarantorum primo veneni insultu similia sunt iis, quae in maligna febre ex coagulatione observari solent; qualia sunt angor cordis, spirandi difficultas, omnimoda fere pulsus oppressio, animalium, vitaliumque actionum repentina, ac pene fatalis jactura. Horum omnium testis oculatus est optimus parens meus, isque in Apulia medicus &c. . . . Ille tribus in aegris rure Licium ad-
vectis non multis ab hinc annis observavit, quod cum tales aegroti maligna febre ex coagulatione laborassent, & multa in illis apparerent symptomata tarantorum symptomatibus multum analogia, eorundem parentes judicarunt a tarantula demorsos fuisse, & enarrare progreditur: ita hoc sibi suasse, ut licet summo opere pugnasset medicus, asserens illorum morbum febrem esse malignam; nihilominus eadem metho-*

do, ac si tarantula demorsi fuissent, hos mederi voluerunt, nempe advenientibus musicalibus instrumentis, chorea, & saltatione, ex qua duo parentum jussu has ineuntes sibi mortem accelerarunt, tertius vero in ipsa saltandi actione defecit.

Tertio, in nonnullis animalibus quosdam succos latere, qui vel ingeni sunt, vel acquisiti, quorum textura ita depravatur, ut lethalis veneni naturam acquirant.

Ingeniti sunt E. G. serpentum, ac viperarum, bufonum, scorpio-
num, tarantularum, aliorumque insectorum, qui a nativitate venenosam vim contraxerunt, & ideo venenifera animalia vulgo appellantur.

Acquisiti vero canum rabidorum, quorum natura per se minime venenifera, ex morbosa interna affectione adeo pervertitur, ut ipsum canem rabidum necet, cuius spuma per morsum vulnere infixam aliis animalibus non solum eiusdem speciei, sed cuiuslibet generis lethalis est.

Inter animalia, quorum succi venefici ingeni sunt, admiratione dignum videtur, quod praemonstrante doctissimo Redi in viperae morsu passim observamus; scilicet postquam eadem vipera semel, aut bis momorderit, ita ut vesicula eius gingivae adhaerens veneficum succum continens rumpatur, vel saltem evacuetur, illius morsus,

X 3

qui

(a) Sennert. Cap. 1. Lib. VI. p. VIII (b) Dissert. de Tarant.

qui vesiculae rupturam sequuntur, minime veneniferi sunt; si vero aliquandiu fervetur vipera, rursus oris vesicula turgescit, ac lethales edit morsus; ex quo patet in ore viperae hunc veneficum succum elaborari, quia e fluidorum massa hac veneni vi prorsus carente secernitur.

Ex his itaque inferre licet: quemadmodum in praedictis animalibus veneficos succos enasci, atque elaborari evidenter constat, ita & in humano corpore hanc deleteria qualitatis materiam malignae febris productricem gigni censendum est, quod tunc eveniet, cum nostri corporis fluida, sive eorundem portio ita vitietur, atque corrumpatur, ut in malignam huiusmodi materiam convertatur.

Fluidorum corruptio nequaquam fiet, nisi praevia eorundem stagnatione; ceterum donec fluida suo gaudeant progressivo motu, fermentescere, seu dissolvi, & colliquari non possunt; si vero aliquandiu stagnet, dissolvuntur, atque corrumpuntur, cuius indubitatum, ac frequentissimum habemus experimentum: nempe sanguis, sive per intrinsecam affectionem in vasis, aut extra vasa erumpens stagnet, ut in tumoribus phlegmonosis, qui ad suppurationem tendunt, sive per externam causam, contusionem, vulnus, aut quamcunque laesionem, quae eiusdem sanguinis e vasis egressum, ac proinde stagnationem pariat, ipse sanguis in pus convertitur, rubrum colorem in album mutat, chyllosae substantiae, ex qua constat, similem, eo quia serosae, & lymphae

ticae sanguinis molecule rubros globulos componentes corporis calore agitatae, atque solutae a se invicem disiunguntur, ac volatiles praecipue particulae rarefactae a crassioribus extricantur, atque efferuntur, quae cum exhalare non possint, quoniam intra ipsius corporis parenchyma continentur, ideo stagnantis sanguinis crassem repetitis actibus pervadendo dissolvunt, & colliquant. Accedant salinae fixiores, quae instar vectium penetrando eosdem globulos effringunt, eorumque componentes molecule dividunt; hinc pus conficitur, qui lancinantes quidem dolores ex praedicta partium commotione, ac febres suscitatur; deinde contigua fluida, atque solida corrumpit, donec abscessus, si profundus sit, ad exteriora perveniat, ac natura, vel arte dirumpatur.

Si igitur mediante stagnatione, & calore pus efficitur, inferre licet, fluida nostri corporis intra capillaria vasa stagnantia, nisi in pus convertantur, naturalem tamen texturem amittere, ac in pravam commutari, quae prout salinis sive fixis, sive volatilibus partibus abundaverint, eo deteriorem naturam assequuntur.

Si salinis fixis admodum referta sint fluida stagnantia, & acres lymphae affectiones, herpes, artuum dolores, nec non canerosos tumores gignunt.

Si volatilibus scateant, hae a crassioribus, quibus insident, partibus solvuntur, atque coagmentantur, maiorem elasticitatem, seu maiorem se

se expandendi vim acquirunt, quae minima vascula distenduntur, tandem ita acuuntur, attenuanturque, ut nervoso, ac membranoso systemati infensae sint.

Ex pluribus quidem causis huiusmodi stagnationes, sive lentores contingere possunt E. G. ex aucta sanguinis plethora, quae solidorum vis elastica eiusdem fluidi momento opprimitur, nec ad ipsius progressivum motum per vasa minima promovendum satis agere potest; nec non sanguinei globuli, quia imbecilliter comprimuntur, ac ruditer conteruntur irregularem figuram, ac molem crassiolem canaliculis, per quos traici debent prorsus imparem acquirunt, in quibus necessario, vel saltem lentescunt.

Quare nimia ciborum ingluvie copiosam chyli portionem sanguini suppeditante, hic solidorum contractionibus haud satis atteritur, eiusque molecule sanguineorum globulorum figuram tarde assequuntur, quae ad extrema arteriolarum sanguinearum advectae, eorum diametrum aegre subibunt, proinde in illis haerentes stagnationis occasionem praebent.

Ita, & quaecumque alimentorum digestionem obstant, veluti laboriosum corporis exercitium, quod animale spiritum infumat, ac solidorum muscularem vim imbecilliolem reddat, vel assidua, & intensa mentis operatio, quae animalium spirituum in cerebro secretionem suspendat,

ac universale nervorum genus naturali liquidi influxu defraudet; unde eorundem elasticitatis momentum supra fluida imminuatur.

Vel animi moeror, ac timor, per quem cerebri fibrae rigescunt, ac medullaris substantiae tubuli coarctantur, eoque magis animali liquido viam intercludunt; vel denique frequens iracundia, quae solida ad frequentes, & intensas oscillationes concitet, spiritus dissipet, stomachi peristalticum motum subvertat, aliaque viscera, aut glandulas secernendi munus praestantes convellat, ut contentos succos immature eliminent; unde cruoris massa secretorum moleculis inficiatur, quae praedictum lentorem producant.

Non solum vero ea considerata sunt, quae pravas digestionem, & immaturas secretionem pariant, sed ea quoque, ex quibus necessariae corporis evacuationes sufflaminantur; harum quidem suppressionum, ante alias insensibilis, ac per cutaneos porulos exhalans, quae juxta celebrem Sanctorii calculum duas circiter tertias omnium evacuationum implet, acutorum morborum, proinde etiam malignarum febrium, origo saepius esse solet, in quo plerique medicorum conveniunt, praesente Sanctorii statica, quae tamen cum antiquorum medicorum observationibus diu ante ipsum Sanctorium traditis mirum in modum convenit.

Inter hos habemus Hippocratem, qui pluribus in locis nos monet (a):

Mutationes

(a) Sect. 3, aphor. 1.

Mutationes temporum potissimum pariunt morbos, & in quibusdam temporibus magnae mutationes aut frigoris, aut caloris & alia pro ratione eodem modo & (a): in temporibus quando eadem die modo calor, modo frigus fit, morbos autumnales expectare oportet; & (b) quando aestas fit veri similis, sudores in febribus multos expectare oportet.

Praeterea anni tempora nobis observanda esse serio contendit (c), & tamquam primum institutum proponit: Qui artem medicam recta investigatione consequi volet, is primum quidem anni tempora in considerationem adhibere debet, quid horum, quodque possit; neque enim quicquam habent simile, sed cum inter se plurimum differunt, tum etiam propter varias, quae in eis contingunt mutationes. Deinde vero ventos tum calidos, tum frigidos &c.

Haec igitur monita, atque observationes, celeberrima Sanctorii statica illustrantur, per quam de iis physicam rationem reddere quisque potest.

Quid enim mali nostro corpori afferre potest temporum, seu potius caloris, & frigoris repentina mutatio, nisi transpirabilem materiam intra secretorios ductus cohibere, si frigus calori superveniat; aut ad ipsos praeternaturali impetu impellere, si frigori calor festinanter succedat; nam caloris effectus est quidem nostra fluida rarefacere, nec non vasa ita dilatare, ut cutis secretoriorum oscula magis expandan-

tur, per quae secreta volatilior pars exhalat; frigoris vero est condensare, ideoque externa oscula ita coarctare, ut transpirabilis materiae ad secretoria vasa propulsae exitum impediat; quare si frigore calori repente succedente cutanei poruli pene occludantur, dum fluida adhuc rarefacta sint, transpirabilis materia retropellitur, non sine notabili corporis plerumque damno; immo ipse aer frigidiusculus, quem aestivo tempore excalefacti pro jucunditate perquirimus, saepius magis officit, quam frigidum, sicuti ab ipso Sanctorio animadvertitur. *Aura jucunda, & frigidiuscula corporibus excalefactis magis nocet, quam aeris, vel aquae frigus in excessu, de quo rationem reddit: illa enim, inquit, non reddit corpus levius, sed obstruit, & laxat: hoc obstruit, & roborat, & inde minus ponderosa corpora fiunt; equidem aer absolute frigidus, si cutaneos porulos occludat, ac perspirationem cohibeat, universa quoque fluida, tum frigore, tum gravitate non nihil condensat, fibrarum tonum augeat, ac solidas partes corroborat, ita ut perspirationis materiam retentam per alias vias repellere, & ad alia secretoria saepe traducere valeat natura, veluti urinae, aut alvi, quemadmodum ex quotidiana docemur observatione, & a celeberrimo illo Hippocratis documento: *Cutis densitas, alvi laxitas*, admoniti sumus.*

E contra aer frigidiusculus, & jucundus excalefactis corporibus cutaneos

(a) Aphor. 4. (b) Aphor. 6. (c) Lib. de aere, locis, & aquis.

neos porulos obstruit, fluidorum vero massam jam rarefcentem minime condensat, immo occlusis perspirationis meatibus eandem fluidorum molem exauget, quae turgidior facta vasa praeter modum distendit, solidis partibus vim facit, eorumque elasticitatem opprimit, proinde corpora laxantur.

Quapropter si perspirabilis materia ob infirmatam contractionis vim ab arteriis aegre repellatur, sanguinis progressus motus intercipitur, aut saltem retardatur, unde illius ad interna regressus, qui si in aliqua parte organica magis haereat, eiusque vasa violenter distendat, peculiaris inflammatio cum acuta febre prodit.

Interim, si eadem transpirabilis materia cutaneis secretoriis aliquandiu stagnet, summe rarefit, atque effervescent, quae, si salino-volatilibus scateat particulis, hae interno corporis calore exaltatae a lymphatico-oleosis extricantur, & coagmentantur, ita ut nervoso, ac membranoso praecipue generi, praedictis rarefactionibus, atque distensionibus infensa sint, deinde & ipsam fluidorum crasim evertant.

Quo diutius perspirationis via occlusa remaneat, eo copiosior evadet huiusmodi materia, quae sanguinem, & universa liquida paulatim obruit, ac inficit, scilicet ad capillaria vascula, & quaque verum ad secretoria, glandulasque tracta, in quibus sanguis tardiori motu progreditur, ipsius particulae

rursus exaltatae volatiliores evadunt, & acrimoniam acquirunt, qua sanguineos globulos subigunt, eorundem componentes moleculas dividunt, molem, ac superficiem augent, consistentiam minuunt, ita ut extremis arteriis, iidem globuli facile haereant, ac pravam lentorem sibi invicem adhaerentes efficiant, modo vero fundantur, & in quoddam liquidum solvuntur, de quo Bellinus (a) sic ait: *erit summa solutio partium in sanguine maxime mobilium, quae nitantur in eundem lentorem ita, ut ipsum possint subigere ac fundere* & per illam solutionem mutari illae non possint in naturalem sanguinem, orietur quoddam liquidum in vasis sanguinis non alendo, non movendo, non sentiendo aptum, hic durius, ibi liquidius &c.

Dixit itaque Bellinus *non alendo aptum*, quia cum sanguinei globuli figuram, & crassitiem mutaverint canaliculis traiciendis minime congruentem, lymphae, & succorum ab ipsa derivantium inopia succedit, qua exinaniantur lymphatica vasa, atque glandulae, praesertim salivales, & oesophagi, unde notabilis linguae, & faucium ariditas, quae corporis extenuationem sequitur.

Non movendo, neque sentiendo, quia, mutata naturali consistentia, elasticitatem quoque amittunt ipsi globuli, sine qua minorem impetum accipiunt, ac minori celeritate procedunt, immo ob scabram eorundem superficiem vasorum parietibus

(a) De Febr. pr. XXVII.

rietibus adhaerent, & in massulas minima vascula obstruentes coeunt. Quare tum ob amissam globulorum sanguineorum elasticitatem, tum ob imminutam animalium spirituum nerveas fibrillas influentium copiam, qui ex huiusmodi sanguine inaequaliter lentefcente aegre fecernuntur, obscurantur sensus, atque hebetantur.

Praeterea ex liquefacta sanguinis portione vult idem Bellinus maculas, & peticulas oriri, cui si addamus vasorum spasmodicam crispaturam (de qua supra) ipsam sanguinis liquidam portionem praeternaturali arteriolarum contractione compressam extillare, ac secretoria cutis, five fudoris, five transpirationis subire facile concipimus, quae inter cutem, & cuticulam, e cuius osculis exire nequit, subsistit, ac maculas efficit.

Ex quibus legitime infertur nonnullas praedictarum febrium acutarum, praecipue ardentium & synocharum putridarum in malignas degenerare posse, quia eadem vasorum tumefcentiis, ac distensionibus comitantur, quae postea phlogoses, lentores, ac stagnationes parere solent, in quibus volatilium partium exaltationes, ac rarefactiones nervosum, ac membranofum genus irritantes, distrahentes, fluida inficientes, eorumque texturam corrumpentes fiunt.

Immo Bellinus (a) vult experientia duce, plerasque febres malignas,

his febribus succedere, praecipue tertianis, & quotidianis; hoc autem lentori illi tribuit, quia earundem febrium proxima causa est; quare communem cum illis malignam quoque febrem originem habere autumat.

Primo autem, inquit, febres malignas, quae communiter invadunt, a lentore superius expositarum febrium originem ducere, ex eo patet, quod pleraeque febres malignae iisdem febribus succedunt, & quotidianis, & tertianis, praecipue in quibus maior vis caloris, & humiditatis ad fermentationem, & solutionem eiusdem lentoris disponentium. Equidem saepe observamus ipso admonente Bellino, quod tertiana febris, si simplex sit, duplex evadit, si duplex, in continuam per subingressum, quae tandem in malignam definit.

Has mutationes ex variis lentoris gradibus, quibus magis, vel minus haereat, oriri putat, & ideo summum lentoris gradum, cuius summa mobilium partium in sanguine solutio coniuncta sit, quae in eundem lentorem nitantur, ut ipsum possint subigere, ac fundere, malignam febrem parere arbitratur.

Inter procatacticas malignarum febrium causas nonnulli vermina enumerant; quidam in eadem verminatione corpus lancinante malignitatem consistere volunt, ut Kircherus (b); Recentior vero auctor ex morbosa, & gravi vermium nostro corpore contentorum affectione

(a) Prop. XXVII. de Febr.

(b) Pestis scrutinio.

ne enasci contendit, qua prava, & maligna evacuant excrementa, chylum inficientia, deinde sanguinem, & universam fluidorum massam obruentia, cuius postea effervescencia, & corruptio malignam efficit febrem, ut in celebri opusculo (a) legitur, & haec theoria plurimis observationibus supra aegrotantes lethalis epidemiae annorum 1734. 35. Regii factis nititur; cuius efficientem causam, tum ex symptomatum febres comitantium natura, tum peculiari medendi methodo felicissimo exitu inito, teretes vermes ventris cavitatibus habitantes gravi morbo correptos fuisse statuit.

Hinc ratiocinans ulterius progreditur, ex simili, ac plerumque uniformi symptomatum syndrome, quae malignas, & pestilenciales febres comitari solet, unam, eandemque causam, eamque verminosam esse concludit; ego vero, licet illud concedere deberem, non istud tamen continuo darem, a vermium nempe morbosa affectione, quascumque febres malignas pendere, quamvis enim eiusdem esse naturae malignarum, & pestilentialium febrium causam credere fas sit, ex demonstratis, hoc quidem de proxima malignam febrem immediate excitante intelligendum est, non autem de dispositiva, & progignente, quae multiplex esse quidem potest, ut modo explicavimus.

Febres epidemicas Regii, de quibus historiam praebuit auctor, ver-

minosas fuisse manifeste apparet, nec ullus praeter illum, cuius animum occupaverit invidia dissentiri, eiusque in meritum in eisdem profligandis latrare poterit; insuper non raro verminosas huiusmodi febres dari, quae malignarum characterem etiam in adultis assequantur, rationi consentaneum videtur; omnes vero, tum malignas, tum pestilenciales a vermibus semper oriri, nequaquam subscribere auderem; nec me movet auctoris inductio (b): causam hanc esse conspicuam sub sensibus cadentem, atque conceptu faciliorem, quam miasmata, aut volatilia, ad quae confugiunt, qui de malignis scripserunt.

Materiae namque malignae conditio, nempe, valde tenuis, volatilis, ac rarescibilis, quam in omnibus istius generis febribus admittendam esse probavimus, ac tantummodo per intensioris gradum differre, etiam si vermium hypothesis concedatur, non sine huiusmodi materiae productione malignae febres excitari possent, alioquin phaenomenorum super expofitorum rationem reddere minime daretur.

Si igitur ex morbosa illorum animalculorum in eorundem corporibus affectione praedictam materiam, humano corpori adeo infensam, elaborari supponatur, quare etiam in ipso humano corpore separatim a vermibus ex morbosa il-

lius affectione non generabitur? eo quidem facilius, quo maior sit humani corporis machina, si cum vermibus comparatur, per magna vaporum congerie plurimis anfractibus, latebris, variisque fluidorum speciebus composita, atque etiam, si placeat, iisdem alimentis, ac succis enutrita.

Quoad prognosin, paucis me expediam, quippe malignam febrem esse summe periculosam neminem latet, maius vero, vel minus periculum a symptomatum qualitate, & saevitia pendet, quamquam animadvertendum eo perniciosiorem esse, ac magis proditoriam, illam febris malignae speciem, quae valde mitis, & benigna apparet, ac nisi ex quibusdam symptomatibus sapiente medico dignoscitur; ceterum, si saeva sint symptomata, & acuta febris, pulsus vero demissi, admodum frequentes, parumque ordinati, periculosior sane est.

Convulsiones, etiam in his febribus semper mali ominis sunt, monente Hippocrate (a). *Convulsio in febre lethalis, minime vero in pueris; peiores vero in deliriis, praecipue vehementibus, sicuti in Prospero Alpino habemus (b): quae in mente capitis fiunt, maxime suspectae erunt, sed omnium perniciosissimae, quae in phreniticis fiunt, proximum enim exitium significant; immo Galenus; (c) nullum unquam ex his convulsis sanatum vidisse asserit; Hippoc.* quoque in epidemica constitutione

(d) de pluribus mentionem facit, qui convulsi cito moriebantur.

Sub his convulsionibus etiam convulsivi motus comprehenduntur, inter quos frequentiores sunt manuum, de quibus ipse Hippocrates (e) scribit: *qui in febre acuta, aut delirio &c. manum subinde ad os fert, aut colligit festucas, aut de veste evellit pilos, aut de pariete stipulas carpit, id omne malum, exitialeque est.*

Magni momenti est respiratio, quae, si valde gravis sit, mortem plerumque portendit, siquidem sanguinem pulmonariis vasis lentescere, vel potius in ipso cerebro, illa praecipue regione, ac medullari parte, qua nervi intercostales originem ducunt, indicium est.

Praeterea maculae cutaneae petiulae dictae, cuiuscumque generis, magnitudinis, & coloris semper mali ominis sunt, peioris vero si livescunt, & nigrae.

Surditas, quae in morbi statu supervenit, saepe bona, saltem si cum aliis concoctionis signis veniat, sicuti praelaudatus Prosp. Alpinus (f) animadvertit, & Hippocrates (g) observatione confirmat. E contra vero in principio morbi, vel non apparentibus concoctionis signis semper mala, ut in eodem lib. (h) ostendit. Si vires langueant exitium portendit, quemadmodum, & visus tenebricosa, de quibus Idem (i): *In febre continua si non videat, vel non audiat, jam debili*

(a) IV. Coac. praesag. tex. 356. (b) Lib. III. Cap. VIII. (c) Lib. XII. meth. med. (d) I. epid. sect. 2. (e) Lib. prognost. p. 38. (f) Lib. II. Cap. IX. (g) Lib. III. Epid. Aegro. 7. (h) Lib. III. Epid. Aegro. 4. (i) Sect. 4. Aphor. 49.

debili existente corpore, mors proxima est, & alibi (a) jam labescentibus viribus, siquidem aeger non videat, vel non audiat, lethalis.

Suspectus quoque habendus est aurium tinnitus, si continuus, praesertim in principio, hic enim delirium denotat (b).

Parotides nunquam periculo carent, pessimae autem, quae acuto dolore prodeunt, ut monet Hippocrates (c), quae vero dolenter ad aures exsurgunt pestiferae, ante alias si augescente morbo, saevientibusque symptomatibus.

Funestae etiam sunt, si in suppurationem non abeant, nisi natura ad alias partes convertatur, ac notabilis humoralis massae portio evacuetur, sive per alvi fluxum, sive per concoctam urinam, aut sudorem, vel etiam largam haemorrhagiam, quibus morbificam materiam eliminari, ac naturam levare posse credendum sit; nec minus funestae, si suppurent pure subtiliori, & inconcocto, aut introrsum tendant.

Parotides vero minoris periculi sunt, quae levi dolore, ac remittente febre, eiusque symptomatibus, apparent.

Ex veritatibus, quos circa malignarum febrium causas modo assequi potuimus, indicationes ad curam texendam desumemus, quarum praecipua, ceterasque complectens erit sanguinis progressivum motum, aliorumque fluidorum separationes

promovere ad stagnationes amovendas, vel solvendas, quae tenuissimarum partium exaltationem, coagmentationem, & rarefactionem pariunt; unde perniciose illa symptomata, quae malignae febris characterem efficiunt.

Item harum particularum volatiliū effervescentiam compescere, rarefactionem, & acrimoniam sedare, ac temperare, nervi, ac membranosi systematis irritamenta, & crispationes lenire, & laxare.

A capite, quo fluida, & praecipue sanguis, plerumque tendunt, ac stagnationem minantur, omni studio revellere, ut a supra laudato Sylva tot argumentis (d) solidiori mechanica nitentibus commendatur.

Postremo naturae languoribus succurrere, quod cardiacis ita dictis remediis, atque volatilibus perficitur. Hi tamen languores sedulo expendendi sunt, si vere adsint, ac si adsint, an sint legitimi, ex solidorum nempe imminuta elasticitate, partiumque spiritalium inopia, aut dissipatione.

An vero spurii, & supposititii, qui spiritalium organorum oppressione, praecipue cerebri, exoriuntur; hoc enim cum in praedictis morbis peculiariter obsideatur, arteriolarum distensiones, tum ob sanguinem lentescens, tum ob materiae malignae expansionem patitur, quae medullares tubulos comprimendo, animalium spirituum separationem impediunt, ideoque animalis

Y 3

(a) Lib. V. Coac. praesag. Tex. 72. (b) Prosp. Alpin. lib. II. Cap. X. (c) 2. Coac. cum. Cap. 4. (d) Ibidem.

malis non solum, verum etiam vitalis potentia imbecillis videtur.

Ut autem positivus, & essentialis languor a spurio, & suppositio, dignoscatur, sequentia signa examinanda sunt.

An vires morbi initio deficient.

Si absque causa manifesta, vel laboris ante morbum initi, vel victus inopiae, animique moeroris; aut e contra, si cibo & potu se ingurgitaverit aeger, otioque deditus fuerit.

Si sanguinis plethora turgeat, aut potius lymphae, albique humores praedominium habeant.

Si pulsus exiles, molles, & languidi, aut magni sint diametri vibrantesque, vel si parum oscillent, ac sepulti, duri, & rigidi percipiantur.

Si caput immune sit, aut gravativo praesertim dolore, vel mentis stupore afficiatur.

His, & aliis similibus circumstantiis in febre rite perpensis, quale naturae robur solidiori fundamento explorabimus, & cuinam causae virium prostratio tribuenda sit: an fluidorum praecipue spirituosorum inopiae, & defectui, ex quo vasa haud satis impleantur, & languescant, vel potius nimiae plenitudini, crassitiei, aut rarefactioni, quae vim patiantur, & per quam solidorum momentum a fluidorum massa obruatur, ut saepe evenit.

Quare liquet, quam detestabilis sit etiam in his febribus remediorum car-

diacorum, ac spirituosorum abusus, quo nonnulli medici indiscriminatum aegrotantium vires reparare cito curant, non sine gravi patientis nocumento.

Haec enim remedia laxatum quidem fibrarum tonum solidis restitunt, ac deficientem elasticitatem redimunt; verumtamen solidarum partium nimis tensarum, aut vehementer oscillantium impetum adaugent, fluidorum rarefactionem inducunt, & sanguinem ad inflammationem disponunt.

In his itaque cardiacis, & alexipharmacis calidioribus caute se gerere medicos monent graves, & celeberrimi, tum praxi, tum doctrina auctores: Thomas Sydenham, qui loco supracitato (a), & alibi (b) periculosos, & pravos cardiacorum effectus narrat. Fridericus Hoffmannus (c): *Ex medicamentis, ait, alexipharmaca, & spirituosas, licet ceu efficacissima vulgo commendentur, plus damni, quam emolumenti attulerunt. Dissolutionem enim sanguinis elementorum promoverunt, & ob id maiorem petechiarum fecerunt copiam, vel cephalalgias, anxietates, inflammationes &c.* Hecquet (d) loco supra citato, Hugo Gouraigne universit. Monspeliensis, qui pluribus (e) in locis cardiacorum abusum damnat; nam (f) languescentem sanguinis motum cardiacis, & volatilibus remediis refocillare proponit, caute tamen eadem adhibere nos hortatur, eosque huiusmodi remediis

(a) Pag. 62. Feb. cont. an. 1661. 62. 63. 64. (b) p. 188. Feb. cont. an. 1667. 68. (c) *Medic. system. T. 4. Sect. 1. cap. X.* (d) *De la digest. T. 1.* (e) *Traët. de Febr. juxta circulationis leges, & de maligna cap. 1.* (f) p. 345.

diis abutentes quasi exprobrat his verbis : *ne credideris ea esse indiscriminatim usurpanda, laxatas quidem partes tendunt, sed humorum rareficientiam inducunt, & intendunt; unde inflammationes, vel adaugent, vel accersunt &c.* deinde (a) eosdem deridet, qui ad macularum, & exanthematum apparitionem ad cardiaca validiora cito confugiunt, ad venenum juxta ipsos per cutis poros eliminandum.

Quod de cardiacis, & alexipharmacis remediis, etiam de validioribus sudoriferis, & expansivis intelligimus, quae in eundem scopum collinant, & in quibus administrandis, ut ipsis auctoris verbis utar, non minores committuntur errores; Quales enim sunt horum remediorum actiones, ac proprietates, nisi animadvertente eodem Gouraigne (b) membranofum systema irritare, cordis, & vasorum oscillationes intendere, & frequentes reddere, proinde sanguinis circulatorium motum accelerare, rareficientiam augere? Quapropter, si sanguinis plethora adsit, aut magna eiusdem rareficientia notetur, ut primis morbi diebus, immo donec natura maturam aliquam secretionem inierit, plerumque contingit; Si solidorum vehementior oscillatio, nervosi systematis ataxia, seu effrenis, ac inordinatus motus percipiatur, inflammationis periculum certe occurret.

Hoc animadvertisse etiam Riverrum in sua celeberrima praxi vi-

detur, qui (c) in quatuor classes pro diverso malignae febris statu, & gradu remedia dividit; de tertia vero classe haec habet: *Tertiae classis alexipharmaca, quae nimirum diaphoretica sunt, & sudorifera non nisi in statu morbi, aut declinatione, ut ante actum est exhiberi debent.*

Quoad malignae vero materiae eliminationem, quam praefatis remediis etiam in principio praestare contendunt; quibus mechanicae legibus, ab ipsis peto, hoc opus naturam moliri autumant?

Non in summe accelerato fluidorum motu, nam tunc parciores fiunt secretiones, quia sanguis magis directo, quam laterali gaudet motu, magis per axem, quam prope circumferentiam excurrit, ac uno verbo ex arteriis in venas festinanter progreditur, ita ut lateralia vasculorum, ac tubulorum oscula ad secretiones destinata praetereat. Praeter quam quod tenuior sanguinis pars vehementioribus arteriarum ictibus cum crassiori se intime commiscetur, nec ad ipsa oscula secretoria subeunda se expedire valet, idcirco quosdam gradus motus in fluidis circulantibus aequae, ac in solidis impellentibus ad separationes celebrandas necessarios esse evincitur, ipsaque testatur experientia, qua in acutis febribus, donec solidorum, & fluidorum impetus non remittatur completa, & matura separatio, in qua crisis consistit, non absolvitur, & ipsae tertianae febres

in

(a) P. 354. (b) P. 353. (c) Lib. XVII. p. 32.

in sola declinatione sudores eunt, earumque paroxysmi sudore plerumque extinguuntur.

Non in solidorum vehementioribus ictibus, a quibus summa ipsorum fluidorum velocitas pendet; nam haec membranarum, totiusque nervosi generis tensiones, aut crispationes consequuntur, quibus secretorii meatus ita angustantur, ut parum fluidi secernendi traiciant.

Nec tandem in summa eorundem fluidorum rarefactione, qua vasa turgent, atque distenduntur, vel enim praepeditur eorundem contractio, sanguinisque per vasa minima progrediendi impulsus deficit; vel, si summe elasticae sint solidae partes, eorundem contractilis vis ita provocatur, ut in extranea vasa, veluti serosa, & lymphatica ipsum sanguinem impellat, ubi phlogoses, & utroque in casu stagnationes fiunt, quibus glandulae, & secretoria vascula obstruuntur.

Maligna quoque materia, quo magis rarefit eo maius in praedictis arteriis, ductibus, & glandulis spatium occupat, proinde dato tempore minor eiusdem massae quantitas per ipsos tubulos ratione molis auctae traicietur; praeterea maiorem elasticitatem, ac momentum supra secretoria organa acquirit, quae propria vi contractili illam expellere non valent, immo tunc distenduntur, ac distrahuntur membranosae partes, ipsumque cerebrum invaditur, non sine gravi aegrotantis damno, ac febris pernicio, quae maior est, prout maior malignae mate-

riae rarefcentia, & expansio, ut supra demonstravimus.

Verumtamen supponatur aliquando volatilia, & sudorifera secretiones, ac sudores excitare, quis asseret has maturas esse, atque salutes, & diaphoram esse veram ad morbum profligandum, aut faciliorem viam? de qua Hippocrates nos sollicitos, & circumspectos esse commendat.

Frustra vero instabunt huiusce methodi fautores praedicta remedia magno cum fructu adhiberi; nam Thom. Sydenham iis pro me respondebit: *Illa dumtaxat per accidens auxilium praestare, nempe diaphoreseos, quam suscitant beneficio, quo sanguinis particulae inflammatae diffantur, atque exterminantur, quod si forte exhibita sudores commovere non valeant, ut persaepe accidit, mox sanguinis incendium ab additio calore magis efferatum eorum noxam palam proclamat.*

Perpendant itaque isti, utrum huiusmodi remedia morbi initio, & indiscriminatim adhibere expediat, quoniam, primo, secretionis, & expulsionis actio, quam illi tribuunt raro suum pertingit effectum, nisi ad has disposita comperiatur natura, quod primis morbi diebus expectare non licet, si Hippocrati credamus; secundo vero, adeo infensa, & perniciofa esse in praedictis eiusdem morbi circumstantiis, praecipue si secretionum viae non aperiuntur.

Hunc tandem in morem declamat supra citatus Hoffmannus his verbis:

bis (a): *Pessimus omnino practico-
rum mos est, in principio statim vola-
tilia, bezoardica, sudorifera cum re-
gimine calido, & infuso theiformi
exhibere. Sic enim intestinus ille pu-
tredinosus motus invalescit cum or-
gasmis, maiorque virium subsequitur
prostratio.*

Aliud profecto praeiudicium in fe-
bris malignae curandae methodo de-
tegere oportet; hoc est, lex, quam
sibi effingunt nonnulli medentes: a
venae sectione tamquam pernicioso,
& exitiali remedio, nullis exceptis
morbi circumstantiis, nulloque ser-
vato tempore, cavendum esse, eam-
que adhibere, pro gravi piaculo ha-
betur; quibus vero ratiocinandi prin-
cipiis, quibusque observationibus, vel
quibus auctoritatibus eorum saltem,
qui medicinam sive theoreticam,
sive practicam optime professi fue-
runt, scriptamque posteritati tradide-
runt, me adhuc quidem latet.

Si sanguinis plethora se manife-
stet, aut insignis rarefactio, aut de-
nique crassities, cur primis saltem
morbi diebus venae sectio prohiben-
da erit?

Dices ne vires labefactentur; si-
quidem unicum obiectum est, quod
ab his adduci possit. Respondeo, ae-
ger aut viribus consistit, quemadmo-
dum febris initio saepe evenit, prae-
cipue si malignitas ex succorum de-
pravatione alias febres consequatur,
aut viribus destituitur.

Si primum cur times virium im-
becillitatem, quae nondum adest?

Sanguinis detractio in plethora vi-
res minuere non debet, ita nec in
notabili rarefcentia, quae illius mo-
lem, & elasticitatem auget, vasa
praeter naturam tumefacit, atque di-
stendit, nec prostremit in crassitie,
in qua, licet sanguis ratione volumi-
nis non excrescat, augetur tamen
ratione ponderis, ac massae. Quo-
niam in hisce tribus circumstantiis
ipsa sanguinis detractio vitium in
eius quantitate aufert, vasa fluidi
pondere gravata sublevat, & aequi-
librium inter solida, & fluida re-
stituit, naturae robur, qui in ea-
rundem partium continentium, &
motricium elasticitatem, & contractio-
nis vi consistit, magis firmatur; er-
go sanguinis detractio vires nequa-
quam minuentur.

Vel secundum, nempe: si viri-
bus destituatur aeger.

His positis circumstantiis sive ple-
thorae, sive rarefactionis, sive cras-
sitiei, virium prostratio non ex mo-
triciis partium languore, sed prae-
pollentis fluidi momento, ut supra
explicavimus, pendet; ergo nec in
secundo casu virium languorem per-
timescere debemus, quin immo tam-
quam necessarium remedium, ad
venae sectionem confugiendum est,
quae vires non imminuet, sed flui-
dorum massae subtrahendo naturam
ab oppressione redimet.

Et sane, si ad praecipuam in fe-
bris malignae curatione indicatio-
nem oculos convertamus, nempe
sanguinis

sanguinis progressivum motum adjuvare, atque stagnationes amovere; phlebotomiae praestantia, & necessitas in praedictis casibus manifeste apparebit; siquidem in his morbis maius stagnationis periculum imminet, tum ex sanguine lentescente, ut superius exaravimus, tum ex diris nervei systematis crispationibus vasculorum diametros angustantibus, quibus progredienti sanguini resistencia praeter modum augetur.

Et si tamen nonnulla virium effusio, his positis morbi circumstantiis, aut plethorae aut rarefcentiae, aut crassitie, in venae sectione concederetur; quo pacto quaeso tantum huiusce remedii beneficium, cum levi virium detrimento comparaveris, eoque minus illud huic postpones? Nonne ut fluidorum, & praesertim sanguinis stagnationes amoveantur, ad quas tendit, & in quibus terminatur maligna febris aliquid virium impendere expedit?

Instant nonnulli vulgi praeiudicio obducti: venae sectionem perniciosam esse, quia venenosam malignae febris materiam a circumferentia ad centrum revocat. Venenosam vero materiam a centro ad circumferentiam per maculas traduci, & erumpere existimant, quod, quam inverisimile sit, ex his, quae modo diximus, praecipue de peticularum phaenomeno, quisque dignoscere potest; Apparentibus ideo maculis a venae sectione tamquam rabido cane, & angue fugiendum esse denun-

tiant; immo ab ipsis cucurbitulis scarificatis prorsus se abstinere.

Audiamus interim, quod praeaudatus Gouraigne (a) de hoc mendi regimine pronunciet. *Cum maculae, & exanthemata apparent ad cardiaca validiora cito recurrunt nonnulli ad venenum, a quo juxta illos omnis febris malignae species immediate dependet per cutem foras eliminandum; nam venenum esse ex vulgi erroribus existimant, quod tunc per cutem erumpit. At maculae, & exanthemata illa non venenata materies sunt, sed sanguinis a suo cursu deviantis congeries, quare si illis erumpentibus corpus magis, atque magis aestuet, febris intendatur, atque ingravescant alia symptomata, sanguis mittendus est, & eadem quantitate, & acque frequenter, ac si nullae essent maculae, nec exanthemata. Remedia etiam refrigerantia, & humectantia praescribenda sunt. Non me latet a venae sectione maxime abhorere in tali casu ignarum vulgus, sed haec a proposito non avertent medicum; quem non latet illas nihil aliud esse, quam congeriem variam sanguinis, qui propter praepeditum ipsius circuitum in propriis vasis aliena subit, & eo magis, & citius, quo sanguis magis rarescit... possem plures observationes afferre, quibus &c.*

Diversimode tamen se gerit, si efflorescentibus maculis vires quoque languescant; si solidorum ictus vere imbecilles percipiantur, nec vaporum adsit plenitudo, sive inflammatoria

(a) *Ibidem* p. 315.

matoria dispositio; nam tunc a venae sectione tamquam noxia se abstinet, & cardiaca adhibet remedia (a).

Præcepta autem, quae tradit auctor circa methodum, & præcipue circa venae sectionem, quam ipso febris initio proponit, & iisdem positis circumstantiis summe necessariam esse contendit, hæc sunt: *Altera febris malignae species, hanc enim ab illa maligna, quae positivo languore comitatur, distinguit, diversa planè methodo tractanda est; ibi non lentescit sanguis propter debilitatum vasorum tonum; sed quia vasa nimis tensa, & rigida sese contrahere non possunt, quare cardiaca hic sunt maxime noxia, sicuti ea omnia, quae irritare possunt: & quidem ut febris ardens hæc malignae febris species tractanda est, ita docet experientia. Ad aegrum ergo tali febre laborantem accersito medico, ea sit sollicitudo, ut inflammationes præcaveat, aut illis cito medeatur, vasisque laxitatem conciliet, ut exinde restituantur sanguinis circuitus, & ordo, quare mitigatur sanguis, & pluries reiteretur, venae sectio sanguinis quantitatem imminuens illius rarefactionem compescit, vasa minus distenta validius, & liberior oscillant &c.*

Quaestionem, an erumpentibus peticulis conveniat sanguinis missio, agit Riverius (b), eamque serio definit his verbis: *Sanioribus Doctorem sententiis sancitum est, maculis purpureis apparentibus in morbi*

principio, & iis diebus, quibus venae sectio celebrari consuevit, si antea sanguis sufficienter detractus non fuerit (quippe nullam de venae sectione in maligna febre ipso morbi initio passim celebranda dubitationem proponit, sed tali remedio curam inchoandam esse absolute pronunciat,) etiam quantitate moderata esse detrahendum, neque ullum inde imminere periculum, cum illa exanthematum eruptio, quae fit in principio morbi, critica non sit, sed tantum symptomatica ex insigni sanguinis ebullitione &c.... atque adeo non possit impediri naturae motus, qui nullus est tunc temporis. Si enim corpore existente plethorico cum lotio crasso, ac rubro exanthematum apparentium ratione habita sanguinem non detraxeris, vix natura tantam humorum copiam superare poterit, & periculum erit, ne illi in partem aliquam internam irruant, in eaque perniciosam inflammationem generent.

Thomas Sydenham non solum in maligna simpliciter febre phlebotomiam proponit, & adhibuit, erumpentibus etiam peticulis, ut in febre epidemica anno 1667. 68., apparet, & notabili cum levamine, quod colligitur praesertim in doctissimo Dom. Morrice (c), qui effusis sudoribus, & petechiis laborans paucis post venae sectionem diebus sanitati restitutus fuit; verum etiam in febribus pestilentialibus, ipsaque peste saepe convenire, immo necessariam fuisse, expertus est

est plurimis in casibus, ac praecipue in febre pestilentiali, & peste annorum 1665., 66. (a).

Vulgi praeiudicia sacra in hoc morbo venae sectionem reputantis negligit, medicorum fidem provocat, si in illa Londinensi peste phlebotomiam larga manu, ac repetitis vicibus prima morbi invasione inchoatam unquam funestam fuisse observaverint; utique, si parca fuisset, atque prodeunte tumore; *Tunc enim rei inquit administratio e naturae manibus eripitur, nec interea alia satis efficax morbificam materiam evacuandi operatio substituitur.* Ex quo sequitur, huius regiminis nocumta a contrariae sententiae fautoribus ad phlebotomiam impugnandam argumenti loco torqueri, ut in Diemerbroeckio legitur.

Complurium scriptorum gravissimorum, qui in peste venae sectionem convenire censuerunt auctoritatem adducit: Ludovici Mercati, Joannis Costei, Nicolai Massae, Ludovici Septalii, Trincavelii, Foresti, Mercurialis, Altomari Paschallii, Andernachi, Peredae, Zacuti Lusitani, Fonsecae, aliorumque; Prae illis vero Leonardi Botalli decimoquinto seculo medici propriae methodo prorsus faventis verba ab eodem referuntur; *Ego, ut uno verbo dicam, nullam pestem esse puto, cui haec non possit esse salutaris supra omnia remedia, modo opportune, & quantitate convenienti, ratus eam aliquando inutilem inventam fuisse;*

propterea quod, aut tardius, aut parcius quam opus esset, aut quod utroque modo circa eam usurpandam peccatum sit. At in tanta timiditate, & parca detractione, qui fieri potest, ut quis recte possit judicare &c.

Si morbus hominem interficiat, ideo non interficit, quia sanguis est missus, sed quia non justo modo missus est, nec forte etiam opportune. Verum nebulones nequissimi, & ignavissimi in id semper culpam convertere satagunt, non quod novit, sed quod per fas & nefas a cunctis vituperari exoptant. Deinde quae plurium annorum experientia confirmat idem auctor: His observatis nemo rationis capax jure in his morbis vituperare missionem sanguinis potest, sed mirifice, & tamquam divinum auxilium commendare, extollere, & confidenter usurpare: quod ipse profecto ab annis quindecim facio. Ideo in morbis pestilentialibus in obsidione Rupellarum, & Montibus Annoniae abhinc quadriennium, & Parisiis toto hoc biennio, & Cameraci anno proxime actio in omnibus aegrotis, qui innumeri fuerunt, nullum praesentius, ac salutarius reperi ipsa larga, & tempestiva sanguinis missione.

Nonnullas apponit morborum historias ipse Sydenhamius, quarum prima est cuiusdam pestis castrensis in provincia Sommertonensi, in qua quidam chirurgus militibus crudeli morbo correptis facultate a praefecto petita ingenti sanguinis detractione medebatur, ceu primo morbi

(a) Sect. 2. constitutione epidemica.

bi insultu, atque nullo adhuc erumpente tumore pertusa vena sanguinem exilire sinebat, usquequo aegrotantes in lipothymias inciderent, & quamquam nullo alio praeter phlebotomiam remedio uteretur, ex plurimis, quos hac methodo tractavit aegrotantibus nemo prorsus periit.

Deinde in febre pestilentiali, & peste annorum 1665. 66. duos affert tantum casus, in quibus phlebotomia a morte aegros eripere non valuit; primum cuiusdam nobiliss. foeminae annorum 21. sanguineo temperamento praeditae, alterum juvenis temperamenti, & atletici habitus, quorum in utrisque sanguis quidem detractus fuit, sed non illa frequentia reiterata eiusdem detractio, qua ceteris omnibus, qui salutem assecuti fuerunt succurrere curavit; quoniam in praedictis duobus casibus adversus ulteriorem venae sectionem adstantium pervicacem repugnantiam inivit.

Celsus quoque (a) in febribus pestilentialibus sanguinis missionem, permittentibus viribus, suadet, cetera vero medicamenta pro inutilibus, aut perniciosius damnat, his verbis: *In febribus pestilentialibus minime utile est fame, aut medicamentis uti, aut alvum ducere, si vero vires sinunt, sanguinem mittere optimum.*

Nec non Fridericus Hoffmannus phlebotomiam convenire censet in febribus non solum exanthematicis,

& petechizantibus, verum etiam pestilentialibus, & omnino contagiosis, quotiescumque sanguinis plethora adsit, aut crassities, vel consuetarum sanguinis evacuationum, sive naturalium, sive artificialium defectio: quemadmodum (b) se observasse dicit: *Sanguinis missio ad arcendum morbi incursum proficua observata in corporibus plethoricis, & quibus sanguinis evacuationes tam spontaneae, quam artificiales consuetae.* Deinde Cap. sequenti (c): *qui sanguine crasso, & gravi abundarunt, uti Vuesphali ob victum durum, & crassum fere omnes, his sanguinem subtrahere jussi, quod regimen tam in locis infectis, quam alibi versantibus mirifice profuisse asserit.* Cuiusdam juvenis robusti, & plethorici (d) petechiali febre prehensi lethalem exitum notat, cui sanguis ab imperitis medicis minime fuit detractus, & inferius (e), trium aegrorum eiusdem familiae historiam refert, qui maligna contagiosa febre decumbentes intra quadriduum mortem obierunt. Auctoris verba hic quoque transcribere juvat: *Medici, qui curationi praeerant catharralem morbum esse censuerant, & ob id venae sectionem omiserant; sed cum morbus ad reliquos etiam domesticos procederet, & rumor passim increbresceret, eundem esse pestilentem alius medicus in consilium vocatus, qui ob capitis dolores venae sectionem instituendam esse in principio suavit. Hinc omnes quotquot*

L 3

postea

(a) Lib. 3. cap. 4. (b) Sect. 1. cap. X. de feb. epid. exant., & petech. pag. 131.
(c) XI. de febr. petech. veris. (d) Obs. 2. ibid. pag. 145. (e) Obs. 6.

postea corripuit simul ac conqueri coeperunt vena in pede pertusa, & conveniens sanguinis quantitas educta tam felici effectu, ut non tantum morbus mitior incederet, maculae petechiales cum purpura, secus quam in primis comparerent; verum etiam ex septem, nec unus occumberet, ac ipse contagiosus morbus sic desineret.

Guglielmus Ballonius (a) in hoc cum citatis auctoribus convenire satisprehenditur. Nam in Consilio XIX. de febre pestilentiali nobilissimae mulieri venam secavisse die quinto narrat, ita Consil. LXXXV. Joanni Longueville a castris Rupellae redeunti, ac febre maligna laboranti die septimo, & Consilio LXXXVII. Joanni du Teil. robusto juveni sanguinem detraxisse; ita & nobis viro D. de Cervenaii eiusdem generis febre ab uxore prius laborante contracta; in Joanne Chevarrii vero Consil. LXXI. sanguinis missioni pepercit, ex positivo languore, & facultatum impotentia; idcirco concludit, in quibus cacoehymii sanguinis copia, eiusque intensus calor, a quo rarefcentia: *Audacius*, inquit, *sectio venae tentari debet, non ut quid semel fiat, quia humorum pravorum proventu raro vires sufficiunt, sed iterato*; ut in quodam Tonfore usus est, de quo: *atque huic tonsori multa sectio venae occurrimus, ut insigniter saevientem febrem confoderemus, ac jugularem.*

Verumtamen, ne nimis prolixus sim medicorum auctoritates adducens, qui in malignae febris curatione phlebotomia utuntur, Sennerii monitu concludam, qui (b) phlebotomiam in febre maligna saepius necessariam esse absque dubitatione asserit, & solam quaestionem agitat, an apparentibus peticulis conveniat, supra quam affirmative pronunciat: *In febris malignis utiliter saepius vena aperta sanguinem mitti posse, hic extra controversiam ponimus: sed de eo saltem querimus; an apparentibus illis maculis, quas vulgo petechias nominant, sanguinem mittere liceat.* Eorum, qui negant, rationes exponit, quae ad hanc reducuntur; ne scilicet venae sectio malignos humores ad corporis ambitum eiectiones ad centrum revocet, ac salutarem naturae actionem perturbet. Cuius rationis fundamento discussio ita concludit.

Cum plerumque maculae illae ab insigni solum sanguinis ebullitione, & humorum malignorum fervore fiant, nihilque aegrum juvent: ipsarum gratia necessaria praesidia omittenda non sunt, & proinde venae sectio, si indicetur, & vires ferant, non praetereunda.

Metuentes postremo arguit, malignam scilicet materiam minime revocari posse, nec salutare naturae molimen impediri, quotiescunque superabundantem sanguinem evacuent; hoc enim imminuto ipsa

natura

(a) T. 2, lib. 1. Consil. Medic. (b) Lib. V. Inst. p. 2. sect. II. Cap. XVII. de venae sectione.

natura ex onere, quo opprimebatur, refurgit, ac quod perniciosum est, facilius expellit.

Ex quibus perspicue colligitur, primo, sanguinis missionem saepe necessariam esse in malignis febribus, quotiescumque scilicet sanguinis plethora, vel notabilis rarefientia, aut crassities exploretur.

Secundo, in venae sectionis celebratione triplex habenda est ratio, nempe temporis, quantitatis, & loci missionis: Temporis; Tutius enim est venam secare primis morbi diebus, hoc est ante quartum, quoniam vires adhuc consistunt, vel saltem natura spiritibus nondum exhausta esse solet; praeterea cum primis morbi diebus sanguis praepedito eiusdem cursu lentescat quidem, sed nondum stagnet, ut in morbi progressu, praecipue si ad perniciem, & mortem ipse ducat, contingit; idcirco venae sectione tunc celebrata facilius sanguinis lentescantis motum accelerare, quam stagnantis cursum pene extinctum restituere praestabimus; quippe vasorum tonus morbi initio adhuc subsistit, qui postea ex assiduus, ac praeternaturalibus distensionibus adeo imbecillis redditur, ut etiam detracto sanguine, ac immutato eiusdem pondere, quo gravabatur, aegre tamen resilire, ac stagnantia fluida propellere valeat.

Deinde ad quantitatem respicere debemus, quae nec modum excedat, nec deficiat.

Damna, quae in nimia sanguinis detractioe occurrunt, cuique nota sunt; illa vero, quae a nimis parca

oriri possunt a plurimis practicis habenda essent. Tantum igitur sanguinis detrahendum, quantum eiusdem copia, & rarefientia, prout a statu naturali distet, atque vasa praeter modum distendat, requirit; sanguinis enim evacuatio tantum ipsius massae detrahere debet, quod vasorum proportionatam vim exsuperet, proinde aequilibrium inter utraque, solida nempe, & fluida, restituat. Hoc posito, nisi sanguinis copia extracta, praeternaturalem vasorum diametrum, quae in arteriarum dilatatione percipitur, imminuat; ipsae arteriae, pene eandem, ac prius distensionem patientes, supra fluida systalticam vim exercere nequeunt, nec sanguis lentescens, aut stagnans maiori impetu propelletur; ideoque tunc pene nullum levamen afferet venae sectio.

Insuper animadvertendum, etiam si post sufficientem sanguinis detractio- nem una, vel pluribus vicibus celebratam ipse sanguis febrili calore adhuc rarefientia vasa distendat, quod & in ceteris acutis febribus, synochis, & ardentibus saepe evenit; tunc vena rursus secanda, nisi aliquid obstet; E. G. incipiens naturae secretio, quae manifeste critica sit, vel futuram promittat crisin.

Denique locus venae sectionis contemplandus, de quo aureus ille Dom. Silvae tractatus legi meretur. Proponit auctor, solidisque mechanicae legibus contendit efficacem, & tutam in phlebotomia revulsionem, & e contra periculosam derivationem, praecipue, nisi huic

huic praecedat revulsio, & copiosa vasorum depletio.

Et sane, si concedatur, quod quidem negari nequit, sanguinem eo tendere maiori celeritate, quo minorem invenit resistantiam, maior sanguinis quantitas dato tempore ad venae sectionis locum excurreret, ex qua vasa lentescente sanguine turgida magis infarciuntur, proinde gravius inflammationis periculum imminebit.

Revulsio vero ad remotas partes sanguinem accersit, ideoque minor sanguinis portio in ipsa revulsione, & post revulsionem ad affecta vasa defertur, quae cum ab appellente fluido minus distendantur vim contractilem recuperant, qua in stagnantem sanguinem nituntur, eiusque progressivum motum cient.

Sicuti vero in malignis febribus cerebrum praecipue invaditur, ut superius demonstravimus, ita vena pedis secanda erit, ut sanguinis inclinatio ab ipso cerebro, quam fieri potest amoveatur; nam venam brachii sectam a capite non revellere acriter contendit idem Silva, sed ad ipsum derivare, siquidem ad superiores arteriae aortae ramos sanguinem promovet.

Ego autem sanguinis missionem e brachio etiam in his febribus excludere non auderem, eaque aliquando utor, si crassior sanguinis textura se manifestet, praesertim vero, si praecordia graventur, quod difficili respiratione, suspiriis, cordis palpitationibus, & angustiis deprehenditur, propterea quia sanguis ex ampliori vase extractus maiori

celeritate ad venam sectam determinatur, ex qua cor, eiusque, & pulmonis vasa nimio pondere, & distensione citius exonerantur, proinde vim contractilem recuperant, qua sanguis maiori impetu propellitur, atque attenuatur; statim vero ac sanguis e brachio extractus sit, vena pedis secanda erit, ne sanguis ad caput irruat, ac cerebri vasa turgefaiat, quod in malignis febribus magis timendum, quae cerebri inflammatoriam stagnationem plerumque minantur.

His igitur circumstantiis rite celebratur phlebotomia in malignis, ceterisque acutis febribus, quae si passim observarentur a medicis magis salutare phlebotomiae effectus experirentur aegri, insanusque vulgus venae sectionis timorem fortasse deponeret, qui non solum in malignis, sed in quacumque acuta febre morientium, quibus vena secta fuerit, phlebotomiae procul dubio causam imputat.

Praeter venae sectionem, etiam cucurbitulae scarificatae in maligna febre saepe conveniunt, praesertim iis, qui dorsi, & lumborum dolore vexantur, quemadmodum, & hirudines haemorrhoidalibus vasis applicatae, si capitis affectus, dolor, stupor, aut delirium, etiam post vasorum depletionem perseveret.

Sed haec satis sint de sanguinis missione; modo reliquum curationis regimen velociter percurramus.

Considerandae quoque sunt in hoc chirurgico fonte fricationes, atque cucurbitulae siccae, quae a plurimis

mis pro explorandis peticulis adhibentur; animadvertant tamen ex violenta carnis, & vasorum intra easdem coarctatione non raro sanguinem e propriis vasis in aliena erumpere, atque in secretoria cutis intrudi; unde maculae rubrae, quae pro peticulis imponunt; an vero cucurbitularum usus, seu repetita eorundem applicatio omnibus maligna febre laborantibus adiuumento sit, valde dubito. Iis quidem prodesse arbitror, quorum sanguis ex propria crassitie, & lentore capillaribus vasis haereat, vasorumque tonus aliquantulum torpeat, & languescat, quod virium prostratione, mentis stupore, nimio sopore, supino & pene immobili corporis decubitu, aliisque similibus symptomatibus deprehenditur; nam cucurbitulae sanguinis lentescantis, aut stagnantis cursum promovent, quia tum vasorum perfricatione, tum carnis intra easdem elevatione, denique externi aeris aequilibrium tentantis compressione talis impulsus sanguini donatur, ut illud de loco in locum migrare cogatur.

Contra vero omnibus illis nocere debent cucurbitulae, vel saltem frequens cucurbitularum, & frictionum usus, qui diversa a descriptis symptomata experiuntur, E. G. spasmodicum, & ulcerosum dorsi, & lumborum dolorem, incessantes vigilias, furiosa deliria, corporis inquietudinem, respirandi difficulta-

tem, muscutorum rigidam tensionem, atque convulsivos motus; haec enim effrenem solidorum impetum, perniciosas nervorum crispationes, quibus vasa coarctantur, & sanguinis progressivus motus intercipitur, indicant; quare si cucurbitulis perfricentur, ac distrahantur musculares partes, nervorum propagines, ac membranae eosdem musculos involventes divelluntur, ex quo spasmodica contractio augebitur.

Cucurbitularum siccarum applicationem sequuntur vesicantia, de quibus magis circumspectos esse medicos oportet, quia irritamento, & corrosione operantur. Haec igitur illis cavenda erunt, qui fluidorum, ac praecipue lymphae inopiam, sicumque corporis habitum nacti sunt, quorum fibrae exquisito sensu donatae, & adeo elasticae, ut praeternaturales, & convulsivos edant motus, vel ita rigidae, ut graves ineant crispationes; illis quoque, quorum morbi symptomata temperamento, corporisque affectionibus respondent, veluti deliria, vigiliae, jactationes, & convulsivi motus (a).

Perniciosa itaque pro iis omnibus considerari debent vesicantia; sicuti e contrario notabile juvamen praestare possunt, si pro aliis diverso temperamento, oppositisque corporis affectionibus, nec non morbi symptomatibus prehensis adhibeantur. Quibus nempe fluidorum

massa

(a) Vid. Joannis Bianchi Arimin. dissertat. de vesicant. Acta erud. Lipsiae 1747.

massa vasa turgent, praesertim lymphatica; & obesa sunt corpora, quibus fibrarum atonia, & languida vis elastica, fluidorum lentor, & crassities deprehenditur; quibus denique mentis stupor, comatosi affectus, aut melancholica deliria, de quo satis apte Baglivius.

Quod de vesicantibus diximus, etiam de sinapismis intelligendum erit.

De clysteribus, & unctionibus, five particularibus, five universalibus idem, quod in ceteris acutis febribus repetendum esset. Caveant tamen medici, ne forte clysterum abusu criticam sudoris separationem perturbent; ita quoque intempestivis unctionibus cutaneos porulos obstruant; tunc scilicet cum sudor emanare jam inceperit.

Inter pharmaciae remedia, primo sese offerunt purgantia, quae ad morbi saevitiam leniendam quandoque inserviunt, si juxta Hippocratis ritum conferantur, hoc est, si stomachi infarctus se manifestet, purgans medicamentum in principio exhibitum admodum juvare, five maiorem morbi exasperationem tollere poterit; nam materia intra cavitatum glandulas detenta diuturna stas, ac febrili calore exaltatur, ac pervertitur; haec in sanguinem reversa, & huc illuc delata febrem auget, & acerbiora parit symptomata.

Pro purgante deiectorio saepe emeticum indicatur, illo nempe casu, quo natura ad vomitum inclinet, notabilem cibi fastidium, palati amaritiem, aut visciditatem ac-

cuset aeger. Emeticum tamen ex blandis, & simplicibus, ut plurimum eligendum, reiectis antimonialibus, quae si aliquando adhibeantur medici, robustis tantummodo, five illis, quorum fibras duras, parum elasticas, ac medicamentorum stimulo admodum resistentes experti sunt, conferre debent.

Nisi tamen praedictum infarctum adesse constet, a purgantibus abstinere debemus, primo, quia morbifica materia nondum secreta erui nequit; unde celebris illud Hippocratis monitum *concocta medicari oportet non cruda*.

Secundo, quia solida irritata maiori impetu contrahuntur, ac febris exacerbatur. Si vero noceant in principio, eo magis in statu perniciofa erunt purgantia; huc enim accedit praeter recensita alterum nocumentum, hoc est, eadem purgantia naturam a suo recto tramite distrahere, & secretiones, quas molitur, perturbare, quod aegri fortasse interitum portendere potest.

Declinante quidem febre utilia, immo necessaria quandoque erunt, praecipue si natura per alvum se exonerare tentet, vel si secreta tenuiore parte, sudore mediante, aut urina, crassior, & feculenta remaneat, quod sapienti medico plerumque innotescit.

Exhibito in principio medicamento purgante, vel omisso, prout indicationes postulant; Alkalina, & temperantia remedia primis saltem morbi diebus adire debemus, ac si vehemens sit febris, vibrantes pulsus, vel plethora quoque adsit, opportuna

portuna erunt nitrata, praesertim si nervalibus, ac sedantibus commisceantur, veluti succino, aut camphora, sed pauxilla huius quantitate, ne fluida nimis rarefiant, ac solidorum impetus magis provoceatur. Si vero febris minus acuta, imbecilles pulsus, nec admodum, vel etiam parum frequentes, ut ille, quas aspectu benignes, effectum vero perniciosas experimur, ideo proditorias appellamus; tunc etiam alexipharmaca temperatiora nervalibus semper commixta exhibenda erunt.

Siquidem causam, propter quam huiusmodi febres malignae mortis periculum celant, ac proditoriarum characterem acquirunt, expendamus; hanc nihil aliud esse, quam imminutam solidorum elasticitatem, seu imbecillem contractionis vim comperiemus, ex interrupta animalium spirituum separatione, vel ob nimiam vasorum sanguineorum tumescentiam medullares cerebri tubulos comprimantem, vel ob ipsius sanguinis summam crassitiam, ac lentorem, e cuius sinu volatiliores, ac spirituosae particulae aegre secedunt. Hinc eorundem solidorum oscillationes parum accelerantur, ac minori impetu fluida propellunt; his itaque in febribus alexipharmaca temperatiora, etiam in morbi principio proderunt, eo quia natura, ac solida stimulo afficientibus indiget, ut eorundem elasticitas restituantur.

Inter alexipharmaca temperatiora Radix Contrayervae, Carlinae, Tormentillae, Scorzonerae, Carduus B.; Pentaphyllum, Vincetoxicum, Scabiosa, de quibus aut pulvis, aut extracta, aut decoctiones adhibentur; Pila Rupicaprae, Bolus armena, Bezoar orientale, aut occidentale, de cuius tamen viribus admodum dubito.

Primo, quia si eiusdem substantia physice examinetur nullum sapit principium, quo in liquida, aut in solida agere possit. Secundo, quia sudores ciendi proprietas, quam illi tribuunt omnino fallax invenitur, quemadmodum nonnulli celeberrimi practici nitide fatentur.

Hercules Saxonia (a) haec profert: *Ut ingenue dicam, dum Venetiis praxim exercerem maximam huius lapidis copiam sumpsi, nec egregiam operam sensi. Scio plurimos, quibus exhibui, fuisse sanatos, sed non in lapidem retuli causam, quia reperio apud scriptores, quod eo sumpto sudor excitetur, post quem statim sublevantur, ego tamen non vidi sudorem prorumpentem; abiici itaque omnem spem huius lapidis. Idem expertum esse asserit Jerolam. Mercurialis (b), Riverius quoque (c) sic ait: Virtute sudorifica pollere hunc lapidem vulgo creditur, quam tamen probati auctores non pauci in dubium revocant, quod nullum sensibilem effectum ex huius lapidis exhibitione videre potuerint.*

In statu morbi, qui plerumque post septimum habetur, si vires eo

Aa 2

magis

(a) Lib. de Feb. cap. 38. (b) Consul. 5. tom. 3. (c) Lib. XVII. cap. 1. de feb. pest.

magis languescant, pulsus molles, ac debiles percipiantur, & tales sint morbi, aut aegri circumstantiae, ut vitalis, & animalis potentiae languor non a praeternaturali vasorum distensione, sed lentore, partiumque volatiliū dissipatione produci nobis patefiat, alexipharmaca calidiora, sive eadem expansivis, & exaltantibus commixta, veluti maiori camphorae portione, aut salibus volatilibus succini, Cor. C., Viperarum, ipsaque pulvere viperina, ac si natura sudoris viam inire ostendat; Bezoardicum minerale, Stybium diaphoreticum, aut Cor. C. philosophicum vel Unicornu, de cuius tamen virtute non minus, ac de lapide Bezoar, iisdem innixus rationibus valde dubito.

Ex simplicibus autem alexipharmacis calidioribus: Radix Angelicae, Zedoariae, Pimpinellae, Melissa, Scordium, Ulmaria eligi possunt, de quibus decoctiones, aut aquae destillatae simplices, atque compositae, ut Cordialis Saxoniae, Hirundinum cum Castoreo, Cerasnigrorum aliaeque; Electuaria quoque, aut pulveres alexipharmacae, bezoardica appellata, ut magni Duc. Etruriae, Ponae, aliaeque plures.

Ita, & cardiacis uti necesse erit, sive confectionibus, sive tincturis, sive elixiriis, ac spiritibus, quae, cum in pharmacopœis prostant, recensere supervacaneum est.

Hac igitur methodo malignae huiusmodi febres tractandae erunt, minime vero illae, quae vasorum turgescencia, praetermodum accelerato

fluidorum motu, vehementioribus solidorum ictibus, aliisque symptomatibus, quae gravem naturae commotionem, aut oppressionem indicant, comitantur, sed ante septimum, vel usque dum naturae vigor subsistat, vel fluidorum copia, vel rarefcentia nondum insigniter imminuatur, bezoardica aut nulla, aut temperatiora, utique sedantia, nervalia, & diluentia adhibenda erunt, primorum namque, & secundorum spasmodicas nervorum crispaturas mulcere, in quibus maior morbi saevitia, & periculum consistit, ac patulos vasculorum diametros servare officium est, ut fluida, ac praecipue sanguis, capillares arteriolas libere permeare possit; tertia vero, nempe diluentia, rigidas fibrarum tensiones humectando leniunt, sanguinem lentescentem fluxiliorem reddunt, ac nimis rarefcentem compescunt.

Perniciosa igitur erunt remedia, quae contrarios pariunt effectus, bezoardica scilicet calidiora, valida expansiva, volatilia, & exaltantia, quippe fluida magis rarefaciunt, nerveas vasorum fibrillas stimulo afficiunt, ac solidorum elasticitatem provocantia, vehementiores earundem oscillationes producunt; unde lethaliū stagnationum periculum accedit.

Verum ad diluentia paulisper redeamus, quae tanti a nonnullis habentur, ut his solis in maligna, & colliquativa febre utantur.

De iis loquor, qui solo aquae largo potu, & ad heminas frequen-
ter

ter exhibito huiusmodi febribus mendentur, non minus felici exitu, ac illi, qui, ne dicam pravam alexipharmacorum, & volatilium abusum, sed rationalem pharmaceuticae methodum sectantur.

Erubescant itaque, & confundantur illi, qui tantam exoticorum remedium catervam, ad fucum, & ostentationem depromunt, non sine gravi aegrotantium salutis, & rei familiaris damno. Videant, & agnoscant absque alexipharmacis, cordialibus, ac volatilibus medicamentis, sed solis diluentibus malignam materiam facile expelli, ac febricitantem feliciter curari posse.

Hic tamen omittere non debemus rationem, propter quam in hac methodo gelida aqua sub nive scilicet, aut glacie prius demersa utuntur, quae procul dubio est: ne tanta aquae copia ventris viscera, ac praecipue stomachum laxet, deinde etiam, ne universali fibrarum generis atoniam afferat; quis enim ignorat gelidae potionis proprium esse, fibram laxam contrahere, ac spiritalium partium per circumferentiam effusionem cohibere, & ita languescentem solidorum tonum restaurare?

Antequam huic capiti finem imponamus silentio praeterire non debemus illud remedium, quod novi systematis auctor in illa epidemica malignarum febrium constitutione adeo salubre, & mirificum expertus est, Mercurium scilicet crudum.

Hoc quidem saepe numero propinatum vidi, in illis tamen febribus, in quibus verminosa lues patet, jamque diu apud multos in usu esse me non latet, Bononienses praesertim Professores, & apud nonnullos Veronenses; ex D. enim Carolo Constantio ornatissimo viro mihiq; amicissimo, ante novi systematis editionem se Mercurium vivum in his casibus frequenter, nec sine evidenti juvamine, exhibuisse, pluries accepi, & ego quoque primo mearum observationum tempore non semel propinavi; de quo juxta meae praxis methodum ita sentio.

Hoc adhibere etiam aliquoties expedit; nam quaecumque sit febris malignae natura, damnum inferre profecto nequit; si vero verminosa, admodum prodesse praxis nos docet. Satiус quoque erit illud in principio exhibere, ut ipse auctor consulit, & sanae methodo consentaneum videtur.

SECTIO II.

De Febribus continuis, acutis, accidentalibus, & compositis.

CAPVT I.

De Lypiria.

Sunt quaedam febres continuae, & acutae, quae ex peculiaribus symptomatibus dignoscuntur, ac differunt; harum nonnullae malignarum naturam sapiunt, aliae ardentium, aliae vero synocharum putridarum, sed ad praecipitem stagnationem tendentes, quae phlegmonodes,

monodes, aut erisipelatosae etiam a nonnullis nuncupantur.

Huiusmodi febres inflammatoriae, & ad stagnationem tendentes, si partem aliquam peculiariter invadant, symptomatae dicuntur, veluti in phrenitide, si inflammatio cerebri membranas teneat, in pleuritide, ac pulmonia, si pulmones, ac pleuram; ita si in stomacho existat inflammatio, febris a nonnullis Lypiria symptomata appellatur, si in hepate cum tumoribus inflammatoriis Thypodes.

Inter symptomáticas quoque enumerantur febres variolosae, & morbillosae, de quibus hic non agitur.

Lypiria est febris, quae dignoscitur ex interno, & insigni corporis aestu externarumque partium frigore, de quo hic animadvertendum; Lypiriae frigus aegri sensum plerumque minime ferire, ideoque non aegri conquestu hoc medicis patet, sed solo contactu, quo ipsae externae partes frigefactae percipiuntur, externi vero frigoris sensum non apprehendunt, quia hic ab interno aestu obscuratur.

Lypiriae febris proxima causa eiusdem naturae, ac causon esse evincitur; ac solo intensioris gradu differre, siquidem Lypiriae initium ardentis symptomata plerumque continet, seu potius est ipsa febris ardens, quae in Lypiriam cito desinit, quoniam in externis partibus sanguinis circulatio praepeditur, ac languescit, maiorque sanguinis copia per interna vasa, utpote cordi propinquiora, defertur, quae ut ab il-

lis traducatur progressivum sanguinis motum accelerari necesse est.

Cum itaque a praeternaturali eiusdem sanguinis copia viscerum arteriae distendantur, provocata eorundem elasticitate frequentius contrahuntur; unde maior sanguinis attritus, & rarefactio, proinde intensus calor, de quo aegri conqueruntur.

Praeternaturalis, & inordinata haec sanguinis circulatio ex vitio imprimis fluidorum in qualitate, aut quantitate, deinde & solidorum pendet. Vitium in quantitate, si sanguine nimis copioso vasa ita turgeant, ut eorundem contractilis vis opprimatur, tunc lentescit idem sanguis in vasis minimis a corde remotioribus, veluti partium externarum, ideoque deficiente calore externa frigida perferuntur.

Vitium in qualitate, si heterogeneis succis, ac salino-volatilebus particulis refertis abundet sanguis, quod ab interceptis separationibus saepe contingit.

Biliosus succus, si retrogradus in venae portae ramulis aliquantulum haereat, propriam texturam mutat, eiusque salino-volatiles particulae, quibus repletur, visceris calore attenuatae a crassioribus eiusdem bilis particulis extricantur, & coagmentantur, immo volatiliores, & acres fiunt, quae postea huc illuc delatae, atque in capillaribus membranosarum partium vasculis, glandulisque nonnihil immorantes easdem vellicant, ex quibus vellicationibus nervei plexus spasmo affecti vasculorum diametros coarctant, sanguinique circulant

culanti resistantiam faciunt, ita ut in exterioribus partibus, ubi propulsiva cordis vis minus pollet, lentescat sanguis. In internis vero, licet spasmodicae nervorum crispationes sanguini vias coangustent, tamen difficiliter haerescit, sed validiori cordis vi propulsus maiori impetu in viscerum arteriolas nititur, ex quo nisu maior caloris sensatio excitatur; huiusmodi autem nisus fortior fit, quia in extremis arteriolis praepeditus sanguis cum progredi nequeat, regreditur, ad latera reflectit, earumque tunicas violenter distendit; unde solidorum elasticitas provocatur.

Praeterea ratione celeritatis, & massae aucto impetu, sanguis in lymphatica vasa se intrudit, eaque infarcit, ex quo tumescitiae, caloris intensiones, ac fibrillarum nervearum distractiones, haec vero dolores varios, ac inflammatorios tumores pariunt, modo in ventriculo, quos proximam lypiriae causam nonnulli existimant, modo in hepate, qui febrem Thyphodem constituunt.

Interim augescentibus stagnationibus sanguis aegre in venas traiectus minori quantitate ad cor redit, ea scilicet, qua ex ipso corde proiectus fuit; unde parvus, languidusque pulsus, deinde mors.

Quam periculosa, vel potius lethalis sit haec febris, quis non videt? Si vita nostra in fluidorum circulatione consistit, ut superius

demonstravimus, (a) ac in Lypiria fluidorum circulatio intercipiatur, insignesque stagnationes subsequantur, lethalis procul dubio haec febris plerumque erit; de quo nos monet Hippocrates. (b) *In non intermittentibus febribus, si externa quidem frigida, interna vero urantur, & sitim habeant, lethale est.* Eo tamen saeviore experimur, quo frigidiores sint externae partes, & calidiores internae, & vicissim eo minus periculosam, quo minus a statu naturali praedictae partes recedant.

Erunt itaque praecipuae ad curam indicationes, interceptum progressivum sanguinis motum solvere, & ordinatum reddere, spasmodicas crispationes lenire, & urentem calorem temperare; quod emollientibus, temperantibus, diluentibus, denique etiam leniter evacuantibus impletur.

Ex chirurgicis remediis necessaria, ut plurimum sanguinis missio, nisi imbecillis praecedat aegri constitutio, sanguinisque potius inopia, quam plethora se manifestet; haec enim ad sanguinis lentescantis, aut stagnantis motum promovendum quantum praestet ex mechanicae legibus, & ex superioribus dictis satis constat.

Ut frigida membra nonnulli calefaciant pannos calentes etiam laneos, ac pelliceas pelles admoveere solent, an vero felici exitu, discutendum esset. Contrarium sentit

Mar-

(a) Lib. I. huius. (b) Aph. 48. sect. 4.

Martianus in suis commentariis, Hippocratis doctrinae inhaerens, qui (a) Lypiriae frigefactoria conducere cenlet, *Et ad alvum*, inquit, *forinsecus ad corpus cavendo ne inhorrescat*. Pro hac sententia propugnat Martianus, ac suo systemate Hippocratis mentem interpretatur, seu remedii propositi rationem reddit, ac postremo ad experientiam, & observationes se convertit: *Observavi enim*, ait, *taliter affectos, quo magis calefactoriis ad naturalem statum reducere procuramus, eo impensius refrigerari, quod prae aliis nuper cognovi in* &c.

Animadvertant igitur oportet medici, qui stragulis sive pannis quibuscumque calentibus utuntur, illi indicationi satisfacturi, nempe ut calorem a centro ad circumferentiam eliciant; hic diversam plerumque esse rationem, quia externarum partium refrigeratio non ex naturae languore, seu solidorum vis contractilis defectu, ac spirituosarum partium inopia pendet, sed a sanguine prae copia, aut crassitie vasa infarciante, vel potius e succis adeo pravae texturae membranas, & nerveas fibrillas irritantibus, ac spasmodicis contractionibus ipsa vasa adeo coarctantibus, ut aucta progrediendi sanguini resistentia eiusdem stagnationes contingant. Si igitur calentibus pannis corpus contegatur, cum iidem panni calentes non progressivum sanguinis motum adiuvere, sed ipsum san-

guinem tantummodo rarefacere queant, & ita maiorem vasorum distensionem portendere, si plethora adsit, nerveae partes, ac solidorum vis contractilis opprimetur; eoque minus spasmodicae crispationes, vasorumque coarctationes auferentur, sed augebuntur; siquidem calor siccus nerveas fibrillas tendit, minime autem laxat.

Idcirco Hippocrates frigida refrigerato corpori paulatim admoveere praecipit, ita tamen, ne corpus perhorrescat, nam moderate frigida spasmodicas crispationes lenire possunt.

Eadem ratione perniciosae erunt cucurbitulae siccae perfricantes, quia cutaneae fibrae laceratae, eo magis contrahuntur, vasaque coarctantur.

Universales quidem unctiones proderunt, quoniam saltem ad ipsas contractas peripheriae fibras leniendas inserviunt, ita & peculiares anodynae, laxantes imo ventri, intra cuius cavitatem saeviores fiunt contractiones.

Pharmaceutica remedia ex diluentibus, sedativis, & refrigerantibus depromenda sunt, eadem pene methodo, ac in febribus ardentibus, scilicet, absorbentes pulveres cum nitratis, & succinatis, emulsiones ex seminibus frigidis, papaveris, & portulacae, decoctiones, vel ptisanae refrigerantes cum sero lactis depurato, aut destillato, levique paregorica prudenti medico exhibita conferentia sunt.

A pur-

(a) *Libr. de Flat.*

A purgantibus validis omnino cavendum est, lenientibus vero, nec abutendum, hoc est ipsa Cassia, aut lenitivo electuario, quae sola aut eiusdem generis purgantia convenire possunt, caute, & circumspecte adhibenda sunt, veluti in principio, si primarum viarum glandulas cruditatibus infarciri constet, vel postea remittente morbo quemadmodum in ceteris acutis febribus. Inter lenientia vero peroptimum erit oleum amygdalarum dulcium ad contractas ventriculi fibras laxandas, membranarum irritamenta mulcenda, ac pravam infarctum paulatim eliminandum.

CAPUT II.

De Febre Afode, & Syncopali.

Febbris Afodes multam cum Lypiria affinitatem habet. Peculiariora accidentia, quibus hae febres una ab altera dignoscuntur, sunt, primum, tanta corporis inquietudo, & jactatio, per quam aegri nullum locum, nec momento quidem servant, quod Afodes proprium est; alterum, externarum partium frigus, quod soli Lypiriae jungitur; ceteris symptomatibus cum Lypiria convenit; aestu nempe vehementi, hypochondriorum tensione, ac dolore, palati, & faucium ariditate, cibi fastidio, ac pulsu saepe subtili, & depresso.

Haec inquietudo, per quam aegri incessanter locum mutant, nisi a molesta & universali nervearum, ac membranosarum partium sensatione

oritur, propterea quia, cum in quocumque situ, & figura, moleste se habeant, ideo a molesta sensatione se liberaturi modo huc, modo illuc se convertunt, nulloque lecti situ quietem inveniunt, molesta vero sensatio ab earundem partium divulsione, praepedito pene universali in extremis vasorum sanguinis circuitu, excitatur; sanguis enim ad ipsa capillaria propulsus, cum progredi nequeat, regreditur, ipsique sanguini a tergo venienti resistit, ita ut motus directus, seu per vasorum axem, in obliquum, & lateralem commutetur, ex quo ipsae arteriolae distenduntur, ac tumet dolorosa tendinearum, ac membranosarum partium sensatione.

Sanguinis circuitus in extremis vasorum intercipitur, primo, quia sanguis summe rarefit, & maius spatium occupat in vasorum cavitatibus, secundo, quia tanta velocitate a corde propellitur, ut maior ipsius quantitas ad extremas arteriolas appellat, quam traici possit, ex quo fit, ut minor sanguinis portio dato tempore ad cor redeat, quam illa, quae a corde discesserit; hinc in morbi progressu valde imminuto sanguinis ad cor appulsu, debilior quoque sequitur illius contractio, & exhausta ipsius sanguinis in arterias proiectio; unde pulsus imbecillis, ac depressus.

Huiusmodi vasorum infarctus, ac interrupta sanguinis circulatio non solum in externis, & muscularibus partibus, verum etiam in internis, praecipue vero in ventriculo, eundem

dem inflammatione afficiens, evenit, quod dolorem, hypochondriorum tumescentiam, faucium siccitatem, & cibi fastidium progignit; immo adeo sensilem eundem ventriculum reddit, ut a quocumque ingesto dolorosa sensatione afficiatur, & cardialgiam inducat; saepe vomitus accedit, quo biliosi succi acrimonia praediti evomuntur, non dissimiles, vel saltem ratione intensioris tantummodo differentes iis, qui in Lypiria stomachi fibras vellicant, & spasmodicas crispationes producant.

Caussae vero procatacticae huius febris, quemadmodum, & Lypiriae plurimae esse possunt, quas enumerare supervacaneum est, eadem namque sunt, quae ceterum acutarum, praecipue ardentium februm, cuius generis sunt quoque Lypiria & Afodes, de qua loquimur.

Haec quoque febris inter admodum periculosas recensetur, praesertim, quae cardialgiis, ac pulsum depressione comitatur. Hippocrates (a) in febris, ait, circa ventrem aestus vehemens, & oris ventriculi dolor, malum.

Remedia eo collimare debent, ut aestus temperetur, sanguinis rarefcentia compescatur, eiusque infarctus, ac stagnationes amoveantur, veluti in ventriculo, qui inflammatione, hac in febre plerumque afficitur.

Venaesectio, si plethora adsit, in principio est celebranda, ac repeten-

da, si vires permittant, aut pulsum distensio, & elasticitas vasorum plenitudinem ostendant.

Universales unctiones ad cutaneas fibras contractas nonnihil laxandas, ac transpirationis meatus aperiendos; ad ventrem quoque laxantia, & anodyna fomenta, & unguenta applicanda sunt; ita, & enemata emollientia, & refrigerantia utilia erunt.

Quoad cathartica vero circumspectos ire medicos necesse est, nec nisi in morbi declinatione, aut tantummodo in principio, prout materiae febrilis natura postulaverit; si enim succorum crassitiem ventriculi glandulas infarcire ex ingestorum quantitate, aut qualitate constet, etiam emetica, tamen mitiora, ac diluentibus sociata, veluti rad. Ipecacuanna opportuna erunt. Cetera remedia nonnisi refrigerantia, & diluentia, sedativa, & paretgorica conveniunt, ac si expansiva adhibeantur, eadem prorsus methodo, ac in Lypiria, & febre ardente.

Febris Afodes interdum in Syncopalem, seu cardiacam definit, quotiescumque ventriculi infarctus ex adeo pravae texturae succis constet, ut irritatis eiusdem fibris, & imprimis orificii superioris. Cor si cuti communi cum ventriculo nervorum pari donatur, nempe vago, consensu afficitur, eiusque sinus ita convelluntur, ut eorum oscillationes pene sistantur, proinde fluidorum

(a) *Aph. 65. sect. 4.*

rum appulsus admodum languescat, ex quo animi deliquium, seu syncope.

Praeterea, si sanguinis progressivus motus in capillaribus adeo lentescat, ut valde tenuis eiusdem portio per venas ad cor redeat; eius ventriculi cum sufficienti sanguinis quantitate non dilatentur, imbecilliter quoque contrahuntur: interdum tamen prae nimia plethora, & crassitie sanguis cordi naturalem resistantiam auget, eiusque systalticam vim opprimit, ex quo syncope pariter producitur.

Quaecumque sit proxima huius febris causa, haec gravi periculo nunquam caret. Periculosior autem erit, si aeger frequentius in syncopalem affectum incidat, eoque peior, si tarde resurgat, si pulsus pene deficiat, si frigeant membra, ac sensus hebetentur, denique si faciei color a statu naturali multum recedat.

Curatio febris syncopalis nonnihil varia esse potest, prout variae eiusdem causae, ex quibus indicationes sumuntur.

Quae igitur in corpore plethorico contingit, vel cuius sanguinis crassis lentore, & crassitie peccat largiorem phlebotomiam requirit; quae vero in corpore graciliori, & rarioris solidorum texturae, cuiusque in stomacho notabilis infarctus patefiat, sive per vomitum, sive per anorexiam, & palati visciditatem, tunc phlebotomiam recusat, vel admodum parcam admittit, sed potius opportuna, & convenienti purgatione indiget. Opportunam dico,

quia si infarctus materia, licet acrimonia praedita, crassiori tamen, atque viscosa commixta, nisi aliquid obstet, per blanda emetica illam educere satius erit; si autem succi intra ventriculi cavum, eiusque glandulis hospitantes acres sint, ac penetrantibus particulis constent, ab emeticis cavere oportet, ne ventriculi fibras nimis irritando spasmodicae crispationes inflammationis periculo augeantur.

Tamen si natura ad vomitum proclivis sit, & vergat, lenientia emetica exhibere licebit, veluti oleum olivarum, vel amygdalarum dulc. aqua tepida, aut jure dilutum, vel ad summum oxymellem simplicem, aut syrupum acetosum; nisi itaque natura ad vomitum inclinet, atque purgationis indicatio habeatur, solis lenientibus uti debemus, inter quae oleum amygdalarum dulc. praestantius est.

In morbi vero progressu eadem fere methodo, ac in febre afode procedendum est, hoc tantummodo addendum; quod in syncopalibus insultibus cardiacis remediis locus est, quae quidem, ex temperatioribus sumenda, nisi positivus virium languor, ex animalium spirituum inopia, ac debili solidorum elasticitate appareat, tunc enim ad cardiaca validiora confugiendum, atque volatilia, veluti Spir. C. C., volatile oleosum Sylvii, Salis Ammoniaci; salem volatilem Viperarum, Cor. C., Succini, & similia, ita & externe salia volatilia naribus, ac sternutatoria vehementiora, nec non aquam Reginae Ungariae, Spiritum

tum Fuliginis, aut Salis Ammoniacy.

Huiusmodi tamen positivus virium languor in Syncopalibus febribus non adeo frequens est, ut nonnulli existimant, sed plerumque ab intercepto fluidorum cursu, aut spasmodicis contractionibus cor ipsum devincientibus pendet; quare in his casibus validiora cardiaca, & volatilia remedia larga manu exhibita noxia esse possunt; nam sanguinem nimis rarefaciunt, nervorum systema irritant; unde capillaria vasa eo magis ingurgitantur, ac syncopalis affectus lethalis fit. Profunt quidem temperatiora ex confectionibus, speciebus, & aquis cardiacis appellatis, quas referre omitto, quia in usu sunt, & unicuique, etiam tironi, innotescunt. Sicuti ex internis remediis temperatiora cardiaca in his casibus profunt, ita ex externis, praeter acetum commune, vel rosaceum, aqua frigida, vel pannus aqua frigida immersus testibus in viris, & mammis in mulieribus applicatus admodum juvat.

CAPUT III.

De Colliquativa.

Colliquativa est illa febris continua species, in qua corpus vehementer, seu cito extenuatur. Colliquativa improprie quidem, nam vox colliquativum duro tantummodo corpori in liquidum commutato convenit, veluti glaciei, quae in aquam, metallis, quae

ignis vi in liquidam substantiam abeunt. Extenuatur vero corpus, non quod solidae partes colliquefiant, sed quia liquida substantia, qua replentur, exhauriantur.

Corporis machina nil aliud est praeter vasorum, ac tubulorum congeries, quippe vasa maiora, ex minoribus, minora ex tenuioribus, haec postremo ex minimis contextuntur. Donec vasa liquidis repleantur adaequatam magnitudinem, & crassitiem corpori impertiantur, si vero exinaniantur ipsum corpus statim extenuari necesse est.

Exinaniantur itaque cito vasa, si fluida contenta dissipentur; fluidorum dissipatio, vel per cutis meatus aucta perspiratione, aut sudore, vel per intestinorum secretoria alvi fluxu, vel denique per renum tubulos praeternaturali diuresi contingit; sed cum haec ad diabetem pertineat, cuius febris plerumque symptomatrica, praetermittenda hic modo erit.

Extenuans, ac symptomaticus sudor, qui ab aliis colliquativis Eloquentes nomine hanc febrem distinguit, talis fit, si praeter copiam, etiam qualitatem a naturali diversam acquirat; hoc est, si sudoris materia, non ex solo fero, vel materia febrili coniuncto constet, sed lymphatica oleosa, pinguedinosa substantia ad tenuissimos solidorum porulos, lymphatica vasa, ac membranae adiposae cellulas replendas destinata; nam tunc, iisdem lymphaticis vasis lympham exhaustis, & adiposae membranae cellulis pinguedinosa substantia exinanitis, excantur

cantur muscoli, viscerum parenchymata, & universae fibrae arescunt, & contrahuntur; unde corporis macies, nasus acutus, contracta tempora, oculi concavi, & alia, quae extrinsecus apparent, & ad huiusce febris diagnosim conducunt.

Symptomatici huius sudoris, seu ipsius febris elodes causa proxima, erit, primo: praeternaturalis molecularum rubros sanguinis globulos componentium cohaesionis laxitas, ob quam ipsi globuli rubri facile in serum solvantur, quod ex substantiae lymphatico glutinosae, ad eorundem nexum firmandum necessariae, defectu oboritur, nec non ex salino terrearum partium praedominio, quae nisi praedicta lymphatico glutinosa substantia imbuantur, atque immisceantur, in sanguiferorum extremis, ubi sanguis valde remisso motu progreditur, sive in ipsis serosis, & lymphaticis vasis, a fluidis, quibus vehuntur, utpote maioris specificae gravitatis, secedunt, ac sibi invicem coeuntes saepe angulosas moleculas efficiunt, (a) quae in penitioribus vasorum anfractibus haerentes membranosis partibus infensa sunt, cuius fibrillas proritant, feriuntque, ita ut universum vasorum systema ad vehementiores contractiones provocetur; unde febris; secundo: summe acceleratus sanguinis motus ex vehementioribus, & frequentioribus solidorum ictibus; hinc ipse sanguis ratione velocitatis praetermodum auctae ad extre-

ma vasa tanta quantitate appellit, quanta ex minimis arteriis in venas traduci nequeat; ideo progressivo motu illic interrupto maiori impetu in colatoria sudoris irruit, ac dilatat, copiosumque sudorem affert.

Interim vehementiores, ac frequentiores cordis, & arteriarum systoles, non solum sanguinis crassim attenuant, ita ut serosae moleculae, quae sudoris materiam praebent a crassioribus, & rubris nullo negotio fecernantur, verum etiam ipsius lymphae motum in propriis vasis accelerant, quo nimis cito illa secreta ad sanguinem redeat, & a propriis muneribus nutriendi, organicas partes humectandi, & liquida separanda fluidiora reddenda deficiat, ac per cutis meatus eiiciatur; Adiposae quoque substantiae moleculas atterit, dissolvitque, ut e propriis cellulis quovis modo exprimantur, ac dissipentur, venas facile subeant, ac in humoralem massam traducantur, in quam cum pervenerint, circulationis vi ad ipsa sudoris secretoria deferuntur, & sudore commixtae eliminantur.

Oleosae autem, & crassiores sanguinis moleculae, quae ad adiposae substantiae reparationem a natura destinatae sunt, circulationis impetu delatae propria vasa, sive secretoria oscula praetereunt, ex quo membranae adiposae cellulae cito exhauriuntur; ita lymphatico-oleosae, quin lymphaticas arterio-

las ineant, ex arteriis sanguiferis in venas velocius migrant, & ad peripheriae vasa appellentes sudoriferos meatus praeter modum dilatatos traiciunt, ex quo exinanitis lymphaticis, corporis emaciatione necessario sequitur.

Quod de sudoris symptomati, & colliquativi natura diximus in febre Elode, etiam de ceteris perniciosis excretionibus, quae colliquativam constituunt febrem applicandum est, veluti alvi fluxu; hic enim ex accelerato sanguinis motu aequae, ac sudor excitari potest, si pro secretoriis cutis, ac sudoris illa intestinorum, quibus feces excernuntur, magis dilatentur, sive debiliorem tonum, quam priora nacta sint, per quem fluidis appellentibus infarciantur, quia minus resistunt, nec validis contractionibus se exonerari queunt, quare impetu fluidorum a tergo venientium horum oscula violenter aperta copiosam in intestinorum cavum eructant materiam, quae sero plerumque, & lymphæ adiposae substantiae particulis quandoque commixta constat.

Eius consistentia tenuis, & liquida, color varius, prout varia liquorum commixtio, praecipue bilis, eorumque proportio, nec non modificatio, quae ab oscillatorio vasorum secretoriorum motu magis, aut minus vehementi, diuturno, aut brevi, pendet, quia in his ipsae excernendorum molecule magis,

aut minus atteruntur, ac dividuntur, diversamque texturam acquirunt, ita & admodum foetent, si diutius intra eadem vasa immorentur, in quibus aestuante calore sulphureae, & volatiles particulae exaltantur.

Huiusmodi itaque alvi fluxu exinanito vasorum systemate deest nutritio, idcirco eadem ratione, ac in febre sudorifica extenuatur corpus; cuius emaciationis gradus, prout intensior, ac citior, magis, vel minus lethalem reddit febrem, seu citius, vel tardius mortem portendit, quod praenuntiatum nobis videtur ab Hippocrate (a) his verbis; *Si nasus sit acutus, cavi oculi, adstricta tempora, frigidae aures, contractaeque &c., item cutis circa frontem dura, intenta, arida &c.*

Equidem exinanitis vasis emaciatæ corporis partes contrahuntur, solidaque naturalem elasticitatem, & systolicam vim amittunt; ex qua fluida motum, & animal vitam nanciscitur.

Hippocrates quoque de sudore colliquativo in acutis febribus nos admonet (b) dicens: *Sudores, alii propter corporis exsolutionem, alii propter inflammationis vehementiam.* Inter sudores vero pessimos esse frigidos pronunciat. (c).

De perniciofa autem alvi deiectione agit idem senex, (d) in quo haec habemus: *exitiosior est, si nigra, aut livida, aut pinguis, aut foetida est deiectio, si vero versicolor est,*

(a) *Praedic. lib. I.* (b) *ibid.* (c) *Aph. 37. sect. 4.* (d) *lib. 2. progn. Cap. 3. & 4.*

est, diuturnior quidem, sed nihilominus exitialis est &c. Id tamen, quod nos de colliquativis, & lethalibus tum alvi deiectionibus, tum sudoribus certiores facit, est, non solum quantitas, & qualitas earundem excretionum, sed notabile virium detrimentum, atque insignis extenuatio.

Modo vero causa efficiens perquirenda esset, per quam solida ad tam vehementes oscillationes excitantur; verum haec eiusdem naturae, ac in ceteris acutis febribus, sive synochis putridis, sive ardentibus, sive malignis esse potest; colliquativa namque febris modo ex ardentium, modo ex malignarum genere se prodit, fitque colliquativa, si talis sit solidorum affectio, sive elasticitas, ut vehementius oscillent, ac fluida tanto impetu propellant, ut in secretorios ductus praeternaturali copia irruant. Haec autem ingurgitatio in illis fit vasis, quae ob debiliorem tonum fluidis appellentibus minus resistunt, idcirco si secretoria sudoris momento sanguinis minus resistant, quam illa intestinorum, colliquativus sudor habetur, & vicissim, si horum tonus prioribus praevaleat colliquativus alvi fluxus emergit.

Praecipuae indicationes, quae in huius febris curatione desumendae erunt, prima, ut colliquativae excretiones cohibeantur, secunda, ut corporis emaciatio, quae excretionibus consequitur, impediatur.

Quoad sudorem, aegri lectum imprimis est invisendum, qui si gravioribus stragulis cooperiatur, imminuenda erunt, sive leviora apponenda, liberus externo aeri ingressus donandus, etiam fenestras identidem aperiendo, ut aer (praesertim si calida tempestas sit) frigidiusculus cubiculum ingrediatur, pavimento aqua frigida aspergi oportet, ac demum illa omnia amovere, quae aegrotantis aestum fovere possunt, & illa adhibere, quae refrigerare, cutisque poros nonnihil coarctare valent; idcirco veteres medici ad sudorem illum cohibendum pluribus externis remediis utebantur, quae fane ad sudoris oscula angustanda, & obstruenda inserviebant, veluti unguentis adstringentibus, oleis, ac mucilaginis, quibus totum corpus, ac praecipue lumbos inungebant, pulveribus eiusdem generis, quibus conspergebant, nempe rosarum nostrarum, seu satarum, Cynosbatos, Myrtillorum, Balaustiorum, Mastich, aliorumque. Haec externa remedia, licet apud plerosque recentiorum obsoleverint, nihilo tamen minus proficua, & opportuna esse fateri debemus.

Venaesectio, hic non convenire fane videtur, quam auctores, vel silentio praetereunt, vel excludunt; non inutile tamen, ac necessarium remedium aliquando esse posse infero cum Hugone Gourraigne (a); nam in corporibus plethoricis morbi principio, in quo sudor iam sympto-

pto-

(a) *Tract. de feb.*

ptomaticus emanat, sanguinis evacuatione solidis vehementer oscillantibus illam resistantiam, ac distensionem imminuet, ex qua eorundem elasticitas, eo magis provocatur, sanguinem, & universa fluida, nimio impetu propelluntur; unde febris colliquativae characterem acquirit, deinde liquida ad circumferentiam praeternaturali affluxu tendentia revellet, & ad symptomaticum sudorem sistendum nonnihil praestabit.

Opportunus quoque erit enema refrigerantium, & emollientium usus non solum ad febrilem aestum temperandum, ac irritantes feces educendas, verum ut natura per aliam viam alliciatur, & a sudoris secretionem, per quam fieri potest, distrahatur.

Quoad interna remedia, si primarum viarum infarctus se ostendat; cathartica quoque in principio exhibenda, ex his tamen leviora, & refrigerantia, quibus, si stagnantes, & pravi succi eliminantur, solida non irritentur, nec aestus augeatur; nam horum ope laxata alvo sudoris materia alio educitur, & symptomatica excretio aliquantum imminuitur, atque cohibetur.

Optime hic convenient absorbentia, & subadstringentia, ut oculi cancrorum, conchae, creta praeparata, corallia, terra sigillata, bolus armena, species diatria santalorum; proderunt quoque maxime nitrata ad insignem sanguinis rarefactionem compescendam, inter quae praestantius est nistrum corallatum; haec vero diluen-

tibus, & refrigerantibus solvantur, nempe emulsionibus ex seminibus frigidis, lactucae, ac papaveris, ptisanis paululum acidulis, succo limonium, vel granatorum, decoctionibus ex herbis, & radicibus refrigerantibus, ac subadstringentibus Acetosae, Fragariae, Sonchi, Malvae, Lactucae, Portulacae, Plantaginis, &c. quibus etiam addenda erunt in morbi progressu Pentaphylon, Tormentilla, Bistorta, Carlina, quarum extracta labentibus viribus seu in statu morbi mire profunt, praecipue si aliquando laudani, vel aethiopis vegetabilis grano associantur; etenim adstringentia remedia paregoricis coniuncta ad vehementes solidorum ictus leniendos magis valent.

In febre colliquativa vero ex alvi fluxu eadem fere remedia, ac in febre elode adhibenda sunt, eadem enim est utriusque morbi causa, idemque modus, ac tantummodo ratione loci differt; quare calidiora remedia vitanda, saltem in principio, quia praeternaturalem solidorum motum magis fovere possunt, ex quo & ipsa colliquans per alvum excretio pendet, temperantibus, adstringentibus, & anodynis uti expedit. Enemata emollientia & anodyna, praecipue si tormina adsint, veluti ex decoctionibus refrigerantium simplicium, vel hordei, vel ex lacte, in quibus solvantur mucilagines seminum Cydoniorum, Psyllii; si cruenta, & dysenterica sit evacuatio, eo validiora, agglutinantia, & anodyna esse oportet. Clysteris materia E. G. ex decocto capitis

pitis vitulini, aut vervecini, cui praedictae mucilagines, ac vitella ovorum addenda erunt, ac ubi magis urgeat alvi fluxum cohibendi necessitas, etiam tincturam rosarum, vel decoctiones earundem rosarum, Cynosbatos, Balauftiorum, Poligoni, Bursae pastoris, Equiseti, rad. Tormentillae, Bistortae, Consolidae, aliorumque in ipso jure agglutinante factas confugiendum erit.

Interna vero, seu pharmaceutica remedia eiusdem generis esse debent, ac illa, quae in febre elode adhibentur. Labentibus itaque viribus etiam cardiaca, stomachica, & spiritum confortantia exhibentur. Volatilia tamen semper suspecta, ne dicam noxia habenda sunt.

CAPUT IV.

De Febre Epiala.

Inter has continuas accidentales, & acutas febres Epialam quoque collocamus, licet nonnulli ex acutarum genere eandem excludant; utrum vero rationi magis consentaneum sit, mox videbimus.

Epiala est febris continua, in qua aegri calorem, & frigus eodem tempore perferunt, cuius proximam causam inaequali celeritati, qua sanguis per arterias, praesertim capillares, fluit, & inaequalibus vibrationibus, quibus eadem arteriae oscillant, tribuimus.

Sanguis itaque ex quacumque causa in capillaribus vasculis lentescens, totius massae, quae illum subsequitur progressivo motui ob-

stat; unde solidorum momento resistentia augetur; verum sicuti lentor non toto sanguini, saltem aequaliter inest, ita iisdem extremis vasculis inaequaliter retardatur ipse sanguis; quare ubi arteriolae ob maiorem eiusdem lentescentiam maiorem infarctum patiuntur, prae aliis quoque dilatantur, & ultra resiliitionis vires distenduntur, ita ut in adhaerentem fluidum propellendum se sufficienter contrahere non valeant, ideo propter utrorumque motus, tum sanguinis, tum arteriolarum defectum, sive remissionem, frigus enascitur.

Ubi vero minor est sanguinis lentescentia, leviorque arteriolarum infarctus, nec excedens dilatatio, haec arteriolae facilius resiliunt, ac in lentescentem sanguinem fortius nitentur, quo nisu properabit idem sanguis, atque calor perferentur; ex eadem inaequali sanguinis celeritate, arteriarumque infarctu, muscoli quoque modo hic, modo illuc magis gravantur; unde pandiculationes, atque oscitationes, quae musculorum maxillam deprimentium contractione, & irritamento exoriuntur.

Itaque sanguis in extremis vasculis huc illuc haerens tardius in venas migrat, proinde minori quantitate dato tempore ad cor redit; ideo cor minus, nec frequenter dilatatur, cuius dilatationi cum respondeat contractio, haec quoque nec frequens, nec vehemens, sed potius rara, & imbecillis, quemadmodum & pulsus percipitur.

Universum arteriarum genus ob causae moventis languorem, qui

ab imminuto sanguinis a corde proiecti impetu pendet, debiliter oscillat, ac tarde, & imperfectae fiunt separationes; hinc urinae crudae, & aquosae, quia fluidior tantum pars a cruoris massa secernitur.

Si igitur praeternaturalis huiusmodi lentor totam cruoris massam paulatim occupet, siue solida adeo languidae texturae sint, ut necessariam elasticitatem amittant, universalis fiet fluidorum stagnatio, ac proinde mors.

Si vero ipsa solida tonum, ac vim contractilem recuperent eodem remanente in qualitate sanguinis vitio, arteriaeque continua distensione afficiantur, earundem elasticitas provocabitur, vehementer, ac frequenter oscillabunt, haerentemque sanguinem succutient, quod universalem calorem efficiet, ac febris characterem in ardentem, aut aliam continuam aeque periculosam commutabit.

Indicationes, quibus curatio dirigitur, erunt quidem: sanguinis lentorem attenuare, eius velocitatem aequabilem reddere, earumque arteriarum elasticitatem a sanguinis infarctu suffocatam restituere; haec ultima tamen ut expleatur, caute se gerere debet medicus, ne, si exaltantibus, calidisque remediis utatur, ipsam solidorum elasticitatem nimis excitet, ac illarum praecipue arteriarum, quarum vis systolica suas edit vibrationes, caloremque eiusdem epialae efficit; praeterquam quod aegri temperamentum, eiusque solidorum affectiones examinandae, quarum fibrae, si ela-

sticae per se sint, praedicti generis medicamentis in effrenes motus facile devolvi, & in acutiorem febrem epialam commutare possunt, vel si rigidae, & ad contractiones obnoxiae, capillares arteriolas nimis coarctare, ac stagnationis periculum portendere.

Satius itaque erit temperantia, & diluentia, his praecipue in casibus, adhibere. Verum antequam ad interna remedia transeamus, externa, & chirurgica excutienda, & in primis phlebotomia, quae utrum conveniat, admodum dissentiunt auctores. Nos vero pro maximo instituto rationem, & experientiam habentes, ita sentimus.

In corporibus plethoricis viribus nondum labentibus venae sectionem profecto conferre; nam imminuta sanguinis mole, vasorum infarctus, & dilatatio imminuetur, & vasa, quae prius magna dilatatione devinciabantur systolicam vim rediment, ac febrilem lentorem conterere valebunt; quae vero minus replentur, naturalem resistantiam acquirant, qua nec vehementius, nec frequentius oscillabunt.

Igitur venae sectio in his corporibus ad caloris, & frigoris causam destruendam, & ad interceptum sanguinis circuitum restituendum mire inservit.

De ceteris chirurgiae auxiliis fileo, quae enim convenire possunt, levioris momenti sunt.

Inter pharmaceutica remedia purgantia se se offerunt, in quorum exhibitione eadem obiecta in aliis febribus

bus continuis, & acutis exposita perpendenda sunt; si tamen indicentur, blanda, & leviora sunt eligenda; praeterea morbi non solum gradus, seu tempus est observandum, verum etiam symptomata, quae in hac febre saepe pro criticis separationibus medicis imponunt; quaeque non sunt adjuvandae, sed quidem cohibendae.

Alkalina, & expansiva temperatio-
ra primis morbi diebus conveniunt, veluti Cor. C., Dens Apri, & alia similia cum pauxillo salis ex simplicibus parati: Card. B., Cent. m., Agrimoniae, vel potius alio blando digestivo, nempe Arcano dup. M. quibus superbibendae decoctiones ex Cichorea, Buglossa, Ceterach, Capillo Ven., Malva, Violaria, &c. quibusque addere proficuum erit radices aperitivae temperatiores, Apii, Asparagi, Rusci, Altheae &c.

In statu vero morbi ad expansiva validiora transeundum, vel ex chymicis pulveribus, veluti Bezoardico minerali, Styb. diaph. pulvere viperina, aliisque, quibus pauxillum Camphorae immiscere perutile erit; hic quoque convenient extracta plantarum Card. B., Scabiosae, Gentianae &c. quae fibrarum tonum languescientem excitant, ac naturam ad aliquam separationem alliciunt; haec cum diluentibus semper sociando, ut vehiculum stagnanti sanguini praebeatur. Ceterum cardiaca, & confortantia remedia languescente natura multum praestant, quae tam in qualitate magis, vel minus spirituo-

sa, ac volatili, quam in dosi praescribenda, ad virium gradus, corporisque affectiones semper respiciendum.

CAPUT V.

De Febris continuis periodicis.

Febbris continua periodica, quae & composita merito appellatur, diurnas habet exacerbationes; sicuti remissiones; variant exacerbationes ratione ordinis, ac ratione symptomatum.

Ratione ordinis, quaedam singulis diebus eademque hora aegrum invadunt, aliae alternis diebus, aliae quarta qualibet die, aliae modo bis, modo semel in die, aliae denique incertis diebus, atque horis, quae erraticae dicuntur, neque ex acutarum genere plerumque sunt.

Variant ratione symptomatum, scilicet ex intensione ipsius febrilis exacerbationis, corporis jactatione, siti, vomitu, cardialgia, acuto capitis dolore, aliisque, quorum modo haec, modo illa, magis, vel minus intensa in huiusmodi febribus observantur.

Febris itaque, quae quotidie aequalibus symptomatibus exacerbatur, ac si intensior fiat, uniformiter augeatur, eorumque symptomatum natura non multum vehemens sit, quotidiana appellatur, quamquam haec ad lentas magis, quam acutas referatur.

Tertiana alternis diebus exacerbationem patitur, Graecis *Triteophies* dicta, quae etiam qualibet die exacerbatur, ac duplex tunc dicitur, seu duae tertianae, quarum

exacerbationes nonnihil inter se differunt, saltem ratione intensioris; prima vero exacerbationi tertiae, secunda, quartae &c. consona est. Huius febris si acerbiora sint symptomata, veluti acutus capitis dolor, inquietudo, anxietas, vomitus, cardialgia, fitis intensa, rigor, fortis aestus, & alia, quae in febre ardente experiuntur, Tertianae legitima nuncupatur; si vero mitiora sint eadem symptomata, ac sine rigore invadat, spuria. Tertianae continua saepe quidem ardentis symptomatibus comitatur, aliquando tamen adeo perniciosa fit, ut malignae naturam assequatur; hoc autem evenit cum humorum stagnantium textura adeo pervertitur, ut deleteriam indolem acquirant, quod ex tenuiorum, ac volatilium partium exaltatione oritur (a).

Quartana continua dicitur, quae quarta qualibet die recrudescit, interdum duplex, si secunda die repetat exacerbatio; tertia tantummodo ab eadem libera remanente. Inter periodicas vero hic enumeratas febres, Hemitritaeus merito adscribitur, quae praeter quotidianam alternis diebus novam recrudescentiam init, ita ut tertio quoque die duplex exacerbatio sequatur; hinc plerique Hemitritaeum ex quotidiana, & tertiana continua compositam esse volunt.

Harum febrium occasionales, & procatacticae causae, seu antecedentia eadem esse possunt, quae in

aliis febribus continuis, five simplicibus, five compositis, quemadmodum similes, & pene eadem sunt proximae, & intrinsecae; hoc solo discrimine, nempe, in singulis exacerbationibus nova febrilis materia ad extremas arteriolas coagumentatur, quae si tali crassitie polleat, ac sanguinis in venas transitum adeo intercludat, ut eiusdem moleculae in capillaribus peripheriae vasculis haereant, & membranosas partes leviter irritent, ac percellant, frigoris sensu, non sine tremore ac pandiculationibus, exacerbatio fit; si vero minus crassa, magisque volatili substantia donata sit, ipsius sanguinis regressum, vasorum turgescientiam, ac vehementem membranarum partium distractionem parit, ex quibus provocata solidorum elasticitate magno calore, concitatione, aliorumque accidentium intensioris eadem exacerbatio invadit.

Haec autem febrilis materia, vel in ipsa cruoris massa huc illuc divisa insidet, cuius particulae ad capillaria peripheriae vascula delatae ob asymetram earundem magnitudinem ac figuram horum diametros aegre subeunt, & aliquantulum immorantes ceteris appellentibus cohaerent, quorum coalitus, cum ad illam magnitudinem perveniat, quae plurimas arteriolas obstruat, seu talis fiat obstructio, ut circulationis leges magis perturbet, febrem exacerbari necesse est.

Inte-

(a) V. Cap. 5. Sect. 1. huius de Febr. malign.

Interim, cum ex accelerato fluidorum, ac solidorum motu, pene referentur vasa, ac obstruentes moleculæ ex arteriis in venas depellantur ex angustio in latius spatium transeunt, a se invicem disiunguntur, sanguinique circulanti prior cessat resistentia, vel saltem imminuitur, donec prædictæ moleculæ per cruoris massam divisæ excurrant, quo tempore febris remittit, sed cum ad capillares arteriolas rursus deferantur, ibique haerentes paulatim coagmententur, aucta sanguini circulanti, cordique propellenti resistentia febris exacerbatio redit.

Vel extra cruoris massam existit eadem febrilis materia, ac in ventris visceribus eorumque secretoriis delitescit; horum ideo succi cum depraventur, cruoris massam coinquinant, non immediate, ut nonnulli putant, hoc enim circulationis ordo non permittit, sed mediantibus liquidis, quæ cruoris massam ingreditur; si E. G. in hepate bilioso succo febrilis materia immisceatur, aut ipse biliosus succus vitiata eius textura febrilem materiam suppetat; hic, sive per hepaticum, sive per cysticum, prout in hepate, aut fellea vesicula vitiosus succus elaboratur, in commune ductum ad intestinum deferitur, in quo chylo immixtus sanguinem adit; vel in mesenterio, seu eiusdem glandulis, quarum succus ad diluendum chylum destinatus, eidem pertranseunti febrili semen inserit, vel in ipsis intestinalibus glandulis, aut ventriculi, quarum febrile farci-
men per easdem vias in sanguinem traducitur.

Quo maior sit vitiosarum molecularum aggeries, eo maior erit glandularum, ac minimorum vasorum infarctus, proinde longiores, aut vehementiores exacerbationes. Longiores, & minus vehementes, si fibrarum tonus aliquantulum laxus, vel nimis rigidus sit, solidaque minori momento fluida impellendo haerentes moleculas non nisi aegre, ac maiori oscillationum numero eliminare poterunt. Hinc protractis ob naturæ inertiam opportunis separationibus in penitioribus locis, nempe in ventris visceribus, in quibus lente fluit sanguis, ac remota solidorum vis, prædictæ moleculæ congeruntur, præsertim si febris initio aliquod infarctus detegatur, ac enormes eorundem vasorum obstructions fiant, ex quo huiusmodi febres in lentas quidem, sed contumaces, magisque periculosas commutantur, præcipue si obstructions hepar, aut mesenterium afficiant.

Vehementiores vero, & magis acutæ, si solidorum tonus valde elasticus sit, ac nervosum, seu membranofum systema ataxiis, effreni, & inordinato motui, sive spasmodicis crispationibus obnoxium sit, obstructis enim capillaribus arteriis, hæc a sanguine jugiter appellente magis distenduntur, in quem elastica vi contranitentes vehementer oscillant, quemadmodum in eundem sanguinem retardatum, magisque resistentem suas accelerant, intenduntque vibrationes, ideoque vehementior, magisque acuta percipitur febris.

Huc accedunt ex arteriis prætermodum distensis violente mem-
brano

branofarum partium distractiones, nec non ab angulosis moleculis nerveas fibrillas ferientibus irritamenta, quae spasmodicae crispationes excipiunt; haec vero vasculorum diametros saepe coarctant, ita ut progressivus sanguinis, ceterorumque fluidorum motus huc illuc intercipiatur; unde periculosa stagnationes, in quibus stagnantium liquidorum textura (a) adeo pervertitur, ut membranoso systemati infensa sit, idemque talibus irritamentis afficiat, ut febris pernicio-sae, & malignae characterem prorsus acquirat (b).

Quo frequentior igitur sit febris continuae exacerbatio, eo periculosa erit ipsa febris, quare omnium praedictarum periodum habentium maximum periculum portendit Hemitritaeus, minus quartana.

Nihilominus quaecumque febris continua periculi expers non est, peior vero composita, quae exacerbationes patitur; in his enim recrudescunt symptomata, ac in maiorem vitae discrimen aeger inducitur; ideo Hippocrates (c), ait, *febres quaecumque non intermittentes tertia die fortiores fiunt, magis periculosae.*

Concludendum tamen est periculi gravitatem ex vehementiae febrilis gradu, eorumque symptomatum saevitia deducendam esse, ita ut quartana simplex continua, licet ob rariores exacerbationes minus periculosa consideretur, tamen

cum diris symptomatibus comitatur, ac vehementior se ostendit, ipsa quartana duplici, aut tertiana magis pertimescenda erit, & ita tertiana simplex magis, quam duplex, ipsaque Hemitritaeus; quae quidem maximi periculi plerumque est, quia imi ventris viscerum inflammationes affert, vel ab illis originem ducit, praecipue ventriculi, unde vomitus, cardialgia, lipothymiae, quibus lethargus, aut delirium superveniunt.

Curatio febrium periodicarum in cunctis modo descriptis, pene eadem construenda erit, ac non, nisi pro symptomatum varietate diversisque corporis affectionibus, varia esse debet.

Remedia itaque praescribenda eo collimabunt imprimis, ut febriles recrudescantiae cohibeantur, & gravia symptomata leniantur, deinde, vel natura crudiatum infarctu oppressa exoneretur, vel quocumque modo ad materiae febrilis secretionem adjuvetur.

Si vasorum plenitudo emineat, sanguinis missio non omittenda, immo iteranda easdem ob rationes, quas pro aliis acutis febribus adduximus, idemque venae sectionis ordo, & locus servandus, ac in illis symptomatum natura semper respicienda.

Universales inunctiones, si de universali musculorum, praesertim dorfi dolore queratur aeger, atque cutis ariditas persentiat, opportuna

(a) Cap. V. Sect. 1. huius, & Cap. XVI. Lib. I. (b) Cap. V. Sect. 1. (c) Sect. 4. Aph. 43.

portunae erunt, nec non ventri necessariae emollientes unctiones, vel fomenta, si tensio, durities, aut dolor prodeat.

Capiti quoque acuto dolore laboranti pertinacibus vigiliis, aut delirio affecto, quae omnia rigidam membranarum, ac ipsius cerebri fibrarum tensionem arguunt, proficuae erunt unctiones emollientes, & anodynae, ut ex Unguento Alabastro, Populeo, Oleo Viol., Hyosc. aut Papavere, vel potius fomenta ex decoctione herbarum emollientium, & anodynarum, ut Nymphaeae, Lactucae, Solatri, Semper-vivi, fl. Samb. Chamom. Papaveris, quae fomenta unctionibus sunt praeferrenda, quia haec fibras contractas laxant, non minus ac unguenta, & olea, perspirationis vero oscula non obstruunt, sed patentiores reddunt.

Nec pediluvia sunt aspernenda ex similibus decoctionibus parata; nam haec pedum vasa laxando e superioribus ad inferiora sanguinem revocant.

Enemata quoque refrigerantia, & anodyna iisdem indicationibus evidenter satisfaciunt.

Quoad interna remedia, purgantia imprimis sunt expendenda, utrum convenient, quod a primarum viarum infarctu omnino pendet.

Hic tamen animadvertendum saepius in his febris periodicis, quam in simplicibus, & homotonis purgantia

convenire; siquidem exacerbationes cum extranearum, & vitiosarum partium in humoralem massam ingressu excitentur, nisi cavitates eorumque glandulae pravis succis scatentes depleantur, ipsarum exacerbationum fomes non extinguitur, sed augeri permittitur.

Purgantia ex lenientibus, blandisque sunt eligenda, ne solida ad effrenes motus provocentur, nervique in perniciosas crispationes inducantur; praeterea purgandi modus, & viae opportuna sunt examinandae, per quas glandularum infarctus maiori facilitate, & conferentia imminui queat. Si nempe stomachi nausea, linguae superficies, faucesque viscosae, & ad vomitum inclinatio pateat, blandum emeticum adhibere, & ita per conferentem viam naturam exonerare oportebit, juxta tritum illud Hippocratis (a), quae ducere oportet, quo maxime natura vergit per loca conferentia eo ducere convenit, & (b) si qualia oportet purgari, purgantur, confert &c. Hoc peracto, nisi notabile imi ventris glandularum farcimen subsistat, ad febrifugum confugiendum est, quod laudano commixtum ad vehementem solidorum impetum cohibendum, & ad exacerbationes promte sistendas mire prodest, quemadmodum celeberrimus (c), Franciscus Torti (d), & praelaudatus Gourraigne testantur. Si vero praedictum in imi ventris visceribus farcimen detegatur a febr-

(a) Aph. 21. sect. 1. (b) Aph. 25. (c) Therapeutice Spec. ad febres periodicas perniciosas. (d) De feb. cont. essent.

febrifugo, seu Ch. Ch., quam fieri potest, abstinere debemus; ne vasculorum obstructio augeatur, ac lethalis fiat morbus, si E. G. hepatis secretoria vasa a lentefcente bile infarciantur, arteriolae, aut venae portae ramuli arteriarum munere fungentes comprimuntur, eorumque diametro angustata sanguis difficulter traicietur, ac formidabilis stagnationis periculum imminebit, quam aegri interitum plerumque sequitur.

Si mesenterii glandulae notabili cacochylia turgeant, haerentium succorum moleculae eo magis coagmentantur, induranturque, ac in scirrhosos tumores saepe degenerant, qui utpote indissolubiles, contumaci febre aegrum ad mortem ducunt. De his funestis eventibus quotidiana praxis nos certiores facit, eorumque mechanica ratio nos non latet; nam febris cum sit naturae conamen, juxta celebrem Sydenhamii definitionem ad morbosam materiam expellendam, quotiescumque febrifugum adhibeatur, huius conamen, vel tollitur, vel infirmatur; quare si febrilis materia eius naturae sit, & consistentiae, vel etiam si iis in vasculis haereat, quae a corde remotiora sunt, quibus lente fluida moventur, ut ad illam eliminandam tot solidorum ictibus, ac tanto impetu praeditis indigeat natura, quos nisi per febris progressum assequi possit; ideo febrifugo intempestive adhibito modus tollitur, quo eadem febrilis materia eiiciatur, aut solvatur; haec autem aliquandiu haerens eo magis con-

densatur, fluidisque appellentibus, & interclusis magis coacervatur, ita ut sanguifera comprimat vascula, sanguinisque ex arteriis in venas tractionem impediat, proinde stagnationes, ac peculiare viscerum inflammationes producat.

Illis quoque summa circumspeditione exhibendum erit, quorum sanguis cacoehymus, crudis heterogeneisque particulis refertus; etenim aeger ut a febre omnino evadat, ac legitime convalescat, praedictas vitiosas moleculas repetitis solidorum ictibus, vel conterere, donec sanguineorum globulorum figuram acquirant, vel per idonea secretoria eliminari, vel utrumque fieri necesse est.

Si igitur febrifugi actione solidorum intensa vis inopportune minuat, eorumque vibrationes remittantur, neutrum consequimur, sed lethales decubitus, aut pene inextricabiles congestiones subsequi solent.

His exceptis plerumque felicem febrifugi usum experimur, in quo eo maiori fiducia perseverandum, quotiescumque critica separatio se manifestet. Febrifugo tum opportunum erit aliquid commiscere, quod naturam ad crisin inceptam alliciat, V. G. si ad sudorem inclinet, sudorifera, si ad diuresin diuretica, si ad evacuandum cathartica Ch. Ch. addenda erunt, quemadmodum, & alexipharmaca, si in febre aliquid malignitatis detegatur.

Ceterum diluentia non sunt omitenda, siquidem febrilem aestum temperant, sanguinis rareficientiam

com-

compescunt, solidorumque effrenes motus, aut crispationes leniunt; praeterquam quod ad quamcunque secretionem perficiendam naturae vehiculo sunt.

Labentibus autem viribus, languidoque pulsu, cardiaca, & confortantia remedia veluti in aliis acutis febribus eodem ordine, ac distributione procedendum erit.

Declinante febre aeger purgandus prout opus sit, quibus tantummodo cavitates, seu stomachus crudorum succorum sarcina opprimitur, quandoque lenientibus, quandoque detergentibus, seu digestivis vicissim operandum; quibus vero viscerum infarctus deprehenditur, specifica deobstruentia sunt exhibenda, atque epicratice purgantia, quorum praestantius Rhabarbarum; huius tamen, vel tinctura, vel extractum, vel ipsa substantia, prout aegri temperamentum, vasorumque tonus requirat; idcirco plerique medicorum rationalem medicinam profitentium Rhabarbarum non solum, sed aliquo leniente immixtum, veluti Cassia, extracto Polypodii, aut alio idoneo, aegrove conveniente purgante praescribunt.

SECTIO III.

De Febribus continuis lentis.

CAPUT I.

De Febre hectica.

Inter febres continuas lentas primum locum hecticae debemus, cuius notas nemo profecto mortali-

um ignorat; eam scilicet ad universalem corporis emaciationem tendere, ideo a pluribus non solum recentioribus, sed etiam veteribus febris habitualis vocata fuit, inter quos Galenus, qui febrem hecticam esse in habitu affirmat, ex quo difficillime curationem admittit.

Febris hectica, vel est essentialis, de qua hic agimus, vel dependens, & symptomatrica; essentialis hecticae causa proxima est quidem vasorum, praecipue capillarium, ac liquida alba continentium praeternaturalis exinanitio, atque exsiccatio; a colliquativa distinguitur ex sequentibus.

Primo, in illa brevi temporis spatio corporis tabes efficitur; secundo, colliquativa febris acuta, & vehemens est; tertio, ipsa tabes ingentibus evacuationibus subsequitur.

In tres gradus passim dividitur, qui maiorem, aut minorem emaciationem respiciunt, quorum tertium marasum vocant.

Ab essentiali symptomatrica dignoscimus, quippe re ipsa ab aliquo organico morbo pendet, veluti pulmonum tuberculis, vomica, ulceribus, aliisque affectionibus, quas phthisis consequitur, hepatis tumoribus, vel frigidis, vel phlegmonosis in abscessum desinentibus; mesenterii strumis glandulisque scirrhosis, quae febrem hecticam, hypochondriacam constituunt, intestinorum ulceribus, renum, aut vesicae, vel etiam externis abscessibus,

quibus maligni, & cancerosi tumores praecedunt.

Praedicta igitur morbi lenta, & continua febre comitantur, quae hectica quidem est, quia corpus paulatim emaciat, vel ex se ipsa; diuturna enim febris corpus necessario extenuat, exsiccatque, vel ex puris confectione, succorumque, praecipue alborum, consumptione, quibus nutritionis materia solidae partes defraudantur.

Hanc itaque febrem hecticam symptomaticam appellari juvat, & ab essentiali distinguere, propterea quia medici opus in visceris, aut cuiuscunque partis affectae, ex qua febris ipsa pendet, cura prorsus versari debet.

Sed de hac differere ad institutum nostrum minime pertinet, ideo solius essentialis hecticae naturam explicare conabimur.

Essentialis huius febris naturam plane explicabimus, si Galeni sententiae, ac definitioni, quae mirum in modum hic arridet, inhaereamus: nempe *hecticam esse febrem in habitu*.

Pro habitu corporis nil aliud sese offert, quam solidorum systema; hac igitur definitione febrem hecticam pro humorali eundem auctorem non habuisse patet, eamque ab humoralibus distinctam iri voluit; & sane hectica essentialis solidorum vitio potissimum oriri evincitur, videlicet ex aucta contractili fibrarum vi, qua membrano-

fae partes, proinde vasa, utpote ex membranis constructa, praetermodum contrahuntur; quare coarctato capillarium arteriarum diametro circulanti sanguini resistencia augetur, eiusque in venas progressus retardatur; hinc necessario febris excitatur, siquidem cor, arteriaeque ex praepedito sanguinis progressu magis gravatae crebris oscillationibus se exonerare conantur.

Veruntamen non solum sanguifera vasa, sed etiam serosa, & lymphatica, ita constringuntur, ut homogenea fluida paulatim excludant, atque exsiccentur, quod corporis maciem constituit; crassities enim, & nutrimentum corporis ab universali vasorum repletione pendet (a), ut superius innuimus. Huiusmodi autem vasorum exinanitio, & exsiccatio non ex fluidorum defectu oritur, quoniam horum effusio, saltem sensibilis, veluti in colliquativa febre non observatur; ergo corporis macies, & ipsa febris hectica solidorum vitio potissimum oritur.

Lente procedet haec febris, primo, quia solidorum vitium paulatim fit, ac fluidis resistencia sensim augetur, secundo, quia eorundem solidorum fibrae adeo rigidae sunt, ut breves edant oscillationes, tertio, quia sanguis aegre in venas migrans minori celeritate ad cor remeat.

Adolescentes, ac juvenes huic morbo obnoxii sunt, siquidem naturae

(a) Lib. I. cap. 3. de Nutritione.

turae lege solidae partes durefcere incipiunt, eorumque vis contractilis augefcit; idcirco corporis incrementum fiflitur; crefcit enim corpus, donec fibrarum, vaforumque fyftema datum flexilitatis gradum fervet, quo mediante tenuiffima vafcula liquida fubeuntia non folum excipere, fed ab ipsis nitentibus dilatari queant; unde corpus incrementum accipit, ac in trinam dimensionem extenditur.

Ineunte igitur juvenili aetate minima vafcula dilatationis terminum aflequuntur, quippe eorum tunicae haerentibus fluidis craffefcunt, illorumque nifui magis refiftunt, ob fortiorem elementarium partium cohaefionem (a); quare cum summam contractilem vim naftae fint, minimorum vaforum diametros fenfum coarctant, ita ut ab appellentibus fluidis fenfum non diducantur, ac minorem imprimis fluidi portionem recipiant, deinde minimam, ac poftremo nullam admittant, ex quo eadem vafa folidefcunt, & arefcunt, corpusque paulatim in extremam talem inducitur.

Membrana adipofa ex pinguedinofae fubftantiae defectu exficcat, quae per fecretoria vafcula jam conftricta permeare nequit; mufculi quoque, qui membrana adipofa involvuntur, eo magis gracilefcunt, atque contrahuntur; hinc offa, eorumque protuberantiae, extrema cava, & fulci in enutrito corpore ipsis mufculis cooperta, jam dete-

guntur, ac in profpectum veniunt. In facie, quae magis eminet, offium temporalium cava, ac proceffus ad zygomaticum extenfus, nec non maxillae fuperioris, & inferioris fe oftendunt; nafus fit acutus, oculi concavi.

Ex mufculis palpebrarum orbicularibus jam contractis, & arefactis non raro connivent palpebrae, ac aegre attolluntur, univerfa cutis rugofa, & afpera, fed praecipue in fronte, quia tum membrana adipofa, tum mufculi, cui fubftrati funt, quamque diftendebant, exficcantur.

Contracta cute fanguifera vafa per ipfam perreptantia constringuntur, nec fanguinem admittunt, unde naturalis, & rubicundus color obliteratur, pallefce facies, & cadaveri fimilis evadit.

Univerfalem calorem fenfu percipit aeger, praecipue in volis manuum, ac pedum, qui etiam attingentis digitos ferit, quoniam humidae fubftantiae defectu acuitur febrilis calor, & ubi fenfus exquisitus eft, ibi maior ipfius caloris fenfatio.

Huiusmodi folidorum exarefcencia quotidie augefciente, obtufisque vafculis lymphaticis, nec non oleofam, & pinguedinofam fubftantiam fecernentibus, tum lympham, tum ipfa pinguedinofa fubftantia propriis vafis exclufae retrogrado motu per humoralem mafsam vehuntur, ac per alienos meatus fymp-

Dd 2

maticae

(a) Cap. 1. lib. 1.

matice eliminantur; quapropter perenni plerumque sudore oleaginoso, & crasso corpus, praecipue noctis tempore, madet, quippe lymphæ pinguedinosa substantia commixta cutaneos porulos subit, vel renum tubulos, ac oleaginosam urinam, araneorum telis similem superficiem habentem, reddit, vel denique glandularum intestinalium excretoria, ac perniciosum alvi fluxum producit.

Si vero neutra harum secretionum se prodeat, lethales, vel saltem minime salubres decubitus superveniunt. Lethales, si internis, nobilioribusque partibus fiant, ut in pulmonibus, qui in huiusmodi febribus magis obnoxii sunt, ideo hectica essentialis saepius in phthisim degenerat.

Obnoxii sunt imprimis pulmones, quia ex contractis vasculorum, five glandularum ad bronchia humectanda destinatarum secretoriis, pulmonares vesiculae, ac membranae bronchiorum, & asperae arteriae annulos induentes arescunt, eorum fibrae crispantur, vasorumque capillarium diametri coarctantur, per quae sanguis aegre traicitur; quapropter in iisdem lentescens saepe stagnat, ac novo sanguini huc appellenti resistit, ex quo ipsa vasa superiora turgescunt, & obstruuntur, unde tumores, qui suppurantes in abscessus, & vomicas abeunt. Interdum vero ipsa materia lymphatica, aut serosa intra bronchiales glandulas, vasculaque detenta condensatur, & coagmentatur, nec non in sicca, duraque tubercula

paulatim excrescit, qui difficulter suppurantur, sed membranas immediate, vel mediante fluidorum regressu irritando, ac distrahendo assidua, & acerba tussi aegrum afficiunt; his postea rauca, & clangorosa vox subsequitur, siquidem secretorii lymphæ tubuli ad tracheam irrigandam destinati ita constringuntur, ut proprium fluidum omnino excludant; hinc fibrillae internam illarum partium membranam construentes arescunt, & crispantur, scabramque reddunt superficiem, in qua aer per eandem fistulam expulsus praeternaturales init vibrationes, ac in prominentes sulcos incidens confuse repercutitur, asperumque reddit vocis sonum; muscoli quoque laryngis, & arytaenoidearum praecipue cartilaginum, & epiglottidis ita exsiccantur, ut proprium officium exercere nequeant, quo mediante larynx, & glottis constringitur, ac dilatatur, & aerem e fistula exeuntem diversimode percellit, impellitque, unde varius eiusdem vocis tonus, sed semper naturalis, modo vero ipsi muscoli arefacti contrahuntur, ipsam laryngem, & arytaenoideas cartilagines coarctant, eorumque motum oscillatorium, quo ad vocem modificandam dilatantur, & constringuntur, impediunt, cohibentque, ideo aeger raucam, nec sine conatu edit vocem.

Ex modo dictis facile quisque intelliget, cur ungues incurvantur, & capilli e capite defluant; nam haec nil aliud, praeter fluidae substantiae

stantiae inopiam, solidorumque extremam siccitatem pro causa agnoscunt.

Diversi huius morbi gradus diversam quoque prognosin efficiunt. In principio haud tam laboriosam admittit curationem, dummodo cognoscatur, in progressu vero admodum difficulter curatur.

Postquam igitur insignis corporis emaciatio, atque extenuatio supervenerit, extremisque symptomatibus comitata, veluti crasso sudore, oleoque scatentibus urinis, aut diarrhoea, unguium curvamine, capillorum defluxu, aliisque; tunc de aegro sane conclamandum est.

Horum febricitantium casus magis, vel minus funestus esse potest, etiam ratione temperamenti, ac naturalium corporis affectionum. E. G. periculosior erit in iis, qui siccum aridumque corporis habitum nacti sunt, quam qui mollem, sufficientique humiditatis copia praeditum.

Curativae indicationes ad duas tantummodo rediguntur, quarum etiam tanta est inter se connexio, ut unam sine altera amplecti nequeamus, nempe solidorum fibras contractas humectare, & laxare; deinde corpus contabescens enutrire; valde itaque connectuntur hae indicationes, quia contabescens corpus nequaquam enutriripotest, quin solidorum fibrae arescentes, & contractae prius laxentur, emollienturque, siquidem nutritio in vasorum minimorum repletionem consistit, vasorum autem repletionem, nisi praevia dilatatione, nec vasorum dilatationem, nisi praevia fi-

brarum mollitie, ac flexibilitate assequi unquam valeamus.

Ut igitur hecticae curationi operam demus, illa perscrutanda erunt auxilia, quae solidorum fibrarum mollem, ac flexibilem reddant.

Inter chirurgica remedia phlebotomiam ratione morbi minime convenire quidem videtur, nec in principio, nisi quaedam circumstantiae, veluti naturalis sanguinis evacuatio suppressa, haemorrhoidum, vel narium, vel menstruum, illam postulent, in progressu vero, & properante macie ab indicationibus toto caelo distat huius remedii indicatio; etenim sanguinis missio exinanita vasa eo magis evacuat, proinde corporis maciem augeat.

Universales, & emollientes unctiones, quae cutaneas fibras laxant, vasorumque perreptantium tunicas flexiles reddant, perutiles erunt, veluti Unguentum resumptivum, oleum nucleorum pineorum, amygdalarum dulcium.

Praestantior tamen est balneorum aquae dulcis usus, dummodo in morbi principio, viribusque adhuc vigentibus illa adhibeantur; equidem humor eorundem tepidus in peripheriae porulos nonnihil penetrans rigidas, & contractas cutaneorum vasculorum tunicas remittit, atque contenta fluida moderate rarefaciens ipsa vascula dilatat, eoque magis, quia ratione aequilibrarii alia fluida vicinis vasculis lentescunt, ac pene intercepta accersit, & ita progressivum eorundem motum illuc promovet, vasorumque ariditati, & exsiccationi resistit

sistit (a), propterea sicuti nostri corporis fibrae, five immediate, five mediantibus aliis inter se cohaerent, atque consentiunt, ideo laxatis externis fibris etiam internas remitti rationi consentaneum est.

Inter pharmaceutica, utrum purgantia, nec ne convenient, esset disquirendum, quae cum praedictis indicationibus adversentur, excludenda videntur, tamen, si stomachi infarctus feбри coniunctus exploretur, blandis lenientibus hunc eliminari necesse erit, saltem, ne adhibendorum remediorum actionem infringat, eorumque substantiae solutionem impediat, unde crudorum sucorum cumulus augeatur.

Febrifuga hic locum non habere ex adhuc dictis satis constat. Tunc tantummodo ad illa confugere licebit, si humorale aliquid accedens febris exacerbationem promoveat, tamen periodicam, adeo ut aeger praecipiti passu mortem obire periclitetur; ceterum in febre simpliciter hectica omnia febrifuga vel nocua, vel supervacanea esse puto.

Nocua erunt, si intensa amaritiae, ac stypticitate polleant, qua solidae partes devinciantur, ac rigidiores fiant, quoniam vasa, ac membranae, quin exoptatam mollietatem, & flexilitatem ad se dilatandum acquirant, eo magis contrahentur; Nocua pariter, si exaltandi vi polleant, qua solidae partes stimulo affectae ad vehementiores

oscillationes proritentur; his enim lymphaticae substantiae, de qua indigemus, ulterior fiet dissipatio.

Minus nocua erit Ch. Ch. temperata amaritiae, nec exaltanti natura donata, verumtamen, nec pro absolute innocua habenda est, quippe saltem stomachum inutili pondere gravat.

Specificum febris hecticae remedium, ceterisque omnibus, quae excogitari possunt, praestantius est lac, hoc quidem, lymphatica substantia abundans corpori homogenea, fibras humectare, laxare, & partes enutrire aptum.

Antequam lac exhibeatur, quaeenam illius species convenientior sit, discutiendum.

Muliebri magis congruum est, utpote primum naturae alimentum, quo nostrum corpus enutritur, & crescit. Secundum vero locum tenet asininum, quod prae ceterorum animalium lacte diluit, humectat, fibrasque laxat; huic succedit per analogiam caprinum, postremo vaccinum, quod crassioribus moleculis, ac minori feri copia, quam priora constat, ideoque ad nutriendum aptius. In pluribus tamen digestionem aegre subiicitur, sed coagulatur, & acefcit in primis viis; eorumque moleculae in humoralem massam traductae oscillatorio solidorum motu, ac vasorum traiectionibus haud satis conteruntur, ut sanguineam, aut lymphaticam naturam assequantur, quare

(a) Sennertus, Hoffmannus sect. II. Cap. XIII. Med. Syst. T. 4. Prosper. Alpinius de Med. methodo Cap. 6.

re ad extrema arteriolarum perductae lente progrediuntur, in secretoria vero glandularum, ipsisque glandulis haerent, diuque stagnant, donec intestino calore effervescentes naturalem texturam amittant, ac in deteriores succos notabili acrimonia praeditos coagmententur, quibus acutae febres, cibi fastidium, cardialgiae, vomitus, dolores excitantur.

Advertat igitur oportet medicus subiecti dispositionem, cui lac vaccinum ex morbo indicante praebere statuit, quam si perspicue detegere nequeat, ab effectu, lac ipsum pauxilla quantitate exhibendo, sensimque augendo eandem explorare facile poterit.

Insuper idem lac diluere tutius erit decoctione aperitiva temperante ex radicibus Asparagi, Apii, Capillo Ven., & similibus, quibus etiam ebullitionem fieri etiam opportunum credimus. Nihilominus etiam praevis his cautionibus, si vaccinum lac nocumento fore videatur, aut nocuum experiatur, ipsumque muliebri recuset aeger, asininum, aut caprinum capiendum erit ad Lib. X., vel XII. Saccharo commixtum mane, & fero.

Tamen, si febris non remittat, nec corporis macies cohibeatur, totum alimentum in lac convertere, seu lacteam dietam inire opus erit, vel saltem hora prandii, & coenae pulmentum tantummodo permittere ipso in lacte coctum, aut offam, quae panis fermentati taleolis ipso lacte demersis sit; haec tamen respu-

entibus aegris, ipsis indulgendum, ac pulmentum in iure vitulino coctum concedendum est, huiusmodi autem pulmenta oriza, aut hordeo constare debent, cuius etiam succus expressus magis conducit, quam grana. Hic animadvertendum lac pauxilla quantitate primis vicibus exhibere, sensimque augere, cautius quidem esse, praecipue, si aeger illum nunquam hauserit; hac enim methodo ad lactis digestionem stomachum melius disponi evidens est.

Iis vero, quorum gustus lac prorsus respuit, vel stomachus nullo modo digerit, decocta incrassantia, nutrimentum reparantia substitui debent, veluti ex radice Chinae, carne vitulina, vel ranarum, caudis, & chelis Cancrorum fluviatilium, semin. quat. frig. mai., Papav. Cannab. emulsiones ex Amygdalis dulcibus, sem. Pepon., & Confecto Diacodio paratae. His adiungi possunt pulveres incrassantes, scilicet cancrorum fluviatilium in furno exsiccatorum, vel pulvis Haly. Ab., quae ex gummatibus, & seminibus refrigerantibus, & incrassantibus constat.

Rursus illis, qui imbecilliori stomacho donantur, atque nimis incrassantibus remediis opprimuntur, destillatis uti oportebit ex lacte vaccino cum testudinibus, limacibus, herbisque refrigerantibus prius decocto, veluti lactuca, portulaca, soncho &c.

De chymicis remediis, nec verbum facio, quorum celeberrimum, specificum Poterii, horum enim insignis praedicata virtus experimen-

tis non respondet, nec rationi admodum satisfacit.

Si autem febris hecticae pulmonum, aut aliorum viscerum affectus subsequatur, nempe tubercula, vomicae, & abscessus, tunc phthisicorum cura amplectenda, quae in ius hecticae similis profecto est. Hic tamen adhiberi solent a plurimis etiam balsamica, de quorum vi, & actione, ut quod sentio ingenue exponam, admodum dubito; ipsis namque externis vulneribus applicata, nisi natura ad consolidandum disponatur, proboque gaudeat nutritio succo, inutilia sunt; & e contrario etiam absque balsamicis, si vulnus sufficienter abstergetur, solo naturae opere obducitur.

Quid itaque inferre licebit de balsamorum interno usu, quorum actio, & consolidationis effectus adeo incertus esset, etiam si ipsa balsama naturae miraculo ad visceris affecti plagas afferrentur, iisdemque apponerentur, quemadmodum chirurgus exterioribus mederi solet?

Etenim, nisi vasculorum ex ipso vulnere scissorum, & eorum, quae illis proxima sunt, symmetria, atque cavitates a farcimine, aut crispationibus exsolvantur, & ad naturalem statum reducantur, nisi quoque proborum succorum sufficiens affluxus ad continui solutionem perveniat, externi vulneris obductio unquam obtinebitur.

Quantum igitur abest a naturae legibus, balsamica remedia prius in ventriculū descendētia gastrico

succo commixta, ac post ipsius ventriculi attritionem bilioso, & pancreatico, deinde per chyli vias lymphā, postremo intra cruoris massam delata, immersa, atque subdivisa balsamicam consolidandi vim fervare, eoque magis, quia balsamicae particulae ita commixtae, & subdivisae huc illuc per vasa circulatorio motu vehuntur, nec plagam versus peculiari impetu propelli ratio suppetit, sed vel fortuito, vel post repetitos circuitus eandem pertingunt, quibus circuitibus sanguineam naturam jam afsecutos fuisse credendum est.

Ex quo manifeste apparet; primo fucosa, & inutilia plerumque esse, interdum vero nocua balsamica remedia, quae pro internis ulceribus sumuntur, nisi illius sint proprietatis, veluti Terebinthum, ut in notabili saniosa ab ipsis ulceribus aluvie materiam revocare, & per urinae vias educere possint.

Interdum nocua, si calidiora sint, aromatica, & volatilia, quibus solidae partes stimulo afficiuntur, & ad vehementiores oscillationes excitantur, unde maior corporis extenuatio sequitur.

Secundo, consolidationis opus a natura omnino pendere, quae si proborum succorum abundantia fruatur, illud facile perficit, si vero exhausta sit, quam difficulter assequitur. Quare praecipuum medici officium erit, alibiles, & nutritios extenuato corpori succos indere, quibus fulta natura nostrae intentioni satisfaciat.

CAPUT II.

De Febre lymphatica.

Fbris lymphatica est febris lenta continua, quae ex lymphâ, albisque succis, qualitate peccantibus, exoritur.

Dignoscitur haec febris per mittem calorem, qui vespere, ut plurimum nonnihil augefcit, pulsum parum frequentem, vel si frequens, parvi diametri, leviorisque vibrationis, per tussim, aut raucedinem, aut coryzam, vel si neutrum horum symptomatum, per quasdam lenes, & universales horripilationes calori coniunctas, aridamque cutem, nullam, vel moderatam sitim, urinae, vel crudae, & aquaeae, vel parum a naturali colore recedentes, conspiciuntur.

Proximam, & peculiarem huius febris causam, lymphae, & succorum alborum, ad membranas, & organicas partes irrorandas destinatarum, inaequalem, ac interruptam secretionem esse arbitramur, qua glandulae, sive vascula eorundem secretoria turgescunt, eadem membranosa, & organicae partes laxantur, ac tument, sanguinea vascula per illas perreptantia comprimuntur, sanguinisque liberam traiectionem impediunt, ex cuius regressu aucta sanguinae molis resistentia, solidorum motus intenditur, ac febris excitatur.

Horum liquidorum interrupta secretio, seu oppilatio, si tracheam, & bronchia occupet; bronchiales glan-

dulae, vasculaque secretoria infarciuntur, ac turgescunt, ex quo internae bronchiorum membranae distensionem, ac distractionem patiuntur, quae frequenter illuc appellentibus fluidis, vel ex naturali, ad insuetum pondus expellendum, pulmonum conatu vehementior fit, ex quo ipsae membranae ad tussim proritantur; tussis sicca est, si humor glandulis detentus tenuioris sit molis, & consistentiae, acredinemque ex diuturna saltem stagnatione acquisiverit; humida vero, & crassa, si eadem glandulae copiosam, & crassam materiam contineant, quae in eadem tussi excutitur, atque per os eiicitur.

Huiusmodi infarctus saepe laryngem occupat, glottidem laxat, musculorumque praesertim arytaenoideorum actionem hebetat; unde raucedo, vocem edendi impotentia, vel saltem difficultas; quoniam sicuti vox, aequae ac sonus, ex aeris vibrationibus oritur, haec autem vibrationes, primo, thoracis, & bronchiorum nisu, quo aer sursum pellitur, secundo, ex ipsius glottidis repercussione, quippe cum idem aer ex latiori tubo per angustum orificium egredi cogatur, maiorem celeritatem acquirit, & in arytaenoideas cartilagineas, & thyroarytaenoideos musculos, qui ex thyroidis utroque latere discedentes, unoquoque in sui lateris (a) arytaenoidem parallela directione tendente, supradictum orificium, glottidem appellatum, constituunt, incidit, atque reflectitur, quae

(a) *Anatomie d' Heister.*

quae reflexio ab eorundem musculationum, & cartilaginum, praesertim arytaenoidearum, elasticitate pendet; qua propter, si hae cartilagines, ac musculi catharrali infarctu teneantur, tonum amittunt, atque laxantur, nec aerem reflectere valentes raucedinem portendunt.

Si vero idem infarctus in capitis membranis haereat, seu in nasi interna membrana, ossiumque spongiosorum; haec utpote glandulis, seu secretoriis vasculis ad mucum separandum destinatis contexitur, tumet, nasique foramina aeri transitum praebentia pene claudit, ut os ad inspirandum apertum detinere oporteat. Tumet itaque narium membrana, quia muci secretoria adeo infarciuntur, ut distendantur, ac maius spatium occupent; quare oppressa illorum elasticitate, & contractionis vi eundem mucum eructare non valent, sed crassiori parte remanente, aquea, & fluidior ex ipsorum osculis momento ponderis percolatur: quae affectio coryzam constituit.

Horum infarctuum externa, & procatactica causa, erit procul dubio suppressa insensibilis transpiratio, vel solis calore hyberna fere tempestate, nisi autumnali, & verna; si enim solis calori nos aliquandiu exponamus, vel ad ignem, aut in hypocausto, sive calente quocumque loco immoremur, fluida nostri corporis rarescunt, ad circumferentiam pelluntur, cutisque poruli aperiuntur, postea vero, si in aerem frigidum transeamus, cutaneae fibrillae

rigescunt, contrahuntur, ac transpirationis oscula obturantur.

Hinc transpirabilis materia retro-pulsa alio tendit, & ubi minor solidorum elasticitas invenitur, ibi stagnat. Quandoque igitur in cutaneis vasis, quibus distentis nerveae papillae comprimuntur, ac obtusum dorsi, & lumborum dolorem non sine stupore, & ligamine, nec non horripilationes progignit.

Plerumque tamen, vel in trachea, bronchiisque pulmonaribus, vel in nasi membrana lymphaticus huiusmodi infarctus cogitur, quia frigidus aer, quem inspiramus, easdem partes immediate pertingens secretoria oscula constringit, exhalantem media respiratione vaporem coercescit, lymphaticum humorem bronchialibus glandulis, mucosum vero nasi membrana intercludit.

Haec febris incerto dierum numero terminatur, modo uno, modo duobus, modo tribus diebus extinguitur, modo ad plures extenditur; incerta quoque est naturae crisis, per quam solvitur, quandoque enim per sudorem, quo citius solvitur, quandoque per nasi purgamen, aut anacatharsim, quandoque etiam copiosa transpiratione.

Periculosam minime esse febrem lymphaticam, satis liquet; verumtamen non semel a me observatum fuit, eos, quorum pectoris structura vitiosa, & ad phthisim inclinans in tabidam febrem paulatim, seu repetitis actibus degenerasse, siquidem simpli-

simplices bronchialium glandularum obstructions in tubercula evadunt.

Curatio huius febris in solis diluentibus calidis, & frequenter sumtis consistit, quibus lymphæ stagnantis progressivus motus, eiusque interceptæ separationes promoventur, sive per sudorem, ac transpirationem, sive per anacatharsim, sive per nasi purgamen.

SECTIO IV.

De Febris intermittentibus.

CAPUT I.

De Tertianâ.

Inter febres intermittentes tertianam imprimis consideramus, utpote frequentissimam, quæ sive simplex, sive duplex, in legitimam, & spuriam distinguimus.

Tertianâ legitima passim vocatur a medicis, quæ vehementi rigore, tremore corporisque succussu, ardente siti, vomitu aegrum invadit, cui subsequitur vehemens deinde calor, inquietudo, qua aeger incessanter jactatur, anxietas, urinae rubrae, lingua quandoque arida, & sicca, acutus capitis dolor, postremo in paroxysmi declinatione sudor copiosus; intermittens vero febris species, ac differentiae sunt, quotidiana, tertiana, & quartana, quarum secunda, & ultima in simplicem, vel compositam, seu duplicem distinguitur; quotidiana, quæ quolibet die, tertiana, quæ alternis diebus, quartana, quæ quolibet quarta die aegrumprehendit; tertiana duplex, quæ quotidie, sed

non eodem paroxysmo invadit, primus enim tertio, secundus quarto respondet, quartana quoque duplex, quæ duos sibi sequentes habet paroxysmos, tertia tantum die libera remanente; spuria vero, quæ nullo, aut levi frigore aggreditur, sive vehemens, sive mitis subsequatur febrilis calor, qui non tanta corporis inquietudine & anxietate comitatur, obtusiori capitis dolore, minusque ardente siti, saltem accessionis tempore.

Ut tertianæ febris causam proximam, quam fieri potest exploremus, generalem mechanicæ intermittens febris ideam assequi oportet.

Febris intermittens nil aliud erit, quam interrupta in extremis vasorum sanguinis circulatio ex solidorum, ac fluidorum capillares arteriolas obstruentium vitio, quæ obstructio in paroxysmi calore solvitur, ac post datum tempus redit.

Vitium fluidorum erit, quaecumque heterogenearum, ac male attritarum partium aggeries sanguini commixta, quæ heterogeneae particulae non solum dissimilem ab illa sanguineorum globulorum figuram, sed crassiorem molem, vel saltem viscositatem, & cohaerendi vim nanciscantur.

Haec igitur, donec in cruoris massa divisae, ac dispersae, per maiora vasa vehantur nullam circulatorio motui perturbationem afferunt, at cum ad extrema vasorum perveniunt, ad ea scilicet, quorum diameter unius tantum sanguinei globuli

capax est, facile haerent, aliisque subsequenter coagmentantur, ac sanguinis ex arteriis in venas per eadem vascula traiectionem impediunt; unde ipsius regressus, & aucta etiam maioribus arteriis, & cordi resistentia, ex qua eorundem systalticus motus magis intenditur, & acceleratur, proinde febris, quae cum frigore, & horrore incipit, si lentescientium particularum coacervatio talis sit, ut una cum progressivo motu per cutanea vasa etiam naturalem sanguinis rarefactionem, & calorem sufflaminet, papillasque nerveas comprimens frigoris sensum refert, qui tamdiu durat, quamdiu lentor febrilis in capillaribus arteriis subsistit, & usquequo provocata solidorum vis ad extrema vascorum sanguinem tanto impetu propellat, ut resistentiam superet, ac stagnantium molecularum ex arteriis in venas transitum promoveat. Quo peracto, non solum evanescit frigus, sed jam calor saevire incipit, qui ex accelerato sanguinis motu suscitatur.

Intensae tamen solidorum oscillationes aliquandiu perdurant, donec fluidorum, ac solidorum momenta aequilibrantur, eodem modo, quo pendulum semel motum oscillare non desinit, usquequo inter aerem resistentem, & impetum a vi impellente, sive gravitate acceptum, aequilibrium sequatur.

Eundem quoque effectum in nobismetipsis, etiam sanis experimur, si velociter incedamus, aut quemcumque laborem suscipiamus, etenim post

incessum, ac laborem quiescentibus, crebra respiratio, ac pulsus frequens aliquandiu perdurat, donec solidorum momentum, ob provocatam eorundem in labore elasticitatem auctum, cum fluidorum resistentia naturalem proportionem recuperet.

Postquam febrilis lentor ex arteriis in venas migraverit, ab angustioribus in latiores tubulos pergit, quippe in arteriis vasa conica a basi ad verticem, in venis vero conica vasa a vertice ad basim percurrit; quare cruoris massa permixtus, ac subdivisus ad cor placide redit, ac rursus in arterias pellitur, per quas libere progreditur, donec ad eorundem extrema pervenerit, in quibus primae eiusdem molecularum lentescere incipiunt, aliaeque his succedentes nonnihil haerere, & coagmentari, & sic de ceteris usque dum capillarium arteriarum infarctus hinc inde efficiatur, qui cum talem magnitudinis, aut extensionis gradum assequitur, ut sanguini circulanti admodum resistat, solidorum elasticitas provocatur, proinde febris insurgit, ac novus paroxysmus febrilem periodum constituit, qui vel quolibet die, vel alternis diebus, vel quarto die recurrens febris naturam explicat.

Hic autem periodus, seu febris recursus citius, ac diutius subsequitur, prout lentoris molecularum citius, aut tardius in iisdem arteriis coagmentantur, quod a peculiari, vel ipsius fluidi vitio, vel solidorum affectione pendet. Quod si dignosci posset, peculiaris quoque singularum intermit-

ten-

tentium febrium causa innotesceret.

Ut ad tertianam igitur redeamus, an fluidi vitio, an in solidorum affectione, an in utroque eiusdem efficiens causa consistat, modo disquirendum. Si procatacticas, & occasionales tertianae febris causas perpendamus, non solum in fluidorum, sed etiam in solidorum vitio positam esse comperiemus; equidem tertianae febres aestivo tempore grassari solent, quo calor magis faeviens abundantem reddit transpirationem, fibrasque laxat; iis potissimum locis, quos paludes, vel lacus circumfident, quibus humidus, & coenofus vapor aerem coinquinat; hic cum levior sit, si barometro credamus, quam ficcus, seu non palustris, internum aerem nostro corpore insidentem minus comprimit, qui se expandens, ac rarescens maius supra solidas partes momentum acquirit.

Imminuta itaque solidorum elasticitate, fibrarumque tono, chyli molecule, quae in sanguinem deferuntur, minori impetu propelluntur, ac tardius per extrema vasorum traiciuntur; praeterea ex imbecilliori oscillatoria arteriolarum vi eadem molecule, haud satis atteruntur, nec homogeneam globulorum sanguineorum figuram extremarum arteriolarum diametro congruentem acquirunt; quare easdem difficulter subeuntes haerent, simul coeunt, ac febrilem lentorem efficiunt.

Ex imminuta igitur solidorum elasticitate non solum vitiosis moleculis coinquinatur sanguis, sed ipsae molecule ad extremas arteriolas delatae,

cum forti systole non propellantur, nec progredi queant, coagmentantur, ac febrilem paroxysmum excitant, cui valde molestum frigus praecedit ob pene universalem extremorum vasorum infarctum, qui progressivum sanguinis motum impedit.

Vitio autem fluidorum, si labefactato ventriculi tono, sive nimia ingestorum copia, aut deteriori qualitate onerato idem alimentum, vel ruditer contritum eliminetur, ex quo glutinosus chylus, crudisque particulis repletus in humoralem massam defertur, vel diutius retentum fermentescat, pravam texturam acquirat, eiusque particulae non rotundam figuram, & aequalem superficiem, per quam dulces fiunt, sed asperam, inaequalem, angulisque refertam, per quam acido acres evadunt, accipiunt. Hae particulae chylo commixtae ipsius cruoris massam coinquinant, & in capillarium vasorum anfractibus cohibentur; hinc digestivos succos pervertunt; siquidem ad hepar delatae in venae portae penitioribus ramulis, quibus lente fluit sanguis, coagmentatae bile commiscentur; ad pancreas, vel ventriculum gastrico succo, eiusque glandulis detentae eo magis exaltantur, & aciuntur, ita ut nerveam membranam feriant, ac stomachicos plexus in spasmodicas contractiones inducant, quae vomitibus, & cardialgiis in febris ingressu ab aegro persentiantur, ac vomitus materia modo viridis, modo flava apparet; prima, si eiusmodi succi, e ventriculi glandulis eructati, soli evomantur; secunda ve-

ro, si bile, ex spasmodicis contractionibus, e vesicula in duodenum maiori quantitate eiecta, deinde in ventriculum ascendente, commisceantur.

Ad extrema tandem peripheriae vasa delatae membranofas partes stimulo afficiunt, & animalium spirituum refluxum concitant; unde inaequalis musculorum, & tendinum irritatio proinde tremor, & totius corporis succus, qui saeviente frigore aegrum torquet.

Superata vero stagnantium molecularum in extremis arteriolis resistantia ex provocata vi contractili, multo maior fit solidorum momentum supra fluida, quae in praedictas arteriolas nitentia insignem earundem dilatationem, non sine membranarum, ac tendinearum fibrarum divulsione, universalis corporis dolore, per quem aegri jugiter locum mutant, & anxii videntur, & acuto capitis dolore vexantur.

Tertianae legitimae a spuria caussa ratione intensioris differt, prout ipsa legitima a spuria; hoc est fluidorum vitium in quantitate, vel qualitate, vel solidorum diverso atoniae gradu. Ratione fluidorum maior, aut minor arteriolarum infarctus, nec non maius, aut minus membranarum, ac nervearum fibrillarum irritamentum; primum, a febrilis lentoris quantitate pendet, secundum, a molecularum crassitie, figura, magis, vel minus volatili substantia.

Ratione solidorum, si eorundem fibrae naturali tono, plus, vel minus deficient, vel si rarioris, aut

densioris texturae sint, plus, vel minus elasticae.

Ex his symptomatum diversitas, quae tertianam, sive legitimam, sive spuriam reddit.

Tertianâ febris nihil periculi plerumque portendit, quippe intermittens, quemadmodum ex celebri Hippocratis documento habemus, nec non aliarum intermittentium tutissima, nisi perniciosis symptomatibus societur, veluti syncopalibus affectionibus, sudoris profluvio, insigni delirio, pertinacibusque vigiliis; lethalis quoque, vel saltem diuturna, si in aliquo viscere, ut non raro evenit, potissimum in hepate, ac mesenterio crassiorum humorum fiat decubitus; hos enim solvere plerumque arduum, & difficile, quandoque impossibile experiuntur medici.

Curativae indicationes erunt; vitiosos succos expellere, fluidorum lentorem attenuare, obstructa vascula reserare, amissum tonum solidis restituere, ut crassiores molecule extrema vascula obstruentes validis oscillationibus conterantur, atque eliminentur.

Externa, & chirurgica remedia, quae opportuna esse possunt, erunt inunctiones hypochondriorum regioni applicatae, emollientes simul, ac discussivae, quibus viscerum infarctus facilius destruat. Ipsa venae sectio, quandoque opportuna, imino necessaria sese exhibet, licet ex natura febris minime postulari videatur.

Necessaria itaque iis corporibus, quibus plethora conspicua est, vel sanguinis crassities, solidaque naturae elasticae

elasticae sunt, ne ex fluidis turgescen-
tibus, ac resistentiam augmentibus, vehe-
mentiores solidorum motus continui
fiant, continuamque, & acutam effici-
ant febrem notabili aegri periculo;
praeterea imminuta sanguinis copia
vasa distendente facilius se contrahunt
arteriolae, ac propulsivam vim ad sta-
gnantes moleculas impellendas, ea-
rumque crassitiem attenuandam exer-
cere valent.

Ex internis vero, purgantia im-
primis sese offerunt, quorum, utrum
cathartica, vel emetica febris initio
conveniant, discutiendum.

Si stomachi infarctus se manifestet,
nec aliud quicquam vomitum prohi-
beat, emetico uti expedit; nam saepe
emetico semel exhibito febris ex-
tinguitur, quod expertus est etiam Ga-
lenus (a), qui multos hac febre solo
vomitu curatos fuisse testatur, immo
nonnullas tertianas ita contumaces, ut
medicorum studium deluserint, eme-
tico ad duas vel tres vices ab empiri-
cis manibus propinato profligatas fuis-
se, mihi plures ab aliquibus probatis
viris, ipsisque etiam aegrotantibus ac-
cepi; siquidem emetica tenaces ven-
triculi succos eius glandulas infarci-
entes, eisdemque haerentes inverso visce-
ris motu facilius eiiciunt, quam cathar-
tica, quorum stimulus intestina magis,
quam ventriculum premit.

Praeterquam quod stomachicos ple-
xus irritando solidorum elasticitatem,
diuturna praecipue febre, iam labefa-
ctam excitant, ut febrilem, ac sta-

gnantem materiam terere, aut elimi-
nare possit. Inter emetica tamen, mi-
tiora eligenda esse satius existimo, ne
stomachi fibras in spasmodicas con-
tractiones inducant, & convulsivum
vomitu, aut praecipitem purgatio-
nem pariant.

Post universale medicamentum ae-
gris maxime expetentibus, ac febrilibus
paroxysmis vexatis plurimi medico-
rum ad febrifugum confugiunt, quod
cum bene, vel male suscipiant, ita
diagnosci posse arbitror.

In legitimis tertianis vehementibus
paroxysmis constantibus, quarum effi-
ciens causa non in copioso vasorum
farcimine, sed prava febrilis materiae
qualitate resultat, proficius erit febrif-
ugi usus, eo magis, si febris ad per-
niciem tendat; si vero cruoris massa
crassioribus, rudibusque moleculis re-
ferta sit, refluabile infestetur, imi ven-
tris viscerum infarctus se manifestet,
febrifugum, nisi ad periculum evitan-
dum, adhibere licebit; horum statu-
um discrimen ut innotescat, antece-
dentia, & concomitantia signa sunt exa-
minanda.

Prima, si aeger vorax fuerit, dete-
rioribusque cibis deditus; si animi pa-
thematibus vexatus, gravi corporis la-
bore, intensa, vel diuturna mentis, aut
corporis actione fatigatus, quibus ob
spiritalis substantiae dissipationem, vel
in cerebro suspensionem, eiusque fi-
brarum nimiam tensionem imi ventris
viscera, ac ventriculus naturalem to-
num, cunctaque vasa, capillares prae-
sertim arteriolae, propriam elasticita-
tem

(a) Lib. 1. ad Glauco. cap. 10.

tem amiserint, quod imperfectae digestionis, rudes molecularum chyli attritiones consequantur.

Secunda, si aeger de summo cibi fastidio, oris amaritie, aut visciditate queratur, si hypochondria tumida, & tensa persentiantur, si cutis color flavo-obscurus, & cacochymus appareat.

Hoc in statu a febrifugo abstinendum vel saltem multo tardius adhibendum, ne systaltico solidorum motu intempestive sedato, materiae febrilis concoctionem impediamus, quoniam concoctio in heterogenearum, ac rudium molecularum attritione consistit, cuius ope ipsae molecule capillarium vasculorum subditae fiunt, hinc facilius earum secretio, & eliminatio perficitur.

Nocui quidem effectus, qui febrifugum consequuntur, sunt; maior capillarium vasculorum infarctus, auge-scente materiae febrilis molecularum coagmentatione, qui infarctus in imi ventris visceribus, in quibus lentior per se sanguinis circulatio, implantari solet, ac eorundem pertinaces obstructions, qui quandoque in duros, & indissolubiles tumores degenerant, quare in his casibus febre vix extincta, vel potius cohibita, aut sopita, hypochondria magis tument, durefcunt, novaque febris lenta, sed curatu difficilis oritur, magisque difficilis, si mesenterium prae aliis visceribus infarcia-tur, ut sapienter monet Baglivius.

His exceptis casibus febrifugum prodesse comperimus, quod maxime sperandum, cum natura post, vel in febrifugi assumptione aliquam secretio-

nem molitur, propterea quia tunc ante febrifugum a spasmodicis solidorum contractionibus eandem ita devincit, ut criticas separationes inire non possit, arguere licet.

Quibus autem febrifugum exhibere non convenit, epicratice purgantibus uti oportet, ut viscerum infarctus, vasorumque oppilationes dissolvantur, nec validis solventibus hoc assequi possumus; nam valida solventia membranosas partes nimis feriunt, vel saltem notabili stimulo afficiunt, ita ut e vasis secretoriis serosa colluvies exprimatur, crassiori saepe remanente, ipsaque medicamento substantia ex provocata peristaltica earundem membranarum vitius eliminatur, secus vero leviora, & epicratice solventia; haec levi agunt stimulo, vasa lactea facilius subeunt, & in humoralem massam traducta ad obstructa viscerum vascula perveniunt, eorumque lentescencia liquida invadunt, ac penetrant, tunicas proritant, quarum elasticitas jam devicta excitatur, & ad febrilis materiae expulsionem intenditur.

Praevio itaque universali medicamento, aut emetico, epicratice purgantia adire oportet, inter quae Rhabarbarum palinam praeripit. Hic in sicciore temperamento, rigidaque fibra aliquo leniente commiscere expedit, veluti Cassia, cui Sal Tartari addere opportunum, si stomachi glandulae crudis viscosisque succis infarciantur. Rhabarbari quoque tincturam sali Tartari, vel potius Ammoniaco extractam admodum proficuum expertus sum; diluta enim purgantia magis arrident, quam solida,

solida, cui tincturae quandoque ipsa Cassia cum Rhabarbaro per vices interponenda.

Iis, qui temperamento humidiori, ac debilem fibrae tonum nacti sunt, sicciora, ac magis stimulantia remedia sunt adhibenda, veluti pilulae Ammoniaci, vel Tartareae, Mercurio dulci, aut Rhabarbaro; & aliquot Diagridii granis, quibus acuantur, paratae, ipsumque Gummi Ammoniacum pro quotidiano alterante exhibitum, ac ipso Rhabarbaro, Aloe, & Tartaro vitriolato, aut Sale Ammoniacico coniunctum mirifice prodest, quibus tamen opportuna diluentia, & aperientia superbibenda, veluti decoctiones ex Cichorea, Agrimonia, Fumaria, Ceterach &c. quinque radicibus aperientibus, Rusci, Fumariae, Chelidoniae, Calami aromatici, Rubiae tinctorum &c.

Veruntamen, si febris post dictorum remediorum diuturnum usum quidem mitior evadat, sed non extinguatur, vel per vices redeat, licet hypochondriorum infarctus, sanguinisque cacoehymia excussa videantur; hoc solidorum atoniae tribuendum, propter quam digestionem, ac secretionem imperfecte absolvuntur, alimenterum moleculae ruditer atteruntur, atque extremis canaliculis haerent, unde febriles lentores coagmentantur; quapropter illa eligenda erunt remedia, quae non solum obstructa vasa reserare, sed stomachum roborare, fibrarumque tonum redimere valent. Opportunum erit electuarium de bacis Lauri, aut pulpa baccarum Juniperi, pauco Rhabarbaro, & Cinnamo-

mo, opportuni quoque flores salis Ammoniaci martiati, spiritus salis coagulati, sal Absynthii, quos cum succo Agrimoniae concreto, vel potius eiusdem extracto, aut Gentianae felici eventu saepius exhibui. Ceterum his omnibus praestantiora sunt chalybeata, quae in diuturnis huius naturae febribus adhibita a Patre meo mirifica vidi, & ipse quoque expertus sum, sive forma liquida praeparata, ut mox infra videbimus, sive solida, E. G. Chalybem cum sulphure praeparatum, extracto Aloe, aut Rhabarbaro, Croco orientali, radice Ari, pauca Myrrha, & Cinnamomo, aut essentia Juniperi, & similibus aromatizatum, cui supradictae decoctiones constanter superbibendae.

Quoad specifica stomachi roborantia, hic inter cetera mihi magis arriident sequentia: Elixir stomachicum Hoffmanni, Liquor anodynus eiusdem Mineralis, Tinctura Absynthii Med. Been, vel eiusdem Essentia Helvetii.

C A P V T II.

De Quartana.

Quartanae insultus sequentibus symptomatibus corripere solent, rigore nempe, qui paulatim procedit, pandiculationibus, molesta quadam totius corporis sensatione gravante, & ossa tibiaram praecipue contundente, vehemens deinde factus dentium stridorem, ac tremorem inducit, veluti iis, qui hyemali frigore rigent, faciei, & interdum totius corporis pallor fuscus, ac pene lividus unguium color. Nonnulli mente non constant, &

inania loquuntur, inaequales rigidos, & contractos habent pulsus.

Post duas vel tres horas calor succedit lente progrediens, nec summum gradum attingens, sed plerumque mitis, faucium tamen ariditas, ac sitis, praecordiorum angor, & corporis inquietudo, urina in principio tenuis, & cruda, deinde colorata, sed variabilis, lienis tumescencia antecedit, vel coniungitur.

Vespertinis ut plurimum horis invadit, autumnali tempore, vel declinante aestate.

Antecedentes, & occasionales causae eadem esse possunt, ac in tertiana, tum ratione insalubris victus, tum ratione intemperantiae ciborum, aut liquorum spirituosorum, vel acidorum abusus, vehementes animi affectus, tempestates inaequales, in locis palustribus commoratio, quorum aer acribus recrementis, & exhalationibus refertus inspiratur, hinc nonnullis in regionibus endemia, ut in Pomerania, Westphalia, & aliis quibusdam locis Boream spectantibus, ut notat Hoffmannus (a). Haec & alia quam plurima quartanam febrem progignere valent.

Internae vero, & dispositivae: sic cum temperamentum, & macilentum corpus, in quo & humiditatis inopia fibrarum tonus rigidior fit, minus flexiles, & elasticae membranae, arteriarum genus imperfecte oscillat, eorumque vis propulsiva intercipitur; quare lente progreditur sanguis in vasis capillaribus, & a corde remotioribus,

tum ratione impetus imminuti, tum ratione resistentiae earundem capillarum arteriarum, quae ob ipsam fibrarum rigiditatem aegre dilatantur, & appellentem sanguinem aegre traiciunt, ex quo lentores febriles facillime congeruntur.

Sanguinis, & praecipue chyli in ipsum sanguinem recenter delati moleculae, haud satis conteruntur, ut secretoria vascula subire queant, proinde imperfectae liquidorum separationes, ipsaeque secreta liquida ob diuturnam stasim deteriora fiunt, salinae particulae, utpote graviores, ab oleosis extricantur, deorsum tendunt, atque simul coeuntes asperas, angulisque prominentibus irritantes moleculas componunt, quae membranosis, ac nervosis partibus infesta sunt; haec enim minimis vasculis detenta illarum partium fibrillas feriunt, in maiorem tensionem inducunt, & ad spasticas crispationes sollicitant, quibus vasculorum diametro coarctato, fluidorum circulantium, vel saltem rudium molecularum traectio intercipitur; unde febris, ac imi ventris viscerum, quorum in vasculis lente fluunt per se liquida, obstructiones, praesertim lienis, cuius parenchyma, & vasa laxioris texturae sunt; hinc angustatis per eorundem nervorum crispaturam venae portae ramulis, qui sanguinem ab ipso ad hepar traducunt; Lien, cuius arteriae minus coarctantur, quam venae, quippe durioribus constant tunicis, plus sanguinis recipit, quam remittat, ideo refluyente sanguine, & lympham
quam

(a) T. 4. p. 1. Cap. II. de Febre quartana.

quam illuc per vasculorum lymphaticorum congeriem ad spleneticum sanguinem diluendum copiose affluere evincitur, tumet, atque induratur.

Haec rudium molecularum coacervatio, si capillaria vascula ita obstruat, & regrediens sanguis in arterias tanto impetu nitatur, ut eorundem elasticitatem provocet, & ad frequenter oscillandum sollicitet, febris insurgit.

Posita maiori fibrarum tensione, rigidoque vasorum tono in quartana febre laborantibus, nonnisi fortiori fluidorum nisu, solidorum elasticitas provocabitur, proinde febrilis paroxysmus nonnisi fortiori huiusmodi fluidorum nisu, qui a maiori vasculorum obstructione, seu copiosiori praedictarum molecularum ingurgitatione pendet, excitabitur; idcirco quartana post longius temporis spatium, quam tertiana revertitur.

Ob praedictam fibrarum duritiem non in tam vehementem oscillandivim solida abripiuntur, nec fluida in adeo rapidum motum propelluntur, ideoque haud tam intensus calor excitabitur, quemadmodum in tertiana; vasorum tamen diametro non nihil coarctato, tensisque membranis violenta fiet ex refluyente sanguine earundem membranarum, ac tendinum distractio, quae adeo sensibilem, & veluti ossa contundentem dolorem efficit.

Hanc solidorum affectionem dispositivam esse quartanae febris causam, & illi immediate coniungi, ex dictis phaenomenis ipsam quartanam febrem comitantibus, satis constat, quem-

admodum ex antecedentibus, quae supra attigimus, veluti victus durus, liquorum spirituosorum, aut acidorum abusus, acres exhalationes locorum palustrium.

His omnibus rigidam tensionem solida inire necesse est; Victu enim duro magis exsiccat corpus, duraque evadit fibra, spirituosii vero, aut acidiliquores, nec non acres palustrium locorum exhalationes nervosum genus penetrantes, atque irritantes praeternaturali duritie, ac tensione eundem afficiunt. Ita confluentem, & epidemicam autumnii tempore quartanam saepe fieri nonnulli observarunt (a), praesertim si aestas praetermodum calida, & sicca praecesserit, in qua copiosa fluidarum partium quantitas per transpirationem insumitur, solidae partes arescunt, superveniente vero autumno, in qua aer frigidiusculus cutaneos porulos constringit, transpirabilis materia cohibetur, & alio revertitur, ubi lentescit, crassior fit, & asperitatem acquirit, ipsa vero solida tum ex ambiente frigidiori, tum ex stagnantium molecularum irritamento magis rige-
seunt, vel crispantur, & ita corpus ad quartanam subeundam disponitur.

Quartana febris erit duplex, aut simplex, mitis vel acerba, eiusque paroxysmi longi, aut breves, prout febrilium molecularum aggeries maior, aut minor, eiusque in vasis capillaribus coag-
mentatio citius, vel tardius contingat, citius, aut tardius solvatur, prout ipsarum molecularum natura magis, vel minus aspera, volatilis, aut fixa, deni-

F f 2

que

(a) Sennert. de feb. Lib. VI. cap. 20. Bartol. Cent. 1. hist. anatomiae 95.

que prout membranofum systema magis, vel minus rigidum ataxiis, & contractionibus obnoxium.

Quartana febris, licet pro fecura habeatur, quippe raro ad interitum duceat, tamen valde contumacem, cunctaque remedia interdum eludentem experiuntur medici. Talis est potissimum autumnalis, quae saepe toto hyeme persistit, & usque ad vernum tempus perdurat. Haec autem ini ventris viscerum, & praesertim lienis obstructione coniungi solet, vel saltem notabili sanguinis cacoehymia, non sine vitiosa solidorum tensione, quae praedicta symptomata antecedit, atque comitatur; idcirco periculosa senibus, quia, ut animadvertit Bellinus (a), eorum solida summa ficitate rigescunt; accedente igitur quartana febre ad extremum gradum pertingit ficitas, ac lethalis evadit morbus.

Vere, aut aestatis principio invadens minus contumax, illo enim tempore aeris temperies, vel calor fluida rarefaciens, & ad peripheriam alliciens, solidorum fibras laxat, vel saltem flexibiliores reddit.

Nonnullis spontaneis excretionibus quandoque solvitur, E. G. pustulis, impetigine, haemorrhoidum fluxu, vel etiam dysenteria, eoque magis, si lienis obstructione ut solet, coniungatur, ait namque Hippocrates: *Lienosis difficultas intestinorum superveniens bonum*; haec autem si moderata fuerit, & brevis, ut animadvertit Bellinus, quippe diuturna, & gravis in peiores morbos aegrum inducit, quemadmo-

dum ex alio Hippocratis textu habemus: *Qui lienosi difficultate intestinorum corripuntur iis longam supervenientem dysenteriam, aqua intercutem, aut laevitas intestinorum excipit, & moriuntur*. Huiusmodi nempe affectio spasmodicam intestinalium membranarum crispationem praemonstrat, qua vel lymphatica vasa occluduntur, ac lymphae fluxus prohibetur, vel ipsa vasa lactea, quae cum chylus adire non possit, fecibus commixtus per intestinale tubum descendit, hoc autem lenteriam parit, illud vero ad Hydropem disponit.

Curativae indicationes itaque erunt, primo, ut primarum viarum infarctus, ex quo crudeae, & vitiosae pravorum succorum molecule, sanguinem adeuntes febrilem lentorem augent, per convenientia loca educatur; secundo, vitiosam solidorum tensionem corrigere, & laxare, ita ut vasa fluidorum impulsu facilius dilatari, & vicissim maiori impetu in eadem niti queant; tertio, abdominis vascula ad viscera excurrentia referare, & praepeditas secretiones naturali oeconomiae restituere.

Remedia imprimis chirurgica, & externa, quae praedictis indicationibus satisfaciunt, erunt: inunctiones partim laxantes, partim attenuantes, imo ventri applicandae; universales quoque ad peripheriam, ut fibrae molliorem assequamur, & cutis meatus patulos reddamus; ad hoc tamen balnea aquae dulcis praestantiora sunt, si opportuno tempore, & vacuis a febre

(a) De febr. prop. XXXIII.

bre diebus instruantur, vel saltem fomenta emollientia, & nonnihil discutientia, si viscerum obstructions ex peculiari, vel universali hypochondriorum tensione se manifestent, ad quas etiam internis remediis semper collimare opus est, ut proxima, & pertinacior febris occasio amoveatur.

Ex purgantibus medicamentis, quibus solis, etiam si quartanae curationem obtinere non possimus, nihilominus ad curationis dispositionem necessaria sunt, emetica imprimis considerata, quae si primarum viarum, seu stomachi infarctus se manifestet, maxime conveniunt, ex blandis, quemadmodum solventia, siquidem quartanas vehementioribus medicamentis tractatas interdum exasperari, ex simplici duplicem, ex intermittente continuam fieri praxis nos docet, ac ratio suppetit, nempe fibra, quae praeter modum tensa, & contracta, fortiter irritante quacumque vi, eo magis rigescit, aut contrahitur, hinc febris, vel intenditur, vel in aliud lethalem morbum quandoque migrat. Cassia cum rhabarbaro opportunum erit medicamentum in sicciore praecipue temperamento, quibus etiam sal tartari, si addatur, utpote detergens admodum proficiet.

Febrifugo hic parum fidendum, quotidiana nos docet observatio, licet enim China Ch. sistatur, saepe tamen sedata, non extinguitur, sed paulo post exurgit, cuius phaenomeni ratio ex eo petenda, nempe viscerum obstructions adhuc permanere, vel solidorum tonum valde rigidum esse;

hic enim Ch. Ch. usu non flexibilis, sed iners potius redditur, unde ipsius febris occasio propius adest; ceterum, nisi praevis eiusdem cautionibus, quas in tertiana exposuimus, ad febrifugum confugere licet.

Ch. Ch. purgantibus coniuncta in quartana feliciore eventu adhibetur, quam sola; Rhabarbaro, E. G., & sale tartari commixta, quandoque eiusdem decoctio cum Sena, Poly-podio, ipsoque Rhabarbaro. Si vero abdominis viscera obstructa detegantur, illa eadem deobstruentia, quae in tertiana proposuimus, optime convenient.

Hic tamen peculiare decoctiones aperientes, ac dissolventes, quoniam posita vitiosa solidorum tensione, deobstruentia diluta, vel deobstruentibus diluentia superbibere oportet; sic enim fibras proritando humectamus, ideoque ad flexibilitatem, & elasticitatem eisdem restituendam opportune agimus; e contra deobstruentia sicca, irritando, fibrarum tensionem augent, nec non crispationes, quibus capillaria, & secretoria vascula pene occluduntur, excitant, proinde febrem exasperant, vel in deteriore morbum commutant.

Hae decoctiones, quae Rhabarbarinis, Ammoniacalibus, vel Aloeticis superbibendae sunt, E. G. ex corticibus Tamarisci, Capparorum, ex rad. Ruscii, Asparagi, Acori, Fumariae, Rubiae tinctorum, Saponariae, Ari &c.

Deobstruentia, si forma liquida exhibere velimus, Infusio Rhabarbari sale Tartari, vel Ammoniaco extracta

est praemittenda, in qua postea ipsius Rhabbarbari praedictis alterantibus commixti sequatur decoctio.

CAPUT III.

De Quotidiana.

Febbris quotidiana minori impetu invadit, quam superiores, nempe quartana, & tertiana, levi scilicet refrigeratione praecipue extremorum sine rigoribus, & tremoribus, quemadmodum in praedictis observatur; Accessio quotidiana aequalis, quae nocturno fere tempore, vel summo mane fit, facies sublivida, & subtumida apparet, corpus gravatur notabili in somnum propensione; quibusdam nausea, & lipothymia superveniunt, nec non ventris inflatio, deinde calor mitis, nec sitis intensa, pulsus exigui diametri, nec vibrans, ceteris intermittentibus febribus rarior, aliquantum inaequalis, urinae in morbi principio tenues, & crudae, quoddam interdum sedimentum deponentes, immaturas, & pravas quandoque continentes particulas, progressu autem morbi nonnihil coloratae, & crassiores, alvi feces crudae, pituitosae, flavo colore fere nunquam tinctae, sudoris primis morbi diebus nihil, procedente morbo aliquid in paroxysmi declinatione, paroxysmi longiores sunt, quam in ceteris febribus intermittentibus, quoniam ad quindecim, viginti interdum horas, plus minus, extenduntur. Rara est febris sed contumax, & per integros menses subsistit.

Haec sunt, quae quotidianae legitima junguntur, quae vero succedunt, Cachexia, vel Hydrops plerumque sunt, interdum vero soporosi affectus, ut Coma, & Lethargus. Antecedentes causae, sunt: crudorum, aut viscosorum alimentorum natura, eorumque immoderata copia, vita otiosa, ac fignis, vel mentis labores, aut maerores, tepentes, & humidae tempestates, veluti flante Noto, in locis palustribus commoratio, aegri temperamentum phlegmaticum, atque pituitosum, aetas puerilis magis, quam adulta, sexus muliebris, ac menstruorum defectus, praesertim iis, quae ultimos adolescentiae annos attingunt.

Ex his manifeste liquet, quotidianae febris dispositivam causam esse solidorum vitium quartanae febris oppositum, hoc est fibrae tonus summo gradu imbecillis, eiusque imminuta elasticitas; quare eorundem solidorum momentum fluidorum pondere opprimitur, arteriae capillares fluidorum nisui cedentes promte dilatantur, sed languido renisu ipsa fluida admodum lente propellunt, sanguineae, & crassiores molecule minime perficiuntur, quippe serosi globuli, ex quibus resultant, (a) arteriolarum systaltica vi languescente, ex qua compinguntur laxae coeunt, ita ut, cum ad capillares arteriolas pervenerint, aegre traiciantur, immorentur, ac in serum fatiscant. Augetur itaque feri, & lymphae proportio in vasis sanguiferis, turgescunt serosa, & lym-

(a) V. Cap. 1. Lib. 1.

lymphatica vasa, & ad cachexiam, vel hydropem tendit morbus.

Praeterea chyli particulae in sanguineam massam delatae, ac imbecille praelum subeuntes sanguineam naturam tarde adipiscuntur, ac novo jugiter superveniente chylo crudis, rudibusque moleculis obruitur cruoris massa, quae extremarum arteriolarum meatibus minime congruentes, sed asymmetrae, ac illorum diametrum exsuperantes facile haerent.

His tandem coagmentatis febris excitatur, (a) quae lente procedit, quia solida ex imbecilli elasticitate languide oscillant, nec vehementibus ictibus in fluida nituntur, idcirco haud multum accelerato sanguinis motu levis est calor, tardae secretiones, longi paroxysmi.

Ventriculi atonia ab hoc morbo non disiungitur, immo hanc pravis digestionibus quotidiano insultui materiam praebere, rationi consentaneum est, quippe ructus, nausea, oris inquinamentum, halitus nidorosus, Cardialgia, & alia, quae stomachi repletionem arguunt, quotidianam comitantur.

Vitiosae huius materiae portio, nec non chyli crassiores, & male attritae moleculae per vasa lactea in sanguinem transmittuntur, quae cum extrema vascula difficulter permeent, ipsius sanguinis circulatio in iisdem praeepeditur, & laceffitis nitente fluido membranosis, ac nervosis partibus, febris insurgit, aut exacerbatur. Sub hoc genere puellarum febrem, quae Chlo-

rosis appellatur, comprehendo, cuius febris menstruorum defectum, non quidem causam, sed ipsius symptoma esse, vel saltem ex uno, & eodem fonte menstruorum defectum, & febrem oriri puto, siquidem plures illarum, quibus menstrua nondum apparuerunt, aut suppressa sunt, in alios diversae naturae morbos incidunt, & versa vice nonnullae ex illis, quae Chlorosi laborant, menstruis excretionibus non prorsus orbantur.

Ex solidorum, ac fluidorum quidem affectionibus causa est petenda; solidorum enim tonus, quippe imbecillis, supra fluida necessarium munus minime exercet, sed ab ipso fluidorum momento opprimitur, quare imperfecta fit sanguificatio, sanguinei globuli facile in serosam substantiam abeunt; heterogeneae, & crudeae particulae ex alimentis male solutis, chylisque moleculis male attritis multiplicantur, imi ventris viscera infarciuntur, praesertim hepar, bilis particulae refluentes cruoris massam coinquinant, lymphatica vasa exuberante serosa substantia turgent; unde pallidus, ac subflavus cutis color, ac universalis oedematis principium, febris lenta, quae paucis temporis spatio intermittit, aliquando nullo, & sub continua quotidiana continetur.

Hypogastricae arteriolae ad uterum tendentes obstruuntur, sanguis ad uterum, nisi lente propellitur, nec vasa in illius cavitatem prominentia necessario impetu dilatantur, proinde, nec ad menstrua explenda aperiuntur; sanguis

(a) Vid. Cap. I. 2. sect. huius.

sanguis utpote crudis particulis repletus pulmonaria vasa aegre permeat, quae cum naturali elasticitate, & propellente vi pene destituantur, infarciuntur, ac distenduntur, hinc ipse pulmo praeternaturali fluidorum pondere gravatur, eorumque vesiculae nonnihil coangustantur, quod levem illam spirandi difficultatem, aut quandam anxietatem, quam saepe hoc morbo laborantes experiuntur, parit.

Quotidianam itaque febrem contumacem esse morbum non minus mechanica ratione, quam practice observationibus ex communi saltem auctorum consensu edocti sumus.

Hanc febrem Cachexia, & Hydrops saepe excipit, praesertim, quae modo descriptae Chlorosi jungitur, quae ipsius Cachexiae principium est, quidquid distinguere placeat Etmullero.

Curativae huius febris indicationes erunt, e Cacochymia, viscerumque infarctu corpus purgare, deinde ventriculo, & universo solidorum generi tonum restituere.

Remedia ex chirurgico fonte desumpta pauca sunt, quae conveniunt; missio enim sanguinis nocua esset. Inunctiones resolventes, & discussivae hypochondriis applicatae utique conveniunt, si eorundem inflatio, aut peculiaris durities exploretur, ita, & emplastra stomachica, sive epithemata eiusdem regioni applicata proficere possunt.

Validiora itaque auxilia ex internis remediis sunt petenda.

Purgante universali praemisso, E.

G. Manna cum Tartaro, aut Sena praeparata ad peculiaria deobstruentia, fibrarumque contractilem vim provocantia nos convertere debemus.

Haec sunt ammoniacalia, nempe pilulae de Ammon. Querc. Merc. dulci, pauco Diagridio, aut Mag. Mechac., vel eiusdem Auctoris Tartareae, aut Schroederi, pilulae Cochiae, Foetidae, aliaeque eiusdem generis, quae alternis diebus exhibendae; aut epicraticae purgando, ipsum Gummi Ammoniacum Rhabarbaro, & pauco Aloe coniunctum, quippe stomachicum est, addendo Tartarum vitriolatum, qui viscidos humores incidat, vel, si expandendi, & corroborandi necessitas urgeat, flores salis Ammoniaci martiatos.

Huc quoque pertinere videntur pilulae Becherianae, quae quolibet die sumi possunt.

His vero superbibendo decoctiones aperientes, deobstruentes iis similes, quas in tertianae intermittentis curatione attigimus. Perdurante interim febre, etiam post absolutam purgationem, ad martialia confugiendum, quae etiam levi deobstruente coniungere expedit, veluti tinctura Martis tartarizata, vel aronizata Wedelii, Pilulae chalybeatae ex Fullero, potissimum in Chlorosi Virginum, in qua & ipsum Crocum Martis cum Rhabarbaro, fecula Ari, Trochiscis de Myrrha satis aromatizatum admodum proficuum expertus sum. His quoque decoctiones superbibendae aperientes, & emmenagogae.

NATVRAE MORBI
HYPOCHONDRIACI
EIVSQVE
CVRATIONIS MECHANICA
INVESTIGATIO.

CELEBERRIMIS ATQVE PRAECLARIS
SCIENTIARVM ATQVE ARTIVM
INSTITVTI BONONIENSIS
ACADEMICIS.

ANTONIVS FRACASSINI

Quid mihi hoc rude opusculum in lucem edenti gratum magis, quid-
que iucundius accidere posse sperem, quam sapientissimo gra-
vissimoque vestro coetui illud dicare? Quippe duo in praesenti
mihi redundant beneficia, alterum scilicet ipsi operi decus, ex
quo fiet, ut nec quisquam illud legere recusaverit, nec fortasse de illo
iudicaverit tam severe, quod et a Vobis, doctissimi non minus ac hu-
manissimi Viri, factum iri non despero; Alterum vero atque potissimum,
grati animi officium, quod nunc Vobis praestare mihi datum est, apud quos,
cum ut aliquid in Physico - medica arte addiscerem, e Patavino Lyceo
Bononiam me contulissem, pulcherrimae doctrinae solidaque praecepta, unde
mentem instruerem atque erudirem, mihi non defuerunt, pro quibus utinam
parem Vobis gratiam referre possem. Cum tamen gratiarum actionem, non
solum accepto beneficio, sed etiam promerentis merito respondere oporteat, con-
cinna de laudibus vestris oratio texenda mihi esset; quod cum non rudis phi-
losophi, sed eximii oratoris officium sit, me orationis munus praetereuntem
haud condemnaturos fore puto; insignis enim Instituti Bononiensis Academia
nec orationibus, nec oratoribus indiget. Satis igitur Vobis esto, me vestra
humanitate summe devinctum fateri, et si quid minus insuave in praesenti
opusculo inveneritis, illud me e vestrae doctrinae fonte hausisse. Interim quid-
quid mihimetipsi etiam Vobis singulis vehementer cupio, atque exoro, ut diu
valeatis, ac vivatis, qui scientiarum atque artium progressui, proinde et uni-
versae hominum saluti prodesse possitis.



I N D E X

P A R S P R I M A.

PROPOSITIO PRIMA.

Affectio Hypochondriaca est morbus corpori universalis, seu cunctas fere corporis partes afficiens.

PROPOSITIO SECVNDA.

Primaria affectionis hypochondriacae sedes est nervosum ac membranofum systema.

PROPOSITIO TERTIA.

Hypochondriacus morbus est spasmodica nervorum ac membranarum affectio, qua praecipue naturalis, quandoque et animalis, interdum etiam vitalis oeconomia perturbatur.

PROPOSITIO QVARTA.

Natura in aequabili et harmonica solidi nervei et membranosi oscillatione delectatur, et e converso hac perturbata contristatur.

PROPOSITIO QVINTA.

Omnes hypochondriaci morbi causae, sive extrinsecae, et occasionales, sive intrinsecae et dispositivae ad harmonicum solidi nervei et membranosi motum oscillatorium destruendum tendunt.

P A R S S E C V N D A

CAPVT I. *De Affectione hypochondriaca calida et sicca.*

CAPVT II. *De Affectione hypochondriaca calida et humida.*

CAPVT III. *De Affectione hypochondriaca frigida et sicca.*

CAPVT IV. *De Affectione hypochondriaca frigida et humida.*

P A R S T E R T I A.

De Affectioibus hypochondriacis compositis.

CAPVT I. *De Affectione hypochondriaca hysterica.*

CAPVT II. *De Affectione hypochondriaca scorbutica.*

CAPVT III. *De Affectione hypochondriaca phthifica.*

CAPVT IV. *De Affectione hypochondriaca asthmatica.*

CAPVT V. *De Affectione hypochondriaca calculosa.*

CAPVT VI. *De Affectione hypochondriaca tympanitica et aliis affectionibus in solidum, in quas hypochondriacus morbus migrare potest.*





P A R S P R I M A.

PROPOSITIO PRIMA.

Affectio Hypochondriaca est Morbus Corpori Universalis, seu cunctas fere corporis partes afficiens.



Si Affectiois hypochondriacae etymologiam spectemus, haec peculiaris morbi, seu peculiarem corporis regionem afficientis ideam nobis exhibet, nempe ea viscera, sive partes, quae costis subjacent; Vox enim hypochondrion apud Graecos idem, quod sub costis apud Latinos significat. Arabes quoque hunc affectum myrachialem nuncupantes cum Graecis in denominatione conveniunt; Nam *Myrach* abdomen significat, in Marcello Donato legimus (a): Si vero plurima, hujus morbi accidentia eiusdem characterem constituentia perpendamus, universalem quidem, et nulli fere corporis parti ignoscentem deprehendimus.

Universalem ratione symptomatum eundem passim agnoverunt medici, ex quo sicuti ex febre, nulla pars aut functio corporis illaesa remaneat, horumque in syndrome, atque varietate affectionis hypochondriacae naturam consistere arbitrati sunt omnes; Peculiarem vero ratione principii ac morbi sedis, in regione scilicet hypochondriaca omnes fere, qui hunc morbum pertractarunt, statuerunt.

Hippocrates, cui notum fuisse volunt nonnulli (b) sub alio nomine, nempe morbi *resiccatorii*, eundem ita describit (c). *Non inedia, nec cibum sumptum ferre potest, sed jejuno quidem viscera rugitum edunt, et ventriculi os mordetur, et alias, varia vomit, bilem, salivam, pituitam, et acre, postque vomitionem aliquantisper melius habere videtur. Ubi*

Gg 3

autem

(a) *Lib. 4. de Hist. Mirab.* (b) *Sennert. Pract. Lib. 3. P. 5. Sect. 1.* (c) *Ib. 2. de Morb. Sect. 5. P. mibi 484. Foes.*

autem sumpsit ructus ei contingunt, cum rubore incenditur, semper se copiosum alvi recrementum dejecturum existimat, cum vero defecerit, flatus infra demittitur, caput dolore vexatur, totum corpus huc, et illuc, velut acu pungi videtur, crura gravantur, debilitantur, imminuuntur, debilisque evadit, et paulo infra: Hic morbus diuturnus est, nec nisi consenescentes definit; alioquin ad mortem usque comitatur. Nec latuit quoque Dioclem Carystium Antigoni Asiae Regis Medicum, cui post Hippocratem, primas deferunt. Iste ut apud Galenum legitur (a) in libro, cujus titulus: *Affectio, causa, curatio*, de Hypochondriaca affectione haec habet: Porro alius oritur a ventriculo morbus, qui supra propositis non dissimilis est, nominaturque ab aliis melancholicus, ab aliis flatuosus, quem sumpto cibo maxime coctu difficili, et caustico sputum humidum idemque multum comitatur, idem ructus acidus, flatus, aestus in praecordiis, fluctuatio non illico, sed cum retineantur: interdum ventriculi quoque vehementes dolores, qui nonnullis ad dorsum usque procedunt, concoctis deinde cibis quiescunt, mox aliis ingestis eadem rursus revertuntur accidentia, quae interdum etiam a coena molestant, atque evomunt crudos cibos, et pituitam, vel subamaram, vel calidam, vel acidam adeo, ut torpedine dentes afficiantur. De morbi vero sede, five causa proxima ita lo-

quitur: Ceterum flatuosas vocatas affectiones suspicandum est plus caloris, quam decet, habere in his venis, quae alimentum a ventriculo excipiunt, sanguinemque in ipsis crassorem factum etc. deinde: Aiunt autem nonnulli os ventriculi, quod intestinis continuatur in huiusmodi passionibus inflammari, ac ob inflammationem ipsam, et obstrui, et prohibere, ne alimenta statuto tempore ad intestina descendant, quamobrem diutius, quam decet, in ventriculo manentia, et tumores, et aestus, atque reliqua, quae praedicta sunt, efficiunt.

A ventriculo quoque hypochondriacam affectionem ortum habere putat Galenus (b), qui ad suam sententiam firmandam praedicta Dioclis verba adducit, quamvis ipsum Dioclem non nihil reprehendat, eo quia in recensendis symptomatibus praecipua iuxta ipsum morbi characterem designantia, metum nempe et moestitiam omiserit. At Galenus de speciali potius affectione, id est melancholia hypochondriaca agere visus est, Diocles vero affectionis hypochondriacae diagnosin in genere tradidit; ideoque immerito forsan ab eodem Galeno reprehenditur, ut animadvertit Sennertus (c).

Aetius (d) flatuosam et praecordiacalem affectionem appellat, cuius principium in ventre quoque haerere putat, ut de melancholia hypochondriaca Galeni loquens exponit: At vero, inquit, *tertia melancholiae dif-*

(a) Lib. 3. de loc. affect. (b) loc. cit. et in Lib. VI. Hippocr. de morb. vulg. com. 3. (c) Pract. T. 3. p. 494. (d) Tetrab. 2. Serm. 2. Cap. 9.

ferentia, cuius principium a ventre haerere diximus, et quae affectio praecordialis appellatur, saepe ex relatis cognoscitur. Primum enim incipiunt ventris symptomata, velut sunt inflationes, rugitus, ructus acidi ac virosi, et quod venter resiccatur, et quod in secessibus ac vomitibus, et ructibus allevantur, et quod ipsi aegri percipiunt omnes vexationes circa praecordia consistere.

Ita et Paulus Aegineta (a) a praecordiorum inflammatione oriri scribit, cuius verba sunt: *Tertia melancholiae species, quam flatulentam et a praecordiis hypochondriacam appellant ob inflammata circa stomachum praecordia proveniens etc.*

Non solum vero Graeci auctores, de quibus adhuc, verum etiam Arabes de hypochondriaci morbi sede conveniunt. Hos inter Avicenna (b), ut de aliis taceam, qui tum a liene, tum ab hepate infensam stomacho materiam subministrari censet, ex quo hypochondriaca affectio excitatur.

Veterum sententiam secuti sunt recentiores quotquot hunc morbum pertractarunt, demptis tantummodo duobus, ex iis saltem auctoribus, quos quidem pervolutarim, de quibus mox infra sum dicturus, nec isti a veteribus, nisi in phaenomenorum, seu symptomatum explicatione, quae a systematum varietate pendet, discrepant; Veteres enim quaedam ex ac-

cidentibus, quae hypochondriacum morbum comitantur, veluti capitis dolorem, vertiginem, delirium melancholicum, suffocationes, aliaque ab elato ex ventriculo ad oculos fuliginoso quodam aut fumoso halitu, aut crassis quoque vaporibus (c) similia suffusorum accidentia fieri crediderunt, eademque ratione, sublata ad cerebrum ab atra bile evaporatione, melancholica evenire in mente symptomata. Recentiores vero, aut per vicinarum partium consensum, si cor, mediastinum, diaphragma, aliaeque thoracis partes, siue continentes, siue contentae laborent, aut per animalium spirituum refluxum, si capitis, siue internae, siue externae partes afficiantur, excitata prius in ventriculo et intestinis nervorumque plexibus illuc perreptantibus communicata fibrarum *ataxia*, aut spasmodica crispatura, peculiarem morbum ratione principii, in ventriculo nempe, intestinis partibusque adiacentibus haerentis, universalem quoque, et unicuique corporis parti per sympathiae leges infensum haberi autumant.

Scio quidem aliquos, siue veterum, siue recentiorum in mali huius sede stricte designanda non nihil inter se dissentire. Quidam enim in mesenterio praecipue collocant, ut Rondeletius (d) Mundinus (e) Marcellus Donatus (f). Primus intemperiem ficcam eiusdem visceris accusat, secundum

(a) Lib. 3. Cap. XIV. p. mihi 98.

(b) Lib. 3. fen. 13. Tract. 2. Cap. 1.

(c) Ga-

len. ibid.

(d) Meth. curandi morbos cap. 42.

(e) Anatom. Cap. 3.

(f) De

Histor. mirab.

cundus, et tertius eius glandularum ab humore crasso et melancholico infarctum.

Alii ex veteribus praeter Avicennam in liene, quibus adstipulantur Rhodius, atque Heurnius (a); Reiciunt vero Sylvius de le Boe (b), Hoefferus in Hercule Medico (c), Hochstederus (d). Alii in venae portae, arteriae coeliacae ac mesentericae ramis, ut Sennertus (e), qui cum Mercato quodammodo conveniens ex triplici fonte affectionem hypochondriacam oriri posse censet. Quorum primus: splenis, mesenterii, ac jecoris venae obstructae; quae ab hoc ad ventriculum, vel a mesenterio in splenem vicinasque partes tendunt, quibus vasis omentum quoque addit, utpote amplos a vena porta ramos accipiens, eiusque praesertim cavitatem in sinistro hypochondrio sub diaphragmate a ventriculi, omenti, coli aliorumque connexionem ortam, quam ita conclusam arbitratur, ut aquam flatumque continere possit, in eaque e vicinis visceribus crassos, pituitosos serososque humores scatentes colligi, illo Hippocratis aphorismo inhaerens (f): *Quibus inter ventriculum et septum transversum pituita intercluditur, et dolorem affert, in alterutrum ventrem viam non habens iis per venam et vesicam versa pituita, morbi fit solutio.*

Alii veteribus Graecis supra citatis quodammodo inhaerentes, ut Hig-morus (g) lienem a culpa ab Arabibus eorumque sectatoribus apposita vindicavit, et praecipuam huius morbi causam in ventriculi atoniam retulit, eiusque symptomatum rationes ab hoc petendas esse asserit.

Alii in ventriculo, et intestinis, ut Etmullerus (h), Conringius (i), Hoffmannus (k), qui in eorundem motus peristaltici, quo gaudent, praeternaturali constitutione, et quidem tali ponit, ut ille partim ac in uno loco deiectus, atque destructus, partim et in alia loco intensior, atque passim inversus ab inferioribus ad superiora tendens existat. *Tales, inquit, et resolutio, et distensio spasmodica simul praesentes in intestinis, sed diversis locis se invicem excipientes genuinam mali hypochondriaci essentiam constituunt, et ad explicanda cuncta symptomata clarissimum praebent fundamentum.*

Quidam denique hypochondriacum morbum ad convulsivos affectus spectare ac praecipua eiusdem symptomata spasmodica esse, atque immediate a spirituum animalium, et succi nervei anomaliis, potius, quam a viscerum coctioni inservientium dyscrasia pendere contendunt. Hi sunt: Willisius (l) et Sydenhamius (m) qui nostrae propositioni favere videntur.

Nos

(a) Vid. Hoffman. *Medicin. system.* Tom. IV. p. 3. (b) *Diff. de usu Lienis.*
(c) *Lib. 3. Cap. 3.* (d) *Dec. 5. p. 502. et 588.* (e) *Pract. lib. III. Par. 5. Sect. 1.*
(f) *Sect. 7. aph. 54.* (g) Vid. Willis. (h) *Colleg. Consult. Cas. LIII.* (i) *Dissert. de Morb. Hypoch.* (k) *Tom. IV. Par. 3.* (l) *Cap. XI. de Morb. Convulsivis.* (m) *Dissert. Epistol.*

Nos itaque, ne Auctorum sententias particulatim referentes legentibus taedio sumus, nostram propositionem exponemus: Affectionem scilicet hypochondriacam non esse morbum alicui visceri peculiarem, sed universalem, nervosum ac membranosum systema praesertim corripientem.

Quod ut liquidius constet, propria eiusdem symptomata, quae ad ipsius diagnosin nos conducunt, sunt discutienda, quorum praecipua tantummodo ex plurimis, ne dicam innumeris, quae nobis obviam veniunt, recensebimus, ac ut recto ordine procedamus trium nostri corporis cavitationum, sive regionum insigniorum affectiones hypochondriacos vexantes examinaturi ab imo ventre exordiemur, in quo considerandae

Graves tensiones, atque intumescitiae, praesertim sub costis spuris saepe in hypochondrio sinistro, in quo durior, ac distincta percipitur, quaeque lienis infarctui passim tribuitur, nec perperam, si constans fuerit intumescitiae, interdum circa umbilicum, et in quacunque abdominis parte, quae a ventriculo et intestinorum praeternaturali inflatione oritur, obtusus, seu gravativus in regione ventriculi dolor a pastu recrudescent, sive quaedam molesta sensatio, de qua valde queritur patiens, circa umbilicum, et in intestinorum praesertim tenuium regione, interdum tormenta et vehementes lancinationes, saepius vero murmura et borborygmi,

alvus quibusdam laxa, aliis pertinaciter sicca, aliis modo profluens, modo adstricta, flatuum modo retentio, modo crebra expulsio, sive per inferiora, sive per superiora, ex qua, licet levamen percipiat Hypochondriacus, tamen ab eorundem proventu rursus opprimitur, haemorrhoidaliu vasorum tumefactio anum obsidens, quae in aliquibus in fluorem sanguineum, quasi menstruum, degenerat, in aliis rariorem, frequentiore in aliis, mictio crebra, quandoque difficilis et dolens, urina saepe tenuis, aquea, et copiosa, quod inter pathognomonica huius affectionis accidentia pro conspicuo habetur (a), quandoque largo sedimento, eoque arenoso imbuta, cui addendum: in renum regione interdum dolor, qui calculum facile mentitur.

Symptomata vero, quae speciatim ad ventriculum et oesophagum spectant, sunt: nausea, et anorexia, appetitus vagus et quasi delirus illi gravidarum res absurdas appetentium non dissimilis, in quibusdam avidior, in aliis prostratus, in his alimenta male concoquantur, acidae viscidaeque cruditates generantur, unde pharyngis glandularum infarctus, crassioris, tenacisque materiae frequens scretus, ructus acidi, stomachi ardor, cardialgia, nec non vomitus, quo vel glutinosa materia redditur, vel liquida et adeo acris, ut dentes stupefacere valeat; in illis vero, quibus avidior appetitus, ingesta parum contrita celerius a ventriculo faceffunt, eoque ma-

(a) *Sydenh. Diff. epistol.*

gis si flatuosa et rarefcentia, ut legumina, hordeacea, ac quaedam simplicia, aut dulcia et acescentia, ut lac et alimenta ex lacte confecta, saccharoque condita, vel fermentescentia ac stimulo afficientia, ut aromatica, sive dapes in opiparis conviviiis appositae aromatum copia, oleis volatilibus refoetae, quae a Boerhaavio (a) Spiritus refoctores appellantur, atque embammatibus imbutae, quae vitiosa epulandi cupido excogitare valet. Haec cruda non solum a ventriculo, sed ab intestinis velocius transmittuntur, ac per alvum non sine murmure eliminantur. Cum itaque nullus hypochondriaca affectione laborans ab huiusmodi symptomatibus immunis eat, duo corollaria inferenda sunt.

Primum: Hypochondriacum morbum, licet corpori universalem, in abdominis tamen visceribus praecipue saevire, ac nullam fere unquam corporis partem ab eodem corripì, quin abdominis viscera simul compatiantur.

Secundum: Cum abdominis viscera pleraque membranosa sint, veluti ventriculus, intestina, et mesenterium, in quibus utique prae aliis suam exercet tyrannidem hypochondriacus morbus, ideo nervosas et membranosas partes primum huiusce morbi subiectum esse credendum est.

Hic tamen monendum, cum membranas partes appello, illas non intelligo, quae interni tegumenti officium praestant, atque concavam cavitatum superficiem, aut viscera vestiunt, veluti dura et pia mater in capite, pleura in thorace ac peritoneum in ventre, scio enim has membranas praecipue, quae solidis partibus adhaerent, ut dura Mater, ac aliae plures, non solum peculiari motu destitui, sicuti de prima multi contra Baglivium et Pachionum animadverterunt; verum etiam sensu atque irritabilitate carere, quemadmodum a doctissimo Haller nuperis plurimisque experimentis ceterisque a suis discipulis initis detectum fuit (b). Sed illas intelligo, quae ad quaedam viscera construenda concurrunt, eorumque substantiam efficiunt, nempe ventriculum, intestina, mesenterium, vesicam urinariam, renum pelvim, vtreteres, cystifelleam, et alia, quae ab eodem auctore inter sensibiles et irritabiles partes enumerantur; nec non illas, quae externorum sensuum organa, sive primaria sensationum subiecta construunt.

Ex abdomine ad thoracem transiendo cordis tremores ac palpitaciones inveniuntur, graves spirandi difficultates periodicae, quae siccum, et convulsivum asthma constituunt, interdum adeo vehementes, sed breviores

(a) *Praelest. Acad. T. 3. 488.* (b) *Vide Dissert. circa partes irritab. et sensibiles animalium. Ioan. Geor. Zimmermann Diss. Philos. de irritabilitate.*

Petri Castelli Experimenta, quibus varias corporis humani partes sentiendi facultate carere constitit. Vide tamen pulcher. diss. Clariss. Thomas Laghi Bonon. edit. anno 1756.

res ac transeuntes, ut suffocationem minentur, gulae compressio veluti globi cuiusdam ex inferioribus ad superiora ascendentis, ac deglutitionem impediens, arteriarum oscillatio, seu pulsus saepe contractus, modo rarus, modo frequens, interdum vehemens, ac vibrans, qui non solum in arteria radiali, sed in aorta, mammaria ac coeliaca aneurysma simulans percipitur.

Tandem capitis infestantia symptomata sunt: Cephalalgiae et hemi-craniae, temporum, et frontis dolor acutus ac feriens instar clavi, constringens, oculosque in consensum trahens cum lacrimarum effusione, scotomia, faciei modo rubor, modo pallor, quandoque aestus cum extremarum partium frigore, et vicissim rigor cum extremarum partium calore, ex uberiori salivae fluxu frequens sputatio, virium prostratio, sensuumque torpor, quibus interdum eorundem temporanea abolitio, ac quaedam paraplegia supervenit, vertigo, cadendi necessitas, nisi adminiculum ad se sustinendum patiens inveniat, somnus difficilis, somniisque lugubribus saepe plenus.

Animi quoque mores perturbantur, commutanturque, ex levi siquidem causa irascuntur, aut valde moerent, inquietudine, angore et terroreprehenduntur, proprium morbum, ut gravissimum ac lethalem mente concipiunt, amicis adstantibusque, qui eosdem solari conantur, et a falso morbi conceptu liberare,

nec non a profunda moestitia bonis ominibus eruere student, fidem minime praebent, hinc saepe imaginatio laeditur, memoriae vis deficit, ratioque deflectit, proinde in melancholicum delirium incidunt.

Praeter ea quaedam notanda sunt symptomata, quae ad totum corpus spectant, nempe cutis color pallidofuscus, musculares ac nervosae fibrae, vel nimis flexiles, imbecillesque, vel nimis rigidae, duraeque (quod, cum temperamenti, habitusque corporis diversitatem efficiat, a rationali medico dignoscitur) corpus ad quoscunque labores suscipiendos torpidum se ostendit, sensum emaciatur, artus lancinatoriis doloribus distorquentur.

Modo enarrata pluraque alia morbi hypochondriaci sunt characteristica accidentia, quae singula recensere nimis arduum esset.

Horum tot syndromes, atque combinationes fiunt, quot sunt individua, quae idem morbus adoritur.

Exposita itaque accidentia, cum universum corpus affligant, nec ulla sit eiusdem pars, quae ab illorum tortura immunis servetur, hunc morbum universalem esse ratione corporis satis evincitur.

Dices cum Hoffmanno (a) ceterisque plurimis has hypochondriaci morbi affectiones universales fieri illo mediante consensu, quem nervosae et membranosae partes invicem natae sunt, ideo ventriculi, et intestinorum spasmus ad alias etiam remotiores regiones propagantur.

Hh 2

Huius.

(a) *T. IV. p. 3. Cap. VI.*

Huiusmodi consensum in nervoso ac membranoso systemate quidem adesse nemo est, qui inficietur; verumtamen modo exposita huiusce morbi accidentia, quae extra abdominis regionem sunt, ex solo praedictorum viscerum consensu oriri minime assentimur, quemadmodum, nec ex uteri (a) cum nervoso systemate connexionem hysterica pathemata, de quibus tanquam particulari affectione in hypochondriaco morbo, veluti suo genere comprehensa impostulorum agemus.

Equidem pluriini, sive stomachi, sive intestinorum morbi nullum hypochondriacae affectionis signum praeferentes observantur, et vicissim hypochondriacae affectiones absque sensibili eorundem viscerum passione, e. g. acuti stomachi aut intestinorum dolores, qui colica appellantur, nausea, vomitus, cardialgia, cholera, scirrhi tumores, diarrhoeae dysenteriae, iliaca passiones, alique morbi, quibus cum ventriculi, tum intestinorum tunicae laceffuntur, et ad motus spasmodicos incitantur, tamen de hypochondriaca affectione nullam suspicionem afferunt, et e

contrario in quibusdam hypochondriacis nulla, vel saltem levis stomachi, et intestinorum affectio detegitur.

Plures quidem hypochondriacorum casus referre possem, in quibus nullum ventriculi, tum intestinorum pathemata noscere potui, quamvis multa ex supra descriptis accidentibus, sive pectoris, sive capitis regionem, sive totum corpus circumvenientibus plane adessent; sed cum Medicinae Professores alloquar, quibus similes casus, sicuti et mihi, non raro occurrunt, hos ideo silentio praetereo, Tyrones vero ut illas legant observationes tantummodo exhortor, quas Hoffmannus describit (b), qui morbi hypochondriaci sedem in ventriculo et intestinis cum plerisque recentioribus collocat; ex his secundam, decimam, undecimam, duodecimam, decimam tertiam perpendant, nec quidquam stomachi, aut intestinorum vitio tribuendum invenient; ergo hypochondriacae affectionis sedes non in peculiari quodam viscere, aut regione, sed in universo corporis habitu statuenda est, quod ex futuris propositionibus clarius elucebit.

(a) *Tract. de febr. Cap. XVIII.*

(b) *ibidem.*



PROPOSITIO SECVNDA.

Primaria affectionis hypochondriacae sedes est nervosum ac membranosum systema.

Huius propositionis veritas ex praecedentibus corollariis satis deprehenditur, hanc tamen novis argumentis confirmare, et illustrare curabimus.

Quotiescumque hypochondriacum morbum tamquam universalem nostri corporis affectionem agnoscimus, nec ab imi ventris passionibus solo consensu ad reliquas partes communicatis omnino pendere, sed revera in toto corporis habitu haerere, ac saepe immediate agere, nervosum ac membranosum systema huiusce morbi sedem esse plane intelligemus; etenim, si universalis, vel in solidis insidere concedendum erit.

Non in fluidorum massa, quippe eorundem fluidorum vitium supponeret, vel in quantitate, vel in qualitate, quibus addere possemus etiam in motu, nisi vitium motus a solidis ipsis oriretur. Si in nimia itaque quantitate, haec plethoricum quidem reddit corpus, non autem hypochondriacum.

Sanguinis quantitas naturali maior sequentes parit effectus; arterias venasque magis replet, quare si eodem tempore, ac naturalis quantitas ex arteriis in venas migrare debeat,

suamque circulationem absolvere, ut integra vitalis poscit oeconomia, maiori quoque celeritate vasa percurrere necesse est.

Augetur vero celeritas ab aucta ipsius sanguinis massa; 1. quia cordis fibras lacertosque gravius comprimit, iisque magis resistit, nec non arteriarum tunicas fortius distrahit, ex quo renisus, sive momentum contractionis cordis et arteriarum per elasticitatis leges maius evadit.

2. Quia, cum in maiori sanguinis quantitate maior quoque animalium spirituum secernendorum materia contineatur, naturali copiosior a sanguine cerebrum appellente eorundem spirituum fiet secretio, qui ad nervos influentes contractilem solidorum vim validiorem efficiunt; hinc plenior ac vibrans pulsus, proinde sanguis ad cor rediens maiori momento eiusdem parietes distendit (a), a quo propellens ipsius vis magis provocatur, ideoque non solum validius, sed frequentius cor contrahitur. Aucta igitur sanguinis velocitate eiusdem globuli maiori impetu collidentes, ac in arteriarum tunicas vehementius impingentes praeternaturalem excitant calorem, quae accidentia febrem constituunt.

H h 3

Si

(a) Boerb. Praelect. Acad. Cord. fab. vis et actio.

Si autem sanguinis quantitas ad illum usque gradum excreverit, ut cerebri arteriolae valde tumeant, pulsus ita mutatur, ut servata plenitudine ex frequenti vehementique rarus ac debilis evadat, ut animadvertit Bellinus (a); quoniam illae medullarem ipsius cerebri substantiam nervorumque tubulos ita comprimunt, ut coangustato eorundem diametro animalium spirituum secretio intercipiatur, similiter arteriae, quae nervorum plexus sequuntur, atque villos, seu fibrillas contractiles innectunt, horum sinulos adeo coarctant, ut excluso liquido contrahente rara et remissa cordis contractio succedat, ideoque rarus debilisque pulsus percipiatur; vires quoque deficiunt, membra torpore afficiuntur, sensus ac motus hebetatur, obtusus capitis dolor, assidua ad somnum propensio, mens obscuratur, color modo ruber, modo fuscus apparet.

Turgentia copioso sanguine vasa, si ab eodem ex quacunque causa rarefcente magis distendantur, haec in laxioribus partibus tenuique tunica donatis scindi poterunt atque periculosas haemorrhagias parere, vel ipse sanguis ex capillaribus arteriis nimis distensis in venas totus difficulter migrans regreditur, ac in lateralia et secretoria vasa vim faciens intruditur, lymphatica scilicet; unde inflammationes, sive internae, ut phrenitides, apoplexiae, anginae, pleuritides, pulmoniae, hepatitides, aliaeque, vel musculares et externae, ut rheu-

matismi, erysipelae, ophthalmiae, sed haec et similia ab affectionis hypochondriacae symptomatibus omnino differunt; ergo non in plethora huius morbi causa est inquirenda.

Contra vero imminutae quantitatis accidentia sunt: virium prostratio, exiles pulsus, lipothymiae, pallidus cutis color, ac sub oculis lividus, corporis macies, anorexia, seu cibi fastidium, aepsia, seu alimentorum imperfecta digestio, aliaeque plura, quorum nonnulla, licet hypochondriaco morbo communia sint, tamen ab alia causa oriri, sive accidentali, sive morbosa evidenter cognoscimus, veluti ex nimia sanguinis evacuatione naturali, vel artefacta, alvi fluxu, fluore albo, gonorrhoea, diabete, lactatione, alimenti defectu, febre, aliisque morbis, quae liquida dissipando corpus extenuant; nam quotiescumque nostri corporis vasa minorem fluidi copiam contineant, minus dilatantur, ac adiposae membranae et cellularis musculorum cryptae, si oleoso, et pinguedinoso succo detumeant, coangustantur, quare gracilescunt muscoli et universum corpus emaciatur, ipsa vasa utpote exinanita tonum amittunt, minor spirituum copia secernitur, ideoque musculorum actio, quae tum a spirituum influxu, tum a sanguine arterias implente expenditur, imbecillis redditur, ex quibus virium languor, exiles pulsus, ceteraque praedicta oriuntur accidentia, quae imminutam fluidorum quantitatem consequuntur; ergo nec naturali mi-

nor

(a) *Prop. II. de febr.*

nor fluidorum quantitas pro hypochondriaci morbi causa haberi potest.

Nec vitiosa eorundem qualitas est omnino culpanda; vitiosa enim fluidi qualitas praesertim sanguinis, vel in nimia e.g. crassitie, vel tenuitate ponatur.

Si in nimia crassitie; haec a nimis viscoso eiusdem sanguinis latice oritur, seu a praeternaturali molecularum, seu lymphae, sive feri aspera, et inaequali superficie, qua eadem molecule rubrum sanguinis globulum efficientes ex aucto per maiorem superficiem contactu arcte cohaerent, ob quam cohaerendi vim rubri iidem globuli adeo multiplicantur, ut serosarum molecularum proportionem excedant (a); Quare sanguis naturali fluiditatis gradu orbatus per minima vascula lente ac difficulter progreditur; ipsi namque globuli, quos serosa pars vehere solet, capillares arteriolas pervasuri facile inter se adhaerent, auctaque mole ipsarum arteriolarum diametrum superante regrediuntur, ac reliquo sanguini a corde venienti resistunt, ob quam resistantiam quandoque idem cor aegrius se exoperans violentiam patitur, hinc palpitantes, anxietates, respirandi difficultates.

Hi lentores, si in cerebri arteriis contingant, gravativos capitis dolores, vertiginosos affectus, hemiplegias pariunt, quibus symptomatibus, licet in hypochondriaca passione

similia observentur, diversam tamen agnoscunt originem, propterea quia praedicta symptomata a sanguinis crassitie orta opportunis non omisiss depletionibus recedunt, atque attenuantibus exhibitis remediis, prorsus evanescunt, quod in morbo, de quo agimus, non nisi difficulter, licet validis saepe ac incessantibus auxiliis eidem occurramus, praestare possumus; unde tritum illud adagium: *hypochondriacum morbum esse opprobrium medicorum.*

Praeterquamquod non haec tantum recensita accidentia huius morbi characterem exhibent, sed alia plura ex his, quae supra evoluimus, requiruntur.

Si fluidorum vitium in nimia tenuitate ponatur, sive ob praeternaturalem molecularum sanguinem constituentium parvitatem, qua ex imminuta superficie decrescente contactu, debiliior quoque sequitur eorundem cohaesio, eoque magis, si harum molecularum superficies laevigata, et ad sphaeroidem magis accedens, in qua minora sunt eiusdem contactus puncta, sive ob oleosae simulque glutinosae substantiae defectum, qua mediante serosae molecule facilius compinguntur, ac rubros globulos firmiores efficiunt; tunc rubra sanguinis pars nimia celeritate per minima vasa traicietur, ac per illas praesertim arteriolas unius tantum globuli capaces (b), in quibus iidem globuli veluti in praelo subiguntur

(a) *Ex Robert. Boil. exper Guglielm. de Sangu. nat. Mazini T. 2. part. 1. dissert. 1.*
(b) *Schreib. Elem. Med.*

tur (a); quare cum pauciores earundem arteriarum ictus sustineant, nec non leviores ob parvum ipsorum, globulorum diametrum, qui a systole non satis comprimi potest, ideo nimis laxa debiliorque eiusdem sanguinis crasis facile in serum fatiscit, ex qua rheumaticae affectiones, asthmata, hydropes.

Insuper exiliores hi globuli ex propriis vasis in aliena nullo negotio intruduntur, data nempe occasione vehementioris corporis exercitii, aut externi caloris, quo sanguinis rarefcentia augeatur, et progressivus motus non nihil acceleretur; hinc lymphatica vasa crassiori, seu rubra sanguinis parte turgent, quod phlogoses, erysipelata, ac internas inflammationes constituit; his accedunt haemorrhagiae, cruenti vomitus, ac haemoptyles, sive per vasorum scissuras, quae diaeresis nomine veniunt, sive per transudationem, seu diapedesim, quae tamen, nisi magna praeeunte vasculosae tunicae extenuatione, vel valida pressione, fieri (b) nequit, sive per secretoriorum vasculorum oscula violentam eruptionem, quam anastomosim vocant, per quae oscula in statu naturali aliquis succus ad aliquod officium destinatus, secernitur.

Haec autem accidentia, et similia, quae a sanguinis nimia tenuitate oriuntur, nullam cum hypochondriaco morbo affinitatem habent.

Si vero fluidorum vitium non in sola crassitie, aut tenuitate earumque

partium amissa naturali, proportionem, sed peculiari molecularum liquida nostri corporis componentium morbosa affectione supponatur, erunt e. g. ex elementaribus sanguinis partibus nonnullae, vel etiam plurimae irregula-rem et angulosam figuram nactae, quae globulos, sive serosos, sive lymphaticos non sphaeroideos, aut ellipticos, sed polygonos efficiunt; haec cum superficiebus non punctis iisdem occurrentia corpora contingant, illis facile coeunt, quoniam adhaesionis vis superficierum contiguarum rationem habet, ideo viscida sunt.

Proprium est viscidarum sanguinis molecularum ad latera vehi (c), quia arteriarum lateribus, quibus impinguntur, adhaerent, sicque ut aliae rotundae ac solidiores in axem reflectunt, per quam, seu per lineam rectam, omne corpus, nisi resistantiam inveniat, excurrere debet. Atqui solidiores, ac rotundae sanguinis molecule minorem resistantiam inveniunt, quippe a solidorum impulsu maiorem impetum adeptae ceteras viscidiores, leviores et oblique progredientes ad latera dispellunt, et antecedunt; ergo solidiores ac rotundae sanguinis molecule per axem arteriarum plerumque vehuntur. Frequens huius legis experimentum habemus in fluminibus, praecipue rapidioribus, in quibus saxa, et glarea per medium alvei velociter abripiuntur, dum arenosae terreae ac argilloae partes aquae mixtae ad latera ac ripas versus secedunt.

(a) Boerhaav. *praelect. Acad. T. V. Morb. Org. Cap. II.* (b) De Gorter. *Chirurg. Lib. 3.* (c) Michel. *Differ. de Separ. fluid. p. 53.*

dunt. Praedictae autem massulae aliis praecedunt non solum ratione gravitatis, quae aequali posita utrarumque velocitate harum impetum auget, (ex Mechanicis) verum etiam ob rotundam earundem figuram, quae cum ceteris minorem collidendi, & confricandi occasionem praebet.

Sanguinis itaque particulae in arteriis cum aliae per axem canalis progrediuntur, aliae ad latera (a) depellantur, ad separationem disponuntur, ac leviores ad lateralia & secretoria vascula tendunt; Hae tamen leviores particulae, si nimis irregularem & polygonam figuram acquirant, in iisdem secretoriis vasculis facile haerent, ad quas aliae accedentes ipsorum canalium diametros occludunt, ceterisque advenientibus obsistunt, idcirco separationes intercipiuntur, ac secernenda liquida regredientia organorum secretoriorum, aut glandularum infarctus producunt, qui in abdominis visceribus, hepate scilicet, liene, mesenterio, & ventriculo, in quibus liquida lento motu progrediuntur, saepe eveniunt.

Horum canaliculorum infarctu praesertim, si ventriculus, tenuia intestina ac mesenterium afficiantur, quaedam aliquando excitantur, accidentia, quae Hypochondriacum morbum sapiunt, sed nisi peculiari solidorum vitio jungantur, pathognomonica huius morbi signa prorsus desunt; Siquidem multi e. g. hepatis *Emphraxi* laborantes, etiam cum impe-

data biliosi succi secretionem, quam icterus, vel notabilis sanguinis caco-chymia excipit, Hypochondriaci tamen nullo modo vocari merentur; Quemadmodum & alii, quorum lien valde tumet, cum imminuta urinae secretionem, alvi siccitate, quam intumescuntiam vasorum quoque hepatis obstructio comitatur, quia sanguis per splenicos venae Portae ramos exiens ipsum hepar ingressurus haud satis dilutus attritusque, ut par est, egreditur (b), idcirco illius sanguinis, quem ad bilis secretionem ceteri eiusdem venae Portae rami afferunt, naturalis crassities non temperatur, quae secretorios bilis meatus obstruit.

Alii viscoso farcimine distentas mesenterii glandulas habent, nec non intestinorum, quae non solum a peculiari eorundem munere deficiunt, chyli substantiam diluendi, ac faeces lubricandi, sed ex stagnantibus succis vehementer distractae nervorum plexus in consensum trahunt, non sine acutis ventris torminibus, ac spasmodicis crispationibus, cui addenda, posita eorundem succorum stagnatione salinarum partium volatilium exaltatio, vel fixarum coagmentatio; Volatiles enim particulae viscerum calore attenuantur, ac ratione aequilibrii exhalare conantur, fixae vero & graviores ad unum fere centrum tendentes in massulas coeunt siccas & angulosas ferientes membranas, quae in mesenterio per chylum

in

(a) Boerb. Praelect. Acad. Tom. I. Sanguin. nat. De Gorter. de Secret. Opusc. Tract. 1. (b) Boerb. Praelect. Acad. Lien. act. Ii

in sanguinem traiectae totam massam coinquinant. Hae cum ad extrema vascula, five secretoria organa perveniunt, secretionum materiam vitiant, ac membranarum fibrillas proritando oscillatorium eorundem motum accelerant, quem nimis copiosae ac immaturae separationes, Diarrhoeae, Dysenteriae, Coeliacae passionis consequuntur, vel irritando ac spasmodice afficiendo eundem motum coercunt, proinde separationes sufflaminantur, & alvi stypticitates, ventris intumescen-tiae ac farcimina prodeunt, quae humores febres plerumque portant.

Alii denique, quorum stomachi quoque glandulae crudis asperisque succis sunt refertae cibi fastidio, nausea, obtuso capitis dolore queruntur, aliquando vertigine & vomitu, quo mediante praedictarum cruditatum ageries se manifestam reddit, nihil tamen de Hypochondriaco morbo sapiunt, & e contrario plures Hypochondriaci satis appetunt, nec quidquam amari, aut glutinis in ore percipiunt, nec stomachi repleti, seu mae digestionis signa experiuntur, ut prima propositione innuimus.

Si vero universalis sit praedictarum molecularum irregularem & polygonam figuram habentium infarctus, veluti in cutaneis glandulis meatibusque, cutaneos quoque affectus parit, veluti impetigines diversae speciei, vitiligines, herpes, five miliares, five exedentes, acores, porriginis, tineas aliaeque, vel in muscularibus mem-

branis rheumatico-scorbuticos dolores, gingivarum lacerationes, profunda & incurabilia ulcera.

Hos aliosque innumerabiles morbos, qui malam fluidorum temperiem arguunt, licet membranoso ac nervoso systemati stimulis ac vellicationibus infensos esse experiamur, hypochondriaca tamen affectio, nisi fortuito comitatur, vel potius tamquam dispositiva causa praecedat; Ergo hypochondriacae affectionis mechanismus non in vitiosa fluidorum massa, sed in solidis latere censendum est, nisi ad fluidorum massam animale spiritum revocemus, in quo nonnulli, veluti Sydenhamius, eundem mechanismum collocant, quod an vero nitatur, sequenti propositione exarabimus.

Quotiescumque hunc mechanismum per solidorum vitium fieri constet, primariam quoque sedem in nervoso ac membranoso systemate habere comperiemus.

Solidas nostri corporis partes nervosis fibris constare, atque contextas esse, multi ex recentioribus volunt, inter quos Wepferus, & Boerhaavius (a), pluribus innixi fundamentis, scilicet, pene nullam, quamvis exilem corporis esse partem, quae sensu, vel motu careat; deinde magnam cerebri molem considerant, cui cerebellum, medulla oblongata & spinalis junguntur, nec non ingentem nervorum ubique distributorum numerum, denique corporis basim in embryone, quae carina est, seu spinalis

(a) *Nervor. propag.*

nalis medulla, ex qua reliquae partes & viscera originem trahunt.

Hoc quidem ad observandum lumen nobis praebuit primus Hippocrates (a) analogiam docens inter ovipara, & vivipara, cui inhaesisse videtur Aristoteles, qui non paucas & accuratas observationes nobis reliquit, & inter recentiores Fabricius ab Aquapendente (b), Harveus (c), Veslingius (d), sed omnium luculentius, & accuratius Malpighius (e), volucrum nempe naturam cum humana conferendo, & ovorum incubatorum singulis diebus usque ad vigesimum, quo pullus excludi solet, mutationes & phaenomena observando, in quibus & Lancisius incubata ova crebrius invisendo multa detexit (f). Similes autem observationes ab aliis plurimis repetitae fuerunt, ut a Ste-none, Langlei (g), & Maitre Jean (h).

Observavit itaque Lancisius post sex, aut septem ab incubatu horas in cicatricula carinam cum pulli rudimentis perspicue apparere, post horas vero duodecim caput pulli cum vertebrarum nodis conspicua fieri; duodevigesima circiter hora vasa umbilicalia clare, cor autem elapsa vigesima octava ad spinæ latus, ac sub specie tantum varicosi, ac semicircularis tubuli nondum pulsantis deprehendit.

Ex quibus observationibus concludit praedictus Boerhaavius (i) primum omnium in foetu esse nervorum

systema, quod tunc in eiusdem primordiis carinae figuram exhibet, deinde viscera & artus. Insuper animadvertit caput ad reliquum corpus maiorem habere proportionem, quo animal suae origini propius fuerit, sicut in Anthropogenia Ruyschiana (k) exprimitur, capitisque recens nati infantis ratio pictoribus jam observata est ad totum corpus ut 1 : 3. & in adulto, ut 1 : 8. ideoque consonum esse ex cerebro eiusque propaginibus, seu nervis construi totum corpus.

Huic tamen sententiae non assentitur omnino doctissimus Haller (l) quasdam obiectiones adducens, quae ad has rediguntur; arteriarum nempe ac cellularis substantiae ossiumque magnam partem nervis destitui; modificandam igitur Boerhaavii propositionem concludit. Verum hoc discutere ad nos non pertinet, eoque minus, quia praedictae obiectiones propositioni nostrae omnino favent, maiusque pondus addunt.

Quis enim rei medicae tam ignarus nescit vitalia organa, cor scilicet & arterias in Hypochondriacis minime lacescere, quippe a febre immunes iidem esse solent, aut superius enarrata eorundem symptomata examinando, e convulsivo genere esse non animadvertet? Idcirco cellularis fabrica & ossa, utpote nervis minus instructa, raro ac levius afficiuntur.

Ii 2

PROPO-

(a) *Lib. de Natura pueri* n. 36. (b) *De forma foetus*. (c) *De generat. anim.*
(d) *In Opere posth.* (e) *Epist. de Ovis incub.* (f) *Prop. XXIV. de motu cordis.*
(g) *De generat. animal.* (h) *De la formation du Pulet.* (i) *N. 301.* (k) *Tab. 1.*
2. 3. *Thes. 6.* (l) *T. 2. ibid.*



PROPOSITIO TERTIA.

Hypochondriacus morbus est spasmodica nervorum, ac membrarum affectio, qua praecipue naturalis, quandoque & animalis, interdum etiam vitalis oeconomia perturbatur.

Naturalem oeconomiam illam dico naturalium functionum seriem, quibus mediantibus humani corporis sanitas conservatur.

Vitam, quae illas nostri corporis actiones respicit, quibus cessantibus vita quoque statim deficit. Hae autem actiones in-systole, & diastole cordis imprimis consistunt, quarum ope idem cor sanguinem exprimit, & recipit, deinde in arteriarum oscillatione, qua sanguis ab his recipitur & ad venas propellitur, ut ad cordis sinus redire possit; Uno verbo vitalis actio a progressivo, & circulari sanguinis motu immediate pendet, quo sublato sanitati etiam perfectae mors continuo succedit.

Animalem denique oeconomiam illam facultatem, seu potentiam quamcumque actionem exercendi, quae vel mutata mente mutatur, eique servit, vel exercita ipsam mentem mutare valet, mens enim illius, qui e. g. philosophiae studium colit, multas acquirit notiones, atque ideas, quas rusticus, aut bajulus ignorat, ac juxta ipsas animales actiones determinat. Ita si quis in tenebris prius versetur, deinde oculos ad lucem aperiat, ut omnia objecta clare videat, statim cogitationes suas mutat; quemadmo-

dum si quis in noctis silentio fragorem repente audiat, aut stridorem, aut musicum concentum novas excipit ideas, atque cogitationes: quod etiam de aliis exterioribus sensibus intelligendum est; ergo, animalis oeconomia est facultas quascumque nostri corporis actiones edendi, quae pro arbitrio mentis mutantur, atque mutatae cogitationes quoque mentis mutant.

Propterea differt animalis facultas a vitali, & naturali quippe vitales & naturales actiones a mente minime pendent; siquidem cor atque vasa inscia, aut sopita, vel etiam invita mente moventur, sicuti & naturales, veluti coctiones, separationes, appositiones, excretiones.

Plerique medicorum de convulsivis affectibus agentes convulsionem, seu spasmus a motu convulsivo distinguunt; per primum, praeternaturalem & constantem contractionem intelligunt, qua pars affecta rigida & contracta manet; per secundum, inconstantem & alternam contractionem, id est motum, sive celerem & concussivum, sive lentum & intermittentem, qua pars affecta tremit, aut diversimode & per vices convellitur.

Ego

Ego autem in praesenti affectionis spasmodicae nomine utrumque spasmus intelligo, quem ratione subiecti, sive loci, in quo agit, triplicem considero: animale scilicet, qui musculos voluntario motui servientes invadit; naturalem, qui viscera praesertim membranosa & nervosa naturalibus functionibus destinata; vitalem denique, qui cor arteriasque, sive nervos his potissimum partibus prospicientesprehendit.

In humano & cuiuscunque generis animalium corpore duae leges, seu proprietates modo sunt notandae; i. solidas partes, sive musculosas, sive membranas, sive nerveas contractili vi pollere, quod plurimis observationibus evincitur.

Si muscularis pars ferro secetur, aut quocunque modo vulneretur, sectae fibrae contrahuntur, & ad suum principium, vel locum, cui nectuntur, accedunt. Naturalem contractionis effectum experiremur in quibuscunque musculis, etiam minus laesis, nisi suorum antagonistarum actio eisdem contra niteretur. Hoc enim manifeste deprehendimus in quibusdam hemiplegiis, vel spasmo cynico affectis, in quibus os, nasus & oculus, vel dimidia faciei pars oblique torquetur, quia alterius lateris musculi ob paralysem, sive perfectam sive imperfectam propriam se contrahendi vim amittunt, qua oppositis resistunt, & sic aequilibrium inter ipsos tollitur, quod in dictis faciei torturis dignoscitur.

Non solum vero praedictae partes organicae, seu musculi, membranae & nervi contrahendi vim nactae sunt, sed etiam quaelibet earundem fibrarum, quibus constant; ita, ut si diversa sit harum fibrarum directio, compositus, & oscillatorius organicae partis motus observatur (a), qui in ipsis animalis partibus etiam recis plane detegitur; nam cor ranarum extractum etiam si in frustra divisum oscillatorio motu movetur, quemadmodum avium, serpentum, & piscium, ipsorumque canum; imo & humanum cor, si a recenter demortuo extrahatur, ac levi stimulo pungatur, palpitare cernimus. Bovum quoque nuper necatorum musculosae partes contrahuntur vicissim, ac relaxantur (b).

Oscillatorii huiusmodi motus in membranosis etiam partibus praeclarum nobis exhibent exemplar ventriculus & intestina, quem motum peristalticum, seu circumpressorium passum appellant anatomici. Hoc mediante modo contrahuntur intestina, ac propriam longitudinem minuunt, modo constringuntur, ac diametrum coarctant. Quare reptilium incessum imitantia vermiculari motu, qui cum peristaltico synonymus est, moveri quoque dicuntur.

Hunc a reciproca fibrarum intestinalium muscularis praesertim tunicae actione immediate oriri quis neget, cum ipsarum fibrarum directionem prorsus sequatur? Quae enim per intestini longitudinem excurrunt, se

contrahendo eandem minuunt; quae vero per latitudinem, circumeuntes intestinale tubum constringunt, atque producunt. Idcirco ventriculus, cuius varii muscularium fibrarum sunt ordines, sicuti irregularis figura, magis compositum edit motum ad ingestorum perfectiorem attritionem naturae consilio ita praeordinatum.

Altera lex, sive proprietas hic considerata; est ipsarum fibrarum elasticitas, seu resiliendi conatus, quo ab aliqua vi distractae fibrae ad propriam actionem vehementius excitantur.

His positis, oscillatorii organicarum partium motus mechanica melius concipitur, tunc cum longitudinales fibrae naturali vi se contrahunt, transversales necessario distrahunt, eorumque contractilem vim provocant ita, ut haec suam actionem ineant, quae actio remissis longitudinalibus prius contractis praevalet, easdemque vicissim divellit, quae ad contractionem rursus excitantur, & ita alternus, seu oscillatorius motus perennat.

Peristalticum tamen intestinorum motum scio nonnullos, etsi paucos, in dubium revocare, scilicet, D. Hagenotum (a) cui alius auctor Galenus assentitur (b): Primus passionis iliaca ac stercorei vomitus phaenomenon in abdominis musculos intestina jam obstructa comprimentes refert, & antiperistalticum motum omnino rejicit, quibusdam innixus experimentis in felibus plerumque

captis, in quibus, sicuti animadvertit Haller (c) peristalticus motus obscurior. Quae tamen experimenta, si cum aliorum auctorum observationibus comparentur, ad hunc motum proscribendum parum valent (d).

Antiperistalticum intestinorum motum etiam Galeno notum fuisse clare videtur (e), qui attractricis potentiae symptomata quodammodo explicans de volvulo mentionem facit: *Quum enim, inquit, secundum naturam se habuerit ventriculus, e supernis partibus ad se trahit, atque per inferiora dejicit; cum vero praeter naturam affectus est, etiam ab infernis aliquid assumit, quippe nonnullis clysteres adeo ascenderunt, ut vomitione rejicerentur, quemadmodum & stercus per lethales volvulos, & paulo infra. Quod intestina constringantur, id ipsis secundum naturam convenit, atque constrictionis auxilio adiuta cibum ad infernas partes dejiciunt; verum per affectus quosdam, quum constringi incoeperint, ea, quae in ipsis continentur, ab infernis ad superiora feruntur. Ita solet evenire nonnullis, quibus non licet ventris onera deponere, quia versantur, vel in foro, vel in alio loco, vel negotio, ut humor quispiam acris ad sedem usque descendat, ibique violenter retentus rursus ad supernas partes referatur. Incipit enim motus a podice animalis potentiae instrumento, deinde quodlibet intestinorum ipsum expellit ad proximum,*

(a) *Memoir dell' Academ. de Sciences* 1713. (b) *Anatom. d' Heister*. (c) *XCIII. not. 6.* (d) *Haller dissertat. circa partes irritabil. & sensibil. animal.* (e) *Libro 3. de Symptom. Caus.*

num, quod loco superiori constitutum sit, haud aliter quam antea, quum deorsum trudebatur..... Itaque non mirum, si per tam violentas intestinorum constrictiones, aliquando tum clyster, tum stercus ad ventriculum praeter naturam deferatur.

Ex quibus, Iliacam passionem non semper ad intestinorum via occlusa, sed ab inverso quoque expulsivo eorumdem intestinorum motu oriri Galenum credidisse constat, quod posterioribus multorum observationibus confirmatur, quarum nonnullas quidem notabiles narrat Sennertus (a). Mattheus de Gradibus puellae historiam ileo laborantis tradit (b), quae alvo suppressa non solum faeces, sed paulo post etiam clysteres injectos per os rejecit, cui postea cum suppositorio longum immissum fuisset, post horae circiter minutum ad stomachum ascendit, & vomitu expulsum fuit; aliud deinde applicatum, sed ad coxam prius filo alligatum, tamen rupto filo sursum raptum fuit, ac cum fili portione brevi per vomitum rejectum, quod & tertia vice, licet quadruplo filo reiteratum fuerit experimentum, res eundem habuit effectum, & cum filorum appensorum parte suppositorium evomuit puella.

De supposito per os rejecto aliam observationem refert Guainerius (c), & Jacobus Oetheus quamdam puer-

peram sebaceae candelae suppositorii loco immisae frustula postero die (evomuisse narrat; quae phaenomena & obiectiones antiperistalticum motum impugnans Hagvenotus (d) imi ventris musculorum actione solvere, & explicare (sed minus apte) conatur.

Praedictum utrumque motum multi describunt, & observationibus confirmant; inter quos Glissonius (e) Peyerus (f) in ranis Wepferus (g) multoties in brutis, in foemina quoque, ut apud Peyerum legitur (h), conspicuum eundem motum observavit; ita & Helvetius, Ruyschius in duobus felibus (i), Harvejus in damis (k). In animalibus morientibus, aut mortuis, nondum tamen refrigeratis, aperto abdomine intestina alternatis conversionibus, modo sursum, modo deorsum, modo antrorsum, modo retrorsum saepissime vidisse testatur Albertus Haller (l), Drelincurtius in canicidiis (m), De Meray (n) in quadam foemina inedito foetu mortua, in qua caesarea operatio facta fuit, cuius intestina motu cordis & pulmonum prorsus extincto peristaltico admodum sensibili adhuc movebantur.

His merito, addenda observatio in Zodiaco Medico Gallico relata, cuiusdam hominis ventris ac intestini vulnere laesi, in quo motus peristalticus a ventriculo ad intestina descendens

(a) *Prax. lib. 3. Cap. 1. de Ileæ.* (b) *In Pract. cap. de vomitu.* (c) *Traçt. V. Cap. II.* (d) *Ibidem.* (e) *L. C. CXV.* (f) *L. C. CIX. p. 47.* (g) *De Cicuta aquat.* (h) *De gland. intest. exerc. I. P. II. Cap. IV.* (i) *Observat. Anat. Chirurg. 72. 73.* (k) *Exerc. 67. de generat. anim.* (l) *Tom. 1. Praelect. Acad. p. 210. & dissert. supra citata.* (m) *P. 586.* (n) *Histoir. de l' Acad. an. 1699.*

dens adeo efficax exploratus fuit, ut cibum per vulnus emitteret (a).

Alter praedictorum auctorum (b) hunc motum peristalticum in dubium revocat quaedam afferens ex mechanicae legibus argumenta praeter observationes, quarum vim ex modo dictis experimentis satis infrictam iri mihi videtur, ut quidquam addere supervacaneum existimem. Argumenta tamen propositionem nostram oppugnantia evolueri utique necessarium puto.

Primo itaque opponit auctor: Peristalticus intestinorum motus per alternam muscularis tunicae fibrarum actionem fieri creditur; sed haec alterna fibrarum actio earundem fibrarum actioni non respondet, quae fibrae ut alternum motum producerent, contraria vi moveri deberent; longitudinales enim fibrae se contrahentes intestinorum tubum dilatare, circulares vero constringere dicuntur. Verum, inquit, longitudinales fibrae propriam vim exercentes circulares quidem ad se trahunt, quippe intestini longitudinem coarctant, non autem harum actionem, quae ad intestini centrum tendit, impediunt, & vicissim circulares ad intestini centrum tendentes longitudinales utique secum ducunt; ne tamen contrahantur, minime prohibent.

Secundo: quaerit qua de causa praedictae musculares fibrae alterno motu moveantur, quoniam nervus liquor per duo plana fibrarum aequè fluit.

Tertio: etiam si huiusmodi motus muscularibus fibris concedatur, officium tamen, quod eidem tribuitur,

excrementa scilicet eliminandi, praestare non potest; siquidem horizontalis vis, quae tubum horizontalem constringit, fluida contenta aequaliter premens ad utrumque latus eadem pellit, nec suadet, inquit, successiva circularium fibrarum: seu anulorum intestinalium coarctatio a ventriculo incipiens, ac inferiora versus progrediens, quae contenta dejiciat, propterea quia nulla est potior ratio, ob quam superiores anuli prius se contrahant, quam inferiores.

Haec autem argumenta haud difficulter corruunt, si animadvertamus primo: ad alternum motum efficiendum vires directe oppositas non requiri, sed imprimis ut contractae fibrae post suam actionem remittantur, ac relaxentur, deinde ut agentes ac se contrahentes alias non agentes ac remissas non nihil distrahant. Utrumque sane, tum mechanicae leges, tum aliarum nostri corporis partium eodem ordine se moventium analogia nos docent. Etenim quoad mechanicae leges, musculares fibrae in actuali contractione aliquid animalis liquidi procul dubio exprimunt, sed novum admittendi incapaces sunt, quare exinanitae necessario laxantur, novoque iterum replentur. Praeterea muscularis tunicae planum fibrarum, e. g. longitudinalium se contrahendo aliud planum circularium, nec non vasa sanguifera, quibus eadem muscularis tunica intertextitur, comprimit, atque coarctat, ex qua compressione circulares fibrae elaterii vi resilire,

(a) *Haller ibid. n. 6.* (b) *Anat. d' Heister.*

lire, ac fibris jam contractis contraniti debent. Cui addendum, quod animadvertit Mazinus (a) ex principiis Borellianis, universae fibrae quo magis in contractione flectuntur, & curvantur, convexam superficiem augent, & concavam ita stringunt, ut ad terminum suae contractionis deveniant. Hinc machinulae romboidales Borellianae, vel potius sphaeroidales cum doctissimo Bernoullio, quibus praedictae musculares fibrae componuntur, nerveo succo repletae cum in ipsa contractione comprimantur, elastica vi dilatari nituntur, easdemque fibras non solum ad remissionem, sed ad naturalem quoque distractionem disponunt. Insuper altero plano fibrarum agente alterum distrahi necesse est; quippe cum non integri plani, sed portiones, sive anuli successivo motu agant, si ex longitudinalibus sint fibris, se contrahere nequeunt, quin circulares distrahant, & naturali situ, seu a puncto, in quo aequilibrantur, dimoveant; ideo circulares fibrae ad suam contractionem excitantur, & ad intestini centrum accedentes prioribus, seu longitudinalibus easdem secum trahentes vim faciunt, quae provocatae rursus contrahuntur, & ita reciprocus alternusque muscularis tunicae planorum motus perseverat.

Magis perspicuam hanc veritatem nobis reddit oscillatorius aliarum partium motus, praecipue cordis ceterorumque musculorum, qui etiam post mortem aliquantum perdurat,

ac jam deficiens, si eadem organicae partes stimulo afficiantur, reviviscit, quod jam supra sufficienter tetigimus.

Praedicta igitur argumenta etiam, quae secundo loco opponit Auctor, satis refellisse mihi videtur; addendum tamen, animale spiritum ad muscularia plana aequaliter utique fluere, ut ipse innuit, in omnibus etiam suis partibus, sed non aequali temporis momento, quod non solum a causis modo expositis reciprocae planorum distractionis, sed etiam a contentae per intestina descendents materiae pondere, distensione, atque irritamento pendet. Nam quotiescumque e ventriculo in intestinum migrant alimenta, circulares fibrae, vel eorundem alimentorum mole distensae, vel pondere, aut salium stimulo proritatae contrahuntur, atque contenta deorsum pellunt, si minorem illuc inveniant resistantiam; quae contenta per intestinalem tubum progredientia eadem mechanica oscillatorium circularium fibrarum motum cient, & ita successiva fit anulorum intestinalium dilatatio, & contractio, quod tertium auctoris obiectum destruit, sed hoc vim lateralem quamcumque respiciens musculorum abdominis actionem, pro ut solam peristaltici, vel antiperistaltici motus vicem gerentem, quam considerant adversarii, omnino reprobant.

Praeterea causa, propter quam alimentorum ac faecum materia deorsum tendit, multiplex est. Prima, mi-

nor

nor resistentia, quae ex propria gravitate oritur. Secunda anularium pylori fibrarum constrictio (a), sive eiusdem valvula, ut vult Heisterus (b), quae alimentorum ascensui resistit, ac nisi violentae ac praeternaturali vi, tum intestinalis tunicae, tum abdominis musculorum contentam materiam sursum pellentium cedit, quemadmodum in iliaca passione, aut convulsivo vomitu experimur. Tertia assidua diaphragmatis mediante inspiratione depressio.

Exarato igitur peristaltico ventriculi, & intestinorum motu, nec non oscillatorio membranosi, ac nervosi systematis & universi corporis fibrarum, hypochondriaca morbi phaenomena clare intelliguntur, quorum nonnulla ad hanc propositionem satis demonstrandam modo afferemus.

Si itaque peristalticus intestinorum, seu membranosi, & nervosi systematis oscillatorius motus ab aliqua causa perturbetur, huiusce morbi symptomata statim insurgunt.

Si fibrarum e. g. longitudinalium muscularis tunicae tonus atque vis orbicularibus praevaleat, harum momentum contractionis minus erit momento contractionis longitudinalium, atque intestini dilatatio, quae a longitudinalium actione pendet, cum coarctatione comparata, quae ab orbicularibus fit, maiorem habebit rationem, quam naturalis dilatatio ad naturalem coarctationem; ideo alimenta, quorum solutio in ventriculo mu-

scularis tunicae ope perficienda est, alterna scilicet fibrarum se invicem ac diversimode (c) decussantium actione, minus conteruntur, siquidem longitudinalium fibrarum ordo caeteris transversalibus vim faciens, eorumdem contractionem cohibet, ne scilicet variis circumflexionibus atque constrictionibus ipsa contenta dividant, solvant, & e ventriculo eliminant. Quare diutius retenta sulphureis, oleosis, volatilibusque partibus interno visceris calore exaltatis ita effervescent, ut corrumpantur; cui accedit, glandularum ventriculi continua liquoris salivae analogi effusio, sive cryptarum succi, secundum Ruyschium (d), quo eiusdem ventriculi cavea madescit. Hinc contentorum volumen augetur, nerveae tunicae fibrae stimulo afficiuntur, aereae alimentorum molecule extricantur, ex quibus stomachi tensio atque intumescencia, dolor, sive quaedam molesta sensatio a pastu recrudescent, acidi ructus, vel ad vomitum inclinatio.

Similes effectus in intestinis sequuntur; chylosa massa ruditer comminuitur, purior ac liquidior substantia difficulter separatur, faeces lente descendunt alvique ficcitatem pariunt.

Si vero transversalium, sive orbicularium eiusdem tunicae fibrarum tonus, ac contractilis vis naturalem proportionem excedat, qua cum longitudinalibus vicissim agunt, & qua peristalticus motus aequabilis perdu-

rat,

(a) Winslov. exposit. Anat. (b) Comp. Anat. (c) Willis. Tom. 2. Pharmac. rat. P. I. Prim. Viar. desc. (d) Thes. X.

rat, nimis praeceps fit ingestorum e stomacho eliminatio, atque eorumdem in intestinis deiectio ita, ut chylota massa haud satis comminuat, ac faeces immaturae descendant, urina quoque copiosior, atque tenuior. Nam orbicularium fibrarum violenta constrictio intestinale tubum adeo coarctat, ut aquosior ingestorum pars celerius per lacteorum oscula ascendat, quae cruoris massam ingressa copiosiore urinae materiam praebeat.

Verisimilius tamen est, non cunctos fibrarum muscularis tunicae ordines alterum alteri seorsum praevalere, sed utrorumque nistum & actionem modo in hac, modo in illa intestinorum parte vehementiores esse, ac non solum inter longitudinalium, seu rectarum fibrarum series & transversalium seu obliquarum aequilibrium tolli, verum etiam inter eiusdem speciei fibras: rectae scilicet hic magis se contrahent, quam illic; quemadmodum & obliquae, nec isocronis & aequalibus oscillationibus procedent, in quibus naturalis & ordinatus peristalticus intestinorum motus consistit.

Coarctatur itaque intestinalis tubus in quibusdam locis vehementer, & stricte, in aliis laxe ex inaequali orbicularium fibrarum actione, quare faecum excretio impeditur. Aer quoque mediante alimentorum deglutitione ingestus, ipsisque commixtus, atque in tenues moleculas subdivisus intercipitur, viscerum calore rarefit, ac solutis alimentis tenues moleculae extricantur, ac in maiores coeunt. Hinc aucta aeris elasticitate illa intestinorum

pars, quae supra coarctationem, aut intra coarctationem ponitur, tumet, atque distenditur, donec elastica, sive contractilis membranarum vis admodum provocata in eundem aerem dilatantem nitatur, ac sursum, vel deorsum, qua data minori resistentia expellat, quod rugitus, borborygmos, ventrisque molestas inflationes parit.

Hi autem flatus si superiora versus repellantur, ac per stomachi viam exitum non inveniant, vel ab orificii inferioris crassioribus fibris valvulam efficientibus spasmodica crispatione contractis, vel ab alia simili causa eosdem reprimente graviores fiunt distensiones non sine vehementi nerveae tunicae distractione ac liber diaphragmatis motus, praesertim descensus remoratur, ex quibus acuti dolores, praecordiorum angustiae, ac spirandi difficultates: si vero per inferiora non erumpant, similia quoque symptomata oriuntur, accedente interdum inversa peristalsi cum violento vomitu, ac intestini coli tumefactione, praesertim in hypochondrio sinistro, quae lienis tumorem repraesentat, quippe, ut animadvertit Hoffmannus, cum intestinum colon, media sui parte, scilicet sub costis spuris ac ubi renibus mediante sacco adiposo cohaeret, sit multo angustius, immo flexuris cellulisque constet, in quibus flatus saepe intercipiuntur, ac caecum versus repelluntur, in ingentem molem distenditur.

Haec distensio, si in renum situ praecipue contingat, ac nerveas fibras

Kk 2 admodum

admodum laceſſat, acutus dolor calculum ſimulans percipitur, qui niſi vomitu jungatur, iſchuriam quandoque portendit.

Praeterea oſcillatorium muſcularis tunicae fibrarum motum aequabilem & ordinatum eſſe oportet, non ſolum ad optimam alimentorum ſolutionem, chyli ſecretionem, ac faecum eliminationem, ſed ad progreſſivum quoque ipſius ſanguinis & lymphae motum in propriis vasis, in quibus lente fluit idem ſanguis, propter ſitum a cordis impulſu remotiorem. Pleraeque enim venarum inteſtinalium tubum percurrentium, quae a meſentericae arteriae ac partim coeliacae ramis ſanguinem accipiunt, non ad cavam reducunt, ſed ad venae portae ſinum, cuius radices ſunt, ex quo in ramos per totum hepatis parenchyma diſtributos ipſe ſanguis migrat; quare arteriarum officium gerentes maiori indigent niſu ad fluidum propellendum, quam caeterae venae.

Harum itaque tunicae, cum multo minori elatiſticitate polleant, quam arteriae, oſcillatorio membranarum inteſtinalium motu proviſae fuerunt, quo eiſdem ſanguinis progreſſus, eiſque attenuatio adiuvaretur. Quippe longitudinales fibrae propria actione inteſtini axem contrahendo, non ſolum eiſdem diametrum dilatant, ſed illorum quoque vaſorum, quae ſecundum axem excurrunt; quae vero tranſverſa ſunt, ac inteſtinalium tubum circumeuntia, con-

ſtringunt. Et viciffim orbiculares fibrae agentes non ſolum inteſtini diametrum conſtringunt, ſed longitudinalia quoque vaſa coarctant, ac eiſdem inteſtini axem producentes tranſverſalia dilatant; ideo ſanguis ab oſcillatorio praedictorum vaſorum motu, qui a periftaltico inteſtinorum pendet, attenuatur, & ad venae portae ſinum compellitur.

Progreſſivo ſanguinis motui eiſque attenuationi natura ubique proſpexit. Nam in univerſo corporis habitu vaſa ſanguifera muſculis fulſit, quorum fibrae alternis contractionibus, praefertim in actuali eorundem muſculorum actione, ipſa vaſa comprimunt ſanguineumque adigunt.

In pulmonibus, quorum textura laxior parumque elatiſtica, niſi reſpiratione adiuvaretur ſanguis, in pulmonaribus vasis ſiſteretur, nec magnam illam reſiſtentiam, quam in eorundem tranſitu patitur, ſuperare valeret. Siquidem in expiratione, ut animadvertit doctiſſimus Haller (a), redit pulmo in ſtatum pene foetus, in quo niſi tertia pars ſanguinis dexteri cordis ſinus trajici poteſt, vaſa breviora ſiunt, & in plicas contrahuntur, eorumque rami per acutiores angulos dividuntur (b). Thorax quoque brevior fit & anguſtior aſcendente diaphragmate, ac parietibus oppoſitis ad mutuos contactus accedentibus, cellularia ſpatia, per quae vaſa repunt, collabentibus iſdem veſiculis immi-
nuuntur. Inſpirationis igitur ope ipſo ſe expandente thorace diſtenduntur
veſiculae

(a) Tom. I. Pulm. ſub. viſ & act. (b) Drakius Tab. XIII. & XIV.

vesiculae pulmonares, ac sphaeroideam figuram acquirunt, reciproci earundem contactus minuuntur, a se ipsis invicem recedunt, ac solo puncto altera alteri adhaeret, inter quas spatia enascuntur triangularia, sive pyramidalia, quae crescunt in ratione triplicata laterum homologorum, quemadmodum & vesiculae in ratione triplicata diametrorum (a) cuncta ideo vasa, sive arteriae, sive venae pulmonaribus vesiculis interpositae sublata pressione expanduntur, maiori sanguinis quantitate capaces fiunt, per quas celerius ex hydraulicae legibus fluere debet idem sanguis imminuta resistantia.

Praeter vasorum dilatationem consideranda quoque aeris quasi irruentis vis, qua pulmones ingreditur, ac in vesiculares parietes, proinde in ipsa vasa nititur, sanguinisque circulationem promovet; quae vis, licet cum momento, quo aer in vacuum irrumpit, minime comparari possit (hoc enim secundum Boylei experimenta ventum generat millies validius vento vehementissimo (b) ita, ut omnia vasa, quae angulosa sunt perfringat (c)) quoniam expirantis pulmo aere nunquam penitus evacuatur; aeris tamen in pulmones irruentis vis aequatur momento differentiae, quo elater aeris externi superat elaterem aeris interni, quae quidem differentia pro magna habenda est (d).

Insuper considerandus ipsius aeris se dilatantis nifus, qui visceris calore rarefcit.

Denique expirationis momentum, quo pectus aerem expellit, non est praetereundum; momentum enim thoracis in homine robusto, qui ad aerem exprimendum tota vi se constringit, iuxta calculum clariss. Joann. Bernoullii mediante tubi recurvi experimento institutum aequatur pondere 420 librarum (e), atque aeris velocitas fortissima expiratione propulsa tanta est, ut unius minuti secundi spatio 400 pedes percurreret, nisi dissiparetur, ac motu uniformi pergere posset, quae velocitas cum illa validi venti comparata est, ut 16. circiter ad 1, sicuti Mariotus expertus est (f), qui minuto secundo ultra 24. pedes percurrere nunquam invenit. Haec autem aeris rapiditas magna quidem videtur, minime vero incredibilis, inquit Michelotus, si illam rapiditatem perpendamus, qua globulus argillaceus per tubum oblongum oris sufflatu exploditur, ut aviculam ad notabilem distantiam interficere possit.

Sed alia est vis expirationis toto nifu peractae, alia placidae ac naturalis, quam invenire Jacobus Keilius conatus est (g), cuius calculus datae hypothesei incumbens a vero multum abluere videtur (h). Utramque tamen eiusmodi vim determinari non

K k 3

posse

(a) Euclid. lib. 12. Prop. VIII. (b) Boerhaav. Praelect. Acad. Pulm. Fab. vis. & act. (c) Boyl. de vi aeris elast. Exp. VII. IX. (d) Haller. ibid. (e) Michel. de separ. flu. (f) Du Mouvem. des eaux P. I. dissert. III. (g) Tentam. Med. Phys. pag. 78. (h) Michel. ibid. pag. 185.

posse physico-mechanici auctores fatentur, nec instituto nostro hoc disquirere magni refert, sufficit enim aeris tum inspiratione ingredientis, tum expiratione expulsi nisum abstracte concipere, atque pressionem, quam ad progressivum sanguinis motum in pulmonibus promovendum natura constituit.

Intra caput, in quo musculares partes prorsus defunt, cuiusque cavitas a molli substantia cerebri tota repletur, peculiaris sanguinis impetus supplet, quoniam per rectam brevemque viam ipsum cerebrum adit; supplet quoque eiusdem qualitas, nempe, ut Boerhaavii verbis utar, purissima parte spoliata.

Sed unde digressi sumus redeuntés rite concludemus, ad progressivum sanguinis motum per intestinorum ac ventriculi vasa, praesertim venae portae ramos eorundem tunicas perrepantes, oscillatorio, seu peristaltico motu opus esse, cuius medio praedicta vasa alternis vicibus dilatentur, atque constringantur, & ita sanguis ad eiusdem venae portae sinum adigatur.

Hoc itaque perturbato, seu huc illuc ex convulsiva fibrarum muscularis tunicae affectione interrupto, sanguinis stagnationes, vel saltem lentescantiae fiunt, ex quibus frequentes vasorum tumefactiones, quae in recto intestino plerumque contingunt, in haemorrhoidalibus scilicet vasis internis, quippe a vi cordis remotioribus, nec non a multo leviori fibrarum muscularium peristaltico motu parum excus-

sis, quoniam rectum intestinum, utpote extremum, nullo, vel insensibili motu dilatationis & constrictionis pollet, nisi in actuali faecum deiectione. Distentis autem haemorrhoidalibus vasis, distractisque nervae tunicae fibris, vel a tumefactione vasorum compressis, spasmodica affectio excitatur, quae ad exteriores ani partes producta, haemorrhoidalia quoque externa coarctat, ac progressivum sanguinis motum impediens, molestam horum intumescentiam parit.

Interrupto peristaltico motu, ac perturbato constrictionis & dilatationis ordine, non eliminantur faeces, nec alvus solvitur, & ob circulantium fluidorum lentorem peyerianae glandulae infarciuntur, nec naturalem mucosi succi quantitatem ad intestinalem tubum lubricandum necessariam secernunt, quare faecibus descendentibus vehiculum deest.

Praeterea si frequens sit & familiaris huiusce motus peristaltici perturbatio, atque in sicco corporis habitu, seu melancholico, cuius fibrae ex naturali constitutione rigidiores lentas ac breviores edunt oscillationes, talis fit fluidorum, & sanguinis in venae portae ramis lentescencia, & crassities, ut ex illo ad hepar traducto biliosus succus separari difficillime possit; quia cum ad extremos venae portae hepaticae ramulos (a) crassior idem sanguis haereat, illum a tergo venientem regredi cogit, qui per anastomoses inter ipsius portae hepaticae ra-

mo

(a) Winslow. *expos. Anat. T. I.*

mos & venam cavam existentes in aëre restituitur. Obstructis itaque praedictae venae extremitatibus, biliarii poruli proprio succo defraudantur, nec ad tubum intestinale necessaria vehitur bilis quantitas, ut chyli pars fluidior a faecibus secernatur, sed intra cruoris massam detinetur, quae cum crassior sit, huc illuc in capillaribus cutis vasculis lentescit, atque transparens, vel subfulvum eiusdem cutis colorem reddit, hypochondriacis familiarem, vel absolute flavum, quem icterici facies ostendit. Hoc autem a bilis quantitate suppressa, seu ab eiusdem separationis interceptae ac si lubet, eiusdem crassitiei gradibus pendet.

Itaque subfulvum, vel saltem pallido obscurum colorem, quem plurimi hypochondriacorum referunt, a bilis separatione imminuta, eaque in cruoris massa retenta, ac caeterorum fluidorum aequalem proportionem excedente oriri censendum est.

Perturbatus huiusmodi muscularium fibrarum motus non leviora ventriculo affert symptomata, cuius muscularis tunicae fibrae, si de sicco & melancholico corporis habitu sermo sit, huc illuc contrahuntur, ac in contractione diutius manentes aliarum quoque fibrarum, tum eiusdem ordinis, tum antagonistarum actionem intercipiunt, videlicet, si orbiculares sint, seu spirales, quae successivo motu ab oesophago incepto agere, ac ventriculi cavum coarctare, eibumque varie comprimere debent;

quemadmodum Wepferus (a) in canibus observavit, quorum ventriculus humano est similis; hae dum rigidae & contractae immorantur, longitudinalibus se contrahere nitentibus resistunt. Hinc ventriculi longitudo haud satis coarctatur, nec eiusdem orificia ad se invicem adducuntur; quare ex interrupta illarum actione spiralem elasticitatem minus provocatur, & earundem contractio concisa, ac imperfecta evadit.

Alimenta igitur haud satis contemuntur, ac intra ventriculum nullam mutationem passa, praeternaturalem moram agere coguntur, donec diuturno calore fermentescunt in liquidam massam chylosam solvantur, sed interim nimia salium volatilium exaltatione & aerearum molecularum excubiis particulis extricatorum magna rarefientia corrumpuntur, ac nidorosos emittunt ructus, vel acrimoniam ad epta nerveae tunicae fibras ita vellunt, ut idem ventriculus spasmodice convellatur, unde ipsius dolor, ac tensio, quibus, vel vomitus succedit adeo aeris materiae, quae dentes stupefacit, vel tarda, & laboriosa digestio, ex qua acidae viscidaeque cruditates generantur. Hae autem ventriculi glandulas replent, in quibus, cum ob diuturnam stasim acrimoniam acquirant, nerveas fibras irritando anxietatem, cardialgiam pariunt, & in superiori stomachi parte diaphragmati viciniore singultum, qui ab eiusdem stomachi superioris orificii cita contractione, ipsum diaphragma in
consensum

(a) *De Cicuta aquat. pag. 87.*

consensum trahente, verisimiliter oritur.

Pharyngis quoque glandulae viscofo & tenaci succo scatent, qui sensum infarctus referens, ipsiusque pharyngis tunicas irritans frequentem screatum producit, sine quo deglutire difficulter potest hypochondriacus.

In his appetitus plerumque prostratus, interdum vagus, & quasi delirius, ex vaga & praeternaturali ventriculi sensatione, qua nonnulla etiam absurda appetit, caetera nauseat.

Diversa vero illius est ratio, cuius cholericum temperamentum, in quo fibra velociter movetur, atque ex levi causa vehementer oscillat. Eius ventriculi musculares fibrae spasmodice quidem contrahuntur, haud tamen in contractione consistunt, sed rapido & assymetro motu moventur. Hinc cibi nondum soluti & in albugineam fluidamque substantiam nondum redacti a stomacho eliminantur. Hi cum ad intestina transeant, quorum musculares fibrae confuse ac violentiori vi pariter oscillant, haud satis conteri, nec a bilioso & pancreatico, vel glandularum intestinalium iugiter affluente succo dilui, ac macerari queunt; idcirco antequam fluidior pars a faecibus secernatur, & ab osculis chyliiferis absorbeatur, incocti per alvum velociter excernuntur, diarrhoeam parit ipsis familiarem, quoties scilicet fermentescentia alimenta deglutiant, vel multae cruditates ex universali fluidorum massa in intestinalibus glandulis decumbentes

nerveam tunicam proritent. In huiusmodi temperamentis appetitus plerumque viget, quandoque avidus & mordax, quoniam alimenta breviorum in ventriculo agunt moram, ac immature praecipitantur.

Excussis abdominis symptomatibus, quae ad thoracem pertinent, modo aggrediamur.

Horum praecipua sunt, cordis palpitationes ac tremores, respirandi difficultates absque pulmonum infarctu, seu asthmata sicca, periodica ac recurrentia, & alia, quae supra (a) enumeravimus.

Asthma siccum seu convulsivum, quod aliis thoracis affectionibus merito praemittimus, in tres classes dividere modo expedit, idiopathicum scilicet, sympathicum, & mixtum.

Convulsivum asthma idiopathicum & essentiale omittimus, quippe ad institutum nostrum minime pertinet.

Sympathicum vero ab aliis locis, atque ab aliis visceribus, quae cum thoracis musculis, aut pulmone, mediantibus nervorum plexibus consentiunt, trahit originem. In imi ventris visceribus sympathici huiusmodi affectus causa plerumque latet, praesertim in ventriculo & intestinis, in quorum glandulis viscidae cruditates ex diuturniori mora a naturali textura deflecentes acrimoniam acquirunt, ac nerveam tunicam proritant, vel nimia copia eiusdem cryptas distendentes ipsam tunicam violenter distrahunt; qua propter musculares fibrae ad irregulares & assymetros motus excitantur;

(a) *Pro. x. huius.*

excitantur; nervei plexus tum ille parvis vagi, qui ob plurimos furculos se invicem decussantes ac superius ventriculi orificium praecipue cingentes coronarius vocatur, tum intercostalis, qui non solum cum diaphragmate, per quem transit, connectitur, sed cum ipsis quoque nervis diaphragmaticis superiori thoracis parte ac inferiori prope diaphragma (a), nec non fere cunctis vertebralibus dorfi & lumborum; Hi diversimode agitati atque perculsi contrahuntur, & in spasmodicas crispationes superiores, & inferiores eorumdem truncorum ramos, sicuti & vertebralium nervorum, sive dorfi, sive cervicalium per consensum trahunt.

Nervos ab irritantibus succis contrahi non posse forsitan diceret prae laudatus Haller, qui licet omnium sensationum organa sint, minime irritabiles esse plurimis experimentis mediante etiam mathematico instrumento irritato canis nervo applicato, qui minimas eiusdem contractiones demonstrabat, clare deprehendit. Tamen diversam esse irritantium corporum externorum ab internorum actione, qua fibrae nerveae varie distrahuntur, atque penetrantur, facile concederet. Nihilominus, quaecunque sit, praedictorum experimentorum vis, neque a causa etiam interna irritabiles esse nervos supponatur; cum irritati nervi effectus in vicinis musculis, per quos idem nervus distribuitur, se convellentibus ipso testante auctore manifeste & constanter per-

cipiantur (b), mechanica nostra explicatio nullam patitur obiectionem, ac irritabilitatis effectus non solum externi artuum musculi atque interni, ut diaphragmatis, sed etiam membranosa viscera, stomachus nempe intestina &c., quae cavi musculi appellantur, necessario sentiunt.

Siquidem ex praedictis irritamentis nerveum fluidum, utpote elasticum, ac summe mobile ex loco affecto in caeteros eiusdem trunci ramos, vel aliorum truncorum, quibus communicant iidem nervi, repellitur; quo fluido magis repleti dicti rami illorum viscerum, aut musculorum, in quibus distribuuntur, praeternaturalem, & inordinatam actionem excitant eadem lege, qua impedito sanguinis in aliquibus vasis progressu, idem in alios laterales, in quibus viam sibi aperit, derivatur. Ob hanc causam ligatus nervus non tumet, sicuti a Malpighio perspectum fuit, qui animale liquidum negantium obiectionem solvens ait (c): *Nec obstat nervum a ligatura facta non surgere cum lateraliter propagines habeat reticulariter propagatas, in quas idem succus, impedito ulteriori progressu derivari potest.*

Dicet fortasse aliquis ex tironibus animale liquidum non fluere sicuti sanguinem per tubulos secundum nervorum longitudinem pervios, sed per cellulas pene rotundas, quibus constant iidem nervi, quemadmodum Cowperus detexit, ideoque difficilis, vel saltem admodum tarda animalis
liquidi

(a) Winslow. *Exposit. Anat.* (b) *Ibid. de irritabilitate.* (c) *In oper. posth.*

liquidi in alias nervorum propagines derivatio. (Quae tamen cellularum hypothefis tamquam a simpliciore naturae operandi methodo aliena a doctissimo Haller rejicitur (a)).

Cui respondemus hanc nervorum structuram derivationis effectus nihil impedire; sufficit enim concipere cum Clar. Mazino (b) praedictas cellulas nervorum substantiam componentes esse inter se tangentes, & nerveo fluido tenuissimo elasticoque repletas, cuius vi suo in situ elastice oscillare, comprimi scilicet, & resilire, ac si sphaericae sint ex reciproca earumdem pressione ac nisu non nihil complanari, & in sphaeroides abire, ac rursus priorem figuram recipere.

His praemissis, sympathicae convulsionis aut convulsivi motus mechanica facile concipitur. Compressa enim, vel quocunque modo irritata nervi propagine, illius cellulae impulsus accipientes aliis se successive tangentibus pressionem communicant; prima e. g. series sphaerularum secundae, secunda tertiae, & sic de caeteris, donec pressio non solum ad laterales ramos, verum ad ipsius nervi radicem perveniat, cuius momentum, ex lege corporum elasticorum (c), nisu, quo prima series pressa fuerit, aequale esse debet; Siquidem demonstravit P. Dekales (d). Si globus elasticus in globulorum seriem pariter elasticorum directe occurrat, ultimus tantum globus eadem celeri-

tate, qua impingens motus fuerat, movebitur.

Cum itaque lateralium nervorum propaginum machinulae sphaericae elastico fluido repletas machinulis sphaeroidalibus muscutorum quoque elasticis acceptum impetum communicent, hae determinatum tensionis momentum ad motum exequendum necessarium acquirant; quippe musculares fibrae huiusmodi machinulis compositae iisdem directe compressis diametrum augment, & axem minuunt, in quo muscutorum actio consistit; ideo ex membranosis, aut nervosis irritamentis musculi partium etiam loco affecto remotarum, dummodo nervis communicantibus a natura impertiantur, ad praeternaturales, & convulsivos motus sollicitabuntur, non solum ii, qui naturali & vitali oeconomiae, verum etiam animali inserviunt. Si autem momentum tensionis ipsis muscularibus fibris communicatum tale sit, ut membranas, nervos, aut musculos circumvestientes vehementer, inaequaliter & assymetrique distrahat, convulsio cum dolore insurgit: non enim ut Mazinus optime explicat (e), immediata doloris causa est in praeternaturali distensione, sollicitatione, seu stimulo, sed mediata, scilicet, quia a tali sollicitatione ac distensione organorum sensibilium fit inaequalis, dissimilis, inordinata & assymetra distractio, attractio, & motus fibrarum & filamentorum solida componentium, a quibus

(a) *Lineae physiolog.* (b) *Instit. par. 2.* (c) *Wolf. T. 2. Elem. Mech. de mot. corp. ex perc.* (d) *Prop. 32. lib. 8.* (e) *Mechan. mor. par. II. diff. I.*

quibus mutantur naturales anguli fibrarum inter se, mutatur directio naturalis earundem, turbatur naturalis parallelismus solidorum, & gravi motu invertitur.

Quaecunque tamen sit sympathicae convulsionis mechanica, eiusdem effectus negare profecto non possumus, praesertim illos, quos quotidie experimur, veluti in sternutatione, in qua leviter titillata narium membrana tenduntur nervi pectoris, & diaphragmatis, qui intercostales musculos contrahendo pectus vehementer dilatant, cui fortis, & vehemens exspiratio succedit.

In cholera morbo tibiarum, & manuum dolor atque contractio, in stomachi evidenti repletionem vertigo & capitis dolor, supra frigidum pavementum nudo pede deambulantibus ventris tormina contingunt, calculo vesicae laborantes in glande penis dolorem, pruritus, & assiduam irritamentum patiuntur.

In calculo vero renum vomitus, cruris stupor, testiculi retractio, in illo scilicet latere, quod dolenti reni directe respondet; in quo morbi genere molesti dolentesque aliarum partium consensus saepe occurrunt.

Admirabilis est quidem casus illius matronae calculosa nephritide affectae, quem narrat Baglivus (a). Haec enim de sinistro reni dolore querebatur, aliisque pluribus symptomatibus, veluti forti, ac summopere dolorosa hypochondriorum ligatura, singultuosa respiratione, deinde aurium

tinnitus ac in stomachi regione acutos, quasi lacerantes dolores sentiebat. Aperto cadavere calculus magnitudinis digiti pollicis incurvatus, & partim in pelvi, partim in principio ureteris existens non in sinistro, sed in dextero rene inventus est, licet dolor sinistrum tantum latus molestaret.

Irritatis itaque ventriculi, intestinorum ac mesenterii membranis, nervearum propaginum paris octavi & intercostalis cellulae animali spiritu repletae impetum accipiunt, caeterisque cotangentibus successive communicant. A praedictorum nervorum propaginibus praesertim intercostalis, eadem elastica cellularum pressio ad vertebrales nervos, quibus adhaeret, atque connectitur, inprimis penetrat, muscoli autem abdominis, qui ab horum nervorum ramis animali spiritu providentur, tenduntur, atque contrahuntur. Hi muscoli cum ad expirationem inserviant, quia superiores extremitates sterno & costis adhaerentes habent; (nam quidam, ut oblique descendens, seu externus, a tribus costis legitimis & quinque spuris originem ducit, alii ad quinque spurias altera extremitatum se extendunt, ut oblique ascendens, seu internus, alii denique ad sternum & quatuor costas spurias, ut recti) si nimis tendantur, costarum elevationem impediunt, proinde thoracis dilationem, quod inspirandi difficultatem, seu asthma sympathicum, de quo sermonem hic habemus, efficit.

L 2

Asthma

(a) De Anat. fibr. & de morb. sol. pag. 272.

Asthma vero inmixtum, quod non a solis irritamentis, vel quibuscumque molestis affectionibus membranarum imi ventris viscerum enascitur, nec a sola abdominis musculorum rigida tensione, sed simul a spasmodica vertebralium nervorum dorsi crispatura, qui per intercostales musculos, supercostales (a), serratos posticos, intracostales, triangularem sterni, aliosque ad respirationem inservientes distribuuntur, quemadmodum & cervicalium, quorum pars tertium cum ramo secundi paris diaphragmaticum nervum componit.

Ex praedicta nervorum crispatura eorundem musculorum fibrae contrahuntur, nec contractioni proportionalis remissio respondet, quare naturalis costarum & diaphragmatis oscillatio ad utrumque motum inspirationis, & expirationis necessaria interceptur, ac nisi illorum musculorum, qui ad animale motum praecipue destinantur, actione, quae expresso ipsius voluntatis nutu perficitur, respiratio obtineri potest. Hinc patiens toto nisu thoracem dilatare, & ore hiante aerem respirare conatur.

Verum quatenus sit huiusmodi crispationum causa inquirendum est; non enim, ut modo explicavimus, a solis membranarum imi ventris partium irritamentis, & crispationibus hoc asthma oritur.

Praeterquam quod etiam sympathicum ipsum, licet a mutuo nervi intercostalis cum vertebralibus consensu excitetur, nihilo tamen minus, ni-

si illa in praedictis nervis adsit dispositio, qua mediante maiori consensu capaces sunt, nullo modo sympathica affectio insurgere potest. Et sane quotidiana nobis suadet observatio eorum, qui stomachi, intestinorum, & mesenterii passionibus vexantur, e. g. glandularum farcimine, alimenterum mole diutius retenta & corrupta, liquidorum digestionem destinatorum acrimonia, aut viscositate, cardialgia, vomitu, doloribus ac intumescentiis, aliisque innumeris, quibus praedictae partes male afficiuntur, tamen nec pectus, nec caput ullum saltem molestum consensum perpetiuntur. Convulsivum igitur asthma etiam sympathicum tunc provocatur, cum illa adsit in vertebralibus nerveis ac superiori intercostalis parte dispositio, per quam in ventriculi, intestinorum, ac mesenterii passionibus facile compatiantur, ac motus spasmodicos ineant.

Haec autem ad consensum dispositio est illa nervearum fibrarum toni imbecillitas, qua eadem fibrae seu tubuli contenti liquidi impulsui non resistunt, facile a se ipsis distrahantur, ac nervorum intumescunt, proinde contractionem portendunt; hinc irregulares, & convulsivi partium motus. Si e. g. in ventriculo, intestinis & mesenterio, vel quacunque alia membranosa parte talis fiat percussio, quae in liquidum nerveum impetum faciat, vel si mavis, in nerveas cellulas eodem liquido turgidas ita, ut ex lege corporum elasticorum

(a) *Werejen. T. XXXV. f. 1. aliis jam notos. Morg. Adv. II. p. 36.*

sticorum modo allata aliis nervearum propaginum cellulis, quibus affecta pars cohaeret, impetum communicet, hae cellulae utpote laxioribus fibris donatae cum secundum axem comprimantur, ad latera magis tument, ac ipsarum nervearum propaginum involucra laxiorem tonum adepta admodum distrahuntur, ideoque nervei ramuli, qui in musculis respirationi inservientibus distribuuntur, eorumque carnosas constituunt, vel saltem ubique pervadunt fibras, tument, auctoque diametro longitudinem minuunt, unde convulsiva ipsorum musculorum contractio, & respirandi difficultas insurgit. Exclusa vero in nervis cellularum fabrica, adhuc simplici mechanica haec phaenomena explicari quisque videt.

Quaenam igitur sit harum crispationum causa, quae mixtum asthma producit, modo investigemus. Non solum itaque ex membranosorum imi ventris viscerum consensu nerveae thoracis propagines crispationem ineunt, sed etiam a peculiari eorumdem affectione. Haec autem affectio erit procul dubio ramulorum nerveorum vitiosa, & inaequalis inflatio, ob quam thoracis musculus vehementer, & inaequaliter contrahuntur, nec contractioni alterna remissio succedit adeo necessaria, ut oscillatorius eiusdem thoracis motus habeatur. Vitiosa & inaequalis huiusmodi tubulorum nerveorum inflatio vel illos musculos praecipue aggreditur, qui inspirationi inserviunt, ac pectus in praeterna-

turali dilatatione sustinent, vel illos, qui expirationi, aerisque expulsionem, proinde pectus in molesta depressione cohibent. In utroque vero casu respirationis actio vim patitur, quemadmodum si & utriusque speciei inspiratorii, scilicet, aut expiratorii musculi non alternis vicibus, sed simul contrahantur, alii aliorum actionem invicem intercipiunt, ac in motu tonico manent, ideoque respiratio non nisi aegre, & multo labore perficitur.

Ramulorum nerveorum in musculares fibras proxime definientium vitiosa inflatio, vel fit a fibrarum eisdem nervos componentium tumefactione, tunc cum ab animali succo maiori copia influente ipsae replentur, aut a quaque causa rarefaciente. Nam si laxiorem tonum nactae sint, eiusdem animalis liquidi visui minus resistunt, ac praeter modum inflantur, vel si a diversi generis canalibus veluti lymphaticis praeternaturales succi interdum aspera superficie donati (a) intra nervosarum fibrarum spatia evomantur, ibidem tamquam cunei eadem spatia violenter dilatant.

Huiusmodi spatia dilatata, utpote corporum solidorum, sunt, docente Mazino (b), in ratione triplicata interstitiorum distantiarumque, quas fibrae habent inter se in statu extensionis naturalis, sicut & vesiculae sphaeroides animali spiritu copiosiori, vel rarefacto distensae, sunt in ratione triplicata diametrorum, qui easdem in statu naturali metiuntur.

Ll 3

Quo

(a) *Mazini. Mechan. mor. P. II. diff. 1.* (b) *Ibidem.*

Quo maior vero horum plexuum dilatatio & ad latera extensio, eo maior longitudinis contractio; idcirco filamenta nervea a dictis plexibus emissas, & hinc inde effusa tantum proxime versus plexus a praeternaturalibus succis, vel animali liquido copiosiori, vel rarefacto extenduntur. Cum autem filamenta nervea musculis alligantur, muscoli vero costis, partibusque thoracis; eadem proxime ratione hae partes praeter modum trahuntur. Hinc obstringuntur respirationis organa, & difficilis redditur respiratio.

Convulsivae huiusmodi affectiones modo sine doloribus, modo cum doloribus insurgunt. In primo casu nerveorum plexuum ab alienis moleculis ingressis dilatatio aequalis & unimoda fit, ac singula nervearum fibrarum interstitia, & distantiae praeter naturam extensae, aequalem inter se proportionem servant, ex quo filamenta nervea ab iisdem plexibus emissas aequalibus undique viribus trahuntur, atque membranarum fibrae naturalem directionem ac parallelismum, naturalemque angulorum inter se aequalitatem sustinent. In secundo casu nervearum fibrarum interstitia ab extraneis moleculis extensa & dilatata, inaequalia sunt; quapropter eadem fibrae inaequaliter a se ipsis distantes naturalem parallelismum amittunt, angulorum inclinationem mutant, diversos tensionis gradus patiuntur, ac diversimode sollicitantur, vel sphaeroidales vesicularum series non unimode, sed inaequaliter naturali fluido

iuxta maiorem, aut minorem earumdem toni imbecillitatem distensae subditarum partium filamenta, five nervosa, five membranosa, five muscularia violenter & asymmetre ad se ipsas trahunt; quod sine acutis doloribus fieri nequit.

Eadem ratiocinandi methodo ad cordis palpitationum, & tremorum naturam examinandam uti debemus. Hos itaque affectus in sympathicos & mixtos dividimus; quemadmodum & asthmaticos. Sympathicos dicimus, qui ab imi ventris passionibus, ac membranosorum viscerum irritamentis excitantur ita, ut his cessantibus, cordis quoque palpitationes obmutescant & vicissim: mixtos vero, qui non a solo praedictarum partium consensu enascuntur, sed a peculiari quoque cardiacorum plexuum affectione, quae cum abdominis affectione coniuncta morbum sensibiliorem reddit.

Distractis mesenterii, intestinorum, & praesertim ventriculi membranis, vel irritatis earumdem fibris, perturbatur oscillatorius motus, ac nerveae propagines in coronarios ipsius ventriculi plexus desinentes, utpote elastico fluido repletae, ab eodem huc illuc refluyente ac superiores tubulos distendente dimoventur, & in spasmodicas contractiones inducuntur.

Cardiaci quoque plexus fibrae ad violentos ac praeternaturales motus concitatae cordis systolem non solum vehementiorem, sed etiam aliquanto frequentiore reddunt ita, ut idem cor ante perfectam ipsius dilatationem contrahatur, eiusque ventriculi debita

tam sanguinis ad propellendum quantitatem recipere nequeant: hinc maior eiusdem sanguinis cumulus in auriculis & ad ostia ventriculorum, qui ex aucta massa fortiore impulsu contra ipsum cor exercens, eiusdem elasticitatem magis provocat; quare in praecipites, ut ita dicam, ictus irrumpit, in quibus quandoque oscillationum ordo prorsus confunditur; unde cordis tremores & palpitationes insurgunt, quae cum pulsus intermittebat, suffocatione, & lipothymia saepe coniunguntur.

Quotiescumque cor, post velocem oscillationum seriem, suam systolem intermittat, vel ob nimis praecipitem eiusdem contractionem, adeo exiguam ipsius sanguinis quantitatem prius receptam propellat, ut ad carpi arteriam vix perveniat, eiusque parietes dilatare non valeat, pulsus quoque intermittit. Ex violentiori autem cordis contractione interdum notabilis pulmonaris sanguinis quantitas a sinistro ventriculo excluditur, quae in pulmonibus gravitans sensum ponderis, atque praecordiorum angustiam refert: cerebri quoque arteriolae ob inordinatam & praecipitem supra dictam cordis contractionem naturali sanguinis quantitate interdum defraudantur, & ideo minor spirituum copia secernitur, minorque ad animalia & vitalia organa influit, quod lipothymiam affert, quae cordis palpitatiioni non raro succedit. Hae itaque cum sint sympathicae cordis palpitatiioni proximae causae, quae primariam licet in membranosis ini ventris visceribus habeant se-

dem, eas tamen a laxiori nervorum structura quoque pendere quisque concipiet.

Mixta autem palpitatio convulsiva quae peculiaris est cardiacorum plexuum affectio, ac ini ventris aliquantulum praecedit affectiones, tunc prodit, cum solidorum nerveorum, quae cordi inserviunt, vitium illud solidorum, aut membranosorum, quae in abdomine distribuuntur, superat, vel saltem eidem pene fit aequale.

Si fibrarum nervearum cardiacos plexus componentium tonus debilior sit, laxiorque connexio; harum interstitia praeternaturalium fluidorum particulae facile ingrediuntur, eaque dilatant; vel sphaeroidales cellulae easdem fibras componentes animalis liquidi influxui nimis cedentes, eodem vitiose, & extra proportionem repleantur ita, ut eorum plexuum violenta fiat contractio, quae cordis systolem vehementiorem, inordinatam, & velociorem reddunt, a quo caetera symptomata modo recensita immediate oriuntur. Abdominis vero plexus eodem principio affecti illa pariunt accidentia, de quibus jam supra egimus.

Cum fibrarum nervearum atonia non ubique est aequalis, sed in quibusdam plexibus, immo in quibusdam eiusdem plexus propaginibus maior, in aliis minor; earum quoque animalis liquidi repletio plerumque inaequalis habetur, sicuti est furculorum nerveorum ab heterogeneis fluidi particulis fibrarum interstitia dilatantibus inflatio: idcirco particulares hinc inde contractiones insurgunt, quae

quae modo sensu doloris, five acuti, five obtusi, modo compressionis & ligaminis, manifestantur. Huius generis sunt molesti dolores, quos circa thoracem, & costas saepe experiuntur hypochondriaci, sicuti & praecordiorum angustiae, gulae compressiones deglutitioni non nihil obstantes, arteriarum constrictiones, quae progressivum sanguinis motum praepedientes brachii pulsum obscuriorem parumque oscillantem efficiunt, unde & arteriarum trunci, qui supra constrictionem sunt, ex ipsius sanguinis percussione vehementer pulsant, ac verum aneurysma interdum repraesentant.

A pectore ad caput transeuntes, eiusdem naturae accidentia invenimus, nec ista a praedictis differunt, nisi ratione loci, ac sensationis subiecto, quae pariter in sympathica, & mixta dividere rationi consentaneum mihi videtur.

Sympathica scilicet, quae infimi ventris affectionibus omnino excitantur: e. g. Ventriculus, qui inter caetera suae cavitatis viscera, magno cum capite donatur consensu, si cruditatum infarctu oneretur, vel quacumque causa nerveae eiusdem tunicae fibrae dimoveantur; mediantibus octavi paris plexibus ramulisque intercostalis, capitis nervi impulsu accipiunt, eorum nempe fibrae inferius percussae & commotae, ob naturalem elasticitatem superioribus, cum quibus communicant, impetum faciunt, quibus dilatatis inordinatae fiunt ipsorum nervorum capitis contractiones. Qua-

re coarctato vasorum sanguiferorum, praesertim venarum, diametro, sanguis intra caput non nihil remoratur, ipsaque vasa turgefacta cerebrum comprimunt, & gravativum capitis dolorem efficiunt.

Medullarium quoque sinuum fibrae ex impulsu ab inferioribus nervis accepto inordinate moventur; ac illae nervis opticis respondentes, quae externorum obiectorum impressiones, oculis mediantibus, excipiunt, ipsique nervi optici quodam tremore afficiuntur; proinde & visionis organum tremore affectum imaginum sedes, seu puncta, in quae radii obiectorum incidunt, assidue mutat, ipsaque obiecta rotantia communi sensorio repraesentat. Qua propter patiens erecto corpore, nisi aliquo fulcimento sustineatur, stare nequit.

Mixta capitis accidentia sunt praeternaturales nervearum propaginum contractiones, quae ab inaequalibus animalis liquidi inflationibus, vel heterogeneorum fluidorum, puta feri, aut lymphae particularum nerveas fibras a se ipsis distrahentium intrusione nascuntur. Si e. g. in quinti paris ramulis fiant, ac huiusmodi intrusio, distensio atque distractio non in omnibus suis partibus sit aequalis ita, ut quaedam huius nervi propagines, ac propaginum partes inaequaliter & assymetrique distendantur, atque distrahantur: tunc temporum & frontis, vel acuti & instar clavi ferientes dolores, vel constringentes, oculosque in consensum trahentes, cum lacrymarum effusione, insurgunt.

Sanguis-

Sanguiferorum vasorum ac praesertim durae matris sinuum diametros hae spasmodicae crispationes coarctant, sanguinemque a cerebro redeuntem sufflaminant, qui regrediens eiusdem cerebri vasa tumefacit, & gravativum capitis dolorem portendit. Si haec sanguinis turgescencia exilia corticalis substantiae & ventriculorum ipsius cerebri vascula, veluti plexum choroideum, ita occupet, ut secretoria spirituum organa aliquantulum comprimentur, virium prostratio, sensuumque torpor, & temporanea quandoque eorundem abolitio contingit.

Ex huiusmodi spiritalium organorum compressione inaequalis fit animalis liquidi secretio atque influxus; quemadmodum & ex laxo fibrarum nervearum tono hinc, illinc maiori, vel minori: quippe eadem nerveae fibrae inaequaliter inflantur, proinde sphaeroidales musculorum machinulae inaequaliter replentur, unde quidam fit totius corporis tremor, praesertim femoris tibiaeque musculorum, qui ad corporis molem sustinendam magis laborant, nec non optico-
nervorum sinuumque medullarium, qui ipsis nervis opticis originem praebent, ac thalami nervorum optico-
rum appellantur. Hi sinus utpote vera visionis sensoria, quae ab organis visoriis impulsu accipiunt, & quae obiectorum imagines nostro intellectui repraesentant, cum tremore afficiantur, eorundem obiectorum, impressiones in diversis punctis recipiunt: ideoque imagines tamquam

se moventes ac in gyrum actas hypochondriacis ostendant, quod vertiginem constituit; ac interdum talis fit harum fibrarum medullarium tremor, atque commotio, ut externorum obiectorum impressiones atque sensationes prorsus obscuraret, vertiginemque tenebrosam reddat, in qua corpus labi cogitur.

Varii ac pene oppositi saepe sunt nervalium crispationum, vel saltem spasmodicorum motuum, qui in vitalibus organis fiunt, effectus. Nam modo coarctantur etiam arteriarum minimarum diametri, ac minor sanguinis quantitas ad cutanea vascula appellit, ibidemque tardiori motu progreditur; unde faciei pallor & universalis rigor, seu horripilatio: modo dilatantur, eorumque motus oscillatorius vehementior fit, ex quo faciei rubor atque universalis calor.

Inter obscura tamen hypochondriaci morbi phaenomena sequens profecto enumerandum est; animi scilicet affectus, quo hac infirmitate laborantes proprium morbum, ut gravissimum ac lethalem mente apprehendunt, ac de illo graviter queruntur; quo pariter plurima mala, quae simul accusant, tamquam acerbissima, & intolerabilia exaggerant. Huic accedit moeror atque tristitia, qua adstantium & amicorum solamina renuunt. Has & alias animi passionum, quas superius (a) ad morbi diagnosin recensuimus, a solidorum mechanica quoque oriri deprehendimus.

Quod

Quod ut melius elucescat, illae considerandae sunt solidorum proprietates atque officia, quae in corpore perfecte sano nunquam defunt.

Sicuti hominis & cuiuscumque animalis vita in motu solidorum propulsivo, & fluidorum circulatorio consistit; ita sanitas in hoc motu ubique non interrupto, aequabili, & proportionato posita est.

Motum solidorum duplicem hic considerare expedit, propulsivum scilicet, qui a corde & vasis non solum sanguiferis, sed etiam serosis & lymphaticis, caeterisque, quae fluida a sanguine secernunt, & recipiunt, postea ad eundem referunt, perficitur: alterum tantummodo oscillatorium, qui viscerum saltem membranorum totiusque nervosi systematis atque musculorum proprius est. Primus sanguinem & caetera fluida ab ipso genita a corde ad partes propellit, deinde ad cor restituit, ac vitalis dicitur: secundus alimentorum digestionem, triturationem, fluidorumque attenuationem, nec non cunctis animalis viribus prospicit, ideoque naturalis simul & animalis appellari posset.

Propulsivus fluidorum motus vitium acquirit, vel in nimia celeritate atque impetu, vel in praeternaturali tarditate atque inertia. In primo casu fluida rapidiori motu moventur, ac sanguinearum molecularum invicem occurrentium vehementior est ictus vehementiorque inter vasa & sanguinem aliaque fluida percurrentia mutua confricatio, ex quibus maior caloris gra-

vis, aucta eiusdem sanguinis rareficientia, frequentior arteriarum pulsus, brevior fortiorque respiratio sequitur, quae accidentia febrem constituunt, non sine molesta universi corporis sensatione, inquietudine & iactatione; quippe a vasis magis expansis ac maiori momento pulsantibus membranosa & nervosa solida percelluntur, atque distrahuntur. In secundo casu lente fluunt sanguis & caetera liquida, vel in quadam peculiari parte, ac inflammationes, asthinata & arthriticos dolores, tumores aliaque plurima pariunt mala, quae fluidorum stagnationem consequuntur; vel in toto corporis ambitu, ac rheumata, cachexias, hydropes, scorbuticos affectus, caeterosque portendit morbos, qui ab universali fluidorum lentore, proinde & ab imminuta cordis & arteriarum elasticitate originem ducunt.

Motus autem simpliciter oscillatorius vitium acquirit non solum in praeternaturali celeritate, aut tarditate, sed etiam in data inaequalitate, & proportionis defectu.

Si in praeternaturali celeritate, quaedam viscera membranosa, ut ventriculus & intestina, quae primae digestionis cibique concoctioni inserviunt, ingestis, antequam conterantur, ac solvantur, praecipitant, ideoque pravae digestionis, crudae deiectiones, seu diarrhoeae ac lienteriae frequenter eveniunt (a): si in tarditate; lentus fit peristalticus intestinorum motus, languidaque muscularis ventriculi tunicae contractilis vis,

(a) *Hequet. Trait. de la digest.*

vis, quae secundum variam fibrarum directionem alimenta comprimere ac dissolvere debet (a), unde tarde digestiones, cruditates, alvi stypticitates, & caetera prodeunt symptomata; Si oscillatorii motus vitium in

rupta aequalitate, & proportione consistat, illa affert pathemata, quae hypochondriaci animum ac mentem torquent, quod ex sequentis propositionis demonstrationibus satis patebit.

PROPOSITIO QVARTA.

Natura in aequabili & harmonica solidi nervei & membranosi oscillatione delectatur; & e converso hac perturbata contristatur.

Tunc cum nerveae & membranosae partes aequaliter, & in data naturali proportionem succo nerveo inflantur, juxta corporum elasticorum leges alternatim quoque tenduntur, ac remittuntur; fibrae vero, quae per diversam directionem antagonistae sunt, vicissim contrahuntur, atque distrahuntur; ex quo naturales & animales operationes promptae, non interruptae, validaeque fiunt; proinde homo vegetus, agilis, tranquillus vivit.

E contrario rupta motus oscillatorii aequalitate & proportionem, fibrae nerveae & membranosae animali liquido inaequaliter tumidae inaequaliter quoque contrahuntur, nec contractioni proportionata respondet distractio, quippe antagonistae fibrae maiori, vel minori animalis liquidi copia replentur, & ideo maiori vel minori contrahendi vi pollent, fibrarumque eiusdem directionis contractionibus minimae synchronae sunt, sicuti & di-

stractiones; quare naturalis consentientium fibrarum harmonia tollitur. Quaedam e. g. organi pars, cuius fibrae animali liquido magis tument, quam fibrae alterius partis vicinae, maiori quoque momento agit contra aliam partem, ac fibrae illius praepollentes alterius fibras violenter & asymmetra proportionem ad se trahunt. Quapropter mutatis fibrarum naturalibus directionibus naturales anguli, & parallelismi fibrarum permutantur, quod convulsivam organi affectionem constituit, quae etiam si absque acuto dolore fiat, actiones tamen naturales & animales perturbans gravem aegri sensorio molestiam affert.

Huiusmodi motus oscillatorii inaequalitas, & asymmetra proportio etiam in cerebri fibrillis contingit, propter quam inaequalis quoque fit animalium spirituum ad partes distributio & in aequalis organicarum partium contractilis vis, quae oscillatorium earundem motum eo magis inconcin-

(a) Hequet. ibidem.

num reddit. Praedictae cerebri fibrillae si non solum inaequaliter, sed etiam tarde & lente moveantur, hypochondriacos eo magis moestos, tacitos, & hominum societati adversos efficiunt, quibus si adeo interrumpatur fibrarum medullarium motus, eiusque ordo, ut naturalis earundem directio & parallelismus auferatur, opaca excitantur phantasmata, quae animae quoque facultates perturbant, & ad melancholicum delirium disponunt.

Naturam, vero in aequabili & harmonica solidi nervei & membranosi oscillatione delectari, & e contra in perturbata moerere, non solum naturalis humani corporis ordo demonstrat, sed etiam plurimae in rebus physicis observationes, quibus mediantibus ea, quae nostros sensus voluptate, aut fastidio afficiunt, percipimus. Si e. g. ea, quae sub gustatus sensum cadunt, examinemus, illa quidem sapida nostro gustui iucunda, & conferentia esse comperiemus, quae linguae papillas gustatus organum efficientes leni stimulo feriunt, quorum vi in ipsis papillis & gustatorii nervi propaginibus illi excitantur alterni motus, qui iisdem partibus homogenei & concinni sunt; illa vero ingrata & nauseosa, quae in violentos & naturalibus asymmetros motus ipsa organa inducit; denique insipida, quae sensorium nostrum nullo modo proritant, eiusque fibrillas ad oscillatorium motum allicere minime valent.

Gustatus organo odoratus valde affinis: & olentium corporum odorem

suavem dicimus, si ipse olfactoriam membranam volatilibus particulis titillans ad illas oscillationes concitet, quae eidem membranae processibusque mamillaribus connaturales sunt; insuavem autem, foetidum & perniciosum, qui ipsam olfactoriam membranam ita ferit, ut ad violentas & inconcinnas oscillationes commoveatur.

Hoc posito principio plurima horum sensuum & praecipue odoratus phaenomena mire explicantur: E. G. cur idem alimenti genus, aut potus quidam iucundum & conferens experiantur, alii iniucundum & perniciosum: cur unus odor quibusdam gratus & suavis sit, aliis ingratus, & ita perturbans, ut capitis dolorem, & diras convulsiones cieat; Hoc siquidem a diverso fibrarum, tum membranae, tum nervorum olfactus organum componentium tono, a quo motionum diversitas pendet, & ab universo nervorum aliquantulum imbecilli systemate quidem nascitur. Tales enim convulsiones in foeminis, quarum solida nervea rarioris sunt texturae, plerumque observantur. Pari modo explicatur, cur in lipothymia languentibus acres volatilesque spiritus naribus applicati vigorem motumque restituant, vel soporoso affectu detentos errhina, & ptarmica remedia ad suos sensus aliquando revocent: cur quoque qui tabaci fumo, aut pulvere utuntur, non nisi aegre se abstinere possint, eoque carentes avidè quaerant, & adstantes, vel amicos in via occurrentes tabacum flagitent

Quod

Quod ad visum attinet, non inferiora huius veritatis argumenta hoc sensorium nobis exhibet. Lux vivida & rutilans, veluti solis directæ aspecti, oculos perstringit, obtenebratque: quippe præter pupillae contractionem, visoriam membranam, nervique optici fibras in oscillatorium motum adeo violentum inducit, ut aliorum obiectorum impulsus utpote leviores commune sensorium non percipiat. Eandem ob causam albus color, qui plures lucis radios vividioresque reflectit, quam caeteri colores, oculos fatigat, & ad organicos morbos disponit: Color vero niger, qui nihil aut parum lucis reflectit, nullum quoque, aut levissimum in visus organo motum excitat, idcirco in oculorum morbis præsertim inflammatoriis, sive acuto dolore laceffentibus in obscuro cubiculo manere, aut decumbere oportet. Cui addendum, quod ob hunc oscillatorii in visus organo defectum tenebrae moerorem in animum nostrum incutere solent, ac si diuturnae sint, sensorii, sive retinae, sive choroidis stuporem nervique optici paralysem aliquando secum trahunt. Viridis color inter caeteros amoenus jucundiorque, quippe oculi sensorium leniter percellit, placidasque & ordinatas eiusdem oscillationes promovet. Equidem viridem colorem plerique etiam antiquae doctrinae philosophi, inter quos & Aristoteles, medium locum inter album, & nigrum tenere crediderunt; hoc autem post Newtonianum prismatis

experimentum pro demonstrato habetur. Nam ipse viridis in spectro, in quo septem primarii colores pinguntur, quartum, seu medium locum occupat; ideoque cum moderata obiectorum actio fibrarum elasticitatem cieat, magisque conservet; violenta laceffat; nimis lenta & obscura stuporem inducat: viridis color ad visus conservationem prae aliis confert.

Ex auditus denique phaenomenis propositionis veritas melius, quam ex praedictis elucescit: siquidem sonus, qui ex aeris succussione & tremore immediate oritur, eiusdem auditus sensorio non nisi per tremorem communicari, & non nisi per oscillatorium motum, quod tremoris species est, impulsus ad cerebrum appellere potest; ac diversa soni, vel toni species, quae, sive in vario succussionis, & tremoris gradu aeri indito consistat, sive in diversa molecularum aeris a corpore sonoro impulsus accipientium natura, ut in hypothese de Mairan legitur (a), non nisi per diversos zonae sonorae & septi cochleae oscillationum gradus communi sensorio se manifestat: Quare nonnullas acusticae leges & proprietates modo expendere opportunum censeo, ut quod proposuimus, rite demonstremus.

Ad sonum itaque efficiendum tria concurrunt subiecta, corpus scilicet sonorum, quod suas edit vibrationes, seu tremores, aer, a quo vibrationes, & tremores corporis sonori suscipiuntur, & ad aures transferuntur, de-

Min 3

nique

(a) *Memoir. del l'Academ. R. de Paris Ann. 1737.*

nique auditus organum, quod aeris vibrationibus & tremoribus percellitur, ex quibus impulsibus mens sonum apprehendit.

Ut corpus sit sonorum, elasticum imprimis esse debet, ac talis naturae, ut eodem pulsato eius minimae particulae (a) componentes, contremiscant (b). Pulsata nempe campana omnes eiusdem particulae alternis vicibus expanduntur, & contrahuntur, & ipsius circulorum sectores alternis quoque vicibus in ellipsum transeunt (c), ut ex arena super campanam aspersa resiliente, & circumducto filo satis deprehenditur. Campana, vel quodcunque aeneum corpus cavum, si etiam leniter percutiatur, bombum edit, qui aliquandiu durat; si vero post percussione[m] statim sonoro corpori manus admoveatur, idem bombus extinguitur; ergo una elastici corporis vibratio auditu non percipitur, sed plures utique vibrationes, quae intra datum temporis spatium fiunt, sonum efficiunt. Numerus autem vibrationum, ut sonum efficiat 12 intra minutum secundum maior esse debet juxta calculum clariss. Sauveur (d), qui in organo musico, ac in tubo pedum 40. duodecim & dimidia vice intra dictum minutum secundum oscillanti minimum sonum, seu profundum, ac in brevissimo tubo pollice paulo minori, cuius vibrationes intra minutum secundum 6400.

supputavit, acutissimum sonum audit.

Extremos itaque vibrationum numeros, intra quos sonus sensibilis habetur, esse 13. circiter, & 6400. spatio minuti secundi, priorem scilicet gravem, secundum acutum; extra hos vero sonum perire autumat; cuius calculo Musschembroekius astipulari videtur (e).

Pater Mersenus, licet maiorem, quam 13. vibrationum numerum a sono sensibili excludat, concludit (f) tamen, sonori corporis vibrationes sonum minime dare, si illius celeritatis sint, ut numerari possint, quod etiam P. Kircherus (g) se expertum esse dicit. Vibrationum autem numerum maiorem, quam 10. intra minutum sec. non audiri posse, asserunt.

Gravem sonum a paucis vibrationum numero, acutum a maiori fieri in musicalibus chordis clarius apparet. Nam chorda cymbali longior, quae pulsata minores edit vibrationum recursus imum *Bassum*; brevior, quae omnium plurimos, acutum, seu *supra altum* dicitur: docetque supradictus Mersenus (h) acumina sonorum esse in ratione inversa longitudinis chordarum, & directa numeri vibrationum intra datum tempus; Sint e. g. plures chordae, veluti in clavi cymbalo, quarum una sit quatuor pedum longa, alia duorum pedum, alia trium, alia unius, ut caetera omitam, tonus primae erit una *octava* inferior,

(a) M. Carré Hist. de l'Acad. R. 1709. p. 48. (b) M. de la Hire Mem. 1704. p. 88. (c) Boerhaav. Prael. Acad. T. 3. de Audit. (d) Aët. Acad. R. 1700. (e) Cap. de sono. p. 188. (f) Harmon. Univers. (g) Musurg. (h) Ibidem.

ferior tono secundae, cuius dupla est longitudo, cum tono vero tertiae comparatus, ad cuius longitudinem est in ratione sesquialtera, dabit *quintam*, cum tono quartae ad cuius longitudinem est in ratione sesquitercia dabit *quartam*, quas sequuntur *tertia maior*, *tertia minor*, *sexta*, *septima maior* & *minor*, qui septem toni *octavam* efficiunt.

Si chorda quatuor pedum dato tempore semel oscillet, in duas divisa, seu posito in medio eiusdem pectine bis oscillabit, in quatuor quater, in octo octies, ita ut numerus recursuum semper sit in ratione reciproca longitudinis chordae.

Chordae eiusdem speciei, aequalis longitudinis & tensionis unisonae sunt, quia aequalem vibrationum numerum dato tempore consequuntur. Post unisonum magis harmonicae sunt, quae una octava distant, seu illae, quarum una diinidiam recursuum partem habet alterius.

Secundum soni subiectum esse aerem, nempe illud medium, quod sonum ad aures perfert, neminem credo in dubium revocare. Siquidem campana in vacuo Boileano (a) pulsata contremiscens nullum edit sonum, quia suos tremores nec aeri, nec alio corpori communicare potest.

In aere rariore, utpote minus elastico sonus minuitur, in aere densiori magisque elastico augetur, hyeme coeloque sereno soni vis intensior, aestate vero, & pluvioso coelo debi-

lior, imo aucta machinae ope intra campanam aeris densitate, duplo & triplo fortiozem sonum expertus est Hauksbee (b). Corpus igitur sonorum, tunc cum sonum emittit omnibus suis minimis partibus tremit, oscillatque & hoc motu tremulo & oscillatorio ambientem aerem iteratis ictibus percutit, ex quibus ipse aer non continuo & aequabili motu movetur, qui ventum efficit; (ventus enim, licet vehementissimus, nullum per se sonum feret, nisi ad terrestria corpora allideret) sed oscillatorio quoque & recurrenti. Quaedam scilicet eiusdem aeris, molecule ab A, Exem. gr. versus B. uno momento impelluntur, & a B. versus A. proximo momento repelluntur (c); quippe cum sint omnes elasticae, molecule B, sive in B. posita a moleculis A. eo comprimuntur, donec earum momentum resiltionis praevaleat harum momento compressionis; ideoque molecule B. compressae molecule compressas comprimentes re-percutiunt; at qui alternus est sonori corporis partium ictus, molecule A. denuo versus B. impelluntur, & a B. versus A. per praedictam elasticitatis legem rursus quoque repelluntur. Interim molecule B. a moleculis A. impulsu accipientes in alias a tergo positas, puta in C. incurrunt. Molecule C.; sive inter B. & C. coacervatae & compressae se dilatare conantes molecule B. contra A. utpote magis expansas reiiciunt, quae a corpore sonoro rursus in

(a) *Boyl. exper. Phys. Mech. de aere.* Hauksbee *Physic. Mech. exper. Philosoph. transf. IV.* (b) *Loc. citat.* (c) *Boerb. Prael. Acad. T. 3. de Aud. p. 173.*

in praedictas moleculas proiiciuntur. Hae perculsae & compressae antequam se restituant, in alias magis distantes impetum faciunt, & hae in remotiores, eo usque sonori corporis momentum pervenire possit. Decrescit enim soni intensitas in ratione duplicata inversa distantiarum a corpore sonante, quod tamquam in centro radios sonoros dictos circum undique emittit.

Soni quidem limites, qui non solum a soni magnitudine, sed a vento aerisque puritate & elasticitate pendent, determinare nequeunt philosophi: velocitatem vero eiusdem determinarunt plurimi, inter quos primi numerantur Galileus (a), & Gassendus (b), qui postremus intra minutum secundum ad 1473. pedum distantiam sonum pervenisse invenit. Academici denique Florentini accuratiori calculo ballistarum ope dato intervallo distantium quinque minutorum secundorum spatio milliare italicum sonum percurrere statuerunt, quod in pedes divisum pro quolibet minuto secundo dat. 1185. pedes (c). Academici vero Parisienses in superioribus actibus soni velocitatem intra minutum secundum pedum parisiensium, seu *du Roi*. 1080. referente du Hamel, esse arbitrabantur: sed cum aliquem postea errorem ex aliorum experimentis inesse animadvertissent, fanciverunt, ut hanc rursus novis experimentis disquirerent quidam academici, inter quos D. Cassini, Ma-

raldi, & de la Caille, ut in aliis academ. act. legitur (d). Londinenses quoque ex observationibus clarissimi Derhami soni celeritatem quolibet minuto secundo 1142. pedum anglicorum determinarunt, qui pedes ad Parisiensem mensuram redacti 1072. numerum efficiunt, quam velocitatis mensuram inclitus quoque Neuton in secunda suorum principiorum editione approbavit, quamvis in prima 968. tantum posuisset. Ex quibus observationum differentiis concludit doctissimus Musschembroekius (e), sonum non semper aequae velocem ubique esse.

Cognita soni celeritate philosophi quasdam assequuti fuerunt notiones, regulasque tradiderunt, non solum ut numerus vibrationum, earumque distantia ad datum spatium percurrendum cognoscatur, quod in sua philosophia naturali (f) praestitit Neuton, sed etiam ut locorum distantiae absque mensura forsitan difficili, aut impossibili innotescerent, quae magnae utilitatis sunt, praesertim militari disciplinae in urbium obsidione, nautis atque geographis. Verum cum haec ad rem nostram minime pertineant, omittimus de quibus pulcherrima valdeque utilia habentur in praedictis act. acad. R. Scient (g).

Aer itaque non solum tremorem motumque undulatorium accipit a corpore sonoro, sed ipsum acceptum aliis sonoris elasticisque corporibus cominu-

(a) *Idem* T. 3. *Praelect. Acad.* p. 178. (b) *Musschembroek de sono* pag. 187. (c) *Tentam. Flor.* pag. 113. (d) *Memor. de l'Acad. Royal.* 1738. p. 128. (e) *Loc. cit.* (f) *Lib. 2.* (g) *An. 1738. sur la propag. du son.*

communicat, qui tremor motusque undulatorius auri perceptibilis est, ac sonorus, si eadem elastica corpora sonanti corpori harmonica sint.

Musicalium chordarum ad unisonum tensarum, si una pulsetur, alteram quoque resonantem audimus, etiam si non in eodem instrumento, sed in duobus pluribusque sibi propinquis existant; immo non solum chordae sonanti perfecte unisonae oscillant, resonantque, sed etiam illae omnes, quae eidem harmonicae sunt; eorumque resonantia maior, quo maior sit harmonicae ratio cum priori, seu quo simplicior sit earum vibrationum proportio, & ad numerorum 1. 2. 3. 4. 5. proportionem magis accedens, ut monet D. Mairan (a) nempe *Octava* caeteris fortior, quam sequuntur successive decrescentes, *quinta*, *quarta*, *tertia*, *maior*, *minor*. &c.

Ne autem solo auditui forsitan incaute fides praebeatur, inquit auctor, visus quoque auxilium adiungere possumus. Positam enim cartulam, vel aliud leve corpusculum supra chordas unisonas harmonicasque etiam alterius clavi cymbali in data vibrationum proportionem tremere observabimus.

Ex dictis aliisque soni phaenomenis excogitavit D. Mairan, aerem, utpote soni vehiculum, diversae elasticitatis particulis constare, quarum vibrationes homologae sint, & aequalem celeritatem habeant, ac illae diversorum tonorum corporis sonori; nec omnes eiusdem aeris particulae, quae sonanti corpori obviam veniunt,

ad vehendum datum sonum ad aures aptas esse, sed eas tantummodo, quae sunt eiusdem specificae vibrationis, & aequalis celeritatis, seu unisonae cum corpore sonoro: idcirco analogiam instituit inter lucis diversae naturae, seu diversae refrangibilitatis radios a magno Neutono detectos, quorum alii rubrum, alii flavum, alii aurantiatum, alii alios colores efficiunt, & quorum primarii ac simplices septem sunt; & inter aeris particulas, quarum aliae unum tantummodo tonum, aliae alterum recipiant, transferantque, qui toni septem quoque sunt *octavam* constituentes.

Hac nisi data hypothese se capere non posse asserit praefatus auctor, quomodo plures diversi toni eodem tempore percipiantur, plurimae nempe voces, quae in musico concentu canunt, aut plures instrumentorum chordae diversorum tonorum, quae eodem temporis momento pulsantur, ambienti aeri proprium tonum singulae communicent, totque tremores ac diversae celeritatis vibrationes idem aer distincte ac sine confusione ad aures vehat. Si enim universae aeris particulae eiusdem elasticitatis supponantur, sequi oporteret, unam & eandem ipsius aeris massulam diversae speciei vibrationes & tremores suscipere, quales diversi toni eidem impertiant. Videlicet cum *octava*, *quinta*, & *tertia maior* eodem temporis momento percellatur, ipsa aeris massula 100. vibrationes ex *octava*, 150. a *quinta*, 125. a *tertia* simul reciperet, & ad
orga-

(a) *Act. Acad. R. Sc. Ann.* 1737. p. 13.

organum auditus distincte transmitteret, quod absurdum videtur.

His quoque admissis in aere diversae elasticitatis moleculis, chordarum ad unisonum tensorum motus, & resonantiam facilius concipi arbitratur; siquidem cum chorda pulsata plurimarum vibrationum ope sonum edat, aeris particulae praesertim illae, quae ad datum sonum recipiendum, & easdem vibrationes conservandas aptae sunt, caeteras chordas offendunt, a quo primo impulsu omnes quidem moventur, hac tamen diversitate, quod chordae perfecte unisonae, quarum vibrationes omnino similes, & aequales vibrationibus chordae pulsatae, nec non earundem aeris particularum datum sonum transferentium, in omni itu, aut reditu novum impulsu accipiunt, qui earundem motum ita accelerat, ut sensibilis ac sonorus evadat; chordae autem harmonicae, sed non perfecte unisonae, quarum vibrationes non aequales; sed ad musicalem concentum aptae, non in omni itu aut reditu, sicuti priores, novum impulsu accipiunt; ideoque earundem motus minus acceleratur, minusque sensibilis redditur, & hoc in data proportionem harmoniae, maior scilicet erit chordae resonantia, cuius vibrationum numerus est ad numerum chordae pulsatae ut 1. ad 2. quae octavae est ratio, deinde cuius numerus vibrationum est in ratione sesquialtera, 2. ad 3, quae ratio est quintae, cui succedit quarta, cuius vibrationum est in ratione sesquitertia, seu 4: 3, & sic de aliis musicali or-

dine decrefcentibus, quarum patet ratio. Nam illius chordae, cuius vibrationum numerus magis ad octavam, seu duplam rationem accedit, impulsuum coincidentia frequentior erit.

Caeterae demum chordae diversi toni, & extra harmoniam tensorum minime resonant, quippe earundem vibrationibus chordae sonorae non conveniunt, aerisque particulae cum ipsa chorda sonora homologue & aequaliter oscillantes, licet easdem primis vibrationibus commoveant, earum tamen motum in itu, aut reditu interrumpunt ita, ut idem nequaquam sensibilis, saltem auditui, esse possit.

Tertium soni subiectum, nempe auditus organum, etiam si obiter examinemus, soni impulsu, non nisi per organicarum eiusdem sensorii partium oscillationes cerebro communicari, ac soni, sive tonorum diversitatem per diversas ipsarum partium oscillationes sonori corporis partium atque aeris sonum vehentis molecularum vibrationibus homologas unisonasque menti manifestari evincimus.

Externa auris fabrica pene tota cartilaginea est, polita & elastica, (ut notarunt clarissimi viri Valsalva & Morgagnus) rugis prorsus destituta, sonis percutiendis aptissima, variis eminentiis & circumvolutionibus donata ita dispositis, ut radios sonoros ex una in alteram reflectere, & in concham dirigi possint, concha autem a musculis internis & externis, anterioribus, & posterioribus, modo arcatur

arctatur ad molestos ferientesque sonos quodammodo arcendos, modo expanditur, & applanatur ad radios sonoros maiori copia excipiendos, cum quibus etiam harmonice contremiscit. Propterea externa auris cum meatu auditorio tubae phonurgicae & stentoreae comparatur, cavum nempe corpus quasi conum repraesentans, cuius sectio elliptica (a) cuiusque basis auricula est, vertex vero meatus auditorius.

Sonus ex auricula in meatum auditorium ingressurus multo intensior fit, quam si absque auricula eundem meatum intraret, atque in data ratione, quam habet area eiusdem auriculae cum area orificii meatus auditorii (b).

Orificio meatus auditorii praestituta lingula quaedam, seu triangulare quoddam corpus, tragus dictum, quod mediantibus musculis a Valsava & Santorino detectis, vel ad ipsum ostium adducitur, eius lumen imminuit, radiosque sonoros infringit, ne nimis collati auditus organum laedant; vel ab ostio deducitur, illudque magis aperit, ut plures radii sonori meatum subire possint; hoc autem fit quando ad sonum aliquem intenti eundem audire cupimus, illud vero, quando ex viso fulgure, aut aliquo magni fragoris indicio percepto eiusdem impetum auri cavere curamus.

Apex itaque huius conus est meatus auditorius, qui canalis est cylindrico ellipticus, partim osseus, partim car-

tilagineus, cuius focus in tympani membrana a quibusdam recentiorum collocatur.

Hic serpentino progressu ascendit, descendit, rursusque ascendens a tympani membrana oblique apposita clauditur, & finem habet. Ita obliquus a natura fabricatus fuit, ut in brevi spatio maiorem longitudinem ac superficiem nancisceretur, in quam radii sonori incidentes in diversis punctis reflecterent, ac in unum tandem punctum, in tympani scilicet membranam, convenirent.

Quo plures fiunt eorundem radiorum reflexiones, quod in longis tubis, praesertim obliquis, & intortis obtinetur, eo magis augetur sonus; idcirco bellicae tubae & cornua venatoria valde sonora sunt.

Admirabilem soni augmentum in tubis stentoreis experimur, quibus humana vox applicata ad milliare & ultra exauditur; quippe radii sonori non solum conservantur, sed etiam in elasticos parietes incidentes, ac plurimis vicibus reflectentes non divergenti, sed parallela directione emittuntur; ideo qui in linea recta tubam respiciunt, vocem audiunt, minime autem, qui ad latera positi sunt.

Ex elliptica quoque ipsius meatus figura notabilem incrementum accipit sonus, & sicuti radii lucis in speculi elliptici, aut parabolici foco collecti (c) magnam comburendi vim acquirunt, ita radii sonori in canalis

Nn 2

elliptici

(a) Boerhaav. Praelect. Acad. T. 3, p. 189. (b) Musschembroek. ibidem. (c) Wolf. Math. T. 3. Elem. Catop. Cor. 307.

elliptici parietibus reflexi ad unum punctum, seu focum diriguntur, in quo soni vis intenditur. Si quidem ellipticae figurae haec est proprietas, ut duae lineae ab utroque foco ad quodlibet circumferentiae punctum deductae angulos cum tangente aequales faciant (*a*), atqui anguli reflexionis angulis incidentiae aequales sunt; ideo quaelibet linea, quae a foco discedens in circumferentiam illabitur, in alterum focum reflectitur.

Plura quidem extant aedificia ellipticae figurae, quae huius proprietatis effectus demonstrant. Florentiae intra aulam porticus est elliptica, & Parisiis in observatorio camera quoque elliptica, in quorum altero foco voces etiam submisce editae ab iis, qui in altero foco manent, fortiores audiuntur; ab aliis vero extra focum positis, etiam si intermediis locis, nihil percipitur. Alia quoque aedificia id praestantia leguntur apud P. Kircherum (*b*), de Lana, Schellhammerum aliosque.

Itaque aucta soni vis per auriculae & meatus auditorii structuram ad tympani membranam pervenit, quae triplici saltem lamella constat, ut descripsit olim Ruyschius (*c*), ac sustinet clarissimus Morgagnus (*d*) immo quadruplici & ultra secundum Winslow (*e*), chordaque nervea sulta. Haec quidem non solum ex propria natura elastica est, quippe meatus auditorii extremitati, seu anulo osseo circumadhaeret, tenditurque, sed etiam

quia instar tympani bellici cavitatem aere plenam claudit, qui per Eustachianam tubam cum externo aere communicat, ideo tympani membranam modo tenditur, modo laxatur, operitrium mallei musculorum, eiusque tensionis gradus innumerabiles sunt, quoniam cum sonori corporis vibrationibus aerisque molecularum sonum perferentibus isochroni esse debent, quae operationes a voluntatis arbitrio minime diriguntur, sed a vario oscillantium aeris molecularum impulsu, ac impressione, ut notat Duverney (*f*), eadem quoque mechanica, qua iridis fibrae, pro ut maiori, vel minori luce visus sensorium afficitur, magis vel minus coarctantur, pupillamque constringunt, vel dilatant.

In acuto igitur sono magis tenditur membrana tympani, quod ab internis mallei musculis eandem cum malleo intus trahentibus perficitur; in profundo vero, & gravi laxatur, quod externi musculi actione ipsam membranam extra ducentis, atque attractam remittentis impletur. Quapropter in sono acuto attractae magisque tensae membranae breviores velocioresque erunt oscillationes; in gravi & profundo longiores lentioresque, ac uno verbo cum sonori corporis vibrationibus, veluti chordarum musicalium unisonarum isochronae & homologae.

Interni mallei musculi, secundus scilicet & tertius, cum simul agunt, tym-

(*a*) Wolf. *ibid.* Theor. 2. (*b*) Phonurg. p. 93. & Musurg. IX. p. 300. (*c*) Epist. VIII. (*d*) Epist. Anat. V. (*e*) Expos. Anat. (*f*) Trait. de l'Organ. de l'Ouïe.

tympani membranam ita tendunt, ut ipsa quascunque etiam toni mutationes auditui exponere capax sit, quod musicam profitentibus necessarium quidem est, quorum nonnulli eandem membranam sono, vel cantui diversisque tonorum gradibus ita accommodant, concordantque, ut inter plurima instrumenta & voces minimam dissonantiam distinguant, atque sonos, vel cantiones, quas audiunt, mirum in modum repetant.

Externi aeris vibrationes cum aeris interni & internarum quoque auris partium vibrationibus duobus modis communicare possunt. Primo quidem praedicta membranae tympani tensione, cuius vibrationes sonori corporis vibrationibus unisonae fiunt, cuiusque fibrae cavitatis tympani aerem ad illos tremores excitant, ad quos ipsae aeris externi molecule excitatae fuerunt: Secundo cavitatis tympani imminutione, vel augmentatione, quae ex dictae membranae ab internis mallei musculis intus attractae maiori, vel minori convexitate & vicissim ab externo eiusdem musculo, utpote priorum antagonista, extra deductae & ad planam figuram redactae omnino pendet.

Eadem prorsus mechanica, qua externi aeris undulationes & tremores cavitati tympani communicantur, ad caeteras quoque penitiores, id est vestibuli & labyrinthi cavitates propagantur. Penitiores etiam cavitates aere repletas esse credendum est (a), si enim aere vacuae essent hae cavitates

externi aeris columna gravi suo pondere tympani membranam, caeterasque eiusdem aeris ingressum impedi-
entes disrumperet. Quare cum cavitatis tympani aer ad tremores excitatur, eosdem quoque & fenestrae rotundae membranae ad cochleam pertinentis & stapedi ovalem fenestram claudenti indit, quinimmo eundem stapedem mediante incude & malleo tympani membranae annexum eiusdem membranae motum sequi verisimile est, in cuius elevatione aeri cavitatis tympani cum aere vestibuli aditum communicationis per dictam fenestram patefieri suspicantur aliqui, licet in cadaveribus omnino adhaerens exigua mediante membrana ipse ossiculus videatur. Quicumque tamen sit communicationis modus, si-
ve immediatus, si-ve mediatum, ope scilicet partium ossearum & membranosarum, saltem hic postremus negari nequit.

Verum non tantum aeris & partium organicarum tremores & oscillationes invicem communicantur, sed etiam dum ad alios sinus & cavitates transeunt, augentur. Id circo augetur tympani tremor ex cavernulis processus mastoidei osseis laminis divisus, quae cavernulae tympano adiacent. Sicuti itaque in clavicymbalo fortis ille sonus, qui ex paucis etiam chordis pulsatis auditur, non a sola chordarum vibratione; sed ab instrumenti quoque cavis, parietibusque resonantibus oritur, & in bellico tympano illa pellis, quae percussa adeo

Nn 3

magnum

(a) *De Mairan Act. Acad. 1737. Sur la propagat. du Son.*

magnum edit sonum, si a suo cylindro, cui supertenditur, auferatur, tenuissimo sono percutienti respondet; ita membranae tympani aerisque eiusdem cavitatis tremores in praedictis mastoidei processus cavernulis expansos valide resonare, & augmentum accipere censendum est.

Ex tremore itaque aeris in tympani cavitate existentis tremit membrana fenestrae rotundae, ac potissimum fenestrae ovalis, quae mediante stapedis musculo cum tympani membrana harmonice tenditur, & oscillat. Fenestrae ovalis membranula tremens tremorem in aerem vestibuli, & canalium semicircularium, nec non cochleae superioris scalae incutit, quemadmodum, & membranula fenestrae rotundae in aerem inferioris eiusdem cochleae, quae scala tympani dicitur. Ex inferiori huius scala aeris tremor in superiorem, & vicissim ex superiori in inferiorem migrare potest, parvo mediante foramine in eiusdem cochleae apice posito, quod a D. Mery forsitan primo descriptum fuit (a), per quod aer transiens, ipso animadvertente Mery, multam compressionem patitur.

Quantum tremoris & resonantiae augmentum assequatur aer in spirales cochleae ductus impingens dum per alteram scalarum ascendit, ac per apicis foramen transiens descendit, facile est concipere, quemadmodum e vestibulo in semicirculares canales diversae latitudinis impulsus (b), in

quorum parietibus radii sonori diversimode repercutiuntur.

Tremore aere in dictis anfractibus existente, alia quoque corpuscula in iisdem contenta tremunt, & oscillabunt; mollis nempe nervi auditorii substantia in vestibulo membranae in modum expansa, veluti retina in oculo, ac huius nervi filamenta, tria canalialia & alteram cochleae scalam subeuntia, praecipue vero eiusdem cochleae septum partim osseum, partim membranofum, harumque cavitatum continuum fortasse periostrium, *& hoc tremere auditus est*, inquit Boerhaav. (c).

Admirabilem auris fabricam inter omnia sensuum organa magis compositam paravit natura, non ut obscurus & simplex sonus audiat, sed ut harmonicus a dissonanti distingatur, in eoque delectationis subiectum invenire possimus. Concipienda igitur auris fabrica, ut sapientiores physiologi arbitrantur, tamquam instrumentum musicum dura osseaque substantia ad sonum reflectendum valde idonea constans, innumerabili chordarum numero praeditum, quae diversimode tendi, ac infinitis sonis aptari, eorumque tremoribus isochronis oscillationibus respondere valeant. Harum chordarum diversam longitudinem ex vario canalium semicircularium & cochleae diametro, eorumque diversa contentae membranae & periostei latitudine resultare recte quidem excogitavit Duverney, praesertim vero, ex septi cochleae, seu laminae

(a) *Description de l'Oreille de l'Homme.* (b) *Duverney ibid.* (c) *Ibidem.*

minae spiralis utriusque membranae triangularis figura, cuius basis fibrae longiores, ad apicem vero ascendentes sensim breviores fiunt.

Spiralem laminam cum sua membrana praecipuum esse auditus organum vult Clariss. de Mairan (a); In hac saepe considerandum, spiralem & tortuosam figuram eidem a natura impertitam, ut in parvo spatio notabilem longitudinem assequeretur, qua mediante in eius fibris infinitus chordarum diversae longitudinis numerus haberetur, quae cum infinitis sonis harmonice oscillare possint, longiores scilicet ut gravem tonum, mediae medium, brevissimae peracutum exprimerent. Praeterea considerandum, hanc membranam eidem septo connexam esse, cuius dimidia pars ossea est ad hoc, ut membranosae fibrae duro corpori connexae magis resonent; insuper esse duplicem, ut ipsae transversae fibrae, veluti unisonae chordae clavicymbali, duplo ordine procedant, fortiolemque edant sonum.

Pulsato igitur sonoro corpore quaedam ex dictis fibris ad unisonum tensae oscillabunt, & cum illis aliae eidem harmonicae in data proportionem contremiscent, *octavae* scilicet, *quintae*, *quartae*, *tertia* &c. qui tremores, seu oscillationes harmonicum sonum efficiunt (b).

Propterea duplex merito statuitur huius organi officium. Primum quod in simplici & nuda perceptione, qua

sonitum indistincte audimus, consistit. Secundum (quod alteri immediate succedit) distinctam dati soni ideam nobis exhibet. Percepto enim simpliciter sono, si mens ad illum distincte percipiendum disponatur, arripitur auris, ac tympani membranae mediantibus mallei musculis adeo tenditur, donec illius fibrae cum sono externo unisonae evadant; quem tensionis gradum mediante stapede eiusque musculo, etiam fenestrae ovalis parva membrana statim assequitur; tunc ideo organicarum auris partium oscillationes tremoribus & vibrationibus corporis sonori harmonicae fiunt, primum scilicet praedictae membranae tympani & fenestrae ovalis, deinde membranae vestibuli, cuius cavitas in sphaeroideam & semiovaalem a summo viro Morgagno dividitur (c).

Hinc semicircularium canalium, quorum quisque duos conos axium curvorum in vertice coniunctos repraesentat (d), fibrae membranosae transversales totidem circulos inaequales & decrescantis diametri efficiunt, eorumque oscillationum velocitas & frequentia in ratione reciproca diametrorum esse debet.

Ex his itaque illae oscillabunt, quae dato sono exteriori, aeriue trementi magis unisonae sunt; tandem prae aliis membranae spiralis septi cochleae, cuius fibrae transversae ad oscillandum melius dispositae (e), quippe rectae & solae extremitate osseo septo adhaerentes: hae veluti innumerabiles

(a) *Ibidem in Epist. ad Lami.* (b) *Boerhaav. ibid.* (c) *Pag. 384.* (d) *Duverney ibidem.* (e) *De Mairan. ibidem.*

merabiles chordae longitudine & tensione diversae innumerabilibus quoque tonis corporis sonori harmonice respondere valent.

Nil tamen mirum, vel saltem conceptu difficile cuique philosopho esse debet, adeo parvas mutationes, atque minimas tensionis varietates, quae in tympani ac fenestrae ovalis membrana fiunt, ad tot diversos tonos exprimendos capaces esse, si glottidis actiones respiciat. Huius rimulae adeo parvum orificium & oblongum, cuius latitudo uni circiter lineae est aequalis, in dimensiones adeo minutas iuxta D. Dodart dividitur (a), ut ad possibilitatem tonorum mutationes 9000 numerum excedentes sufficiant, vel si D. Ferrein explicatio magis arrideat, qui plurimis pulcherrimisque observationibus demonstravit (b): vocis organum non esse instrumentum simpliciter pneumaticum, veluti tibia, nec ut exponit D. Dodart (in hac tamen materia valde meritis) *variā scilicet glottidis aperturam esse veram diversorum tonorum causam*, sed esse instrumentum mixtum, chordis nempe instructum, quae ab aere a pulmonibus & aspera arteria compulso, ac per glottidem transeunte collatae vocem, sive sonum edunt, chordas autem tendineas labiorum glottidis fibras dicit, quae veluti chordae instrumentorum diversos tensionis gradus suscipientes ab ipso aere arcus officium gerente commotae celerius, vel tardius iuxta varios tensionis gra-

duis fremunt, & oscillant, tonosque acutos, vel graves reddunt. Quot igitur tonorum mutationes membrana tympani & fenestrae ovalis, varia mediante tensione auditus sensorio distincte communicare potest, tot etiam glottidis minimis eiusdem chordarum tensionis gradibus exprimere solet.

Modo inquirendum remanet, quaeenam sit voluptatis causa, quam harmoniae sensus nobis affert, & e contra quaeenam molestiae causa, qua a dissonantiae auditu afficimur. Equidem horum affectuum rationem ab eo excutiendam esse apte suadet Doctiss. de Mairan (c), quod scilicet ad eiusdem organi conservationem tendit, & e contra in eiusdem destructionem & perturbationem operatur. Hunc autem effectum portendit dissonantia, primum vero harmonia; cui addere posse mihi videor, mentem in eo delectari, quod naturales organicarum partium motus non violenter sed placide sollicitat, in quibus exquisita salus posita est, & vicissim in eo contristari, quod naturales & harmonicos organicarum partium motus perturbat.

Superiori admissio, vel potius demonstrato oscillatorio earundem membranosarum partium motu phaenomeni explicatio facillima evadit; e. g. cum laminae spiralis membrana suam latitudinem a basi usque ad apicem paulatim minuat, transversales fibrae, quae harmonicae sunt, notabili spatio

(a) *Memoir de l'Academ.* 1700. 1706. 1707. (b) *Memoir de l'Academ.* 1741. 1743. (c) *Ibidem* pag. 16.

spatio inter se distant, siquidem, quae unisonae octava est, duplo longior, vel brevior, quae quinta, tertia, quae tertia, quarta longitudinis parte ab eadem unisona differt.

Dato igitur sono harmonicae fibrae pariter harmonice resonantes, utpote inter se aliquantulum distantes, undulatorium quemdam ipsius membranae motum efficiunt, qui absque violenta distensione eiusdem flexibilitatem servat, fluidumque tenue per eiusdem vascula circulans non remoratur, sed accelerat; ex quo iuxta unionis leges, inquit idem de Mairan, inter animam eiusque organa voluptatis sensus emergit. In dissonanti vero sono illae commoventur fibrae, quae cum illa eidem sono praecipue respondente exiguae, vel nullam commensurabilitatem habent, ipsique nimis proximae sunt, ideoque motus naturalis & oscillatorius eiusdem membranae perturbatur, ac fluidorum motus progressivus in tenuissimis eius vasis intercipitur; hinc per praedictas naturae leges molestiae sensu anima afficitur.

Quam magna sit cum sonis exterioribus aerisque excitatis tremoribus non solum organi auditus relatio, & consonantia, sed etiam cum universo nervorum systemate, plurimae quidem observationes comprobant.

Quaedam morborum historiae in *Academ. Reg. scient.* (a) referuntur, spasmodicorum scilicet affectuum ac febrium acutarum cum delirio, qui morbi postquam methodicis & effica-

cioribus etiam remediis resisterint, dulcium musicorumque concentuum ope profligati fuerunt.

Prima historia est cuiusdam de musicae magistro qui acuta, & continua febre laborans septima die delirio incessanti prehensus fuit cum lacrymis, terroribus, somniisque pene continu- is. Huic exoptanti musico instrumentorum vocumque concentu succursus fuit, quo durante quiescebant symptomata, ipsaque febris intermittebat. Porro cum adeo felix remedium experti fuissent medici, adstantesque, nullo alio posthac auxilio praeter novam sanguinis missionem usi fuerunt, musicumque tantummodo concentum ad decimum usque diem prosequuti morbum omnino profligarunt.

Secunda historia est de choraee magistro, qui quarta, aut quinta die post vehementis febris accessionem in lethargum, postea in furiosum delirium incidit, quo vehementibus conatibus e lecto surgere nitebatur, & illis, qui sibi resistebant magnos ictus minabatur. Huic itaque, quippe qui ad alia remedia capienda imposset, musicales concentus prodesse posse in animum sibi induxit quidam eius amicus, liramque protinus arripiens cantiones edidit ipsi aegroto familiares, quibus delirii impetus statim lenitus fuit, deinde placido superveniente somno, a quo matura crisis, brevi aegrotus a morbo evasit.

Pulcherrimas quidem in demorsis a tarantula habemus observationes,

ex

ex quibus nonnulla leguntur in aliis Acad. Reg. scient. actib. (a), multa vero in pluribus, quae in peculiari Baglivi opere extant, tarantulorum exempli (b). Horum animalculorum adeo veneniferus est morbus, ut diris patientes afficiat symptomatibus, quae illos etiam in vitae discrimen adducant, immo quod mirum videtur, & a morfu aliorum veneniferorum animalium distinctum; hoc venenum semel impressum adeo profundas mittit radices & semina, ut singulis annis reviviscat, & priora revocet symptomata, non sine gravi aegrotantium molestia, nisi consuetis choraeorum & harmonicorum concentuum remediis iisdem succurratur.

Equidem scio quemdam celeberrimum medicinae Professore, nempe D. Franciscum Serao, hunc tarantulorum morbum nihil aliud esse affirmare praeter melancholicum & Apulienfium peculiare delirium (c). Nihilominus tarantulorum symptomata paucis recensere, ac remedium vim brevissime perpendere operae pretium judico.

Symptomata igitur, quae ex prae-
laudato Baglivo compendiose excerpti sunt, externa in primis accidentia, quae in parte morfu affecta notantur: dolor, aut stupor circa vulnus, macula livida nigra, vel subflava, quae in tumorem attollitur, deinde interna, quae post paucas horas patientes corripunt, gravis moeror, respirandi difficultas, praecordiorum angores, & contractiones, de quibus de-

missa voce conqueruntur, oculorum turbatio atque moestitia, quibus adstantes conspiciunt; hinc omnimoda pulsus oppressio, animi deliquia, animalium actionum praecepta abolitio, viriumque prostratio, sitis, capitis & cunctorum ossium dolor, aliaeque malignarum febrium symptomatibus similia. Haec autem accidentia, pro varia tarantularum specie, varia quoque observantur, quae fusius ab eodem auctore describuntur. Vehementiora interim accidentia primis diebus saevientia, tandem in melancholicum affectum desinunt, a quo eorum imaginatio depravatur. *Mul-
ti enim solitaria loca desiderant, in
feretro mortuorum se extendunt tam-
quam mortui. In puteum, ceu desperati
se proiciunt. Virgines, & mu-
lieres caeteroquin honestae solutis ve-
recundiae habenis vehementer suspi-
rant, ululant, indecore moventur
&c. Nonnulli volutantur in limo
tamquam sues & volutatione hac sum-
mopere delectantur. Alii verberibus
caedi desiderant, alii cursu magnam sen-
tiunt utilitatem. Tarantati quibusdam
coloribus delectantur, aliis contra gra-
viter afficiuntur, & pro vario deprava-
tionis phantasiae gradu alternatim
variis rerum coloribus recreantur &
affliguntur.*

Ab expositis itaque gravis melancholiae symptomatibus vexantur aegri, donec, *vel saltatione vel musica, inquit
auctor, vel aetatis mutatione virulenti
characteres penitus eliminantur, quae
felicitas raro contingit; nam &c.*

Harmoni-

(a) Ann. 1702. (b) Dissert. de Tarant. (c) Vide D. Boissier de Sauvages diff.

Harmonici soni & musicae extrinsecos effectus in tarantatis notare oportet, ut de veneni vi & proprietate in humano corpore aliquid eruatur, musicorumque concentuum mechanica in eodem corpore affecto operatio, quam fieri potest, detegatur.

Cum huiusmodi veneno prehensi paulo post morsum humi procumbentes immobiles, stupidi, sensibusque carentes veluti apoplectici videantur, accurrunt cytharaedi musicalem aggre- diuntur concentum, quo statim patientium symptomata mitescent, ipsique ad leves motiones excitantur, paulatim scilicet moventur manus & pedes, deinde caetera membra, & invalescentibus sonis membrorum quoque motus invalescit. Hinc violenter e solo, vel lecto eriguntur aegri, ac post sonora suspiria, mirasque contorsiones saltare, & choraeam ducere incipiunt. In his porro primis vehementibusque saltationibus ad duas tres, vel plures horas protractis absque ulla virium deiectione perdurant, immo se agiliores fortioresque ostendunt; tamen lectum petunt, ut corpus sudore madidum abstergant, viresque ad saltationes iterandas reficiant, in quibus ad vices institutis, intermissa nempe quiete, duodecim circiter horas quotidie insumunt. Haec autem saltatio, ad quatuor, vel quinque dies extendi solet, quibus peractis se plerumque solutos sentiunt patientes, licet venenum haud prorsus extinguatur, sed potius sopiatur, donec illud anni tempus redierit, quo patiens morfu affectus fuit, tunc

enim renovantur morbi symptomata, nisi musicali concentu praeveniantur, quibus ingruentibus eundem ut prius cum consuetis saltationibus repetere necesse est, alioquin ipsi patientes toto anni cursu plurimis incommodis laborant, ac praeter recensita in alia quoque incidunt mala, notabilem scilicet virium languorem ciborum nauseam, ictericum cutis colorem & alia quae, si annis sequentibus eadem sonandi & saltandi methodus omittatur, in cachexiam, hydropem, aliosque incurabiles morbos degenerant.

In huius remedii pro tarantatis adeo necessarii applicatione tria quidem phaenomena ex variis minoris momenti, quae praelaudatus Baglivius recenset, hic perpendenda esse opportunum existimo, quorum primum sit.

Idem tarantati dum choraeas agunt, tum ex vehementi corporis exercitio, tum ob intensum climatis & tempestatis calorem in affluentes sudores pene colliquantur, quibus mediantibus venenosa morbi semina a fluidorum massa eliminari passim creduntur, & sic opinatur ipse Baglivius, qui tamen animadvertit caeteros sudores, seu ab aliis auxiliis provocatos, validis nempe diaphoreticis, ut plures illarum regionum medici, omissis saltationibus, experti fuerunt, eundem effectum praestare minime posse.

Secundum phaenomenon est, quod tarantati musicorum instrumentorum dissonantiam adeo exquisite percipiunt, ut admirabile sit, rudes incultosque rusticos atque puellas, quibus

non solum ignota est musica, sed nec per visum cognita eiusdem nobiliora instrumenta, adeo perite eorundem dissonantias percipere, & perfectam musicalem aurem in illis saltationibus ostendere, ut minima audita dissonantia statim vehementer suspirent, consistant, cordis angoribus vexentur, ac diversimode convellantur, nec ad saltus redeant, nisi instrumenta ad harmonicam consonantiam redacta fuerint.

Tertium denique est, quod huiusmodi veneno infecti non omnes eodem sed diverso symphoniae genere, licet semper laeto & celeri delectantur, & ad choraeas excitantur. Hinc cytharaedi varia sonorum modulamina, variosque tonos attingunt, antequam modulamen patientibus accommodatum inveniant, ad quod saltare incipiant. Verum non solum datum symphoniae & toni genus, sed etiam alii alia peculiariora instrumenta desiderant, alii scilicet *fistulam pastorem*, alii *tympanum parvum*, alii *cytharam*, aut *lyram*, alii *cymbalum*, aut *fides*, aut *tibicines varii generis*. Hoc autem a variis tarantulae speciebus, magnitudine, colore, ac virulentia diversis pendere colligitur. Quibus expensis aliquid de huius veneni natura & proprietate, nec non de musicalium instrumentorum in corpore actione eruere poterimus; ab his vero paucis me expediam.

Tarantulae venenum, sicuti & caeterorum animalium virulentorum, in summe tenui, elastica, volatilique

materia consistere cuique constabit, si consideret primo, tarantulam in Apulia calidissima Italiae regione oriri, suamque venenosam vim aestiva solum tempestate, ac in ipsa regione exercere: secundo ipsius regionis incolarum temperamentum, quod idem Baglivius describit (a), nempe calidissimum, propter quod ad iram proni, impatientes, acutis & inflammatoriis morbis valde obnoxii; idcirco non solum eorum sanguinem subtilioris diathesis, ac rarescibilis naturae, & animales spiritus tenuissimae ac volatilioris substantiae esse, verum & eorum solidas partes, membranosas praecipue & nervosas, rarioris texturae, & ad praecipitem, inordinatumque oscillatorium motum dispositas credendum est, quod confirmant hypochondriacae & melancholicae affectiones iis in locis, quem alibi frequentiores ingensque maniacorum numerus, qui Xenodochium Incurabilem Neapoli erectum pene implent. Admissae igitur a demorsis veneni huius particulae vasa sanguifera prius ingrediuntur, ac sanguini immiscentur. Donec autem hae sanguinea massa obrutae per rubra vasa progressivo celerique ipsius sanguinis motu vehuntur, nullum laesionis effectum percipiunt aegri, cum vero ad minima vascula perveniunt, tenuiora fluida co inquinant, veluti lympham, quae tardiori motu progreditur, hinc membranosae & nervosae partes tali lympham irrigatae ab iisdem venenosis miasmatis pervaduntur, quae miasmata

non

(a) Cap. XII.

non solum ipsius lymphae rarefactionem, eiusque vasculorum praeternaturalem distensionem efficientia earundem membranarum & nervorum violentas distractiones pariunt, sed etiam in minimos tubulos animale liquidum continentes penetrant, cuius particulae tenuissimae a vividissimo istarum motu exaltantur, eosdemque tubulos nervosas & membranosas fibras constituentes praetermodum dilatant, quae fibrae in spasmodicas crispationes concitantur. Quare animalis & vitalis oeconomia graviter opprimitur; siquidem fibrarum antagonistarum se mutuo interfecantium membranosi & nervosi systematis aliae aliis praevalentes reciprocas earundem contractiones suspendunt, & ita oscillatorius organicarum partium motus perturbatur, ac pene extinguitur, fluida per vasa minima excurrentia propulsivo hoc motu defraudantur, immo maiorem resistantiam patiuntur; ideo lentescunt, & ad stagnationem disponuntur, unde lividus cutis color, profunda moestitia ac totius corporis frigus. Augescentibus interim nervosis crispationibus arteriae sanguineae etiam maiores coarctantur, sanguinisque impulsui magis resistunt, qui regrediens cordi vim facit, eiusque elasticitatem provocans oscillatorium quoque eiusdem motum frequentiorrem reddit. Praeterea ipsius cordis lacerti & musculosae fibrae ob spasmodicam cardiaci plexus affectionem convulsive moventur, & ob intercostalis diras contractiones thorax quoque angustatur; ex quibus cordis an-

gore, respirandi difficultates, febris, parvi pulsus & obscuri, luctuosa suspiria nascuntur. Deinde cerebrum petentes eadem venenosae particulae eius fortasse penitiores membranas, piaae matris scilicet productiones in praeternaturales contractiones cerebri sinus violenter comprimentes inducunt, ac ipsius cerebri substantiae corticalis vascula praedicta fluidorum exaltatione & rarefactione enormiter dilatant, quare animalium spirituum secretio sufflaminatur. Medullaris quoque substantiae corporisque callosi fibrillae forti erethismo rigidaque tensione prehensae oscillatorium motum exercere nequeunt, vel si moventur, inconcinne & perturbate moventur; ideo sequuntur depravatae imaginationes & deliria, sensuum stupores, virium prostrationes, per quas saepe humi concidunt semi-mortui.

Ex affecti corporis symptomatum consideratione huius veneni proprietate aliquantulum detecta musicorum instrumentorum affectus & mechanicam in tarantatis concipere non erit arduum, nullius quippe sensorii ope melius, quam auditus, membranosa & nervosa demorfi corporis partes spasmodice affectae ac in rigida tensione manentes, vel irregulariter & violenter motae leniri, mulceri, & ad ordinatos motus allici possunt. Musicalium instrumentorum vibrationes aereas moleculas quatientes organicis auris partibus saltem membranosis proprium motum communicant, ut supra vidimus, & ad homologas oscillationes excitant, quae, nervo

acustico mediante, cerebro in primis conferuntur. Hae autem medullaris substantiae fibrillas spasmodica tensione affectas paulatim mulcent, & ad oscillandum proritant, cui succedit copiosior animalis liquidi secretio & ad nervosas & membranosas partes ordinatus influxus, quarum fibrae aequa proportionem repletas vicissim contrahuntur, & oscillatorium motum prius amissum recuperant. Laxatis deinde universalibus crispationibus cor liberius contrahitur & expanditur, vasorum diametri dilatantur, sanguis imminuta eorumdem vasorum resistentia celerius progreditur, nec regrediens cordi propellenti vim facit, caetera fluida a corde, sive a cordis impulsu remotiora oscillatorio partium motu adiuvantur. Hinc tarantati vitales & animales vires amissas recipientes expergiscuntur, manus aut pedes movere incipiunt, & successive caetera membra, ac humi jacentes, vel in lecto decumbentes magno impetu exsurgunt, ac velut ii, qui a magno labore evadunt, suspirant, vel potius fortiter respirant, varie contorquentur, deinde vehementer saltant.

Hae saltationes ad universales fibrarum torpores & crispationes solvendas necessariae, quippe musculos summo opere exercentes, non solum fluida stagnantia iteratis contractionibus & remissionibus ad progressivum motum compellunt, sed etiam membranoso & nervoso systemati flexibilitatem & elasticitatem restitunt, eoque magis, quia accelerato fluidorum

motu, etiam liquida alba ad solidas partes irrigandas destinatas prompte fecernuntur.

Quibus positis cur sudores a diaphoreticis provocati venenosum semen eliminare minime valeant, nec eiusdem symptomata compescere, veluti sudores per saltationes excitati, facile intelligitur. Omissis enim saltationibus deest musculorum actio, quae & ad ipsum venenum aptius expellendum, & ad universalem organicarum partium motum oscillatorium iam deficientem animandum requiritur: idcirco velocissimum sonum tarantati desiderant, ut ad veloces quoque saltus fortius excitentur, quibus organicarum partium fibrae venenoso succo prehensae vinctaeque celerius exsolvuntur.

Universae itaque fibrarum oscillationes musicorum instrumentorum vibrationibus unisonae & synchronae fiunt, quapropter eorumdem instrumentorum, vel levem dissonantiam aegri percipiunt, quia a dissonantium chordarum vibrationibus, utpote dissimilibus, tenuissimarum auditus sensorii membranarum oscillationes, quae musicali concentui harmonicae factae sunt, perturbantur, & ob naturalem consensum oscillatorius caeterarum organicarum partium motus, in quo recreantur, interrompitur, quod ex vehementibus suspiriis, cordis angoribus, ac repentina quiete deprehenditur, quorum symptomatum exacerbatio tandiu durat, donec instrumentum ad naturalem consonantiam redigatur.

Praedi-

Praedictarum partium oscillationes musicalium chordarum vibrationibus adeo unisonas & harmonicas fieri tertii quoque phaenomeni explicatio nobis ostendit, nempe: tarantatos peculiari instrumentorum genere ac sonorum modulamine delectari. Si quidem cum diversa sit tarantularum virulentia, pro ut diversa earundem natura; varii consequenter fiunt fibrarum erethismi, variique affectionum spasmodicarum atque tensionum gradus, ex quibus eadem fibrae ad peculiare tantummodo oscillationes, longas scilicet, vel breves magis, vel minus veloces determinantur; quapropter iidem tarantati illa exoptant instrumenta, ac sonorum modulamina, quorum vibrationibus atque tonis earundem fibrae harmonice oscillare valeant.

Verum de tarantulae phaenomenis haec sufficiant, eoque, unde digressi sumus redeunt, ex dictis recte colligimus; magnam cum sonis exterioribus non solum organi auditus, sed etiam universi nervorum systematis relationem esse & consonantiam.

Praeterea, quod ad auditum pertinet, rursus animadvertendum; si sonori corporis tremores adeo celeres sint, veluti musicalis chordae vibrationes, cuius longitudo unguis diametro brevior sit ita, ut membranae tympani brevissimas oscillationes celeritate excedant, tunc acutissimus sonus, vel potius stridor percipitur sensui molestissimus; quod in laminis ferreis, cum lima, vel alio secanti instrumento scalpuntur, saepe con-

tingit, a quibus stridoribus ipsi dentes obstupefcunt, quippe eadem tympani membrana adeo tenditur, ut pene disrumpatur atque non solum intimas sensorii auditus membranas, sed etiam plurimas nervosi systematis partes in consensum trahat.

Sonus peracutus, si aliquandiu perduret, auditus sensorium fatigat, molestusque evadit, quia tympani membrana cum sono acuto ad unisonum tensa, si in eodem summo tensionis gradu diu permaneat, dolore afficitur. Quidam vero, quorum membrana tympani exquisitioris est sensus, & acutis sonis absque dolore accommodari nequit, huius generis sonos prorsus effugiunt. Hoc quoque in canibus aliquando observavi, qui prope sonantes campanulas transeuntes, quasi sonum ferre non valerent, fortiter eiulabant.

Haec, quae de acusticae legibus & phaenomenis obiter tetigimus, huius propositionis veritatem satis manifestam reddunt; nam sonus harmonicus, qui in proportionato vibrationum numero partium corporis sonori, vel chordarum musicalium pulsatarum consistit, mentem recreat, delectatque; sed mechanica soni harmonici actio est, promovere motum oscillatorium non solum auditus sensorii membranarum, sed etiam per ipsum universo nervorum & membranarum systemati, ut supra vidimus, communicare; ergo in continuo & proportionato eiusdem systematis motu oscillatorio natura ac mens delectatur.

E contra dissonantia corpora, quorum partes, vel chordae sonorae extra musicalem proportionem sint tensae, vel pulsatae, menti fastidio sunt, eorumque mechanica actio est in sensorii auditus partibus inconcinnum motum excitare, qui caeteris totius corporis membranosis, & nervosis partibus communicatus, naturalem, ordinatum, & oscillatorium motum perturbat; ergo in perturbato & interrupto motu oscillatorio mens & natura contristatur, quod ultimo loco proposuimus.

Posito igitur perturbato & interrupto solidi nervei & membranosi oscillatorio motu efficientem quoque moeroris & timoris causam, qua hypochondriaci proprium morbum, ut gravissimum & lethalem mente apprehendunt, invenimus.

Perturbati huiusmodi motus oscillatorii, a quo nervosum & membranosum systema molestia afficitur, particeps quoque est cerebrum, quod praedicti systematis origo & fons considerari debet, & quod subiectarum partium motuum praecipua est causa. Id autem neque Platonem latuit, cum dixerit (a). *Excogitaverunt enim dii caput motuum omnium compos id fore.* Praedicti igitur vitiosi huiusmodi motus oscillatorii particeps est cerebrum, vel ut quarumcumque nostrarum actionum & motuum mediata causa; vel ex reciproco cum nervosis & membranosis partibus consensu.

Ut mediata causa particeps esse potest cerebrum, quippe inaequalis saepissime fit spirituum ad praedictas

partes influxus, & inaequalis distributio, per quam antagonistarum fibrarum reciproca contractio deficit, vel saltem naturalis harmonia tollitur. Nam quaedam fibrae animali succo nimis repletae diutius, quam par est, in contractione manent, nec conveniens succedit earundem laxatio; idcirco alias minus repletas ad se trahunt, & ita harmonicus organicarum partium motus pervertitur.

Haec spirituum influxus & distributionis inaequalitas inaequali cerebri impulsui, seu medullaris substantiae fibrarum irregulari actioni immediate succedit, qua idem spiritus in hoc e. g. medullari sinu, aut in hac potius quam illa sinus parte maiori copia discernitur, ac sine debita proportionem medullares fibras nervorum radices componentes subit. Sicuti vero ideae ac phantasmata mentis a specificis motibus & oscillationibus fibrarum corporis callosi, seu motuum & oscillationum gradibus excitantur (b); ita cum interrupti, dissonantes lentique sint harum fibrarum specifici motus, moesta quoque & lugubria oriuntur phantasmata, quae in pravo deterrimoque proprii morbi conceptu plerumque versantur.

Si earundem fibrarum tonus ita vitiosus evadat, ut in rigida tensione maneant, vel ad datum tantummodo motum & oscillationis gradum aptae fiant, solius obiecti imaginatione mens vexatur, & in illo suas cogitationes dirigere assidue cogitur, quod melancholicam affectionem constituit.

Vel

(a) In Timaeo. (b) Instit. p. 2. T. I. p. 137.

Vel ex reciproco cum nervosis partibus consensu, perturbati motus oscillatorii particeps est cerebrum: siquidem diversae corporis affectiones, quae naturalem eiusdem statum etiam leviter mutant, medullares cerebri fibras ad diversos motus inducunt, ac si molestae dolentesque sint huiusmodi affectiones, fibrae ipsae curvae segmenta circularia corporis callosi efficientes praeter ordinem distrahuntur ita, ut una magis distrahatur, & incurvetur quam altera eiusdem speciei, ac

earundem naturalis parallelismus auferatur, naturalesque anguli & inclinationes mutantur. Quare & ipsa segmenta circularia, seu distractarum fibrarum arcus asymetri fiunt, eorumque parvae oscillationes dissonantes, & confusae evadunt, ac lugubria phantasmata menti repraesentant, quae hypochondriacorum moerorem & timorem pariunt, ex quo se ipsos lethali morbo laborare & brevi morituros esse suspicantur.

PROPOSITIO QUINTA.

Omnes hypochondriaci morbi causae, sive extrinsecae & occasionales, sive intrinsecae & dispositivae ad harmonicum solidi nervei & membranosi motum oscillatorium destruendum tendunt.

Inter extrinsecas huius morbi causas primum locum occupant quotidianae lucubrationes, mentisque applicationes in artium ac scientiarum studio, vel in quocumque alio munere initae. Hae medullaris cerebri substantiae & callosi corporis fibras in assidua tensione detinent, cuius tensionis effectus in diuturnis & intensis applicationibus plerumque experimur. Caput enim acuto & tensivo dolore & calore prehenditur, quippe cerebri fibrarum, proinde & nervorum tensio aliquamdiu perdurans in spasmodicam contractionem transit, quae sanguifera vasa praesertim venas cervicales & cerebri sinus constringens, sanguinem descendente remoratur,

qui magis rarefcens etiam calorem auget.

Medullares autem fibras in actuali applicatione tensionem pati profecto necesse est. Siquidem in mentis actionibus, quae a cerebri organis pendunt, assidue moveri & peculiaribus tremoribus agitari debent praedictae medullares fibrae; sed hi tremores sine aliquo tensionis gradu perfici nequeunt; ergo eadem fibrae in mentis operationibus tensionem patiuntur, & quo intensiores sunt applicationes, eo maioribus tensionis gradibus, quo minus intensae, minoribus quoque utitur natura. Idcirco in somno, in quo anima a suarum facultatum exercitio feriat, ipsae medullares fibrae omnino laxantur, & tunc non solum

memoria, intellectus, & imaginatio ab opere vacant, sed nec sensuum quidem externorum impressiones percipiuntur, quae in quibusdam, nisi vehementes sint, expergiscendi vim non habent, quia talis est fibrarum laxitas, ut nisi fortiter impellantur, priorem tonum, & oscillandi vim recuperare non valeant. Recuperant tamen ipsum tonum & oscillandi vim absque ullo sensuum externorum auxilio, & expergiscuntur, tunc cum post diuturnum somnum instaurata natura iisdem fibris priorem elasticitatem ad oscillandum necessariam restituit.

Admirabiles quidem in actis Acad. Reg. Scientiarum referuntur casus, in quibus nonnulli per integros menses profundo somno detenti fuerunt. D. Imbert (a) de quodam auriga historiam narrat, qui quatuor mensium spatio dormivit. Duobus primis mensibus nullum dedit motus signum, nisi in palpebris, licet clausos oculos die ac nocte servaret. Istius respiratio naturalis erat, pulsus parvi, rari, sed aequales, nutritio vini meri aliquot cochlearia, quae quotidie in eius os indebantur. Post duos menses ope efficaciorum artis remediorum uno tantum die, in quo solutis omnino sensibus libere loquebatur, a somno vacavit, postea ad pristinum somnum rediit, a quo post duos iterum menses in aquae receptaculum proiectus a somno prorsus evasit; ultimis tamen mensibus, quandoque clara sensationis signa dedit.

In hac historia idem auctor aliam de quodam Batavo obiter attingit, qui sex menses absque ulla intermissione, nulloque voluntarii motus, aut sensus signo dormivit, deinde omnino exporrectus, postquam cum suis domesticis conversatus esset, a somno rursus captus fuit, cuius exitum ignoramus.

Alia somni praeter modum diuturni historia in actis Acad. Reg. Scient. (b) legitur, de quadam nempe muliere, quae mense Junio 1738. in somnum incidit adeo profundum, ut igne manuum extremitatibus quasi ad combustionem admoto minime expergisceretur. In hoc autem reliquum anni tempus transegit, intermissis quandoque vigiliis, sed brevissimis, in quibus comedebat, aliisque corporis indigentis satisfaciebat. Longiores vigiliae duobus exceptis, quarum altera 23, altera trium horarum fuit, dimidium horae non praeteribant; somni vero extra proportionem longiores: nam brevior ad tridui spatium, longior ad decimum tertium diem se extendit.

Quid postea sequenti anno eidem acciderit ab ipsis academiae actibus non refertur. Somnus, licet tam profundus, tamen suavis videbatur, naturali nempe respiratione, summa corporis quiete, aequali & infrequenti pulsu comitatus, ac uno verbo talis erat, qualis in perfecte sano homine observatur.

Hos itaque somnos praeter modum diuturnos a summa cerebri fibrarum praeser-

(a) *Memoires de l'Acad. Roy.* 1713. (b) *Ann.* 1739. *Amsterd.* p. 20.

praesertim medullarium laxitate oriri autumo, quae easdem fibras ad oscillandum incapaces reddat, non solum motu proprio, sed etiam relativo, seu qui ex subiectarum partium, ac sensuum externorum consensu excitatur, cum e. g. auditus forti clamore, aut fragore percellitur, vel tactus vehementi percussione, aut vulnere, aut molesta quacumque actione, quae nerveas papillas totumque nervosum genus commoveat, afficitur. Organicarum enim cuiuslibet sensorii partium tremoribus praedictae cerebri fibrae suis oscillationibus in data proportionem respondere debent, quod cum ex praedicta atonia & laxitate non succedat, somnus adeo profundus evadit, ut nec vehementes quidem exteriorum sensuum impressiones sic affectus homo percipiat, eiusque membra fiant veluti paralytica. Laxitati vero fibrarum vasorum quoque praecipue lymphaticorum turgescencia accedit, quae eandem laxitatem consequitur, & quae communis sensorii organa comprimens impulsus ab externis partibus receptum suffocat.

Verum ad applicationis effectus revertamur. Tenduntur itaque in intensa mentis actione callosi corporis fibrae, nec non totius cerebri, illius saltem regionis, quae nervei liquidi secretioni pro animalibus functionibus prospicit. Haec autem fibrarum tensio ex duplici causa necessaria mihi videtur; primo scilicet, quia in mentis actione summa fibrarum corporis callosi, vel illius quaecumque sit,

medullaris substantiae partis, mentis operationibus inservientis, summa inquam, fibrarum mobilitas requiritur, quae absque dato tensionis gradu haberi nequit; quippe, ut supra vidimus (a), chorda musicalis, quo magis tensa eo velociores edit vibrationes, & membranae auditus organum efficientes praesertim tympani, quae ad unisonum tenduntur cum sonis exterioribus, ad sonos acutos, quarum vibrationes velociores & frequentiores sunt, magis tenduntur, ut eorum vibrationibus, quotquot sint totidem oscillationibus respondere valeant.

Obiiciet aliquis fallaci rationis specie motus, molles cerebri fibras & friabiles tensionem aequalem membranarum tensioni inire minime posse. Cui respondemus: tensionis aequalis membranarum tensioni susceptibles esse quidem non posse cerebri fibras, sed comparativa saltem tensionem capaces censendae sunt, quarum oscillationes cum oscillationibus membranarum in homologa ratione esse verisimile est, nec a vi aliqua distrahente tendi, sed a nerveo, seu spiritali succo inflari, cuius magna esse debet elasticitas. Quo maiori igitur succi nervei copia tumescant ipsae medullares fibrae, eo maiori tensione pollebunt, & velocius movebuntur; quae motus celeritas, & movendi facilitas ad animae potentias exercendas mirum in modum inseruit.

Equidem imaginatio, quae prima inter animae potentias enumeratur, a specificis & inter se diversis fibra-

rum medullarium tremoribus & oscillationibus producitur (a). Tunc cum anima ad aliquid excogitandum attendit, plurimas & abstractas sibi ideas plerumque efformare conatur, antequam illam ipsi satis idoneam inveniat. Quare medullares fibras varie sollicitat, ac movet, donec illae specificae oscillationes in numero, magnitudine & celeritate ab aliis diversae prodeant, quae obiecta quae sita repraesentent. Hinc statim intellectus in arenam descendit, ac specificis oscillationibus continuatis, obiecta, sive ideas primum abstracte repraesentatas clare concipit, supra quas, ut iudicium & ratiocinium exercere possit anima ad novas oscillationes easdem fibras excitat, ut novae eliciantur ideae, quas cum rursus apprehenderit, inter se comparat, deinde hanc eligit, illam reiicit, de his affirmat, de illis negat, &c.

Qui itaque medullares cerebri fibras valde tenues & elasticas, proinde summe mobiles, nactus sit, idearum foecundum ac facilem in inventionem se ostendit, qui easdem crassiores lentioresque, tardi ingenii, ac idearum sterilis evadit. Si vero fibrarum elasticitas & mobilitas proportionem fervet, oscillationum harmonia & concentus habetur, qua mediante intellectualis, & discursiva potentia clare concipit, obiectaque, sive ideas rite comparando optime iudicat, atque ratiocinatur.

Imaginationem & intellectum memoria sequitur, cui si anima obiectum

aliquod committere velit, e. g. verborum seriem & orationem; ut hanc memoria assequatur, praedictas medullares fibras ad tales específicos motus determinare conatur anima, quales orationis verba prius audita, vel lecta, vel componendo excogitata iisdem fibris communicarunt, atque ictibus plus, minus repetitis, pro ut magis, vel minus flexibilis & elastica fibrarum natura, illo oscillationum ordine, proportionem, atque habitu potitur, quos orationis verba successive concepta in eisdem fibris excitare solent; & tunc anima memoria tenere dicitur; reminiscitur vero, cum intellectus ope, obiecta jam praeterita evoluens, ac plurima phantasmata menti exhibens ad varios motus medullares fibras sollicitat, quibus comparatis, diversis, ac permutatis evenit, ut illi occurrant fibrarum motus, quos olim praeterita obiecta excitarunt, & quibus mediantibus motibus eadem obiecta, quorum recordari cupimus, a mente concepta fuerunt.

Hic quoque animadvertendum, sicuti mens infinitarum, seu innumerabilium idearum & phantasmatum est capax, ita específicos organicarum cerebri partium motus, & oscillationes infinitas esse oportere, qua propter natura sub sphaerica figura cerebrum construxit, ut pluribus fibris curvilineis & segmenta sphaerica efficientibus constaret, ut celeberrimi viri Heisterus, Lancisus, & Mazinus notarunt, quin immo corpus callosum tamquam praestantius sensuum internorum,

(a) Maz. Instit. par. 2. T. 1.

norum, seu imaginationis, discursus & memoriae organum considerant, quippe non solum est *substantia medullaris duriuscula* mediam cerebri regionem occupans & utrumque cerebri haemisphaerium coniungens, sed praesertim quia duplici fibrarum ordine elaboratur, altero scilicet rectilineo, altero curvilineo, cuius fibrae segmenta circularia, seu arcus describunt.

Has fibras curvilineas ad plurimos, imo pene infinitos motus suscipiendos aptas esse arbitrantur praecitati auctores, quia viribus five potentiis pene infinitis moveri possunt, videlicet, animadvertente praelaudato Mazino (a), tot viribus, quot sunt possible latera polygoni in qualibet fibra sphaeroideum segmentum describente. Habemus enim ex Archimede, circulum esse polygonum infinitorum laterum ac pene infinitis quoque viribus, seu specificis motibus moveri & oscillare, ergo & fibras corporis callosi, quae circuli, proinde & polygoni infinitorum laterum portiones sunt, pene infinitis quoque viribus, seu specificis motibus moveri & oscillare verisimile est. Fibrae autem istorum polygonorum indefinita latera innumerabiles fibrillae sunt, a quibus fibrae curvilineae, seu circularia segmenta componuntur; ideoque per minimos gradus variat earundem fibrillarum directio, ex qua numero atque ordine indeterminabiles motus & oscillationes sequuntur, quoties ab innumerabilium obiectorum, vel ab animae cogitantis actione innumerabi-

les ideae, five phantasmata progignantur.

Quae de mechanica potentiarum animae vi & operatione leviter tetigimus, modo sufficiant, cum ad perniciosos mentis applicationum effectus tantummodo examinandos hic inserviant.

In actuali igitur mentis applicatione notabilis fit internarum capitis partium tensio, cerebri scilicet ac praecipue corporis callosi fibrarum, ad augendam oscillationum celeritatem, in mentis operationibus feliciter praestandis necessariam, in qua tensione nervorum radices nonnihil constriunguntur, arctatisque nerveis tubulis, animalium spirituum descensus aliquantulum intercipitur; quod etiam naturae consilio fieri rationi consentaneum videtur, ut scilicet maiori spirituum copia intra cerebrum detenta, medullares fibrae eodem spiritu magis tumescant, & opportunam ad oscillandum elasticitatem acquirant.

Intercepto, vel solum imminuto naturali spiritus ad partes fluxu illius saltem, qui per medullae oblongatae nervos descendit, cuncta viscera, praesertim membranosa, quae ab ipsa tantum medulla nervos accipiunt, consueta eorundem spirituum quantitate defraudantur, eorumque tonus labefactatur. Verum non solum consueta spirituum quantitate defraudantur, sed etiam cum inaequalis sit horum in capite sufflaminatio, quippe inaequalis & inconstans applicationis tempore fit cerebri tensio, ac tubulorum

nerveorum constrictio, inaequalis quoque eorundem spirituum influxus eisdem visceribus impertitur, qui per membranas fibras non aequè distribuitur, sed illarum quaedam inflantur, aliae pene inanescunt, ideoque illae maiori, hae minori contrahendi vi pollent; atque hinc oscillatorius earundem motus inaequalis & dissonans fit.

Ventriculi e. g. muscularis tunicae fibrae copiosa, vel sufficienti nervei liquidi quantitate repletae suam contractionem exercent; inanes vero veluti infirmæ otiantur, ac si antagonistae sint, seu contrariae directionis cum prioribus, hae illas ad se trahunt; sed cum inanium fibrarum distractioni ob elasticitatis defectum non respondeat contractio, oscillatorius utriusque ordinis fibrarum motus, qui alimentorum attritionem, & dissolutionem perficit, supprimitur. Idem effectus in intestinis sequitur, in quorum musculari tunica alterius ordinis fibrae puta orbiculares, sive transversales longitudinalibus praevalentes eisdem vim faciunt, & cum illarum actioni minime aequalis fiat reactio, constringitur quidem intestinalis tubus, sed non dilatatur, nec eius longitudo contrahitur. Praeterea quaedam fibrae aliis etiam ipsius ordinis nerveo liquido tumidiore magis coarctantur, quapropter inaequalis ac interruptus evadit peristalticus motus, ex quibus alimentorum imperfecta ac rudis solutio, pravaque digestio, ven-

tris murmura, dolores atque contractiones.

Interrupto peristaltico intestinorum ac ventriculi motu, sanguinis quoque aliorumque liquidorum, quae ab eodem secedunt, progressivus motus lentescit. Nam ut supra innuimus (a) sanguis caeteraque liquida in vasis imi ventris circulantia, cum a vi cordis propulsiva remotiora sint, alio indigent impulsu, ut sufficienti celeritate progrediuntur; quem impulsu in ventriculi & intestinorum vasis a motu peristaltico accipiunt. Retardato igitur horum liquidorum progressu, nec a praedicto membranosarum partium oscillatorio impulsu attenuata eorundem crassitie, tumescunt vasa, a quibus idem ventriculus opprimitur: hic autem repletionem accusat, ac ciborum nauseam experitur, secretorii ductus a crassioribus liquidis obstruuntur, glandulaeque infarciuntur; proinde gastrici succi & intestinalis, quem Peyerianae glandulae eructant, separationes deficiunt. Hinc, vel exsiccatur intestinalis tubus, & alvi stypticitatem parit, ex qua aucta eiusdem tubi & ventriculi distensione nerveisque plexibus agitatæ ad cerebrum nervosque opticos pervenit commotio; unde vertigo & temporaneus virium defectus, si-ve standi impotentia, capitisque dolor & calor: vel succi stagnantes ob volatiliū partium ex viscerum calore exaltationem, ac salinarum ab oleosis separationem, acrimoniam acquirunt, ac solvuntur; quare pruritatis glandu-

(a) Prop. IV. huius.

glandularum vasculis suam excretionem accelerant, ac frequentibus deiectionibus diarrhaeam pariunt, cui interdum violentae fibrarum tunicae nerveae crispationes accedunt, quibus eadem fibrae a se ipsis vario modo distractae tormina patiuntur.

Si liquida stagnantia viscosa sint, nec multis salibus scateant, nisi fixis, nec eorum crasim dissolventibus, venae portae radices ingressa ad hepar vehuntur, ac biliosum succum coinquinantia lentiore reddunt.

Praeterquam quod interrupto peristaltico intestinorum & ventriculi motu, nec non oscillatorio mesenterii caeterorumque imi ventris viscerum, quemadmodum & membranae capsulae efficientis, quae hepaticum ductum cum vena portae continet, biliosus succus haud satis attenuatur, & ad secretoria vascula languide compellitur. Crassioris quoque consistentiae fecernitur bilis, eiusque naturalis quantitas valde imminuitur, quae ad intestinum lubricandum, aliaque in digestionis officio praestanda non sufficit. Materia autem bilis ex secretionis defectu, seu imminutione intra cruoris massam retenta cum aliorum liquidorum rationem excedat, etiamsi ad ictēritiae gradum non perveniat, in capillaribus tamen & cutaneis vasis subflavo colore transparet, & hypochondriaci faciem terreo colore tinctam reddit.

Oscillatorii huius motus interruptio in membranosis non solum imi ventris visceribus contingit, sed etiam in

thorace, capite, totiusque corporis ambitu. Intercoastalium enim nervorum ramuli animali liquido inaequaliter inflati, inaequaliter contrahuntur; ideo inter thoracis musculos eundem thoracem dilatantes, & ipsum deprimentes, inter quos etiam abdominis musculi numerantur, actionis aequilibrium tollitur, quo rupto molestae eorundem crispaturae liberam eiusdem thoracis dilatationem impediunt, ac respirationem difficilem reddunt. Ob similem musculorum inaequalem crispaturam de doloribus hinc inde orientibus queruntur hypochondriaci, vel coarctatis capillaribus venis a corporis peripheria ad centrum sanguinem revehentibus fornicationis sensum percipiunt.

Externarum morbi hypochondriaci causarum ordinem excurrentes secundum locum dabimus animi passionibus praesertim diuturnis. Moeror scilicet, perniciosus animali & naturali oeconomiae infert damna (a), quae ab exterioribus accidentibus moerorem concomitantibus, sicuti ab illis, quae moerori contrarium animi affectum sequuntur, nempe laetitiam, deteguntur.

Exteriora moeroris accidentia sunt: profunda suspiria, vehementes & coactae thoracis dilatationes, lacrymarum effusio, faciei pallor, horripilatio, virium prostratio, demissus atque immobilis intuitus, veluti cogitabundi. Haec quidem a solidi nervei affectione immediate oriuntur, nam animi passionibus in cerebro, ubi potior

(a) *De Gorter. Opusc. de Motu vit. p. 71.*

potior est animae sedes, atque commune sensorium, suam actionem exercent, fibrarum medullarum, oscillationes perturbant, cohibentque, & ideo animales spiritus intra cerebrum sufflaminantur, nec ad solidas partes, nisi imminuta quantitate, & inaequali distributione fluunt; hinc spasmodicae nerveorum crispationes, quibus & lacrymales glandulae comprimuntur non sine contenti liquidi expressione, quod lacrymales ductus a quibus recipi solet, pariter coarctatos inveniens in lacrymas effunditur. Constringitur quoque thorax, nec ad inspirationem satis expanditur, nisi peculiari voluntatis nutu, muscoli costarum, & ipsae costae ad aerem vehementer inspirandum eleventur, ut cor oppressum ad motum oscillatorium magis incitetur, & sanguis lentescens ad motum progressivum satis compellatur. Praeterea ex imminuta spirituum separatione, ac retardato ad partes fluxu, universalis & oscillatorius solidi nervei & membranosi motus infirmatur, vires languent, horripilatio atque pallor supervenit, oculi demittuntur, ac naturalem mobilitatem amittentes terram despiciunt. Ventriculus quoque suo muneri aegre satisfacit, separationes, quae in ipso stomacho, intestinis, hepate caeterisque abdominis visceribus fieri debent, deficiunt, vel succi separati crudis rudibusque particulis abundant.

Si animi passio aliquandiu perduret cum animalis liquidi ad partes fluentis interruptione & inaequali distri-

butione, solidi nervei, & membranosi oscillatorius motus vitiosus, inaequalis & dissonans redditur, quia fibrae inaequaliter ab eodem liquido inflatae diversa vi & inconcinne moventur; quaedam e. g. celeriter & vehementer, aliae tarde & imbecilliter contrahuntur, quae motus dissonantia repetitis actibus in vitium pene constans facile abit, quod hypochondriacum morbum constituit.

Contrarii sane sunt laeti animi effectus; nam medullares cerebri fibrae leniter commoventur, & ad oscillandum alliciuntur, copiosa fit animalis liquidi secretio, & copiosior ad partes influxus, nervei tubuli uberiori eiusdem liquidi quantitate replentur, proinde & solidi membranosi fibrae summa elasticitate pollent, sed aequali, ita ut celeriter & harmonice oscillent, ex quo sequitur, in animalibus actionibus obeundis alacritas, oculorum mobilitas, totiusque corporis vigor.

Inter hypochondriaci morbi causas non infimum locum tenet vita sedentaria, sine convenienti corporis exercitio ducta, quippe muscoli quiescente corpore otiosi manent, nec partes membranasas ad motum oscillatorium sollicitant; ventriculus & intestina a ventris musculis non comprimuntur, a quibus alimentorum contritio & tenuioris a crassiori parte secretio (a) multum adiuvatur,

Respiratio quoque, quae in actuali corporis exercitio vehementior & frequentior fit, ac profundiori diaphragmatis

(a) *Pitcarn. Opusc. dissert. de motu, quo cibi in ventriculo rediguntur &c.*

phragmatis compressione alimentorum solutioni & descensui, nec non chyli in propriis ductibus excurrentis attenuationi, & adscensione multum opitulatur, otiante corpore ad praedicta oeconomiae naturalis officia praestanda, nisi imbecilliter agere potest.

Praeterea deficiente universali musculorum actione, liquida, quae in vasis praesertim minimis excurrunt, haud satis conteruntur; sanguinis molecule sphaeroideam figuram tardius acquirunt; serosae a rubris, lymphaticae a serosis difficulter secedunt, totaque cruoris massa crassioribus, rudibusque particulis refertur, quae cum solidi nervei & membranosi vitio ad hypochondriacum morbum excitandum collimant. Minuuntur enim naturales separationes, vel liquida secreta heterogeneis particulis crassioris diametri referta in minimis vasculis stagnationes portendunt, quae si in partibus membranosis fiant, violentas distractiones, atque irritamenta pariunt, a quibus oscillatorius motus perturbatur.

Musculorum insuper actio non solum ad optimam liquidorum crasim perficiendam & sanguinearum molecularum naturalem proportionem servandam necessaria est, verum etiam ad solidorum elasticitatem excitandam, tum illorum, quae sanguinem continent, atque propellunt, tum membranarum & musculorum organicas viscerum partes componentium. Quippe in musculorum actione sanguifera vasa alternatim constringun-

tur, & laxantur; & hac mediante contractione sanguis, qui in venis est, maiori vi ad cor compellitur, qui vero in arteriis maiori celeritate in venas migrat. Tota igitur cruoris massa aucto impetu ad cor rediens, eius contractilem vim provocat, qua mediante sanguinis circulatio acceleratur, & maior eiusdem quantitas ad cerebrum appellens copiosiore reddit spirituum separationem, ex qua nervosae & membranosae partes magis inflantur, ac maiorem ad oscillandum elasticitatem acquirunt; arteriae quoque ob auctum sanguinis momentum magis dilatantur, & membranosae, seu organicae partes, quibus irretiuntur, vehementiorem distractionem patiuntur, & ad motum oscillatorium sollicitantur.

Deficiente igitur musculorum actione lentescit oscillatorius organicarum partium motus, ac ob tardiores animalis liquidi huc illuc influxum, vel inaequalem distributionem, inaequalis & dissonans evadit.

Ob eandem causam homines, qui in assiduis laboribus vitam ducunt, ab hoc morbo, rarius detentos observamus. Pauci equidem rusticorum, qui ligones & batilla quotidie tractant, fiunt hypochondriaci, pauci quoque baiulorum, fabrorum aliorumque artificum, quorum artes laboriosum corporis exercitium requirunt; & si quandoque hoc morbo prehendantur, ad consuetos labores redeunt felicitate curantur.

Hic autem animadvertendum, quod si quis, licet in perenni corporis exer-

citio vivens, in affectionem hypochondriacam incidat, hoc erit ex vehementi diuturnoque animi pathemate, aut alia gravi ad hunc morbum disponente causa, vel ex ipso nimis laborioso corporis exercitio, in quo magna fit animalis liquidi insumptio & succi nutritii dissipatio. Nam cum ratio animalis liquidi insumpti multo maior sit ratione eiusdem liquidi in cerebro secreti, virium languor necessario sequitur, quia nervei tubuli & membranosae fibrae peculiari suo liquido exhauriuntur, proinde elasticitatem & vim contractilem amittunt, in quam inanitionem, si frequenter inciderint, vel in ea aliquandiu teneantur, etiam oscillatorius organicarum partium motus languescit, & naturales functiones non implentur; prava, aut imperfecta fit, alimentorum concoctio, liquidorum ad chyli mixtionem & ad eiusdem a faecibus separationem vitiosa evadit secretio. Insuper ob liquidi nervei inopiam cum inaequaliter inflentur membranosae fibrae, inaequaliter quoque contrahuntur earumque oscillandi harmonia perturbatur, atque hinc spasmodici viscerum imi ventris affectus, tensiones, borborismi, nauseae, oppressiones, dolores.

Praeter quam quod notabilis succi nutritii insumptio hunc morbum accerere potest, quia corporis emaciatione non solum a nervei liquidi, sed etiam a sanguinis & lymphae dissipatione immediate oritur, ex qua sanguifera & lymphatica vasa exinanuntur, solida exsiccantur, ac fibrae mem-

branosae fluidi distendentis defectu crispantur, earumque crispationi alterna non succedit remissio, ideoque oscillatorius motus perturbatur, quod hypochondriacam affectionem efficit.

His exceptis casibus quotidianum corporis exercitium, in quo musculorum vis exercetur, acuiturque, ab hypochondriaca affectione tuetur. Hoc quidem in foemineo sexu fortasse evidentius deprehenditur. Et enim foeminae, quae otiose vivunt, vel sedendo agunt, neundo scilicet, insigniendo, aut texendo hypochondriaco morbo saepe vexantur, qui a plurimis pro hysterico venditur, sed perperam, ut alibi innuimus (a), quippe talis morbus, qui hystericus creditur, rusticis foeminis communis esse deberet, sed in his raro observatur, quia a laborioso exercitio paucis anni mensibus vacant.

Plurimae aliae inter extrinsecas huius morbi causas enumerandae essent, e. g. immoderatus concubitus, quem multa spirituosae & volatilis substantiae dissipatio, organicarum partium atonia, totiusque nervosi systematis pravae affectiones necessario consequuntur, ex quibus oscillatorius membranosarum fibrarum motus languescit, ordinem amittit, & naturalis oeconomia perturbatur.

Victus opiparus, a quo stomachus nimis distenditur, imperfecte digerit, crudior fit chylus, eiusque particulae viscidiores eiusdem stomachi & intestinorum plicis aliquandiu haerent, corrumpuntur, ac nerveam tunicam velli-

(a) *Tract. de febr. Cap. XVIII.*

vellicando, spasmodicas eiusdem cri-
spaturas, ventriculi orificia ac intesti-
nalis tubi diametrum coarctantes exci-
tant: unde aer rarefcens ventris mur-
mura, dolores, tensiones aliaque hypo-
chondriaci morbi phaenomena parit.

Cupediarum & dulcium quoque
abusus, seu cibi compositi aromatum
copia, embammatibus, aut extractis
parati, qui ventriculi & intestinorum
fibras, vel diversimode proritando in-
confusos & praeternaturales motus in-
ducunt, vel laxando hebetiores reddunt:
atque hinc horum viscerum officium
depravatur, peristalticus & oscillato-
rius motus pervertitur.

Aeris constitutio, sive nimis hu-
mida, quae fibrarum atoniam auget,
elasticitatemque minuit, ut in laxio-
ri temperamento facile evenit, sive
admodum frigida & sicca & ad septen-
trionem vergens, ut notat Hoffma-
nus (a), quae rigidas fibras eo ma-
gis tendit, constringitque ita, ut ani-
mali succo inaequaliter repletas inae-
quali vi moveantur, & oscillent; Pe-
ripherae porulos pariter coangustans
perspirationis materiam ad interiora
repellit, ac liquidorum copiam mul-
tiplicat, quae facilius condensatur,
ac stagnat, & ad morbum hypochon-
driacum disponit.

Verum cum extrinsecas & proca-
tarcticas morbi hypochondriaci causas
aliquantulum contemplati simus, mo-
do intrinsecas & dispositivas breviter
atingemus.

Inter intrinsecas & dispositivas hu-
ius morbi causas mihi obviam veniunt,

primo consuetarum sanguinis excre-
tionum praecipue haemorrhoidalium
in viris, atque menstrualium in foe-
minis defectus, vel notabilis immi-
nutio. Nam sanguis, qui nimis co-
piosus prudenti naturae consilio, sa-
lutari excretionem imminuebatur, in
vasis, sive haemorrhoidalibus, sive
uterinis cumulatur, sanguinique ex
arteria mesenterica venienti resistit.
Hinc retardato eiusdem motu, au-
ctaque mole turgent intestinalia & ven-
triculi vasa, ac peristalticum motum
intercipiunt, suffocantque. Alui prae-
terea stypticitas, diarrhaeae, dysente-
riae intempestiva suppressio, praefer-
tim, si adstringentium remediorum
ope retenta sit materialis causa cras-
sioris consistentiae salibusque referta,
cuius farcimine excretoria vascula di-
stenta nerveae tunicae irritamentum
praebent, quod ad spasmodicas, vel
saltem inordinatas contractiones inte-
stina inducit.

Intermittentes deinde occurrunt fe-
bres, sive tertianae sive quartanae cras-
so morbi apparatu fetae, improvido-
que Ch. Ch. usu sufflaminatae in iis,
qui ventriculi & intestinorum spasma-
dicas affectionibus sunt obnoxii, &
aliae depuratoriae dictae, de quibus
agit Sydenhamius intermittantium epi-
demicarum speciem referens, quo-
rum symptomata adeo moderata sunt,
eoque directa ut febrilem materiam
coctione praeparent, & dato tempore
ad exitum disponant. His quidem
febris hypochondriacae affectiones
saepe succedunt, quae a medicis non

Qq 2

nisi

(a) *Medic. Syst. T. IV. p. 3. Cap. VI.*

nisi summo labore aegrique fastidio superantur.

Caeterae dispositivae causae in temperamenti affectionibus sunt exquirendae, in liquidorum scilicet, & fluidorum vitio. Veruntamen cum superius jam demonstraverimus primariam hypochondriaci morbi sedem esse membranofum & nervosum systema, liquidorum vitium examinare supervacaneum puto, ac statim praedicti solidi affectiones breviter excutere aggredior.

Membranosi & nervosi itaque systematis affectiones a fibrarum & minimorum canaliculorum, a quibus componuntur, vitio oriri certum est. Vitium autem fibrarum & minimorum canaliculorum, vel est in nimia rigiditate, partiumque elementarium densitate, vel in laxitate earumque partium laxiori contactu.

Si rigidiores sint fibrae, densam quoque membranarum & nervorum texturam efficiunt, qua minimi canaliculi progressivo fluidorum motui magis resistunt, eorumque nisui parum dilatantur; ideoque minorem specfici fluidi quantitatem excipere possunt, vasa lymphatica, ipsaeque membranae & nervi ob lymphae inopiam arescunt, ac flexibilitate ad oscillandum necessaria destituuntur; animale liquidum per suos ductus minori celeritate progreditur, suosque tubulos minus dilatat, ex quo lentae ac interruptae ipsarum fibrarum contractiones sequuntur, breves & concisae organicarum partium oscillationes, proinde naturales &

animales actiones tardiores fiunt, quod in melancholico corporis habitu satis deprehenditur. Nisi autem fibrarum densitas & rigiditas, ubique aequalis sit, & animale liquidum non ubique aequalem resistantiam inveniat, quidam e. g. fibrarum tractus eiusdem partis organicae maiori animalis liquidi copia inflati, quam alii, magis contrahuntur, quorum actioni cum aequalis caeterarum non respondeat reactio, oscillatorius ipsius organi motus perturbatur, & naturalem harmoniam amittit.

Si vero laxior sit fibrarum tonus, rarior quoque fit membranarum & nervorum textura; quapropter minima vascula fluidis circulantibus parum resistunt, maiori lymphae copia replentur, qua membranae irroratae flexibiliores redduntur, earumque nervosae fibrae, sive sphaeroidales vesiculae animali liquido facile inflantur, & tument: hinc velocior oscillatorius motus promptaeque naturales & animales actiones, quae etiam levi accedente causa fluidorum molem rarefaciente, aut solida stimulante, summam velocitatem atque impetum acquirunt, quod biliosi temperamenti characterem exhibet.

Etenim qui laxiorem, seu nimis flexibilem huiusmodi fibrarum tonum nacti sunt, minima animi passione agitantur, & ad violentos motus concitantur ita, ut contra offendentes se jactent, nisi ab alia prohibente causa cohibeantur: non solum vero ad iram sunt proni, sed etiam timore facileprehenduntur, ac levissima mala

malis pro magnis, remota pericula pro vicinis mente concipiunt, eorumque naturales functiones violentiam patiuntur: ad risum atque planctum facile moventur, acutos odores etiam suaves ferre non possunt, immo ab his in lipothymias & convulsivos affectus facile rapiuntur. Eorum praeterea ventriculus & intestina ex leni etiam solventis stimulo motum peristalticum valde accelerant, crudorum alimentorum expulsiōe; musculares fibrae admodum contrahuntur, & intestinales cryptas alternis ictibus coarctantes contentos succos vehementer expellunt, ac diarrhaeam pariunt; urinae quoque in iis plerumque copiosae, ac citae potus excretiones.

Verumtamen si horum solidorum laxitas ad illum gradum perveniat, in quo a fluidis circulantibus, rubris scilicet & albis vasa nimis tumeant, ac membranosae nervosaeque partes opprimantur, ac distendantur, maiori momento, quam sit illud, quo fibrae membranosae & nervosae in pristinum statum resilire debent, naturales & animales actiones priorem velocitatem amittunt.

In nostro vero casu si ob nimiam dictarum membranarum & nervorum laxitatem lymphaticus humor intra ipsarum fibras remoretur, easque distrahatur, organicarum partium praeternaturalem contractionem producit, cui proportionalis remissio non succedit, ut eadem fibrae alterno motu moveantur. Insuper huiusmodi lymphaticus humor huc, illuc tumens, ac ipsas fibras comprimens, animalis

liquidi liberum influxum intercipit, atque tubulorum inflationem ad oeconomiae naturalis actiones obeundas necessariam impedit. Hinc stomachi atonia, tarda digestio, anorexia, magnaue post cibum distentio supervenit; intestinorum quoque actio imbecillis, lenta & rara faecum eliminatio, nisi a diuturna ciborum stagnatione, proinde & corruptione, nerveae tunicae fibrae acriter proritentur: idcirco alui stypticitati diarrhaea saepe succedit, & vicissim alui stypticitas diarrhaeae, biliosi pariter succi crassities, & inopia, quae ad intestinalem tubum lubricandum non sufficit, siquidem languescente motu peristaltico, ac imminuta intestinalium fibrarum elasticitate, sanguiferorum vasorum ad venam portae sanguinem & bilis materiam ducentium vis contractilis & propulsiva hebetatur, fluidaque & ipsa bilis contenta lentescunt.

Plerumque vero cum inaequale fiat huiusmodi partium membranosarum & nervearum lymphatici humoris farcimen, nec eadem fibrae undique aequaliter comprimantur, inaequalis quoque fit ipsarum vis contractilis; ex qua oscillatorii motus necessaria harmonia & proportio perit, ac naturalis oeconomia perturbatur: intestina inaequaliter coarctantur, faecum & aeris ab alimentis extricati descensus intercipitur, hinc, illinc inflationes fiunt, borborygmi atque dolores. Insuper vasis sanguiferis in diversis locis spasmodica affectione contractis, sanguinis ad venam portae tendentis

tendentis progressus impeditur, & per haemorrhoidalem venam perpendiculariter sitam (a) regressus retardatur; quare turgescunt eadem vasa, intestinorum tunicae praeternaturali distensione ac pondere molestantur, quod circa intestini recti finem saepe evenit, cuius haemorrhoidales venae in tumores elewantur.

Ex praedicta nervorum ac membranarum spastica affectione non solum vasorum constrictiones ac sanguinearum excretionum per uterum ac per ipsa haemorrhoidalia vasa suppressiones saepe contingunt, sed hinc inde molesti quoque effectus percipiuntur; membranosa e. g. renum pelvis graviter convulsa dolores calculos mentientes parit, vel urinarii syphunculi inaequaliter coarctati tenuem crudamque urinam emittunt; intercostales & vertebrales nervi per thoracem & collum distributi, ob inaequalem animalis liquidi inflationem inaequali vi contrahuntur, & intercostalium musculorum, ipsiusque diaphragmatis alternum motum sufflamant. Hinc respirandi difficultates, cordis tremores & palpitationes, gutturis compressiones. Fibrae integumentorum capitis ac cerebri ob eandem causam aliae aliis praevalentes, cum quae maiori animalis liquidi quantitate turgescant, alias minus turgidas ad se trahant, rupto inter se ipsas parallelismo acutis doloribus idem caput afficiunt. Tandem cum ubique & per externum corpus propagentur huiusmodi spasmodicae affectiones, vagos

dolores, horripilationes, extremarum partium frigus, atque fornicationes experiuntur hypochondriaci.

Inter dispositivas huius morbi causas aetas atque sexus considerari debent. Puerilem aetatem diris convulsionibus, seu convulsivis affectibus ex levi etiam causa obnoxiam comperimus, ac plerumque ex vermium intra intestinalem tubum degentium congerie, qui perniciose lue, aut gravi quocumque morbo affecti se vehementer contorquentes eorundem intestinorum tunicas divellunt, feruntque, vel ex acribus pravisque succis ipsos vermes corripientibus & nerveae tunicae fibras irritantibus; quod quidem a molli atque flexibili solidorum natura pendet, cuius fibrae a minima vi distrahuntur, ac vicinis aut consentientibus nervosi systematis partibus praeternaturalem motum communicant. Ab hypochondriaco tamen morbo immunes vivunt; nam cum eorundem fibrarum tonus admodum mollis sit, organicae partes, etiam si ad irregularem & dissonantem motum oscillatorium cito & frequenter provocentur, eadem quoque facilitate ordinatum & harmonicum motum recuperant; si quidem pueri in levibus delectantur, nulloque negotio ad risum, aequae ac ad luctum moventur.

Augescente vero aetate cum solida crassiora fiant, ac fibrae fortio-rem tonum acquirant, non, nisi a validiori quidem causa, commoveri & ab harmonico suo motu deflecti possunt; tamen

(a) *Hoffmann. ibid. p. 99.*

tamen si deflectant, haud cito veluti in pueris ad eundem rediguntur, qua motus dissonantia aliquamdiu perdurante, illa insurgunt symptomata, quae, ut adhuc exposuimus, hypochondriacum morbum efficiunt. Tandem in senibus, in qua minima vasa solidescent, ac fibrae maiorem duritiem adeptae lente oscillant, eo difficilius a naturali tardoque suo motu recedunt, proinde rarius, quam in iuventute ac virilitate violentas contractiones, in quibus oscillatorius motus perturbatur, ineunt. Illis utique morbis obnoxiam observamus senectutem, qui a lento solidorum ac fluidorum motu oriuntur, cuiusmodi sunt apoplexiae, paralytiae, tremores, rheumatici dolores, arthritides, tussis, pulmonis infarctus, aepthiae, anorexiae, alui stypticitates. Praeterea ob lentum motum oscillatorium, qui ex imminuta solidarum par-

tium elasticitate, auctaque siccitate pendet, melancholici, cogitabundi, in operationibus obeundis tardi, atque morosi sunt senes.

Haec si quis perpendat, propositionis veritatem satis agnoscet, ac pro demonstrata eandem habebit: hypochondriaci nempe morbi causas, five extrinsecas, five intrinsecas & dispositivas ad harmonicum solidi nervei & membranosi motum destruendum, vel saltem perrumpendum tendere.

Praemissis itaque ac demonstratis superioribus propositionibus congruam huius morbi definitionem exhibere possumus. *Morbum scilicet hypochondriacum esse diuturnam molestamque in nervoso ac membranoso systemate oscillatorii motus perturbationem ac dissonantiam, ex qua illa emergunt symptomata, quae modo exposuimus.*



P A R S S E C V N D A.

C A P V T I.

De affectione hypochondriaca calida & sicca.



Hactenus genericam morbi hypochondriaci essentiam eruere conati sumus, mox specialem considerabimus, sine qua clinicus medicus curatorias indicationes ad medendum rite desumere nequit: quae indicationes admodum diversae saepissime sunt, & inter se oppositae, licet eundem, sive eiusdem generis morbum respiciant: diversae nempe esse debent, tum ratione subiecti, tum ratione symptomatum; idcirco morbum hypochondriacum in quasdam species dividemus, quas in practicis observationibus dignoscere potui.

Ratione subiecti, seu temperamenti quatuor quidem huius morbi species mihi obviam veniunt, quarum denominationes ex primariis quatuor temperamentorum affectionibus, seu corporis constitutionibus, sicuti & ipsarum terminos, quibus eadem affectiones exprimuntur, a Galeno aliisque veteribus mutuari non erubescam, quippe ad confusionem vitandam, morborumque characteres melius distinguendos iisdem uti opportunum censeo.

Novem temperamentorum differentias admittit Galenus (a), quarum imparem eucraton & symme-

tron dicit, seu mediocrem & temperatam, reliquas omnes intemperatas; harumque alias simplices, alias compositas, utriusque generis quatuor; *Simplices autem sunt calidae, siccæ, humidae, frigidae*; simplicesque vocat, quotiescumque peculiaris unica qualitas ex dictis alias excedit; compositas vero cum duae qualitates in uno subiecto caeteras contrarias superant. Quatuor etiam sunt compositi temperamenti species, quippe quatuor *primarum qualitatum* possibiles combinationes: temperamentum scilicet *calidum & siccum, calidum & humidum, frigidum & siccum, frigidum & humidum*, quas temperamentorum differentias postea universi medicinae scriptores (b) nomine temperamenti sanguinei, biliosi, melancholici, & pituitosi exprimere consueverunt, quibus terminis plures adhuc ad maiorem perspicuitatem utuntur; sanguineum nempe pro calido & humido, pro calido ei sicco biliosum, pro frigido & humido pituitosum, pro frigido & sicco melancholicum dicentes.

Nos itaque in praesenti quatuor compositi temperamenti differentias consideramus, quae dissimilem hypochondriaci morbi naturam reddunt, ac de diversa eiusdem curatoria indicatione

(a) *Lib. i. de Temper. p. 8. & lib. ii. p. 15. Med. p. 311.* (b) *Sennert. Epitom. Instit.*

catione nos monent. Erunt igitur ratione subiecti, seu temperamenti quatuor huius morbi species: 1. *Calida & sicca*, 2. *calida & humida*, 3. *frigida & sicca*, 4. *frigida & humida*.

Has noscere haud difficile puto, si conspicuas corporis affectiones examinemus, sicuti docet ipse Galenus (a): *In uno quoque genere ubi quid a mediocritate recessit, ab eo, quod vincit, nomen accepit. Itidem in universa substantia cum aliquid medium transferit, non amplius Eucraton, vel calidum, vel frigidum, vel humidum, vel siccum nominabitur, & paulo infra: maxime temperatus is est, qui corporis habitu medius horum extremorum apparet, gracilitatis, crassitudinis, duritiei, molitiei, itemque caloris & frigoris.* Praeter extrinsecas corporis affectiones etiam animi mores ad temperamenta dignoscenda admodum conducere eundem Galenum non latuit, qui de temperato corporis habitu loquens haec habet: *Idem animo quoque medius omnino est, audaciae & timoris, & cunctationis & praecipitationis, misericordiae & invidiae, fuit vero talis amicorum amans humanus & prudens, & temperatissimus quidem homo, ex his primum potissimumque agnoscitur.*

Hypochondriaca affectio, quae ratione temperamenti, seu corporis habitus, calida & sicca, sive biliosa a nobis appellatur, illa est, quae in corpore sicco contingit, cuius vasa

sanguifera, si naturalem eiusdem proportionem spectemus, quam temperatus corporis habitus postulat, latioris diametri sunt, ac magis dilatantur, quam lymphatica; proinde & sanguinea massa habet rationem maioris inaequalitatis cum lymphatica, nec non rationem maioris inaequalitatis cum adiposa substantia, quae in cavernulis membranae eiusdem nominis sub cute existentis, in omento ac cellularibus membranis musculos vestientibus ac dividantibus continetur; idcirco cum sanguinea massa caeteris succis praevaleat, qui minus elastici, seu minus rarefiscibiles sunt, quam ipsa, calidius necessario temperamentum efficit.

Ob plures quidem causas sanguinem caeteris liquidis calidiorem, seu magis calefacientem censere debemus, inter quas hae tres sunt notabiliores, prima, quia magis elasticus & rarefiscibilis, secunda, quia gravior crassiorque, tertia, quia maiori celeritate movetur.

Primo igitur calidior est sanguis, quia globuli sanguinei utpote maiori elasticitate praediti, quam caeterorum liquidorum particulae, feri, lymphae, aut pinguedinis solidorum impulsu se mutuo collidentes, & in vasorum parietes impingentes ex lege corporum elasticorum, qua compressa aequali velocitate resiliunt (b), motum a corde semel susceptum eo magis retinebunt, quam reliquorum particulae minus elasticae ac viscosiores. Duo enim corpora non elastica aequali ve-

locitate

(a) *De Temperam. lib. 2. p. 13.* (b) *Wolf. Mathem. T. 2. Cap. XII.*

locitate sibi mutuo occurrentia ambo quiescere debent. Ab aucto igitur globulorum sanguineorum motu, vehementior fit eorundem actio inter se, maiorque ad latera vasorum attritus proinde intensior calor.

Secundo quia gravitate, & molecularum crassitie caetera fluida exsuperat. Equidem fluidum particulis specificè gravioribus constans, eadem velocitate ac aliud sua vasa percurrentes, maiori impetu in eorundem vasorum latera impingit, eiusque particulae maiori quoque vi inter se colliduntur; unde calor augetur: deinde cum sanguineae molecule crassiores sint, quam caeterorum fluidorum, nisi multo maiori affricu per minimas arteriolas traici possunt; praeterea si densiores & valde compacti sint sanguinei globuli, atque rationem maioris inaequalitatis habeant cum serosis & lymphaticis ipsam cruoris massam componentibus, cum easdem arteriolas unicum sanguinis globulum admittentes subire debeant, fortior propulsione vim a solidis requirunt, quod caloris incrementum portendit. Quare, ut apprimè meditatur doctiss. de Gorter (a), corpora laboribus assueta robustaque, quorum sanguis magis compactus ac condensatus specificè gravior redditus multo sunt calidiora, quam illa, quorum sanguis tenuis, aquosus, iners.

Tertio quia maiori celeritate moveatur. Impetus enim ex massa in celeritatem, sive quadratam ut Leibni-

tius aliique plurimi, sive simplicem, ut celebris Marzagalia cum veteribus sustinet (b), resultat: quapropter cum maior sit sanguinis celeritas, erit quoque fortior in vasorum latera nisus, ideoque maior calor.

Verumtamen dissimulare non debeo, quae de corporei caloris causa proxima summa perspicacia monet praelaudatus de Gorter sanguinis scilicet & nostrorum fluidorum calorem non ex celeri motu, nec valida eorundem partium ad vasorum latera applicatione & nisu excitari (c), sed solidarum partium, seu fibrarum valida actione, in qua eadem contentum liquidum impellentes sibi invicem fortius adhaerent ac celeri motu supra se ipsas vicissim moventur, earumque ex forti attritu calorem pendere. Huic ideo mechanicae innixus, asserit liquida in vasis excurrentia vasorum latera minime terere, quippe cum globulosis partibus constent, veluti nostri humores, hi globuli internam vasorum superficiem tangentes, si aliquam ineant in contactu resistantiam, circumrotantur, quod demonstrare conatur (d). Huic tamen sententiae me omnino adstipulari non auderem, quippe ad nostros humores quod attinet, ac praesertim sanguinem, quaedam solvenda remanent obiecta.

Primo sanguiferarum arteriarum figuram conicam esse, in quarum latera, etiamsi recto tramite ac directione inter se ipsos parallela progredierentur sanguinei globuli, incidere necesse

(a) De Perspir. insens. Cap. VIII. p. 32. ibidem p. 32. & 34. (d) Fig. 10. Tab. 1.

(b) Delle forze vive. (c) De Gorter

neceffe esset, proinde aliquam reflexionem pati, ex qua colliduntur, eorumque affricus calorem parit; Huiusmodi autem reflexio & attritus eo maior fit, quia arteriae alterna constrictione ipsum sanguinem impellunt, qui impulsus, cum lateralis & transversus sit, sanguineorum globulorum motum perturbat, ac directionis lineam assidue commutat.

Secundo, licet sanguineos globulos utpote rotundos arteriarum, quae plurium globulorum capaces sunt, internam superficiem non terere concedatur, in illis tamen, quae nisi singulos globulos transmittere queunt, notabilem eorundem globulorum ad latera applicationem & affricum fieri debere nemo inficietur. Nam in talibus arteriis plures ex serosis moleculis in sanguineos globulos compinguntur, atque chylosae rudesque moleculae heterogeneam figuram nactae tamquam sub praelo atteruntur, & complanantur.

Tertio, calorem, qui in sanguine & aliis nostri corporis fluidis percipitur, a solidorum actione oriri, tamquam a prima causa movente, non est dubitandum. Inquirendus tamen restat modus, quo ipse sanguis calorem a solidis contraxerit, utrum scilicet ab impulsu a solidis accepto, quo mediante in orbem vertitur, eiusque moleculae a vi directa cordis & transversali arteriarum propulsae vario, composito motu feruntur, ex quo assiduam collisionem, validam inter se ipsas attritionem & cum arteriarum lateribus affricum patiuntur,

an immediate ab ipso solidorum calore per contactum communicato. Hoc postremo etiam posito sequens argumentum solvere nescirem: Solidae partes fluidis contentis proprium calorem communicare nequeunt, nisi per motum, quoniam per eorundem partium motum, ad agendum susceptum ipsae calorem assequutae fuerunt, per illum nempe motum, quo fibrae alternis vicibus sibi ipsis fortius applicantur, & attritum ineunt; ergo & per suarum molecularum attritum sanguis calorem contrahit, qui attritus, cum in motu circulatorio necessario contingat, in motu pariter circulatorio sanguinem & caetera fluida calorem contrahere & augere verisimile est. Verumtamen hoc disquirere ad institutum nostrum minime pertinet; ideoque solidorum affectionem tamquam primariam calidi temperamenti causam statim contemplanor.

Solidorum itaque in calido & sicco temperamento constitutionem valde robustam & elasticam statuere debemus, quippe magna vi summaque elasticitate oscillatorium motum exercent. Cor e. g. maiori momento sanguinem impellit, qui impetu accepto in arterias nititur, nitenti autem sanguini arteriasque dilatanti fortis respondet ipsarum arteriarum resilitio & contractio, cuius effectus duplex hic considerandus, primus ipsa solida respicit, alter fluida.

Ad solida quod spectat, fibrae agentes, utpote magis tensae sibi ipsis fortiori nisu applicantur, eorumque

motus aequae fortis attritu perficitur, a quo magis incalescunt solidae partes non dissimili ratione, ut sapienter cogitavit ipse de Gorter (a) ac duo corpora dura invicem confricata non solum calorem, sed etiam flammam emittunt, quod in mollioribus corporibus frustra expectatur, quemadmodum & chordae parum tensae, si invicem terantur, multo minorem calorem excitant, quam valde tensae. Tensioni fibrarum earumque partium cohaesioni admodum confert serosi & lymphatici succi inopia, qui inter membranas & nervosas fibrillas depositus easdem humectat, atque laxat, caloremque temperat.

Non solum vero cordis & arteriarum totiusque solidi vasculosi vis & elasticitas est maior, sed etiam nervosi & membranosi; utrumque enim solidorum genus a se invicem robur & elasticitatem mutuatur. Solidum vitale sanguinem & caetera fluida valido momento propellit, quae musculos instantia motui animali vigorem praebent, atque musculares viscerum membranosorum fibras replentia naturales actiones & secretiones promovent, nec non cerebro maiorem spirituum materiam suppeditantia solidum nervosum & membranosum animali fluido opulenter reddunt. Solidum vero animale, seu nervosum & membranosum systema, ex quo & vitalia organa, saltem pro maiori parte, componuntur, quotiescunque validiori vi contractili atque elastica praeditum sit, vitalibus

iisdem organis ad propria munera praestanda robur & vim oscillatoriam communicat.

Talis in calido & sicco temperamento esse debet membranosarum & nervearum fibrarum constitutio, ut animali liquido prompte & facile repleantur, quod earumdem elasticitatem ac vis contractilis momentum auget.

Huius naturae solida etiam ex levi animi passione in vehementes & inconcinnos motus rapiuntur, hominemque iracundum efficiunt in actionibus promptum, animo fortem, impatientem, audacem &c.

Alter solidorum magna vi oscillantium effectus fluida respicit, ipsaque talia efficit, qualia in temperamento calido & sicco, de quo agimus, inveniuntur.

Sicuti recentiora nostri corporis fluida diuturna, vel saltem pluries repetita circulatione peculiarem naturam dato vasorum generi homogeneam, ac fluidis intra eadem vasa contentis similem acquirunt, ita hanc fluidorum assimilationem a solidorum ipsa fluida impellentium elasticitate & momento pendere extra dubium est. Nam rubra sanguinis pars, seu crassiores & rubri globuli ex serosis componuntur, qui & ipsi rotundi sunt, ac sicuti priores compositi, nec vi insita attrahente ruunt in mutuos amplexus; ut optime ratiocinatur Schreiberus (b) siquidem rubra sanguinis pars a corpore extracta aliquamdiu post extractionem in serum utique pro

(a) *Ibidem.* (b) *Elem. Med. Phys. Mathem.*

pro maiori parte fatiscit, non autem serosa in rubram coalescit, ergo serosae molecule ab externa vi comprimente, seu vi contractili solidorum in rubros globulos compinguntur.

Mediantibus microscopiis observatum fuit globulos rubros per arteriarum extremitates transeuntes aliam induere figuram, seu ex rotunda ellipticam (a), qui globuli cum intra massam redeant & rotentur, vel huc illuc impingant, sub diversa directione minimas arteriolas iterum subire ac diverso proinde situ compressionem pati debent, quare iteratis circulationis ope eorundem compressionibus varia plerumque directione firmiorem nexum, ac rotundiorem figuram consequuntur ipsi globuli. Rursus ergo concludendum serosas molecule contractili solidorum vi coalescere, & rubros globulos construere. Quod de rubris globulis, ex serosis scilicet, compingi dicimus, hoc & de serosis & lymphaticis intelligendum est, quorum ultimi quoque, licet oculos microscopio armatos effugiant, sphaeroideam figuram nactos esse juxta generalem naturae ordinem censendum est.

Si vero tanta sit heterogenearum molecularum ingestarum, vel quocumque modo fluidis commixtarum cohaerentiae (b) vis, ut arteriolarum contractione sphaeroideam figuram induere facile non possint, assidua tamen circulatione, in qua rotantur, & mutuo colliduntur, earundem prominentes anguli teri debent, ac tan-

dem rotundae sive globosae fieri dictae molecule: nisi autem hoc consequatur natura, eadem nostro corpori infensae molestaeque evadunt, ac interdum veneficae, praesertim si acuti & rigidiores sint earundem anguli, a quibus solidae partes feriuntur, atque corroduntur.

Aucta igitur contractili solidorum vi in calido & sicco temperamento, de quo agimus, heterogeneae fluidorum molecule, fortius praelum subeuntes, citius atteruntur, & homogeneam figuram vasorum meatibus conformem adipiscuntur, serosi globuli celerius coagmentantur, & in rubros globulos compinguntur, nec non lymphatici in serosos coalescunt ita, ut quantitas globulorum maiorum, seu rubrorum copiosior fiat, & cum tenuioribus, seu lymphaticis comparata habeat rationem maioris inaequalitatis, quam in mediocri temperamento habere solet; hoc est sanguinis ratio cum fluidis albis comparata justam proportionem excedet, quippe maior fluidorum alborum pars intra sanguifera vasa detinetur, & in sanguinem convertitur, ideoque deficientibus albis succis, ac naturali lymphae quantitate exhaustis vasis lymphaticis siccescit corpus, eiusque calor, qui a validiori solidorum oscillatione excitatur, ob praedictam lymphae inopiam minus temperatur.

Conspicuum auctae solidorum elasticitatis & vis contractilis effectum hanc mechanicam comprobantem nobis exhibet praelaudatus de Gorter in

Rr 3

crusta

(a) De Gorter. de perspir. (b) De Gorter. ibidem.

crusta phlogistica (a), quae in sanguine pleuriticorum, vel quacunque inflammatoria febre laborantium, praesertim post vehementem corporis motum conspicitur. Hanc a maiori violentaque solidorum actione sanguinem compingente oriri autumat, cuius pars gelatinosa *diuturniori attritu, calore & compressione ita compingitur, ut cum liquidis advectis misceri nequeat.*

In iis, quorum validius est solidorum momentum, proinde vehementior eorundem actio, magnam substantiae oleosae dissipationem fieri necesse est, non dissimili ratione, ac in illis, qui in assiduus laboribus, aut vehementiori corporis exercitio vitam ducunt, in primo enim casu maior solidorum vis contractilis oleosam & pinguedinosam substantiam, cuius particulae a globulorum coalescentium natura diversae, utpote magis lubricae & leviores, ita attenuat, ut per excretorios corporis meatus praesertim cutis eadem particulae postea eliminantur. In secundo vero muscularis vis circularem fluidorum motum sollicitans eundem parit effectum.

Affectio hypochondriaca in hoc temperamento calido & sicco non adeo frequens est, nec ita facile ab interna ac dispositiva causa generatur. Siquidem solidorum elasticitatem & vim contractilem cum magna sit, validus nervosi & membranosi systematis tonus comitatur, quo mediante fibrarum oscillantium harmonia conservatur; Si tamen siccitas adeo auge-

scat, ac in quodam loco ita praevalcat, ut aequilibrium inter solidas partes auferatur, hypochondriaca affectio praesto est.

Augetur siccitas inprimis in adulta aetate, five ab adolescentia ad iuventutem, quia solidorum tonus fortior fit, nec vasa primo prima tenuiorem lympham traicientia ultra acquisitum diametrum dilatantur, quia maiores organicae partes, atque compositae naturalem suam magnitudinem assequuntae sunt; deinde eo magis in virili aetate, in qua vasa primo prima, seu tenuissima solidescere incipiunt, quia fibrarum tonus eo durior, minusque flexibilis evadit. Aliquando itaque evenit, ut ex humidae substantiae inopia quaedam membranosae & nerveae partes lymphatico humore, quo irrorari solent, defraudentur, earumque fibrae, inter quas idem humor excurrere debet, magis arescant, & contrahantur ac fluido animali minus inflentur; quapropter cum inaequalis huc illuc fiat tubulorum nerveas & membranosas fibras componentium inflatio inaequalis pariter ac interrupta eorundem actio sequitur, ac oscillationum harmonia tollitur; atque hinc naturales & animales functiones perturbantur, ac pro diversitate loci ac partium, in quibus haec contingunt, diversa quoque morbi accidentia insurgunt.

Si in capitis integumentis, five internis partibus, cephalalgiae & hemi-craniae cum molestis contractionibus; intra nervorum opticorum capsulas eorum-

(a) Cap. XV. De Perspirat. & exercit. med. de motu vitali.

eorumdem tremores, proinde & vertigines, ac rupto interdum ipsorum parallelismo, obiectorum duplicationes; in nervis auditoriis, aut membranis auditus organum efficientibus aurium tinnitus, atque auditus difficilis; in oris glandulis vehementes & inordinatae constrictiones cum uberimo & frequenti salivae fluxu; in laringe, atque pharynge recurrentium paris vagi ramulorum spasmodice affectorum contractiones, & globi in gutture comprimentis sensum referentes, ac deglutitionem difficilem reddentes.

Si in thoracis regione intercostalis & paris vagi plexibus inaequaliter inflatis & praeter ordinem agentibus costarum dolores, respirandi difficultates & oppressiones, cordis angustiae, tremores ac palpitationes, pulsus modo expansi, modo contracti, aliquando frequentes.

Si tandem in abdomine inordinatae fiunt stomachi contractiones ac perturbatus intestinorum peristalticus motus, ex quibus alimenta, vel diutius retenta corrumpuntur, & acrimoniam acquirunt, dolores, vel nauseam ac vomitum pariunt, hypochondriorum tensiones, flatuum interceptiones atque tormina; vel cito nimis expulsa haud satis atteruntur, eorumque tenuior & nutritia pars lacteis vasculis destinata a crassiori non discernitur, sed utraque inconcocta praecipiti motu per alvum eliminatur. Accedunt totius ventris murmura, renalium plexuum spasmodicae contractiones, quibus tubuli urinarii in papillas

definientes vehementer constringuntur, & subtiliorem tantum feri, sive urinae partem traiciunt, quae modo pauca, modo abundans, prout articularum urinae materiam ad renes vehentium celerior, aut tardior oscillatio.

Modo descripta ac plura alia similia symptomata hypochondriacum morbum constituentia in calido & sicco temperamento, sive bilioso excitari possunt, quotiescunque ficcitatis gradus ita augeat, ut naturalis & animalis oeconomiae functiones perturbet, & uno verbo oscillatorium solidi nervei & membranosi motum inordinatum reddat.

Quapropter peculiare in hoc temperamento, quemadmodum & in singulis reliquis, eruendae sunt indicationes, ac licet eadem possint esse symptomata, a quibus duo, vel plures aegri hoc morbo detenti corripiuntur, diversa tamen medendi methodo ipsa aggredi debemus.

Erunt itaque in hoc casu indicationes primariae: Corporis habitum humectare, & calorem temperare, ut solida nimis sicca sufficienti lymphae quantitate irrorentur, & necessariam flexibilitatem recuperent, quibus mediantibus fibrae membranosae & nerveae fluido animali aequaliter inflentur, & harmonico motu moveantur.

Medendi methodus, quae mox dictis indicationibus satisfacere possit, erit, si de solventibus sermo sit, pauca quidem & ex lenientibus corpusque blandius laxantibus eligere; valida

lida vero purgantia praesertim sicca prorsus vitare ac ipso rhabarbaro, nisi valde temperato solventi indito, veluti cassia, aut ipsius cassiae conservati non licebit; si autem pro minorativo adhibere velimus, ad stomachum & intestina cruditatibus infarcta abstergenda, & ad affectionis, de qua agimus, effectum, non causam, auferendam, non eiusdem rhab. substantia erit adhibenda, sed infusio, seu tinctura parum alicuius salis, veluti tartari extracta in aqua vel decoctione ex aliquibus alterantibus parata, veluti radicibus & foliis fragariae, malvae, cichorii, fumariae, ceterach, aliisque eiusdem generis; nec specifica ex genere aloeticorum, valide incidentium, aut quorumcumque amarorum hic conveniunt, ut pilulae tartareae, aleophanginae, marocostinae, nec quidem Becherianae aut Stahlianæ. Incongrua etiam, ne dicam perniciofa, quae ad stomachum roborandum, & digestivam vim acuendam exhiberi solent, spirituosae nempe, balsamica & valida carminativa; haec enim oscillatoriam solidorum vim magis provocant, & fluida magis rarefaciunt, ideoque vitiosum temperamenti calorem & siccitatem augentia ipsam morbi causam foveant; qua posita morbi causa a martialibus quoque abstinere debemus, quae, siue specifica suarum particularum gravitate, siue stimulo in fibras agendo, ipsas ad vehementiores contractiones excitant, & in validiorem earundem partium affriccionem inducunt, & hinc calorem acunt,

solida exsiccant, sanguinemque nimis compactum sero lymphaque pene destitutum efficiunt.

Scio quidem incongrua remedia enumerare nimis longum & importunum esse opus; tamen cum modo allata in plurimis hypochondriacis affectionibus non solum apta, sed praestantiora quoque merito censeantur, hos animadvertere casus, seu morbi species, in quibus illa eadem remedia nocua sunt, opportunum fore iudicavi.

Optimum profecto erit lac, praesertim diaetetica forma adhibitum, serum lactis, siue purum, siue cum refrigerantibus herbis destillatum, optimae emulsionis ex seminibus frigidis compositae, ptisanæ, aquae dulces, inter quas Nocerianae; perniciosae vero minerales, quae forti minerali, siue salibus mordicantibus, siue aestuoso sulphure praeditae sunt omittenda, siquidem in morborum contractionibus mirum in modum opitulantur, quemadmodum & specifica antispasmodica ex temperatis, praesertim si levi paragorico jungantur, inter quae eminent succinata, nitrata, & cinnabarina.

Internis remediis etiam externa respondere debent, idcirco ad phlebotomiam in primis morbi accessibus est confugiendum, ac non solum ad venae sectionem, sed etiam ad hircines haemorrhoidalibus vasis applicandas, quae sanguinis copiam minuendo, ac vehementem solidorum vim compescendo spasmodicas crispationes leniunt, morbumque saepe dissipant, ad clysteres emollientes, anodynos

dynos & refrigerantes in alvi stypticitatibus, quemadmodum & ad unctiones laxantes tum universales, tum particulares, pro quibus & ad fomenta; sed his multum efficaciora sunt balnea aquae dulcis aestivo tempore adhibita.

Quoad dietam autem, humectanti & simpliciiori victu uti debet aegrotus, hordeaceis pultibus, elixatis carnis potius, quam adustis. Aquae

potum larga copia sumptum praeditis indicationibus satisfacere quis non videt, nisi quaedam adsint accidentia, ut peculiaris stomachi languor ex nimio cruditatum infarctu (tunc enim aliquo confortanti stomachus indiget?) Corporis exercitium, quod in caeteris hypochondriacis affectionibus etiam si laboriosum adeo salutare concipimus, in calido & sicco temperamento, nisi moderatum commendare non possumus.

C A P V T II.

De affectione hypochondriaca calida & humida.

Secunda morbi hypochondriaci species sit calidi & humidi temperamenti, pro quo sanguineum & plethoricum passim intelligunt medici, quam tamen, sicuti de priore affirmavimus, raram, vel saltem non adeo frequentem invenimus. Nam calidum simpliciter temperamentum robustum indicat fibrarum tonum, magnamque elasticitatem, qua solida alternatim contrahuntur, & fluida propellunt, ex quorum forti contractione sanguinei globuli facile compinguntur, & elasticam naturam acquirunt: simpliciter humidum vero temperamentum, notabili fluidi copia fultum reddit corpus, qua vasa non solum sanguinea, sed etiam & multo magis lymphatica replentur. Solida igitur in tali temperamento simpliciter humido magnam distensionem patiuntur, atque resistantiam, nec tanta vi in

fluida se constringere valent, veluti in calido simpliciter, vel calido & sicco temperamento, quapropter notabilis sanguinearum molecularum pars, quae in ipso calido temperamento summe elastica arteriolarum vi in rubros globulos cogitur, in humido temperamento serosos & lymphaticos multiplicat, solidaque maiori alborum succorum quantitate madescunt, ex qua fibrarum mollities augetur, & elasticitas infringitur. Molles fibrae ob interpositam lympham supra se ipsas agentes leviolem affricum ineunt, proinde minus calefiunt, idcirco pinguedinosa substantia, quae in leni fibrarum oscillatione copiosior secernitur, in membranae adiposae cellulis atque omenti diutius conservatur, & obesum corpus efficit. Si autem tanta fiat succorum praesertim alborum moles, ut elasticam solidorum

vim obruat, secretiones retardantur, imminuitur transpiratio, quia tanta humorum quantitas, quae in transpiratione infunditur, a laxato vitali fibrarum motu haud satis subigi, nec attenuari potest: biliosus pariter succus minori copia secernitur, crassiorque evadit. Augescente vero fibrarum laxitate, ac se languide contrahentibus solidis rudes moleculae aegre atteruntur, ac multiplicatae sanguineam massam inquinant; deinde globulorum rubrorum ratio ad serofos & lymphaticos ob compingentium virium defectum continuo decrescit, & sic corpus ad cachexiam disponitur.

Hi sunt consueti humidioris temperamenti effectus seorsim considerati, si vero simul cum calido uniantur, optimum temperamentum efficiunt. Calor enim ab humidi copia cohibetur, eiusque damnosi effectus impediuntur; lymphatica nempe liquidorum substantia organicas partes humectans oscillantium fibrarum attritum lenit, earumque tonum flexibilem reddit; fluida insuper, quibus vasa tument, contractili earumdem vi congruam resistentiam faciunt, qua motus vitalis vehementior compescitur, ac nimia arteriarum vis sanguineas moleculas in rubros crassioresque globulos compingens moderatur. Hinc naturalis ipsorum globulorum proportio cum serosis servatur, ac sanguinea massa fluxilis redditur, proinde singula fluida laudabili celeritate per propria vascula traiciuntur, ex quo prom-

ptae fiunt succorum ad naturalem oeconomiam dispositorum secretiones.

Praeterea cum solida nervea & membranosa lymphatica substantia satis irrorentur, eorundem tubuli, ipsorum fibras componentes sufficienti & aequali spirituum quantitate replentur; unde fortis & aequalis eorundem actio, qua vicissim contrahuntur & harmonice oscillant; idcirco rara in huiusmodi temperamento hypochondriaca affectio. Aliquando tamen contingit, nempe cum praedictum aequilibrium inter solida, & fluida, & inter solida & solida tollitur.

Ex rupto aequilibrio inter solida & fluida oriri potest hic morbus, quotiescumque fluidorum massa ac praecipue sanguis maius momentum supra solida acquirat, ac vi cordis propulsivae nimis resistat; quae resistentia ipsius cordis palpitationes, oppressiones ac respirandi difficultates parere solet. Hoc autem momentum, seu resistentia maior fit, vel ratione massae auctae, vel ratione crassitiei. Si ratione massae maius momentum acquirant fluida supra solida, ac in quibusdam organicarum partium vasis ita tumeant, & nerveas fibrillas compri- mant, ut animalis liquidi inflatio huc illuc sufflaminetur, tam animalis, quam naturalis oeconomiae actiones perturbantur. Animales autem actiones perturbantur, quia musculares partes & alia animalia organa modo stuporis & fornicationis, modo doloris sensum percipiunt; naturales vero quia unisonum & aequalem suarum fibra-

fibrarum motum amittunt, ac in propriis muneribus secretionum, aut digestionis deficiunt. Si ratione crassitie, similes in nostro corpore effectus oriri comperimus. Siquidem posita fluidi crassitie particulae quoque idem fluidum componentes crassiores, minusque sphaericae censendae sunt, quarum superficies maiori punctorum numero se invicem contingunt, ac vasculorum latera magis perfricant, ideoque multiplicato earundem contactu progressivus ipsarum motus retardatur, ac solidorum ictui magis resistunt. Retardatur sanguinis aliorumque fluidorum crassiorum motus in locis praesertim a corde remotioribus, veluti imi ventris visceribus, in lienis nempe vasculis, utpote laxioribus ex quo eiusdem moles & durities augetur, eiusque officium sanguinem ad hepar euntem diluendi attenuandique supprimitur (a). Quapropter & in hepate tarde progrediens sanguis crassiorem dat bilem, deinde aliquantulum refluens ventriculi quoque & intestinorum vasa magis distendit, quae musculares ipsorum fibras varie comprimendo & distrahendo peristaltici & oscillatorii motus harmoniam tollunt.

Rumpitur aequilibrium inter solida & fluida, quotiescumque etiam solida maius momentum supra fluida acquirant, de cuius effectibus superiori capite loquuti sumus.

Postremo rumpitur aequilibrium inter solida & solida, si solidorum

elastica vis non ubique sit aequalis, sed organicae partes aliae aliis praevalent, quod tunc evenit, cum nervosi & membranosi systematis fibrae inaequalem tonum nactae sunt.

Hinc animadvertendum 1. fluida nostri corporis juxta hydraulicae leges percurrentia, ad illam solidorum partem magis tendere, ubi minorem resistantiam inveniant, 2. eadem fluida ibi lentescere ac priorem velocitatem amittere, ubi aequali posita a corde distantia & aequali vasorum diametro minorem impulsu ad motum progressivum accipiant. 3. Velocitates liquidi eadem posita cordis vi assidue propulsi, ac per canalem non eiusdem ubique amplitudinis fluentis esse inter se, ut inverse quadrata diametrorum ipsius canalibus (b), quod sic demonstratur. Duorum cylindrorum aequalis longitudinis, sed inaequalis latitudinis capacitates sunt inter se ut quadrata diametrorum, proinde fluida, quibus replentur, in eadem erunt proportionem; si dato igitur temporis spatio eadem fluidi quantitas per eosdem diversae latitudinis cylindros transire debeat, tanto maior erit celeritas fluidi in cylindro angustiori, quanto minor ipsius capacitas; ergo propositionis veritas patet.

Has itaque hydraulicae leges, ut nostro casui applicemus, notandum; Si quaedam vasa, aut vasorum rami laxiorem fibrarum tonum acquisiverint, eorum tunicae fluidorum impulsui minus resistunt, ac magis, quam

§ 2

(a) Boerhaav. praelect. Academ. Lien. visc. & act. (b) De Gort. de Secret. hum. par. 1.

quam caetera vasa, five vicina, five remota dilatantur, ideoque maiorem fluidorum molem recipiunt, quae elasticam tunicarum vim superat, nec sufficientem impulsu ad motum progressivum accipiunt, ideoque lenteſcunt. Nervosa & membranosa organa huiusmodi vasis contexta, vel irretita violenta distensione distrahuntur, aut comprimuntur; quae vasorum dilatationes, si in membranosis abdominis visceribus fiant, veluti ventriculo & intestinis, dolores, borborygmi ac tensiones insurgunt, musculares fibrae huc illuc magis compressae aegre & languide contrahuntur, earumque actio non compressarum, vel minus compressarum fibrarum actioni non respondet; unde oscillatorius ipsarum motus confunditur; circulares e. g. fibrae modo celeribus & successivis contractionibus alimenta immature detrudunt, modo lentis ventriculi orificia, aut intestinorum diametrum nimis coarctantibus diutius remorantur, ex quo pravae digestionis, ac praedicta oriuntur accidentia, quippe aut alimentis immature deiectis nutritio succo orbatur natura, aut diutius retentis alvi stypticitates ac perniciosas init corruptiones, in quibus salia volatilia exaltantur, fixa extricantur, & nerveam tunicam ferientia ad spasmodicas crispationes disponunt; aeris vero moleculae coagmentatae & rareſcentes violentas stomachi & intestinorum inflationes pariunt.

Notandum quoque, ob retardatum fluidorum motum in abdominis vasis

quaedam liquida, quae determinato velocitatis gradu ad eorum secretionem indigent; intra eadem vasa detineri, ac inter caetera biliosum succum, qui fluidorum massa coinquinans hypochondriacos subfulvo colore plerumque tingit; nam ob diuturnam in ventriculi, intestinorum ac mesenterii vasis moram crassior factus hepaticos venae portae ramulos in biliosos porulos definientes aegre subit, ac regrediens per venam cavam, aut diaphragmaticam ad sanguinem revertitur. Hoc autem praecipue contingit, si ruptum inter solida & solida aequilibrium dissonantes & praeter naturales venae portae constrictiones pariat, quas mediantibus membranosa Glissonii capsulae ipsius venae portae ramos ac biliosos ductus continentis spasmodicis crispationibus saepe fieri verisimile est, cuius capsulae actio & officium, copiosis robustisque suis fibris aequali motu oscillatorio instructis sanguinem ex sinu venae portae per hepar ducere ab eodem de Gorter sapienter statuitur, atque mechanicis pulcherrimisque rationibus probatur. Ait enim: sanguis postquam arteriae caeliacae & mesentericae extremorum ramulorum, qui chylopoieticis organis famulantur, angustias superaverit, ac per venae portae radices illinc venientes in eiusdem portae sinum valde amplum pervenerit, si a solo cordis impulsu motum haberet, tunc propulsiva cordis vi procul dubio insumpta motu omnino destitueretur, nec per alteram ipsius venae partem, quam ex officio arteriam portam

portae appellat, internam hepatis substantiam usque ad biliosos porulos penetrare valeret. Deinde considerat nullam adesse in tota vena portae valvulam, quae regredienti sanguini resistere, & ad determinatum locum eundem dirigere possit, etiam si externa vi accedente alternis vicibus adigeretur idem sanguis, veluti in venae cavae ramis valvulis instructis a musculari motu perficitur; his itaque deficientibus, licet ad respirationis actionem alterne prementem confugiamus, haec actio cum totam venam portae aequaliter premat, non magis sanguinem promovet ad hepar, quam eiusdem traiectioni ex arteriis in ipsam venam portae resistat, & eodem tempore ex arteriae portae ramulis per venae cavae radices quoque compressas commeatum difficilem reddat, idcirco sanguinem hepar adeuntem parum adjuvat; quibus addit, ipsum sanguinem ingressurum ex amplo sinu angustos ramos magis resistentes, quippe duriori capsula stipatos, transire debere; adeoque concludit, capsulae Glissonii primarium officium esse robustis suis fibris sanguinem a sinu venae portae, ad hepar adigere, quod alternis & successivis constrictionibus praestat. Si vero membranosa capsulae fibrae minori elasticitate donatae sint, quam aliae solidae partes, spectata naturali proportionem, veluti ventriculus, intestina & mesenterium, a quibus sanguis mediantibus venae portae ramis ad sinum ipsius venae pellitur; huius maior quantitas hepaticam venam por-

tae, seu *arteriam portae*, ut cum de Gorter loquamur, adibit, eiusque ramos ita distendit, ut contractionis vis, qua capsulae membrana ad biliosos porulos eandem compellit, superetur; ideoque bilis secretio deficiet. Quod pariter eveniet, si versa vice eadem membranosa capsula spasmodica contractione affecta vasa portae adeo constringat, ut minor sanguinis, sive bilis materiae quantitas secretorios tubulos subire possit; Si vero ob huiusmodi spasmodicam contractionem ipsius sanguinis transitus etiam ad venae cavae ramulos coangustetur, notabilis ad praedicta imi ventris viscera regressus habetur, quo vasa lienis, ventriculi, mesenterii, & intestinorum, praesertim haemorrhoidalia interna, & externa inflantur, & illa, quae mox tetigimus symptomata, aliaque plurima excitantur.

A rupto inter solida & solida aequilibrio innumera quidem oriuntur incommoda, quae hypochondricos vexare solent, praesertim si inter solida nervea & membranosa, ac inter sanguinea & lymphatica, seu vitalia huiusmodi aequilibrium tollatur. Si momentum solidi nervei praevaleat momento solidi vitalis, cardiaci e.g. plexus vehementiori vi agentes cor ita constringunt, ut eius musculosae fibrae ad ventriculos alterna vice dilatandos ac redeuntem sanguinem totum excipiendum non satis remitti, atque laxari possint, cordis angustiae & oppressiones hypochondriacum aggre-
diuntur. Praeterea in adeo vio-

lentos ictus cor inducunt, ut sanguis magno impetu propellatur, praesertim versus caput, eiusque vasa violententer distendat, non sine capitis dolore. Caeteri quoque vagi & intercostalis ramuli pulmonicum plexum efficientes ipsius pulmonis vesiculas coarctant, quae inspirando aeri resistentiam faciunt, vel dorfi & thoracis nervi intercostales musculos contrahendo costas suspendunt, & alternum thoracis motum intercipiunt; ex qua utraque causa respirandi difficultatem experitur aeger. Non solum vero cor, sed ipsa etiam vasa iisdem spasmodicis crispationibus obnoxia sunt, cumque laxior sit tunicae venarum textura, harum diameter magis, quam arteriarum coarctatur, idcirco coarctato iugularium, vel finium durae matris diametro maior sanguinis copia per carotides & vertebrales ad caput adscendit, quam per iugulares, & ipsam vertebralem venam descendat, ex quo eiusdem capitis calor, dolor, ac faciei rubor emergit. In artubus pariter huc illuc coangustatis venis magis, quam arteriis, sanguinis reditus retardatur, vasa turgent, ac nervosae partes compressae obtusum dolorem, stuporem ac formicationis sensum referunt.

Inter solida etiam nervea five membranosa aequilibrium saepe tollitur, tunc cum quidam nervorum rami, quorum tubuli, five machinulae sphaeroidales animali succo magis replentur in alios ramos vim faciunt, & convulsivas contractiones pariunt, quibus affecti artus difficulter, nec

sine dolore moventur, organicae partes distrahuntur, nervi optici a suo plano, in quo existunt, inaequaliter deflectunt, & sic obiecta dupla repraesentantur.

Fibrae membranosae, etiam si eiusdem organi partes componentes sint, si inaequalem elasticitatem nactae fuerint, & animali succo extra proportionem inflentur, aliae alias violenter trahunt, quarum distractio, si earumdem parallelismum, & angulorum directionem tollat, ut supra vidimus, acutos dolores affert. Haec autem fibrarum distractio in membranosis non solum imi ventris organis, sed etiam caeterorum corporis cavitationum atque in cellulosis musculorum membranis, ipsaque cute contingit.

Ipsius cerebri fibrae diversum inter se tonum habentes inordinatos edunt motus, a quibus animalis liquidi secretio, & ad partes distributio perturbatur cum notabili naturalis oeconomiae damno. Inordinati huiusmodi fibrarum motus eadem mechanica etiam animalibus functionibus nocent, imo ipsum intellectum offendunt; naturales enim obiectorum impressiones commutando falsas ideas menti exhibent, quae in melancholicum affectum hypochondriacum ducunt.

Hypochondriaci morbi in calido & humido temperamento curatio eo dirigenda, ut amissum aequilibrium inter solida & fluida, quemadmodum inter solida & solida restituatur. Illa propterea examinanda sunt accidentia; quae peculiare aequilibrium amissum

amissum nobis patefaciant, de quibus in hac morbi aetiologia mox loquuti sumus.

Si fluidorum momentum, quod in sanguinea massa modo est supputandum, solidorum momentum superet, sanguis extrahendus illa quantitate, qua nimis repleta vasa exonerentur, & oscillatoriam vim ad fluida propellenda recuperent. Si sanguinea massa non tantum ob plethoram, quantum ob earundem partium crassitiem solidorum vi nimis resistat, praemissis venae sectionibus eiusdem crasis attenuanda, quod facile quidem etiam cum morbi profligatione assequimur; siquidem hic morbus quotiescumque a plethora, aut fluidorum crassitie oriatur, non omisiss venae sectionibus, sanguinemque attenuantibus, ac fluidiorem reddentibus remediis brevi quidem recedit.

Remedia, sanguinem attenuantia, praeter venae sectiones, quae opportunis locis, ordine, & quantitate sunt administrandae, plura quidem se se exhibent. Praemissis congruis lenientibus, syrupi violati, vel fl. persicorum, diacassiae, aut ipsa cassia sola, vel aliquo incidente sale, vel rhabar. coniuncta, pro ut de stomachi farcimine, vel peculiari eiusdem affectione certior sit medicus, alkalina & nitrata cum arcano dupl. Mynsichti, vel tart. vitriol., aut terra fol. tart. in his casibus admodum praestantia sunt, si cum sero lactis, vel saltem decoctione rad. & fol. cichor., alth. frag. pentaph. bugl. ac spirit. nit. dul. paucis guttis capiat aeger. Aquae mi-

nerales ex dulcibus, aliquando etiam acidulae multum prodesse possunt; quippe hae non solum sanguinem diluunt, ac nimiam elasticitatem, seu rarefcentiam temperant, sed etiam crassitiem incidunt, & solida stimulando eorundem elasticitatem a massa fluidorum aliquantulum oppressam excitant, & ita aequilibrium inter solida & fluida restituant.

Hac quidem methodo hypochondriaca affectio, quae a nimia plethora sanguinisque crassitie solidorum vim obruente oritur, feliciter curatur. Quae vero a solidorum elasticitate fluida praeternaturali vi propellente pendet, illis remediis, quae theoricæ superiori temperamenti calidi & sicci subiiciuntur, uti oportebit.

Si aequilibrium inter solida & solida sit remittendum, illaque auferenda sint naturalis oeconomiae damna a rupto huiusmodi aequilibrio pendencia, e. g. si imi ventris viscerum infarctus, praepeditas secretiones, praesertim bilis crassioris, ventriculi & intestinorum vasa a sanguine regrediente turgida, atque glandulas heterogeneis crudisque succis repletas solvere necesse sit; rhabar. tincturae cum sale tart., aut parum ammoniaci extractae optime proficient, eoque melius, si aliquod diluens, aut aperiens temperatum iisdem post aliquantulum temporis superbibatur; quo mediante diluente etiam pilulae tart. Schroederi, Becherianae, Stahlinae & quandoque ammoniacales prodesse possunt.

Admira-

Admirabiliores tamen effectus in abdominis viscerum infarctibus saepe observavi ex quarundam pilularum usu, quarum compositio in sapone nostrate, rhab. & tartar. vitriol. parum essentiae juniperi aromatizatis & syrupo aperitivo ad subigendam massam tantummodo consistit. Equidem sapo salino-oleosis suis partibus obstructa viscerum vascula facile penetrat, stagnantes succos diluit, attenuatque, atque rhab. tart. vitriolato coniunctus oscillatoriam vasculorum vim sopitam excitat, ut ipsi stagnantes succi propellantur, & amissum motum recuperent. Soluta forcimine abstersisque viscerum canalibus aquae acidulae, si-ve ex nostratibus cuique iam notae, si-ve quae citra montes ad nos ferri solent, ut aegranae, erunt opportunae, aliaeque huius generis, quas Germanici auctores, inter quos Hoffmannus, commendant.

Pediluvia praesertim in ipsis paroxysmis hypochondriacis saepe conferentia experimur; balnea pariter aquae dulcis, admodum praestantia, siquidem in humido illorum tepore crispatae fibrae laxantur, non solum externae cutaneae & musculosae, sed etiam internae, seu viscerum membranosorum, quae cum prioribus valde consentientes per huiusmodi consensum aliquam mollitiem & laxitatem consequi debent; nam per absorbentia vasa humidae particulae intus advectae spasmodicas viscerum crispationes leniunt, quibus addenda auctae perspirationis utilitas, quam ipse

Sanctorius in huiusmodi morbis v. l. de extollit, his verbis (a) *Hypochondriaci si frequentibus balneis eorum corpora reddantur perspirabilia, & victu humido utantur, sani fiunt.*

Praeterea peractis venae sectionibus, quae nimiam vasorum depletionem tollant, si-ve in brachio, si-ve in pede, si-ve ut plerumque fit, in utraque parte, haemorrhoidales venae hirudinum ope aperiendae sunt; hae namque non solum imi ventris vasa notabili fluidi crassioris lentescens onere distensa levant, sed etiam intestinalium praecipue fibrarum oscillatorii motus perturbationes, quae a praedicta distensione membranas lacescente, aut ab ipsis fluidis quocumque modo irritantibus oriuntur, compescunt.

Si ruptum aequilibrium inter solida & solida in specifica solidi nervei praeter modum aucta vi vasa coarctante consistat, vel in diverso nervearum propaginum ac fibrarum membranosarum tono & elasticitate, quae ipsae inaequaliter agentes oscillatorii motus harmoniam tollunt, quod plerumque evenit; praeter modo descripta etiam antispasmodica ac sedantia remedia ac tandem nervalia & temperate corroborantia erunt necessaria, cuius generis sunt pulveres absorbentes Wedelii, Hanoverianae, & quaecumque alia specifica cinnabarina, succinata nitroque commixta. Inter sedantia quaedam ex simplicibus non infimum locum tenent, veluti cortex cascarillae, feri Americanum, Ch. Chinac,

(a) *Aphor. Cap. II.*

Chinae, cuius quidem salubres effectus in convulsivis praesertim periodicis, affectionibus plerumque observavi. In simplici tamen hypochondriaca affectione adeo felices eventus observare nondum potui; verum de hac infra aliquid dicendum erit.

Ad somnum comparandum & ad ipsius morbi accidentia non nihil sedanda opiatas uti necesse est, quae cum camphora & nitro, vel aliqua antispasmodica confectione coniungere expedit; ex opii vero praeparationibus in his casibus laudanum hystricum de le Febur praefendum esse existimo.

Si contumax fuerit affectio, ac praedictis remediis resistat, ad nervalia, sive temperate corroborantia confugiendum erit, veluti ad liquorem anodynum mineralem ab ipso Hoffmanno in morbis hypochondriacis admodum commendatum (a), vel

ad tincturam martis pomatam, quibus superbibendum praecipio serum lactis cum aperientibus herbis destillatum, e.g. radicibus fumariae, ononidis, saponariae, fol. agrimoniae, pentaphilon, melissae, cochleariae, vel si maior sit temperandi, quam aperiendi necessitas, aliud destillatum cum praedictis liquoribus praescribere soleo, cuius compositio est: Cor. C. rasp. unc. iv., aquae font. lib. xx. M. F. infus. in olla vitreata & diligenter cooperta per noctem, lentoque igne digeratur, postea mane igne carbon. ebull. per horas vi, addendo, sem. pepon. citrulli, cucum. an. unc. i. papav. alb. unc. sem. Postea colentur cum forti express. Colatura reponatur in vitreo urinali una cum lactis vacc. vel capr. lib. viii, aquae fl. aur. lib. i. fl. borag. bugl. nymph. an. m. i. Destilla in B. M. s. a. & servetur ad usum. Dos. lib. i. mane & sero.

C A P V T III.

De affectione hypochondriaca frigida & sicca.

Tertia huius morbi species erit frigida & sicca, seu quae in temperamento frigido & sicco, vel melancholico contingit. Qui autem huiusmodi temperamentum nacti sunt, saepe numero levique accedente causa hypochondriaci fiunt; nam cum eorumdem solidorum structura durior sit, parumque flexibilis, atque ele-

mentares particulae fibras componentes forti glutine sibi ipsis invicem adhaereant (b), fluidorum momentum maiorem resistantiam invenit, vasa parum dilatantur, & quae paulo crassius liquidum transicere deberent, subtiliori tantum capacia sunt. E. g. extremae sanguinis arteriolae, quae sanguineos globulos saltem singulos in

(a) Cap. VI de Malo Hypoch. p. 106. T. I. Morbi fibrae solidae simpl.

(b) Schreib. ibid. van Swieten Comment. T t

in alio corporis habitu transvehere solent, in hoc temperamento frigido & sicco serosis tantummodo transitum dabunt, quae vero serosos transvehere solent, lymphaticos tantum admittere poterunt; muscularium quoque membranarum cellulae fibris utpote rigidioribus constructae ad pinguedinosam substantiam recipiendam parum extenduntur, idcirco deficiente pinguedinoso succo, ac imminuta naturali lymphae quantitate gracilescunt muscoli, corporisque habitus siccior evadit.

Sanguinis praeterea textura crassior, ac rubrorum globulorum quantitas cum serosis comparata habet rationem maioris inaequalitatis, quam in sanguine mediocriter tenui & justam molecularum proportionem, quippe eadem moleculae angustum rigidumque arteriolarum praelum subeuntes in crassiores globulos facilius coagmentantur, ideoque serosarum & lymphaticarum molecularum ratio minuitur; insuper lente progrediente sanguine eiusdem moleculae rotundam figuram aegre acquirunt, quare maiorem in data ratione molis superficiem habentes, vel saltem maiori punctorum numero vasorum parietes perfricantes, circulatorium motum tardiores reddunt. Hinc viscosiores factae in minimis viscerum canaliculis facile haerent, ac secretiones impediunt; biliosus succus crassior & exiguis suis muneribus satisfacere nequit, nec chyli a faecibus separationem promovere, nec intestina lubricare, ut alvus suo tempore exoneretur.

Fibrae etiam solida componentes rigidiores parumque flexibiles, parum quoque elasticae sunt, earumque oscillationes breves & concisae; arteriarum ictus, seu constrictio, ex qua fluida impulsum accipiunt, brevis quoque & concisa. Nam juxta corporum elasticorum leges dilatationi respondet constrictio, propterea minori momento eadem fluida propelluntur. Siquidem momentum corporis moti cum ex massa in celeritatem resultet, pro massa contractilis solidorum vis supputanda, pro celeritate vero spatium, quod arteria oscillando describit, quod cum sit brevius, minus quoque erit momentum, quod ipsa arteria in fluidum exercet, ex qua maior eiusdem motus progressivi lentescencia, aliaque accidentia oriuntur, de quibus superioribus propositionibus egimus, & quae mox infra attingemus.

Praedictam fibrarum duritiem ac rigiditatem oscillationum brevis ac minor solidarum partium calor consequuntur, quia eadem fibrae minus spatium in suis oscillationibus describentes, supra se ipsas motae minorem attritum patiuntur, a quo idem calor excitatur, ipsaeque arteriae cum parum dilatentur, minori vi in solidas partes nituntur, cui aequalis solidarum partium renisus succedit, ideoque non nisi levis fit corporis calor eoque magis levis, quo & ipse sanguis lentiori motu progreditur, ac minus elasticis moleculis constat. Lentae quoque sunt liquidorum separationes, proinde & animalis spiritus, qui

qui non solum ob tardum sanguinis motum, sed etiam ob datam ipsius molecularum naturam difficiliter extricatur, ad corporea organa non nisi modica quantitate fluere potest, quare sic affecti homines in actionibus obeundis tardi sunt, in suis deliberationibus cunctantes atque cogitabundi, aegre rident, ac raro & nisi ex violenta causa irascuntur. Et haec sunt frigidi & ficci sive melancholici temperamenti affectiones, quae ad hypochondriacum morbum maxime disponunt.

Etenim cum in transitu ab adolescentia ad juventutem, eoque magis a juventute ad virilitatem fibrarum tonus gradatim fortior evadat, in huiusmodi temperamento affectis magnam duritiem ac rigiditatem acquirunt fibrae, ac si solidorum supra fluida ratio ineunte aetate in omnibus quotidie augeat, ut alibi demonstravimus (a); in his sane multo maior habetur.

Non raro itaque evenit, ut partibus nerveis & membranosis nutritio succo, sive lympa non aequaliter destitutis, earundem fibrae diversum flexibilitatis gradum assequantur, ex quo sphaeroidales machinae, vel potius cylindricae fibrillae (juxta Albertum Haller, qui (b) sphaeroidales vesiculas anatomicae veritati repugnare contendit,) quibus constant, animali liquido inaequaliter inflantur, ac diversam proinde elasticitatem & contrahendi vim iisdem fibris communicant.

Quapropter in membranosis abdominis visceribus quaedam fibrae rigescunt, ac non solum proprium motum amittunt, sed aliarum quoque antagonistarum contractioni resistunt ita, ut in quibusdam praedictorum viscerum regionibus peristalticus motus prorsus suspendatur. Ventriculi nempe fibrae hic illic rigescentes, aliarum contrariae directionis actionem, & motum impediunt, ac eiusdem visceris officium interturbant, nec ingestorum pondus, aut stimulus contractas & immobiles fibras proritando ad motum excitare valent, sed quandoque in spasmodicas violentasque contractiones easdem inducunt, a quibus vehementer, & inconcinne distracta nervea tunica, acutos stomachi dolores experiuntur hypochondriaci, atque vel occluso saepe ex hisce contractionibus inferiori ventriculi orificio regredientia alimenta per superiora erumpunt, vel interdum superiori, ac eorundem alimentorum in ipsum ventriculum descensus interceptitur, vel saltem retardatur, ex quo non raro ipsa alimenta vix deglutita per vomitum reverti coguntur.

Hae fibrarum spasmodicae rigescentiae etiam in intestinis saevientes expulsivum eorundem motum interrumpunt, & chyli separationem a faecibus tardiores reddunt, aereae quoque molecule in diuturna mora ab alimentorum massa copiosiores extricantur, flatusque cum forti ventris murmure pariunt, qui in illis intestinorum partibus, in quibus minor fi-

T t 2

brarum

(a) *Tract. de Febr. Par. I.* (b) *Primae Lineae Physiol.*

brarum contractio habetur, suum elaterem exercent, ex quo molestae & quandoque protuberantes tensiones hinc inde in abdomine exsurgunt, tamdiu perdurantes, quamdiu eadem fibrae vehementer distensae propriam elasticitatem recuperent, & ad validas contractiones provocentur. Praeterea inferiores fibrae, quae spasmodice contractae tubum intestinale adeo perstringunt, ut aeri ipsi transitum prohibeant, cum aliquantulum laxentur, tunc aer superius coagmentatus ad inferiora cum impetu detruditur, qui ex latiori loco in angustiorē migrans sonoris borborygmis percipitur.

Aliquando perdurantibus spasmodicis crispationibus intestinale tubum infra tensionem coarctantibus flatibus & halituosi vapores ab inverso motu peristaltico sursum pelluntur; hi vero, aut in ventriculum penetrant, aut a coarctatis pylori fibris, quae una cum duplicatura tunicae nerveae & villosae (a) singularem valvulam formant, rursus repelluntur. In primo casu, nisi superiori orificio iisdem nitentibus aperto per eructationes eiciantur, ventriculi magna distensio fit, quae diaphragmatis descensum remoratur, a quo difficilis respiratio; si autem ipsius ventriculi orificia aliquamdiu perstricta maneant, ac flatulenti vapores exitum non inveniunt; eo magis rarefcentes eidem ventriculo maiorem molestiam afferunt, cardialgicos nempe affectus, ac vehementem praecordiorum anxie-

tatem gignunt. In secundo casu enorines intestinorum tenuium, duodeni praesertim & jejunii inflationes incessanti murmure, acutisque doloribus hypochondriacum torquent.

Porro notandum eandem flatulentam materiam ob praedictam fibrarum duritiem & immobilitatem in intestino colon diutius retineri, ubi cum maiorem acrimoniam adeptā fuerit, nerveam tunicam vellicando spasmodice constringit, & alicubi ipsum colon claudens sibi exitum intercludit. Haec itaque cum neque inferius per alvum, neque sursum per ilei orificium exire possit (nam ob valvulam idem orificium coarctantem, faecumque regressum impedientem, quotiescumque etiam si levis accedat orbicularium fibrarum eiusdem orificii earumque productionum, quas celeberrimus Morgagni habenas valvulae appellat, crispatura, eiusdem flatulentae materiae adscensus prohibetur, eoque magis, quā ilei intestini insertio coli axem transverse respicit, & pene ad angulos rectos secat) ipsa inquam materia flatulenta intra ipsius coli flexuras detenta rarefcit, eiusque tunicas vehementer distendit, ut animadvertit Hoffmannus (b), quibus flexuris & renum, sive lumborum cohaesionibus, praecipue sinistro illam inflationem imputat, quae in sinistro hypochondrio lienis tumorem repraesentat. Ibi enim, ubi rursus in varias flexiones literam S. repraesentantes contorquetur idem colon (c), notabilem sui diametri partem

(a) Winsl. expos. Anat. (b) Cap. VI. de malo hypoch. (c) Winsl. ibid.

tem amittit, illius nempe diametri, qui in arcu inter lumbares regiones posito magnus invenitur, ideoque spasmodicis supervenientibus crispationibus facile coarctantur, ita, ut flatulentae materiae descensum non permittat.

Eadem mechanica lumborum dolores nephriticos mentientes oriuntur, qui etiam cum vomitu aggrediuntur, non solum ex mutuo plexuum nervorum abdominis consensu, verum etiam ob validam compressionem, quam coli arcus praeter modum inflatus supra ventriculi convexitatem, cui adhaeret, exercet.

Circa huius flatulentae materiae interclusionem rursus notandum; cum haec multo levior sit, quam faeculenta, descendentes faeces ratione aequilibrum flatulentam materiam sursum pellunt, quae per se considerata, cum eiusdem circiter specificae gravitatis sit ac aer externus, imo ratione interni viscerum caloris, intra quae hospitatur, proinde & rarefactionis hoc ipso aliquanto levior, nisi ab elastica intestinalium fibrarum vi alternatim agente, & a diaphragmatis, musculorumque imi ventris valida compressione eliminaretur, intra intestinalem tubum perpetuo maneret, quod in sicca tantum tympanitide evenit.

Huiusmodi fibrarum rigiditas, & durities, quae oscillatorium intestinorum & ventriculi motum suspendit, non solum digestionem officit, molestosque flatus gignit, sed etiam progressivum fluidorum motum admodum retardat, quippe ut supra in-

nuimus, fluida in harum partium vasis contenta a cordis momento remotiora sunt, nec eiusdem progressio a musculorum actione, sicuti in artubus ac in extrinseco corporis habitu adjuvatur. Peristaltico igitur motu valde indiget, quo interrupto, necessario impulsu destituuntur fluida, ac remorantur.

Per ramos itaque venae portae minor sanguinis quantitas pro bilioso succo ad hepar traducitur, quae ob expositas causas crassioris consistentiae esse debet, idcirco nimis parca succi biliosi portio perficitur, ac secernitur, sine qua digestio impleri nequit. Insuper cum materia succi biliosi intra cruoris massam aliquamdiu detenta aliorum liquidorum proportionem superet, subflavo, vel terreo obscuroque colore cutem tingit, ac si succi biliosi stagnatio in secretoriis hepatis tubulis fiat, cum bilis materia pene secreta ipsius bilis naturam proxime affecuta fuerit, flavus color per universa cutis vascula transparet, qui ictericum morbum hypochondriacae affectioni jungit.

Haec & alia multa symptomata, de quibus jam in superioribus capitulis & propositionibus verba fecimus, a melancholica corporis constitutione, seu fibrae duritiae pendentia, circa ventris viscera utpote membranosa & musculosa saevire solent.

Ab eodem quoque vitio nervorum systema nequaquam immune ire comperimus, eo quod non ubique aequalis sit nervearum fibrarum durities; siquidem vel ob naturalem particula-

rum cohaesionem hinc, illinc magis strictam, vel ob lymphaticae substantiae nervos irrigantis inopiam, inaequalis fit animalium liquidorum distributio, proinde & diversa nervearum fibrarum vis & actio, cuius effectum, non solum in abdominis, sed etiam in thoracis nervorum plexibus (utrique enim intercostalis & vagi soboles sunt) experiuntur hypochondriaci; quippe cardiaci e. g. plexus, quorum fibris quaedam sufficienti animalis liquidi quantitate inflantur, aliae nisi tenui, nec eadem celeritate idem liquidum recipere possunt, haud synchrona, sed dissonanti actione commovent, cuius effectus sunt ipsius cordis spasmodicae affectiones, quae angustiiis & palpitationibus percipiuntur, ipsaeque vasa sanguinem a corde recipientia praeter modum coarctata ab eiusdem sanguinis impulsu non satis dilatantur, ideoque retardato progressivo eiusdem motu, vis cordis propulsiva maiorem resistantiam patitur, atque pulmones ab aucto pondere opprimuntur.

Vertebrales & dorsales nervi, qui per pleuram, & intercostales musculos distribuuntur, cum eiusdem vitii sint participes, iisdem quoque inconcinnis actionibus, ac fortibus contractionibus subiacent: a quibus, si minus pleura, saltem muscoli intercostales hinc illinc violentis crispationibus & distractionibus afficiuntur, & costarum motus aliquantulum intercipitur; unde acuti saepe dolores in

thoracis regione ac inspirandi difficultates insurgunt.

Interrupto oscillatorio membranosi & nervosi systematis motu, vel ablata eiusdem harmonia dolent hypochondriaci, ac de plurimis gravibusque malis conqueruntur, valde moerent, ac proprium morbum tamquam lethalem mente concipiunt; siquidem natura de harmonico partium organicarum motu gaudet, ut alibi demonstravimus (a), qui nostra sensoria leviter percellit, ac si prius irritata, mulcet & ad nostri corporis conservationem tendit; E contra in dissonanti partium motu contristatur, quippe dissonans sensoria nostra inaequaliter ferit, eorumque laesionem portendere videtur. Equidem motus oscillatorius harmonicus fluida, quaecumque sint, ad progressivum motum allicit; in solidorum vero & fluidorum motu placido, nec interrupto, perfecta salus collocatur. Dissonans autem motus solidorum oscillatorius progressivo fluidorum motui obstat, ac si minus in vasis maioribus, nempe sanguiferis, certe tamen in minimis etiam eiusdem generis, sanguinem circumstantem aliquantulum saepe remoratur, ac liquidorum praecipue per lymphatica vasa nerveosque tubulos excurrentium liberum & aequabilem influxum impedit, varii generis molestiis animam afficit atque perturbat.

Praedictum solidorum vitium, seu rigidus fibrarum tonus ad nervorum quoque radices totumque cerebrum exten-

(a) Propos. IV. huius.

extenditur, ideoque secretorii substantiae medullaris tubuli se parum dilatantes non nisi paucam animalium spirituum quantitatem admittunt, etiam in faustis jucundisque casibus in quibus copiosior spirituum secretio in aliis temperamentis fieri solet, tum ob solidorum & fluidorum motum non nihil acceleratum, tum ob fibrarum tonum flexibiliorum, quibus mediantibus maior spirituum materia cerebrum petit, maiorque eorumdem quantitas a substantiae medullaris tubulis recipitur, quae ad vitalia & animalia organa descendit, eorumque elasticitatem auget, unde laetitiae effectus percipit anima, qui etiam externe apparent, tum in vividiori placidoque oculorum motu, tum in ridente vultu & corpore in actionibus obeundis agiliori; Hi vero effectus in melancholico temperamento ob adductum mechanismum valde obscuri sunt, ac nostris oculis vix manifestantur.

Interdum vero vel medullares cerebri fibrae adeo tenduntur, ut a mutationibus, quae in peculiaribus sensoriiis ab externis causis fiunt, parum commoventur, ideoque mens vix percipit obiecta, quae sub ipsis sensoriiis cadunt, quod pene stupidum hypochondriacum reddit; vel ita vitatur earundem fibrarum tonus, ut ad peculiare quaedam oscillationes & motus assidue flectantur ipsae fibrae ita, ut mens ad illa tantum obiecta intendatur, quorum imagines ex datis fibrarum flexionibus & oscillationibus eidem repraesentantur; & hic est casus hypochondriaci, qui ad melan-

choliā tendit, cuius ideae semper lugubres & ferales esse solent, nec alia obiecta, sive jucunda, sive indifferencia hypochondriaco-melancholicum a funestis cogitationibus removere possunt. Nam haec obiecta, ut imprimantur, medullarium fibrarum flexiones & motiones excitare debent pene oppositas, vel saltem multum diversas ab illis, ad quas morbosa & praeternaturalis affectio easdem fibras induxit.

Curatoriae hypochondriaci morbi frigidi, & sicci indicationes ab exposito mechanismo eruendae, sunt quidem: Corpus humectandi & fluidorum massam praecipue albam & lymphaticam augendi, qua mediante eorumdem fluidorum momentum solidorum vi contractili magis resistat, ac vasorum tonus aliquantulum laxetur, ut fluidorum nisui eadem vasa cedant, ac dilatentur, & nerveae ac membranosae fibrae naturalem flexibilitatem acquirant, ex qua animales spiritus aequabili motu & aequali distributione per propria organa excurrant; & sic oscillatorius organicarum partium motus vividior & harmonicus fiat.

Si ab externis auxiliis exordiamur: inunctiones universales, aut particulares imo ventri, aut pectori, aut etiam ipsi capiti, si vitiosa tensio praesertim cum dolore, aliquam praedictarum regionum occupet, admodum conferunt; fomenta vero & eo magis balnea aquae tum dulcis, tum quarundam mineralium, inter quae nostris in regionibus balnea Abani dicta praestant.

praestantiora esse dignoscuntur. Clysteres quoque frequentes in alvi stypticitatibus ex carminativis, sed humectantibus temperati, decoctionibus scilicet fol. rutae, verbasci, fl. chamaemeli, sambuci, sem. foeniculi, cumini, ol. sem. lini, anethi addito melle ros. solut., vel saccharo rubro valde profunt.

Venae sectio in hac quoque affectione plerumque non est omittenda. Sanguis enim, nisi in quantitate vitiosum erit, quae eiusdem extractionem prorsus requirit. Vitiosa nempe qualitas in nimia densitate consistit, in qua globulorum rubrorum quantitas cum serosis & lymphaticis comparata iustam proportionem excedit, eorumque textura durior atque tenax, quae a viscosioribus asperisque feri moleculis resultat; idcirco, ut sanguinis massa fluidior reddatur, eiusque moleculae sphaeroideam figuram facilius recuperent, ipsius sanguinis motus accelerandus, quod mediante venae sectione melius assequimur, praesertim si aliquid melancholici affectus initium exploretur, in quo casu post venae sectionem semel, aut bis peractam hirudinum ad haemorrhoidalia vasa applicatio admodum prodesse solet.

Quoad interna remedia, oleosa in primis sese offerunt, oleum nempe amygdalarum dulc., vel sem. lini, nisi hoc a stomacho recusetur, quorum alterutrum prima vice ad quinque, vel sex uncias propinandum, postea singulis diebus ad duas, vel tres tantum uncias cum jure simplici, vel de-

coct. fl. chamaemeli, aut alterius blandi carminativi per plures vices repetendum. Quod si notabile stomachi farciimen detegatur, leniens ex purgantibus oleo est praemittendum, at si hoc non appareat, post oleum exhibendum. Lenientia eiusdem pene generis esse debent ac illa, quae in superioribus capitibus indicavimus, cassia scilicet cum rhab., quae alternis diebus ad tres, vel quatuor, aut plures vices sumenda, deinde ipsius rhab. tinctura cum sale tartari, vel parum ammoniaci in nodulo positi extracta, cuius menstruum sit decoctio agrimoniae, fumariae, capil. ven. radic. eryngii, asparagi, rusci, aliorumque aperientium, sed temperatorum simplicium, ne forte cum pene sopitam fibrarum oscillationem suscitare velimus, earundem tensionem, aut spasmodicam contractionem provocemus, & sic fibrarum oscillatio eo magis intercipiatur. Si abdominis viscerum, seu venae portae vasorum, sive quae ad hepar bilis materiam ducunt, sive quae in hepate eandem recipiant, obstructio pateat, praeter dictam rhab. tincturam, cuius menstruum decoctio esse potest rad. & fol. chelidoniae, & saponariae, opportunum erit illas adhibere pilulas, quas superiori capite commendavimus, nempe ex sapone veneto, rhab., & tart. vitriol. pauca essentia juniperi aromatizatas. Pilulae aloeticae multa cum circumspectione praescribendae, praesertim, quae cum gummate ammoniaco & tartaro parantur, quas primo capite

enume,

enumeravimus. Magis vero congruentes erunt Beccherianae & Stahlianæ, quibus tamen aliquod diluens superbibere expedit; cavere enim semper debet medicus, ne medicamentis proritantibus fibra nimis sicca spasmodice afficiatur, & ita morbus eo magis exacerbetur.

Deobstructis vasis, ac deterfis acruditatibus infarctu cavitatibus, eorumque glandulis, sedantia, antispasmodica & paregorica remedia meliori effectu adhibentur; sedantia & paregorica in vehementibus, aut perturbationibus insultibus dolorum, tensionum & aliis spasmodicis symptomatibus, nec non vigiliis, nempe pilulæ de cynoglossa cum nitro & camphora, vel laudanum nepentes cum succino, aut aliis confectionibus vulgaribus etiam obstetricibus iam notis, vel laudanum hystericum, valde utilia esse quotidiana praxis nos docet. Ex antispasmodicis nitrata, succinata, & cinnabarina, pulvis Hannoveriana, Marchionis & aliae, quæ in aquis specificis poeoniae, fl. tiliae, calendulae, ceraforum nigr. &c. solvantur, sunt eligenda, sed in solis antispasmodicis minime acquiescendum, quippe absque artis ignominia fateri debemus antispasmodicorum remedium actionem aliquantum incertam esse, atque cum sudoriferis comparari posse, quorum effectus plusquam saepe nos fallunt, ideoque antispasmodica cum anodynis, seu lenibus paregoricis jungere soleo, praecipue ubi magna habetur fibrarum tensio, quam in huiusmodi temperamentis

procul dubio adesse censendum est. Nam ex paregoricorum vi fibrae tonum laxari, ex quotidianis observationibus certi sumus. Chalybeata, nisi liquida forma, copioso temperatoque diluente exhibita, hic locum non habent, verum ab humectantibus ac leviter incrassantibus, seu nutritivis fortius auxilium est petendum, quæ tamen cum aliquo alterante parari oportet; Lac e. g. caprillum, vel asininum cum decoctione rad. chinae, vel potius fumariae & cochleariae mixtum & ebullitum; hæc enim alterantia suis salibus fibras lacte humectatas blande proritant, & ad oscillatorium motum disponunt; hoc autem mane & sero est capiendum. Quod si palatum, aut stomachus lac recusset, decocta in eundem scopum collimantia substituenda sunt, videlicet ex carne vitulina, ranarum, caudarum & chelium cancerorum fluviatilium, hordeo & avena Hannoveriana, additis in fine ebullitionis, fumarina, & cochlearia, vel praemissis ante decocti haustum eiusdem extractis ad scrup. ii. aut drachm. i. circiter cum arcano dupl. Mynsicht. ad scrup. i.

Destillatum ab illo, quod capite superiori exposuimus non multum dissimile, quodque a D. Carolo Costancio medico praestantissimo olim accepi, hic admodum convenit, hoc est Corn. C. raspati unc. iv. aquae font. lib. xx. M. F. infus. in olla vitreata & diligenter cooperta per noctem, lentoque igne digeratur, postea ebulliant igne carbonum per horas vi., adde carnem duarum testudinum aqua ferventi

ferventi extinctarum minutim incisarum, & unius gallinae junioris offibus expoliatae, quae omnia ebulliant ad perfectam earundem consumationem, colet. deinde cum forti expressione, & colatura reponatur in vitreo urinali, una cum libris viii lactis vaccini, rursus addendo, aquae fl. aurant. lib. i., fl. borraginis, buglossae, fol. cochleariae, nasturcii aquat. an. man. sem. destillentur in B. M. f. a., & servetur ad usum, cuius dosis unc. x.

Verno tempore viperinum jus circulatum simplex aut ex radic. falsae-par. & chinae, ipsaque cochlearia compositum non est omittendum; aestivo vero ptisanæ cum pullo campestri paratae proficuae quidem sunt.

Aquae minerales acidulae, nisi leniores, seu minus mordicantes sint, noxiae erunt, & eo magis, quia in huiusmodi temperamentis plerumque difficillime excernuntur. Nam ob vitiosam fibrae tensionem organicae partes aquarum stimulo ac pondere non ad motum oscillatorium ad easdem aquas expellendas necessarium concitantur, sed maiores contractio-

nes urinarios meatus coangustantes ineunt, per quos non nisi pauca aquae quantitas ex repetitis circulationibus sanguineo sero, vel naturali urina commixta traici potest.

Medendi methodo etiam victus erit unisonus. Quare humectantibus alimentis uti necesse erit, elixis carnibus potius, quam assis, offis, seu pulvis ex avena Hannoveriana, hordeolo, vel eiusdem extracto, aut farina paratis. Lactea diaeta, seu semidiaeta, in qua loco prandii & coenae ipsa ossa absque carnibus exhibetur, curatorii indicationibus mirum in modum satisfacit.

Inter hypochondriaci morbi species hanc quidem curatu difficiliorem experientia & ratio nobis ostendunt, quippe ab illa solidorum vitiosa constitutione oritur, quae etiam fortibus medicinae auxiliis resistit. Fibrarum enim tensio & durities, quae a partium elementarium stricta cohaesione pendet, admodum difficulter laxatur, quod nisi humidae substantiae interpolatione assequi non possumus.

C A P V T IV.

De affectione hypochondriaca frigida & humida.

Erit itaque hypochondriaca affectio quarti generis, juxta ordinem a nobis susceptum, quae in frigido & humido temperamento contingit; hoc autem calido & sicco directe opponitur.

Elementares fibrarum particulae laxiori nexu inter se cohaerent, ac nimis flexibilem earundem tonum efficiunt, nec flexioni respondet resiliatio. Fluida per organa vitalia excurrentia minorem resistantiam inveniunt,

unt, sed parum elastica eorundem vi minus propelluntur. Sanguis a corde pulsus in arterias nitens easdem facile dilatat; dilatationi tamen inaequalis, vel saltem magis lenta succedit constrictio, ex qua sanguis minori momento repercutitur, & circularem motum tardius absolvit; quapropter ob minorem celeritatem atque impetum, quo sanguineae molecule colliduntur & in latera arteriarum incidunt, inferior caloris gradus habetur.

Arteriarum fibrae in dilatatione & contractione leviter supra se ipsas motae leviolem quoque attritum exercent, proinde minus intensum calorem producant. Solidarum autem partium attritus, quem motus oscillatorius necessarius parit, non solum a languida fibrarum contractili parumque elastica vi pendet, sed etiam ab humidae substantiae interpositione, ob quam eadem fibrae leviolem contactum & affrictionem patiuntur. Praeterea calor ab aquosa & serosa substantia in fluidorum massa praevalente magis compescitur, & suffocatur.

Praevalet aquosa & serosa substantia in fluidorum massa ob nimis laxum fibrarum tonum, & contractilem solidorum vim nimis imbecilem (a). Siquidem plurimae ex serosis moleculis, quae per minimas arteriolas transeunt in rubros globulos compingi deberent, deficiente earundem arteriolarum contractili vi,

a qua subiguntur, laxe coeunt, & cito solvuntur; ideoque serosarum molecularum ratio cum rubris globulis comparata iustam proportionem excedit. Eandem ob causam etiam lymphatica substantia abundare solet, quippe eiusdem molecule difficilius in serosas coagmentantur. Muscularium membranarum cellulae atque omenti, eiusque adiposi ductus, qui iuxta Heisterum lateralia arteriolarum sanguiferarum vasa sunt (b), cum valde dilatabiles sint, copiosiore quoque adiposam materiam secernunt, ac servant, ad cuius multiplicationem tardior fluidorum motus, eorumque levior attritus apprime conspirant.

Hae solidorum & fluidorum affectiones frigidum & humidum temperamentum efficientes ad hypochondriacum morbum ducere saepe valent. Ratione fluidorum tunc cum sanguis heterogeneis rudibusque particulis repletur, quae in membranosis imi ventris visceribus decumbentes eorundem nerveas fibrillas proritant, & ad vehementem ac perturbatum motum oscillatorium easdem inducunt. Rudibus particulis repletur sanguis, quia chylifera materia ad eundem quotidie delata, cum leve praeculum subeat, difficulter conteritur, ac globulorum sanguineorum naturam tarde acquirit; angulosae scilicet, sive irregularis figurae molecule a sanguine receptae, deinde a minimis arteriolis traiectae, in quibus sphaeroideam

Uu 2

roideam

(a) *Van Swieten Com. T. I. Morbi fibrae debil. & laxae.* (b) *Compend. Anat. de Omento.*

roideam figuram diametro vasorum, & sanguineis globulis analogam induere deberent; leviter subiguntur, & in circulari earundem compressione, utpote debili, ipsarum molecularum anguli tarde, ac nisi circulationibus & traiectionibus multoties repetitis satis complanantur.

Hae rudes particulae nondum laevigatam superficiem habentes, ob maiorem contactum in arteriolarum conis saepe haerent, saepius tamen in illis vasculis, in quibus ob remotam a vi cordis propellente distantiam fluida lente progrediuntur, veluti in extremis ramulis arteriae coeliacae, aut mesentericae cum ramulis venae portae communicantibus.

In primis, seu coeliacae ramulis, qui ventriculo prospiciunt, cum lentescant ipsae particulae, liquida in iisdem circulantia aliquantulum remorantur, vasorumque diametri ita dilatantur, ut praeternaturalem ventriculi fibrarum distractionem & compressionem pariant, quae molestam ipsius stomachi sensationem, anxietatem, & cardialgiam affert.

Ex data liquidorum mora & regressu maior gastrici succi, seu salivae analogi copia laterales canaliculos subit, ac vel per villosam tunicam (a) in ventriculi cavitatem destillatur, eamque pene inundat, quae languore quodam stomachum afficit, sed quia talis succus in ventriculi cavitate aliquandiu detinetur, & quia ante secretionem in vasculis moram traxerit,

exaltatis viscerum calore eiusdem salibus, ac lymphatico-oleosis particulis dissipatis aciditatem quamdam & acrimoniam contrahit, quae per ructum e stomacho ascendens fauces mordicat, & salivam inficit, vel ob nimiam crassitiem asperamque suarum partium superficiem in ipsis secretoriis vasculis stagnat idem succus, ipsaque vasa, non solum infarcit, sed etiam, aut stimulo & vellicatione nervaeam tunicam feriens dolores & vomitus, vel ipondere ac distensione anorexiam, seu cibi fastidium & repletionis sensum parit.

In mesentericae quoque extremis ramulis, qui intestinalem tubum perreptant, & qui cum venae portae radicibus communia habent oscula, stagnant praedicti succi molecule, & fluidorum progressui aliquantum resistunt ita, ut quaedam eorundem pars, quae venam portae tenderet, a suo itinere deflectere cogatur, & vel per tunicae villosae porulos subtilissimas eiusdem papillas, seu villos penetrantes (b), quae arteriolarum exhalantium extrema sunt oscula (c), in intestinorum cavitatem effluit, & alvi excretionem copiosiore reddat, vel ob praedictam crassitiem in exhalantes arteriolas violenter intrusae ipsae molecule eorundem vasculorum diametrum obstruant, & sic imprimis alvi siccitas generatur, deinde aucto infarctu, pondere, ac distensione vasorum, molestia afficiuntur intestinorum tunicae, ac peristalticus eorum-

(a) Albert. Haller. *Lineae Physiolog.*
Haller. *Lineae Physiol. Intest. tenuia.*

(b) Winslov. *expos. Anat.* (c) Albert.

eorundem motus perturbatur, postea ex angulosa & aspera molecularum figura irritatis nerveis fibrillis, violentae contractiones hinc illinc insurgunt, quibus intestinalis tubus absque ordine coarctatur, ac fibrae nerveae a se invicem distrahuntur, non sine acutis torminibus, & flatulentae materiae, quae ab alimentis in stomacho male attritis, aut ab ipsis crudis humoribus, de quibus loquimur, in intestinorum cavo tandem eructatis oriuntur, ab iisdem coarctationibus interceptae exaltantur, atque rarescunt, ac ventris intumescencias & rugitus pariunt, quae phaenomena alibi iam attigimus.

Sanguis quoque, qui ab earundem arteriarum ramulis per venae portae radices cum ipsis communicantes ad hepar vehitur, utpote crudis particulis refertus, biliosum succum coinquinat, qui oleosis & salino-volatilibus particulis pene destitutus, crudisque & phlegmaticis scatens, nec chyli a faecibus separationem, nec eiusdem solutionem, aliaque oeconomiae animalis munera implere potest.

Praeter quam quod bilis materia eo viscosioribus particulis minusque volatilibus repletur, quo leviores impulsus accepit non solum in illa parte venae, quae a ventris visceribus extra hepar trahit radices, veluti ventriculo & intestinis (nam ex data fibrarum atonia, ac intercepto peristaltico motu propellens vis, quae in alterna & successiva fibrarum vasa contrahentium actione consistit, deficit,

vel saltem imbecillior est,) sed in illa quoque, quae hepar ingreditur, & per eiusdem parenchyma distribuitur, ob vis elasticae defectum ad secretoria nimis lente progreditur, quem motum progressivum, ut alibi innuimus cum doctissimo de Gorter, capsula ipsius venae portae Glissonii dicta oscillatorio eiusdem fibrarum motu pro maiori parte sollicitat. Siquidem haec venae portae portio multo magis, quam venae cavae ramuli per universum corpus divisi, a cordis momento distat, seu sanguinis progressivus motus in vena porta hepatica a propulsiva cordis vi multo minus adigi potest, quam in ipsius venae cavae ramulis, quippe in his ab arteriis ad venas immediate transitus fit, in quibus sanguis ex angustiori ad latam diametrum procedit, ac valvularum auxilio, accedente vi contractili venarum, musculorum aliarumque partium, per quas arteriae aortae & venae cavae ramuli excurrunt, nunquam regreditur, sed properare debet; cui addenda vis contractilis arteriarum, quae ipsum sanguinem compellunt, eiusque comineatum accelerant; eadem vero vena portae hepatica sanguinem recipit, non ab arteria propellente, sed ab alia vena valvulis destituta, ab illo nempe venae portae trunco, qui a caeteris imi ventris visceribus ortum ducit; in qua sanguis totum pene amittit impetum, quem ab arteriarum coeliacae & mesentericae ramulis accepit. Quomodo igitur ille sanguis, five bilis materia ex lato venae portae sinu, in quo duo eiusdem trunci

conveniunt, perangustos ipsius hepaticae ramulos inire, & in biliosos porulos iter prosequi valebit, quin alia vis propulsiva eiusdem materiae progressum adiuvet? quam viam in sola capsula mediantibus fortibus eius fibris hepaticam venam successiva contractione coarctantibus collocatam esse censendum est (a).

Ideo posita huius quoque capsulae atonia, biliosa materia necessario impulsu destituitur, quare crudarum partium crassities eo minus attenuatur, quae partes bili sum succum inertem & viscosum & ad sua officia implenda parum idoneum reddunt, vel etiam praeterfluentibus serosis partibus ipsae crassiores, rudesque particulae biliales porulos aegre permeantes in extremis venae hepaticae ramulis stagnant, ac bilis materiam hepar ingredientem remorantur, cuius pars regrediens cruoris massam aliquantulum coinquinant, & pallido obscuro colore hypochondriacum tingit.

Haec sunt fluidorum vitia, quae licet eorundem origo solidorum atoniae tribuenda sit, nihilo minus tamquam alteram ex causis hypochondriacum morbum inducentibus in frigido & humido temperamento consideravimus.

Altera causa erit praedicta solidorum atonia, ex qua posito fluidorum vitio oscillatorius organicarum partium motus commovetur, & naturalem harmoniam amittit: Fluidorum itaque particulae, quarum moles & figura vitiosa sit, in ventriculi e. g.

& intestinorum nerveae tunicae vasculis stagnantes, sive angulosa figura eiusdem tunicae fibrillas proritent, sive obstructorum vasorum praeternaturali distensione, quae ab intercluso progressivo liquidorum motu fieri necesse est, easdem fibrillas distrahant, atque laceessant, nerveorum plexum crispationes excitant, quae frequentes ventriculi dolores ac tensiones afferunt, cum hypochondriorum tumefactione, tunc cum ima ventriculi pars, orificium nempe inferius coangustatur, & flatus ex alimentis in eiusdem cavitate aliquandiu hospitantibus producti intercluduntur, cum hypochondriorum vero depressione, quando superior & media ipsius ventriculi pars mediantibus orbicularibus fibris coarctatur, nec ingestorum descensum impedit, nec flatuum expansioni locum dat, sed potius contenta praemature expellit, quae intestina adeundo, si horum motum peristalticum ob praedicta irritamenta valde acceleratum inveniant, inconcocta eliminantur, si vero inaequalibus contractionibus eorundem tubus hinc illinc claudatur, & peristalticus motus sufflaminetur, diutius immorantur, alvique stypticitas habetur.

Haec & plurima alia hypochondriacorum symptomata a crudarum molecularum stagnatione, vel quarumcumque partium heterogenearum irritamento in similibus temperamentis nullo negotio insurgunt. Nam solidorum constitutio, cum mollis sit, ac fibrarum nervearum & membrano-

(a) De Gorter exerc. de Motu Vit.

branofarum tonus vitiofe flexibilis, earundem partium textura a praedictarum molecularum angulis veluti cuneis penetratur, fibraeque ipsae a se invicem divelluntur, quemadmodum & a vasculorum obstructorum aliquantulum violenta distensione praetermodum distrahuntur, ac naturalem parallelismum amittunt, quare insigniter compressi nervei & membranosi tubuli animales spiritus huc illuc repellunt, atque in vicinas, aut relativas partes maiori impetu derivant ita, ut hae aliis praevalentes convellantur, illasque praeternaturali vi ad se trahant, & ita oscillatorii motus ordo prorsus perturbatur. Hinc ventriculi officium pervertitur, prave digerit, nihil appetit, quippe in perturbato fibrarum ipsius ventriculi motu, nec alimenta satis conteruntur, nec dissolvuntur, nec naturalis appetitus sensatio haberi potest, quae nisi a stomacho vacuo, vel potius ab ordinatis eiusdem membranarum oscillationibus & levibus confricationibus (a) concitatur: ita & intestinalis nervea tunica a crudarum molecularum farcimine stimulo, aut distensione lacerata in rapidos & inconcinnos motus suas fibras, sed praesertim musculares inducit, a quibus immaturae ingestorum deiectiones, anxietates, borborygmi, vel inconstantes, & irregulares contractiones oriuntur: hinc peristalticus motus supprimitur, faeces & flatulentae materiae intercluduntur, quam peristaltici motus suppressionem alvi stypticitas, ventris in-

tumescenciae, modo universales, modo particulares circumscriptos tumores repraesentantes consequuntur.

Extra abdomen quoque haec affectionis hypochondriacae species, sicuti & aliae saevire solet, thoracem nempe & caput ipsosque artus divexat, quod duplici mechanica fit, prima per partium consensum, secunda per causae efficientis extensionem.

In primo casu, per nervearum partium consensum divexat, ut alibi notavimus, qui consensus, ubi magna solidorum flexilitas adest, nerveorumque rara textura, ibi exquisitus observatur. Nam fibrae nerveae, quo magis comprimendi causae cedunt, atque flectuntur, eo maiorem impulsu animali liquido, quo inflantur, impertiuntur, quod in vicinos nervos notabili impetu irruit, ac mediantibus plexuum communicationibus etiam ad remotos nervos pervenit, quorum tubuli, utpote flexibiles ab irruente liquido magis dilatantur, & ita facta inaequali nervearum partium inflatione, diversa earundem vis elastica habetur, qua in spasmodicas contractiones abeunt. Irritatis itaque membranis imi ventris visceribus paris octavi & intercostalis rami cum pulmonicis & cardiacis, qui eorundem truncorum propagines sunt, acceptae impressionis effectus statim communicant, nec non per ramorum cohaerentiam cum vertebralibus dorsi, qui per intercostales musculos distribuuntur, idcirco pulmonares vesiculae saepe coarctantur, & aeris ingressui resistentes

(a) *Hequet de la digest. Pitcarn. dissert.*

sistentes respirandi difficultatem pariunt, vel vehementer constricti cardiaci plexus cordis ventriculorum naturalem diastolem intercipiunt, ex quo ipsius palpitaciones & angustiae insurgunt, ita & diaphragmatis actio mediantibus intercostalis & octavi paris ramulis, qui in idem inferuntur, violentiam patitur, nec non intercostalium musculorum ita, ut thoracis costae ad inspirandum libere attolli nequeant.

Magis autem insignis est cum capite consensus, quoniam universae nervorum propagines a cerebro suas trahunt radices; quapropter ex notabili infarctu onerato ventriculo, aut vehementer agitatæ eiusdem tunicae nerveae fibræ, earum commotionum effectus ad cerebri medullarem substantiam deferuntur, ac talami nervorum opticorum fibrillae violenter agitatæ vertiginem, seu externorum obiectorum rotationem animo repræsentant, vel universalis fit eiusdem cerebri sinuum medullarium tensio, & anfractuum corticalis substantiae per piam matrem compressio, vasorumque sanguineorum constrictio & præternaturalis eorumdem inflatio, ex quibus plerumque gravativi, interdum vero pulsatorii fiunt capitis dolores.

In secundo casu præter abdomen cæteras corporis partes invadit hypochondriaca affectio, quod per causæ efficientis extensionem fit, quotiescumque nervearum partium tonus adeo inaequalis evadat, ut earumdem tubuli ad animale succum recipien-

dum inaequaliter dilatentur, & ideo momentum illarum propaginum maiori eiusdem succi quantitate repletarum, aliarum minus repletarum momentum superet, eisdemque vim faciat; nam tunc hæ ab illis trahuntur, nec illarum tractioni respondet distractio, proinde motus oscillatorii, qui in reciproca earumdem propaginum nervosarum tractione & distractione consistit, naturalis harmonia tollitur. Membranosae quoque partes saltem, quæ muscularibus fibræ donantur, eidem discrimini subiacent, ac inter diversæ & oppositæ directionis fibræ se invicem decussantes inaequalis fit contractio, nec quarundam actioni cæterarum reactio respondet; hinc & in membranosis partibus oscillatorii motus dissonantia sequitur.

Toni autem diversitas in huiusmodi temperamentis facile contingit, non solum ob partium elementarium magis, vel minus debilem cohaesionem, sed etiam quia inter nerveas, aut membranosas fibræ serosa aut lymphatica substantia, quæ ipsarum partium nutritioni inservit, ob prædictam fibrarum laxitatem saepe intruditur, ac elasticitatis defectu difficulter expellitur. Huius itaque substantiae molecule instar vectis heterodromi, vel potius cunei parallelas fibræ a se ipsis distrahendo divergentes facit, quæ fibræ nerveum liquidum continentes comprimuntur, eiusque liberae traiectioni obstant; quapropter reliquæ nerveae fibræ non divulsæ, nec compressæ, cum aequali

bili animalis liquidi influxu gaudeant, maiori velocitate ac vi moventur, quam priores; quae actionum diversitas etiam in membranosis partibus evenit, quae earundem motum oscillatorium confundit. Si igitur fibrarum distractio ex praedictae heterogeneae substantiae interpositione aliquantulum violenta fit, aut inaequalis, acutis doloribus aegrum corripit, ac si nerveas propagines infestet, in convulsivos affectus, si vero membranas, in spasmodicas crispationes ipsum inducit.

Hae contractiones modo fiunt in capite, ac in nerveis ramis a cranio immediate exeuntibus, & oculorum strabismum, palpebrarum constrictionem, maxillae inferioris tremorem ac spasmus cynicum producant; modo in vertebralibus colli, praesertim iis, qui in musculos circa tracheam & pharyngem inferuntur, ac globuli sensum in gutture prementis repraesentant: modo in vertebralibus dorsi, qui per thoracis musculos ac praesertim intercostales distribuuntur, ac dolores pleuritidem mentientes, costarum depressiones ipsius thoracis dilatationem in inspiratione impedi- entes secum ferunt; modo denique in octavi paris & intercostalis plexibus, qui cordis, & pulmonum substantiam perreptant, atque illius sinus, vel auriculas coarctantes sanguinem per venam cavam redeuntem, non nisi aegre recipi sinunt, qui supra cor gravitat, ipsumque opprimit; Pulmonum autem vesiculas constringunt, ac earundem dilatationi in aëris inspiratione resistunt, siccumque asthma praenuntiant.

Artuum quoque nervei rami a praedicta lymphatica substantia affecti stupores, formicationes ac motus difficultatem afferunt. Siquidem vel extranea materia, seu lymphatica intra fibras detenta nerveos ramos inflans eorum longitudinem aliquantulum minuit, ex qua musculares fibrae nimis tenduntur, & contrahuntur, & sanguifera vascula praesertim venae comprimuntur, ac sanguini regressum intercludunt, unde praedicta symptomata stuporis, formicationis necessario oriuntur; vel haec extranea materia intra nerveas fibras diutius detenta condensatur, ac permanens & continua fit non solum affecti nervi contractio, sed etiam illorum musculorum, per quos ipse nervus distribuitur, artuumque flexionem, aut extensionem impedit, sicuti in nodosa arthritide, vel in pertinaci ischiade quotidie observamus, in qua aeger claudicare cogitur, ac partis affectae muscoli emaciantur, quia organicae partes in diuturna & assidua contractione manentes nutritio succo orbantur; vel ipsa extranea materia intra nerveas fibras coarctata, non ipsorum nervorum longitudinem imminuit, sed talem compressionem producit, ut aequabilem animalis liquidi influxum auferrat, & ad alios ramos proximos, vel cum affecto communicantes detorqueat, & ita ad irregulares partium motus, tremores, & quandoque spasmodicas contractiones disponat, quae in frigida & humida corporis constitutione ex levi etiam causa insurgunt,

gunt, quippe nervosum & membranofum systema, utpote rarioris texturae & laxioris toni ab animali spiritu fortiori nisu influente praeter modum distenditur, & ad vehementiores, & inconcinnos motus concitatur.

SCHOLIUM.

Priusquam huius capitis theoriae finem imponamus, cuidam promultis me percontanti rationem reddam, cur scilicet hypochondriacae affectiones, licet non solum animalia & naturalia organa, sed etiam vitalia infestent, tamen plerumque sine febre inveniantur?

Respondeo igitur primo, actua-lem huius morbi insultum sine febre quidem plerumque inveniri, quia, licet vitalia organa aliquantulum infestet, vasa scilicet sanguifera constringendo, & cor ipsum coarctando, raro tamen in vasorum constrictione tanta fit progressivo sanguinis motui resistantia, quanta requiritur ad vitalium solidorum elasticitatem adeo provocandam, ut febris insurgat. Nam sanguineorum vasorum constrictiones non universales, sed particulares plerumque sunt, nec eorundem vasorum cavitates ita coangustare solent, ut ad febrile orgasmum natura concitetur. Secundo, etiam si universalis fiat vasorum sanguiferorum constrictione, ac sanguini circulanti resistantia valde augeatur: nihilominus vitalia organa, arteriae nempe, & ipsum cor forti ac pene spasmodica contractione devinciuntur, nec ad vehe-

mentes motus oscillatorios, in quibus febris consistit, concitari possunt.

Modo ad indicationes transeamus, quae non solum morbum, sed etiam temperamenti vitium, in quo dispositiva ipsius morbi causa invenitur, respiciunt. Ut igitur nervoso & membranoso systemati amissa oscillatorii motus harmonia restituatur, erunt primo cruditates, a quibus naturalia viscera infarciuntur, eliminandae, & cruoris massa heterogeneis asperisque moleculis obruta expurganda, deinde solidorum tonus roborandus, ac fibrarum elasticitas instauranda, qua mediante arteriarum praesertim minimarum vis contractilis extraneas ac rudes moleculas quotidie ex alimentis in sanguinem delatas melius conterat, earum angulos complanet, eisdemque sphaeroideam figuram sanguineis globulis analogam efficiat, ac nerveae fibrae fortiorem tonum assequantur, ne ab animali spiritu in violentas motus *ataxias* rapiantur, nec extraneas particulas, serosas nempe, aut lymphaticas se intrudentes, ac se ipsas distrahentes admittant, a quibus recensita symptomata oriuntur, sed aequabili spirituum influxu gaudentes harmonice moveantur, quo motu etiam membranoso systemati communicato naturalis & animalis oeconomia sua munera rite praestare valeat.

Sanguinis missio plerumque importuna esse solet, quia eiusdem crasis aliquantulum laxa invenitur, & rubrorum globulorum quantitas cum serosis comparata habet rationem multo minoris

minoris inaequalitatis, quam in caeteris temperamentis modo descriptis, ac laxioris sanguinis crassi debilior solidorum tonus respondet. Clysteres, quos in pertinaci alvi stypticitate, vel in torminibus, ac in spasmodicis intestinorum crispationibus requirit morbus, etiam si ut anodynus sint, oporteat, nihilo minus discutientia & carminativa iisdem adiungere expedit; oleis scilicet amygdal. dulc., vel liliorum alb., aut sem. lini & similibus addendae sunt decoctiones fl. chamaemeli, fol. mentae, sem. anethi, carvi, cymini, foeniculi, &c.

Solutiva medicamenta, quibus ventriculi cruditates sunt eiiciendae, & aliis specificis remediis, vel etiam minorativis via est aperienda, erunt, e. g. manna in decoct. tart., fen., & rad. polypodii soluta & aromatizata, vel syrupum fl. persic. cum tart. solubili mixtum, vel de cichor. cum duplici rhabar., quibus, si notabile cavitationum farciimen detegatur, aqua tetutiana superbibenda: Pilulae de ammoniaco solutivae ac tartar. Quercetani hic conveniunt; ex minorativis vero pilulae Becherianae & Stahlianae caeteras antecellunt; rhabarbari tincturam in aqua tetut. vel cichor. & agrimoniae ope salis ammoniaci extractam, quae viscidos ac tenaces succos in glandulis, ac secretoriis ventriculi vasculis stagnantes eliciat, aut inertem crassio remque biliosum succum venae portae hepaticae radices obstruentem attenuet, ac solidorum elasticitatem provocando impellat, optimum experimur remedi-

um. Sicuti & pilulas superiori cap. commendatas, ex sapone, rhab. & tart. vitriolato, &c. quibus in hac peculiari affectione iungitur gumm. ammoniacum, ut molles fibrae ad oscillandum fortius incitentur, haerentesque succos citius expellant.

Solutio cruditatum infarctu ac extricatis secretoriis abdominis vasculis ad corroborantia nos convertere debemus, quorum praestantior est chalybs, vel medicamenta ex chalybe parata. Chalybis itaque limaturam perfecte laevigatam ad drachm. i. circiter cum extracto aloes, aut rhab., fumar., aut cochlear. in bolos compactam & ciennamomo, aut macis, vel eorumdem oleis aromatizata efficacem quidem expertus sum. Huic substitui possunt aliae chalybis praeparationes, praecipue cum sulphure, vel tincturae, veluti pomata, tartarizata Zwelferi, aut aronizata, quae cum aquis stomachicis, mentae, scordei, melissae compositae, aut ciennamomi hauriri solent, vel cum decoctionibus aperientibus, atque aromaticis, quas etiam chalybis limaturae superbibere oportet, nempe ex rad. calami aromatici, ononidis, ari, fol. agrimoniae dictamni cr. pulegii, & similium, nec ipse crocus martis infimum locum tenet, si cum aliquo aperiente & corroborante misceatur, sicuti in pulv. cachectico Qu., vel opiata antiscorbutica Helvetii, in qua crocus cum extractis aloe, rhab., fumar. & cochlear. caeterisque analogae virtutis remediis unitur. Plurima quidem, imo pene innumerabilia

lia ex corroborantibus remedia hic conferre possunt, quae pharmaceutica & chymica ars suppeditant; verum tamen meo muneri satisfacisse puto, si nonnulla ex validioribus auxilia proposuerim. Cognita enim indicatione curabilis morbi, opportuna remedia invenire non est arduum.

Unum porro recensere adhuc mihi restat remedium, quod plerosque hominum etiam medicae artis ignaros non latet, illud videlicet, quod animum laxare & recreare possit, cui accedit & corporis exercitium, in quo musculorum actio vasa alternatim constringendo progressivum fluidorum motum primo accelerat (quae veritas in pulsu frequentiori, crebra respiratione, auctoque corporis calore se manifestat,) secundo rudes atque extraneas particulas, quotidie ex alimentorum massa sanguinem adeuntes melius atterit, ita, ut sanguineorum globulorum naturam citius assequantur, hoc autem praestat non solum musculorum actio, sed & crebra pulmonum inspiratio & expiratio, quae aeris nifus & vesicularum dilataciones multiplicans velociorem fluidorum per pulmones transeuntium circulationem fortiolemque attritum reddunt. Praeterquam quod & diaphragmatis motus non solum ad ventriculum comprimendum ingestaque solvenda, sed etiam ad eandem fluidorum in abdominis visceribus circulationem promovendam inservit, eoque magis, quia alterna compressione membranarum partium inprimis

ventriculi & intestinorum elasticitatem eorumque motum peristalticum sollicitat, tertio ipsorum vasorum praecipue arteriarum vim contractilem elicit, qua suum officium aptius impleant. Postquam igitur ars medica opportuna purgantia, abstergentia, aut deobstruentia medicamenta praemiserit, animi solatium, non omisso, nec interrupto caeterorum corroborantium remedium ordine, est exquirendum, quod cum non in eadem re omnes homines inveniant, varia quippe est eorundem voluptas, quae a diversa partium organa construentium indole, atque combinatione pendet, idcirco peculiare illud solatium aegro captare oportet, in quo magis, saltem ante morbum, delectari solebat. Quidam enim in rheda vehi, alii equitare amant (quod exercitium omnibus sane hypochondriacis perutile esse debet, saltem quia animali corporis motui supplet, similesque effectus in ipso corpore gignit,) alii navigatione delectantur, ac itinera libenter suscipiunt, alii venatione, multi denique summa voluptate musicales concentus, sive humanae vocis cantum, sive musicalium instrumentorum sonum audiunt, ex quibus nonnulli propriam vocem in cantu exercent, vel musicalia instrumenta tractant, sive tibiam, sive lyram, sive citharam unusquisque juxta peculiarem animi inclinationem; hac itaque explorata illa aegroto suadenda sunt exercitia, sive solatia, quae eidem iucundiora esse solent, ac domestici monendi, ut ipsum ob consuetum ex morbo

morbo fastidium etiam renuentem & invitum ad eadem ducant, quae licet primo respuat, cum tamen paulatim postea gustaverit, ad ea fore ut etiam sponte alliciatur probabile est. Haec quidem ut animum laxent, illas in nostro corpore motiones excitare debent, quae homogeneae sint, proinde & ad corporis conservationem tendant. Sicuti vero varia solationum obiecta per diversos motus communi sensorio inditos intellectui manifestantur, ita diversis motionibus, vel motionum gradibus nostra solida afficient, quae motiones, quo magis unisonae sint, atque homologae peculiaribus oscillationibus nostrarum fibrarum, eo magis gratae & iucundae nobis erunt: quo minus e contra unisonae sint, eo minorem nobis afferent iucunditatem; idcirco quaedam nostrorum sensuum obiecta, quae plerosque hominum delectant, quibusdam nauseam movent.

Mechanica igitur solationum actio in nostro corpore levis est nostrorum sensuum seu partium sensuum organa efficientium commotio, qua nervosi generis fibrae ad suavem & harmonicum oscillatorium motum alliciuntur; ergo pro hypochondriacis, quorum morbus in perturbato, vel interrupto nervosi & membranosi systematis motu oscillatorio consistit, magnum & efficax remedium erit solatium; quod practicae observationes nobis comprobant, quemadmodum

inter plurimos testatur ipse Baglivius (a). *Quare inquit cum frequentissime observemus in praxi curari morbos post susceptum iter, navigationem, venationem, musicam auditam, vel exercitiam, quod longo remediorum usu consequi nullo modo potuimus, non est id a Medico spernendum.*

Ex solatiis illud semper praefendum, in quo ante morbum magis laetari solebat aeger, vel ex quo in ipso morbo maiorem iucunditatem percipere videtur, quippe cum valde unisonas in affecto corpore motiones excitet, eo facilius oscillatorium fibrarum motum nervoso & membranoso systemati restituet, ac quod prius inconcinnum, harmonicum reddet.

Hoc quidem prae caeteris praestare videtur musicalis, sive vocum, sive instrumentorum concentus, qui auditus membranas leviter, atque data vibrationum proportionem percellit (b). Ipsae vero membranae cum ad unisonum eiusdem harmonici concentus facile tendi possint, earumque oscillationibus substantiae medullaris tubulorum, & pene universalis nervosi systematis fibrarum concinnus motus respondeat, per magnam suavitatem mens concipit, summaque voluptate anima afficitur, atque hinc spasmodicae crispationes, quae hypochondriacos molestant, & organicarum partium motus oscillatorios intercipere solent, aliquantulum remittuntur, idemque motus reviviscit.

Xx 3

Quare

(a) Cap. XIV. p. 251. Spec. trium reliq. libr. (b) Vid. Observationes circa musicam veterem & recentiore[m] eiusque applicationem ad sanandos morbos edit. Londini 1749. in Act. Erudit. Lipsiae 1752.

Quare si harmonicus concentus, quo delectari solebat hypochondriacus, eiusdem aures frequenter mulceat, ipse notabile levamen, ac sui morbi totalem extinctionem paulatim assequetur. Verumtamen de musicalis concentus effectibus plura superius exposuimus (a), febres scilicet acutas spasmodicis affectibus comitatas demonstravimus, huiusmodi remedio extinctas fuisse; deinde universales tarantatos medendi methodum, in hoc potissimum remedio saltationibus adiuto positam esse, ex quibus eiusdem etiam in hoc morbo praestantiam per rectam analogiam inferre quisque potest. Siquidem proxima tarantatorum symptomatum causa, ut eodem loco satis ostendisse mihi videor, nil aliud est, quam spasmodica nervosi & membranosi systematis affectio a virulenta summeque tenui & volatili materia praeter modum rarefcente vel acriter stimulante producta, ex qua fibrae rigescunt, vel in iugi contractione manent, ideoque oscillatorius earundem partium motus sistitur, sive perturbatur. Similes autem effectus, ac nisi solo intensioris gradu differentes experiun-

tur hypochondriaci, ideoque non dissimilibus remediis pro iisdem uti expediet, cum tamen violentae & diuturnae saltationes huic morbo plerumque non conveniant, his substituenda erunt moderatum corporis exercitium, equitatio, aut vectio super currum, frequentia, aut longa itinera. Pro maximo autem remedio musicales concentus habendi sunt; in iis potissimum curandis, qui in statu sano musica delectantur, vel saltem illam audientes non respuunt.

Haec quatuor capita primarias hypochondriaci morbi species exhibent, inter quas aliae secundariae a clinico medico sunt supputandae, quae nisi gradu inter se differunt, ac pro ipso diversam curationem exposcunt. E. g. hypochondriaca affectio calida & sicca ab alia, licet eiusdem speciei differre potest gradu caloris, aut siccitatis, calida & humida ab alia eiusdem nominis gradu caloris, aut plethorae, & sic de caeteris; ideoque curativae indicationes, quae caloris, siccitatis, aut plethorae gradus semper respiciunt, sunt examinandae, ut apta eruantur auxilia, quorum vis affectionis gradibus omnino respondeat.



(a) *Prop. IV. huius.*

P A R S T E R T I A.

De affectionibus hypochondriacis compositis.

C A P V T I.

De affectione hypochondriaca hysterica.



Affectionem hypochondriacam compositam illam appellamus, quae cum alio specifico morbo coniungitur, vel in illum definit, quorum prima sit hypochondriaca hysterica.

Haec affectio, foemineo sexui peculiaris, est hypochondriaci cum hysterico morbo copulatio, quae tamen fortasse melius pro affectione hypochondriaca muliebri definiretur. Nam affectio hypochondriaca & hysterica in foeminis eandem pene agnoscunt originem seu dispositivam causam, nec a virili hypochondriaca differt muliebris, nisi in illis symptomatibus, vel potius symptomatum intensificationibus, qui a peculiari foeminei corporis constitutione ortum ducunt. Uterum ab omni culpa vindicarunt nonnulli etiam clarioris famae auctores, nempe Carolus Piso, qui huius morbi sedem in cerebro seu nervoso principio a colluvie serosa intra eiusdem fibras stagnante compresso collocavit, Highmorus, Sydenhamius, Sylvius, Willisius, Ernestus Stahl, qui (a) Highmorum commendat his verbis; *Illud praecipue novum & pe-*

culiare egit atque praestitit Highmorus, ut ita demonstraret, quod malum illud veterum opinione soli muliebri sexui simpliciter proprium nequaquam existat, sed potius utrique sexui commune sit, ideoque tali subiecto atque loco, quale mulieribus vere proprium existat, falso adscribatur.

Communia viris & mulieribus symptomata illa sunt, quae in prima proposit. recensuimus graves scilicet tensiones sub costis spuris, interdum circa umbilicum, & in quacumque abdominis parte, quae a ventriculi & intestinorum magna inflatione insurgunt; obtusi & gravantes ventriculi dolores, qui post cibum exacerbantur, in tota abdominis regione borborygmi frequentes, quandoque tormina; alvus modo laxa, modo pertinaciter sicca; acidi ructus; crebra mictio, ac saepe copiosa, sed tunc cruda & aquea, interdum crassiorem, vel arenosam materiam deponens; anorexia, vel nimis avidus appetitus, vel depravatus, seu rerum ad nutritionem ineptarum, quem malaciam vocant; cardialgia, vomitus, quo glutinosa atque viscosa materia eiicitur, aut acris dentesque stupefaciens; frequens

(a) *Articulo I. de Pass. Hyst.*

frequens tenacis quoque materiae screatus, aut crebra salivatio, in regione tiroideae cartilaginis spasmodica contractio gulam comprimens, & globi ascendentis ac deglutationem impediens sensum referens, cordis palpitantes; graves respirandi difficultates; capitis dolores, modo gravantes, modo acuti, ac interdum in fronte, aut temporibus instar clavi terebrantis ferientes, oculos & lacrymales glandulas spasmodice coarctantes, ac lacrymas exprimantes, faciei modo pallor, modo rubor, vertigines etiam tenebrosae; virium prostratio; artuum aliquorum torpor, hemiplegiae, five paraplegiae aemulus; temporanea sensuum abolitio. Haec pluraque alia hypochondriaci morbi characteristica accidentia, quae loco citato exposita sunt, viris & mulieribus communia observantur.

Differunt quidem in mulieribus quaedam huius morbi symptomata a symptomatibus, quae in viris plerumque observantur, seu quaedam huius morbi symptomata in iis saepe, in istis raro contingunt; vehementes scilicet respirandi difficultates, quae uterinae suffocationis nomine veniunt, sensuum abolitio adeo praeceps, ut affectae mulieres repente cadant, & adeo profunda, ut integris horis atque diebus omni sensu atque motu priventur ita, ut quaedam pro mortuis habitae ad sepulchrum delatae fuerint, prout in quibusdam historiis legitur, vel si moveantur; convulsivis

artuum motibus, rigidisque tensionibusprehenduntur; delirium quoque plerumque furiosum, interdum melancholicum, interdum iucundum, quo stulte ridet, quibus addunt aliqui, veluti Hoffmannus, qui hysteri- cum morbum ab hypochondriaco in ipsis etiam mulieribus diversum esse acriter contendit, musculis abdominis in hysterica passione spasmodice contractis ventrem deprimi, & veluti concavum in umbilici regione fieri, & e contra in hypochondriacis ventrem intumescere, deinde non adeo frequentia esse animi deliquia, nec gulae compressiones, neque acutum illum dolorem, clavum hysteri- cum appellatum hypochondriacum sicuti hystericam invadere; tandem illum diuturnum & difficilem esse morbum longamque curationem exquirere, passionem vero hystericam ex data occasione vehementis animi motus, fluxus menstrui suppressione &c. repente insurgere; sed recta medendi ratione profligatam non reverti (a). Verumtamen hoc postremum inter utrumque morbum discrimen fallax quidem experientia nobis ostendit; nam praedicta accidentia hysterica appellata, si a causis accidentalibus mox dictis oriantur, revera exstingui, nec redire, sed hoc etiam in hypochondriaca affectione notatur, siquidem a similibus causis enata, veluti plethora aut vehementi animi pathemate, magna scilicet ira, moestitia, aut pavore, haud tam longam exposcit curationem, ac semel extincta

(a) Cap. V. de malo hyster. T. IV. part. 3.

extincta non reviviscit, secus autem erit si huiusmodi morbos intrinsecam dispositionem a natura contraxerint infirmi. Tunc enim non minus hypochondriacus, quam hysterica, non nisi diuturno medici labore levantur & a reviviscente morbo saepe subiguntur.

Caeterum non inficiat praefata illa symptomata, quae hysterica vulgo appellantur raro in viris hypochondriacis observari, hoc tamen discrimen non uteri infarctui, sed peculiari foeminarum solidi nervei texturae tribuendum esse puto, quemadmodum alibi innuimus. Dixi raro, minime vero neutiquam, quia aliquando etiam in viris observata fuerunt.

Casus legitur apud Willisium (a) de quodam hospite, qui convulsivis motibus per aliquot annos statis temporibus molestari solebat. Hic cum ingentis moestitiae occasionem inivisset, graviolem insultum passus fuit: scilicet per duos, vel tres dies ante paroxysmum, intra sincipitis regionem, magnam commotionem, vertiginem, crebramque visus obtenebrationem tamquam nuntia eiusdem paroxysmi praesentiebat, ipso vero paroxysmo ingruente oculorum contorsiones atque inversi motus in eodem perspiciebantur; deinde moles quaedam instar vivi animalis ab imo ventre sursum usque ad caput gradi sibimetipsi videbatur, quem motum eiusdem Willisii manus ventrem comprimens persentiebat, & donec eam molem ambobus palmis totis viribus

detinebat, graviora accidentia inhibebantur; ipsa vero sensim in caput obrepente immanes cunctorum corporis membrorum convulsivi motus irruerant, quibus coactus tanto impetu se huc illuc contra cubiculi parietes, aut postes iactabat, ut a quatuor robustis viris vix cohiberi posset, ne exiliret. Postea cessantibus convulsivis motibus, membrorum atque musculorum rigida tensio superveniebat, veluti in *tetano* affectis, tandem post horae circiter quadrantem omnibus remissis sui compos factus eorum, quae passus erat, se conscium ostendebat. Paulo post iisdem principiis ipsi spasmodici affectus aliquando repetebant, ac trium horarum spatio tres insultus sustinebat aegrotus.

Alter casus ab ipso Hoffmanno refertur adolescentis nobilis valde plethorici, robusti atque carnosum corporis habitus, qui postquam varios ad venerem stimulos passus fuisset, gravi circa inguina dolore prehensus fuit, deinde in febrem incidit, qua remissa post aliquot hebdomadas iidem circa inguina repetierunt dolores, sed novis accidentibus comitatis hystericis plane similibus, *horribilibus scilicet spasmis a pubis regione ad dorsum, ad praecordia, ad septum transversum, ad cor, ad fauces, immo ad ipsum cerebrum ascendentibus, praecedente cordis palpitazione, faucium strangulatione, spirandi angustia, animi deliquio, sopore; ad quae etiam convulsivae artuum contractiones accedebant, qui paroxysmus singulis fere mensibus*

(a) *De Morbis Conv. Cap. V. p. 481.*

mensibus redibat: pulsus ante accessionem inaequalis & depressus, postea magnus & concitatus percipiebatur; immensi ciborum appetentia urgebatur, quamvis alvus ita adstricta esset, ut fortiorum purgantium vim eluderet &c. Post varia medicamenta antispasmodica, & antepileptica frustra adhibita, tandem eiusdem Hoffmanni consilio moderata sanguinis extractio quolibet mense celebrata fuit & aqua fontis pro potu ordinario, & nitrosis pulveribus ad sanguinis orgasmum compescendum usus fuit adolescens, mentis applicationibus vacavit, ac tranquillum corporis exercitium suscipiens *integrae sanitati brevi tempore fuit restitutus.*

Ego quoque duos casus ex iis qui mihi occurrerunt, breviter exponam: primus fuit cuiusdam viri quadragenarii, qui in re adversa dolore ac ira captus, in sensuum abolitionem incidit, ex qua repente procubuisse, nisi adstantes labentem excepissent, ac in lectum collocavissent. Ad hunc accersitus eundem immobilem & adeo profundo sopore detentum inveniri, ut nullo stimulo aut clamore expergisceretur, immo ne levissimae quidem sensationis signum praeberet. Respiratio eiusdem naturalis, nec in eo convulsivi motus, nec spuma in ore, nec alia epileptici morbi indicia aderant. In hoc sopore ultra duas horas remansit, a qua postea evasit prorsus liber, cunctisque membris solutus, cui addendum alias in eandem sensuum abolitionem, prout domestici mihi testati sunt, illum incidisse.

Secundus: Viri annorum 50. circiter, qui post diuturnam in proprio ministerio exercendo mentis applicationem atque nonnullas in victus genere in crassiorum nempe ac rudium ciborum abusu commissos errores peracuta hemicrania prehensus fuit, non sine notabili stomachi infarctu, qui ex cruditatibus vomitu partim spontaneo, partim per emeticum reiectis dignoscebatur. Haec postquam duos, vel tres dies, & aliquando etiam aliquot horas aegrum cruciavisset, quiescebat, vel saltem mulcebatur, sed rursus paucos post dies recrudescebat, & ita duobus circiter mensibus peractis capitis dolor omnino evanuit, & in asthmaticum affectum siccum tussi carentem fuit commutatus. Ab hoc aeger assidue opprimebatur, ac non nisi levem remissionem interdum persentiebat. Asthmatico affectui notabile cibi fastidium iungebatur, nec non conspicua corporis emaciatio, deinde leve pedum atque crurum oedema apparebat. Tandem post quatuor circiter menses paulatim imminui caepit respirandi difficultas; nocte enim, in qua semierecto corpore prius decumbebat, postea duobus tantum pulvinaribus caput suffulciebat, minori labore incebat atque scalas adscendebat: hinc pedum & crurum oedema sensim evanuit, ac cibi fastidium aliquantulum recessit, non sine aliquo nutritionis augmento. In hoc notabile salutis progressu ac pene soluta respirandi difficultate, antiqua hemicrania, sed potius in cephalaeam commutata eundem

dem aggressa fuit, quae post duodecim circiter horas aliquantulum remisit, deinde rursus per idem temporis spatium exasperata fuit, denique intermisit. Paucos vero post dies cum mensae affideret, repente sensuum abolitione & virium languore captus fuit, ac in terram cecidit. Accurrentes domestici eundemque sublevantes in lectum posuerunt, in quo post horae dimidium animae potentias recuperavit, quin sui casus recordaretur, tamen in humero dolente contusionis effectus percipiebat. Capitis dolor caeteraque symptomata per aliquot dies aliquantulum exacerbata sunt, excepta respirandi difficultate, quae prorsus dissipata erat. Post tres circiter hebdomadas, cum iam omnia pene sedata fuissent, ac domo egrederetur, mane dum missae sacrificio adesset, tenebricosa vertigine adeo vehementi prehensus fuit, ut caput a turris summitate praecipit in terram deiici & pedes sursum tendere, ac uno verbo suum corpus in gyrum verti sibi ipsi videretur; ideoque adstantium auxilium clamans expetebat, ut se ipsum casurum sustinerent. Domum delatus magnam viridis, & amarulentae materiae quantitatem evomit, unde & vertigo aliquantulum impetus amisit, eoque declinata fuit, ut decumbens aeger se totum absque visus rotatione convertere posset. Eiusdem materiae vomitum aliquoties repetiit, deinde & ipsorum alimentorum, quandoque mox post comestionem, quandoque post plures horas; eadem tamen vertigine se nondum so-

lutum persentiebat aeger, ac inappetentia ad anorexiae gradum pervenerat. Vix praeterito a vertigine mensae, quo temporis spatii postrema accidentia pauxillum remissa erant, novus insultus primo similis, nempe sensuum abolitio eundem adortus fuit, qui tamen convulsivos, licet leviores, motus secum ferebat, aegrumque longiori tempore oppressum detinuit, plures quodammodo agens exacerbationes. Altero mense rediit idem insultus, sed multo brevior; peracto vero alterius mensis periodo, quo quartus morbi insultus expectabatur, quemdam memoriae lapsum, ac linguae impedimentum per duas horas pertulit, quibus balbutire cogebatur, nec illarum rerum voces reminiscebatur, quas exprimere volebat. Notandum vero, primo, paucis diebus ante hunc memoriae lapsum asthmaticum insultum quasi orthopnoicum noctis tempore eidem supervenisse, qui sensum declinans post quadraginta horarum circiter spatium illum deseruit. Secundo, hunc aegrum a tenebricosa vertigine nunquam prorsus evasisse; nam ex se ipso incedere non valebat, ac nisi ab aliquo sustineretur, statim procumbebat. Caeteris autem symptomatibus parum molestabatur, quippe cibum satis appetebat, somnum capiebat, nec aliud quiddam praeter capitis dolorem, sed rarum ac levio-rem percipiebat.

Dicet fortasse aliquis hunc affectum inter epilepticos potius quam hypochondriacos enumerandum esse, tamen cum in hac historia desint quae-

dam epilepsiae characteristica accidentia, ac pene universum nervosum systema idem affectus infestaverit, capitis, scilicet, thoracis atque ventriculi, ac pene constantem a capite ad thoracem, & a thorace ad caput molestiae vicissitudinem servaret, iuxta nostram hypothesein de malo hypochondriaco, ad hoc potius, quam epilepticum morbum pertinere videtur. Sed infelix eiusdem exitus alia quidem nobis patefecit. Siquidem aeger postquam per plures dies de gravi capitis dolore assidue questus esset, in totalem sensuum abolitionem paulatim incidit, animali tamen motu, licet languido adhuc perseverante ad ultima usque momenta, quibus fatum subiit. Aperto cranio durae meningis vasa aliquantulum turgida, lividaque conspeximus, dissectoque cerebro notabilis sanguinis quantitas partim concreta, partim liquida in duobus eiusdem cerebri ventriculis, dextero scilicet ex anterioribus, & in quarto ex posterioribus invenimus. Praeterea posterioris & sinistri cerebri lobi partem aliquantulum duram & pene strumofam, & e contra quosdam cerebelli substantiae tractus circulares plicas efficientes aliquantulum mollis laxiorisque consistentiae, & ad corruptionem proximos notavimus. Quare procul dubio concludendum, omnia quaecumque accidentia, quae in descripto morbo passus fuerat aeger a cerebro immediate ortum duxisse; quorumdam tamen phaenomenorum mechanica causa conceptu difficilis vi-

detur, illius praecipue asthmatici affectus, qui absque capitis incommodo sex circiter menses perduravit. Huius morbi historiam hic afferre volui, quamvis inter organica cerebri mala hic enumerandus esset. Quippe usque ad ultimos pene ipsius periodos spasmodici hypochondriaci morbi characterem simulavit, ab illis, qui hysterici nuncupantur, non dissimilem; eoque libentius attuli, quo eiusdem accidentium ordinem medica ponderatione digniorem existimavi.

Veruntamen ad ea, quae proposuimus, redeamus: hystericorum scilicet accidentium ab hypochondriacis diversitatem plerumque non ab uteri infarctu, aut irritamento, sed a peculiari foeminarum solidi nervi structura pendere.

Non esse uterum partem adeo exquisitae sensationis iam alibi in opusculo meo de febribus (a) demonstravi, quod & ipse Hoffmannus Tom. III. Medic. system. cap. V. concedit, quamvis Tom. IV. part. III. cap. V. de morbo hysterico agens, eius sedem & causam proximam in utero statuatur, eiusque membranosa & vasculosa substantia, ac in vasis ad illam spectantibus in primis spermaticis, quibus in partibus stagnantia, aut lentescencia fluida praeternaturali distractione, aut irritamento ad spasmodicas contractiones easdem provocent, quae in nervos intercostalem & ossis sacri insinuatae, per primum immediate, per secundum mediante spinali medulla superiora versus gradientur, & propagentur.

(a) *Part. I. Cap. XVIII.*

pagentur. Materiales vero causas duplicis potissimum generis esse autumat, *cruorem* scilicet *menstruum* in utero vitiatum, ac *semen corruptum*, supra quod ita ratiocinandum esse mihi videtur. Primo quoad menstruas purgationes, plures foeminae, quae naturali menstruorum fluxu defraudantur, vel etiam prorsus orbantur, tamen non hystericam passionem, sed potius illos morbos subeunt, qui vasorum plethoram, sanguinis regressum, aut crassitiem, aut eiusdem rudium molecularum copiam consequi solent, quos enuntiare supervacaneum puto. Praeterea hysterica symptomata menstruorum, aut lochiorum tempore insurgere plerumque deberent, quo tempore uteri vasa ac membranae notabilem distensionem, ac distractionem patiuntur, praesertim ex lochiis, quae molestis doloribus eliminantur; tamen multas foeminas extra dictas occasiones indiscriminatim ab iis invadi observamus.

Idem quoque notatur de seminali materia, quae spuria est, vel potius de sanguine & liquido animali ad genitalia foeminarum concubitum exoptantium, vel saltem venereo stimulo affectarum copiose influentibus, siquidem plures salaciores foeminae, in quibus earum libidinis effectus deteguntur, ab hysterico morbo immunes eunt.

Verum concedatur, a sanguine menstruo ac veneris stimulis hunc

morbum portendi, quod plurimorum virorum auctoritate confirmatur, veluti Galeni, Aretei, Foresti (a) Ballonii (b) Lemnii (c) aliorumque ab ipso doctissimo Hoffmanno citatorum: huius tamen proximam causam esse uterum, in quo omnia fiant irritamenta, & spasmodicae crispationes excitentur, quae toto nervoso generi communicantur, aegre nobis suademus. Quippe in primis uterum non esse partem adeo exquisitae sensationis clare evincimus: secundo, quia plurimis dantur huiusmodi casus, in quibus nec veneris stimulo mali causa imputari potest: tertio, quia in viris eadem pathemata quandoque observantur, ut modo notavimus, idemque Hoffmannus plura exempla enarrato casui similia sibi nota esse perhibet, quorum nonnulla observasse fatetur, quae copiosiori sanguinis ad vasa spermatica & testes affluxui has partes vasculosas & nervosas nimium distendenti ac distrahenti tantummodo tribuit: Quaecumque autem sit horum accidentium causa in viris, in utero sane eam non inveniemus: quarto quia ab aliis etiam extrinsecis causis accidentalibus saepe nascuntur hysterici morbi, a violentis scilicet animi passionibus, veluti ira, timore, & moestitia ex aliquo infortunio orta, siquidem his supervenire frequenter observamus cordis palpitationes, praecordiorum angustias, respirandi difficultates, & animi deliquia, nec non sensuum abolutiones.

Y y 3

Admi-

(a) *Lib. XVIII. obs. 28.* (b) *Lib. de Virgin. morb.* (c) *De occultis naturae miracul. Cap. VI.*

Admirabiles quoque sunt odorum effectus, suaves enim, sed acuti peracutos capitis dolores, suffocationes, seu faucium strangulationes, convulsivos motus, lipothymias, ac sensuum stupores pariunt, & e contra graueolentes praedicta hysteriarum pathemata non raro sedare valent. Haec quidem ab uteri irritamenti oriri nemo sanae mentis asserere audebit; odores enim in olfactoriam tantum membranam suam actionem exercent, quae nervosas corporis partes in consensum trahunt.

Quoad animi vero passiones, haec in cerebrum, a quo cunctae systematis nervosi motiones pendent, collimant; quare substantiae medullaris fibrae, vel praeternaturali celeritate & animalis liquidi copiosiore separationem & ad partes organicas influxum promovent, ex quo nerveae propagines inaequaliter repletae inaequali vi contrahuntur, & aliae aliis vim faciunt, atque idcirco cordis palpitantes, praecordiorum angustiae, atque suffocationes insurgunt, vel nimis rigida tensioneprehenduntur eadem medullares fibrae, & animalis liquidi separatio hic illic intercluditur; atque hinc quaedam organa ordinato eiusdem influxu privantur, cui virium languor ac stupor, sensuumque abolitio succedunt.

Haec phaenomena cum frequentius & multo leviori ex causa foemineum sexum, quam virilem invadant, eorundem mechanica ratio in peculiari foeminei corporis constitutione est exquirenda, quae procul dubio erit

rara & imbecillis solidorum praecipue nerveorum compages, quorum fibrae flexibiliores facilius animali liquido inflantur, & a se invicem divelluntur, proinde in vehementes & inconcinnos motus nullo negotio rapiuntur: cerebri quoque fibrae laxiorem tonum nactae ex levi causa, vel comprimuntur, ac subsident, vel ad vehementiores & inaequales oscillationes concitantur. Quapropter foeminae ad risum & fletum citius moventur, ac plerumque amore & odio atque timore facilius, quam viri capiuntur. Hac posita solidorum nerveorum compage & flexibilitate eorundem fibrarum tono, nil mirum, si intrinsecae etiam causae mox consideratae menstruorum nempe suppressio, vel seminalis, quamvis spuriae materiae coagmentatio hystericas affectiones utero fortasse insorte accersant. Nam refluentia menstrua, seu sanguis, qui in uteri vasis unoquoque mense coacervari, atque erumpere solet, si exitum non inveniat, in cruoris massam regrediens eandem multiplicat, ac vasa nimis distendit, quod propulsivae cordis vi resistentiam auget, & contractilem arteriarum vim opprimit: ideo eiusdem sanguinis progressivus motus retardatur, unde cordis palpitantes, ac praecordiorum angustiae excitantur, cerebri anfractus a vasorum distensione compressi ad spirituum separationem pene incapaces evadunt; & ita haec spirituum sufflaminatio repentinos virium languores, sensuum stupores, ac temporaneas apoplexias gignit,

gignit, quae symptomata in viris raro observantur, quippe eorundem solidorum ac fibrarum texturae tonus est firmior, nec vasa adeo expanduntur, nec cerebri, seu substantiae medullaris tubuli ex levi compressione obtunduntur, aut levi irritamento & aliquantulum vehementiori arteriolarum pulsatione commoventur, nec propaginum nervearum fibrae tam flexibiles animali liquido inflantur, ut in enormes contractiones & convulsivos motus patientes inducant.

Seminalis quoque materiae retentio, quam volatilium particularum multiplicatio consequitur, eosdem circiter effectus in foeminis producit; siquidem copiosa earundem partium volatilium in sanguine redundantia in lymphatica vasa se insinuat, ac lympham se ipsa nimis locupletem reddit, quare volatiles huiusmodi particulae, quae donec a cruoris massa vehuntur, ac eiusdem velocitatis in circulari motu sunt participes, haud tam facile rarefcunt, ac exaltantur, in lymphaticos canaliculos traductae, in quibus lente progrediuntur, magis expanduntur, atque attenuantur, & acrimoniam acquirunt, qua ipsam lympham inficiunt, & a qua membranosae & nervosae partes ad spasmodicas crispationes proritantur.

Praeterea hae volatiles particulae ad cerebrum evectae, vel in minimis eiusdem arteriolaris coagmentatae rarefcunt, earumque diametros praetermodum dilatant, quae dilatatio cerebri fibras distrahens, acutos capitis dolores parit, aut medullaris substantiae

tubulos comprimens, ac spirituum secretionem sistens, sensuum stuporem ac totalem abolitionem inducit; vel eosdem secretorios tubulos magno impetu ineuntes harmonicum medullarium fibrarum motum perturbant, unde inaequalis animalis liquidi ad partes distributio, ac vehementes & convulsivi motus insurgunt; & tunc perrupta earundem fibrarum oscillantium harmonia, & angulorum directione aliquantulum mutata (quod a praeternaturali spirituosae materiae impetu & irritamento fit, quo ipsae fibrae medullares extra ordinem contrahuntur) externa obiecta diversas a naturalibus motiones in easdem imprimunt, ac per diversas quoque motiones menti repraesentantur, de quibus, non nisi perperam, iudicare potest. Insuper cum ipsae medullares fibrae commune sensorium efficientes inconcinne moveantur, illa exhibent intellectui obiecta, quae per similes motiones eidem manifestari solent, quare aegra male percipit, prave iudicat, ac inepte loquitur, quae phaenomena delirium, vel furorem uterinum medici appellant.

Mox enarrata itaque symptomata, quae foeminis peculiariora sunt, vel foeminas saltem frequenter, raro autem mares aggrediuntur, hystericorum nomine donantur; eadem tamen absque ulla uteri actione excitari posse ostendimus, minime vero absque praecedenti solidi nervei vitiosa textura, a qua tota horum malorum myriades sane pendet, quae textura cum in foeminis diversa sit ab ea, quae in maribus invenitur, idcirco diverso-

diversorum pathematum susceptibilis est, & haec potissima quidem est ratio, propter quam morbi hysterici dicti ab hypochondriaca virorum affectione differunt, nec uterus, nisi pro remota & occasionali, non autem proxima horum morborum causa est considerandus, in quibus morbis multo minorem partem gerere, quam in hypochondriaca affectione ventriculus & intestina, plane evincitur.

Praeter peculiaria foeminarum symptomata etiam communia cum maribus sunt expendenda, quae cum illis saepius iunguntur, & quae superius etiam in hoc capite exposuimus. Posita igitur in foeminis rariori solidi nervei & membranosi structura, sed non ubique aequaliter rara, atque eiusdem toni, quaedam eorumdem solidorum fibrae animali spiritu magis tument, quaedam minus, proinde & inaequaliter contrahuntur: quippe momentum illarum multo maius est momento istarum, illaeque istas maiori vi ad se trahunt, quam trahantur ab istis, ideoque reciproca & aequalis tollitur membranarum partium oscillatio, quae ab aequali fibrarum contranitentium actione servatur, ex quo innumera hypochondriaci morbi accidentia tanquam a proxima & universali causa oriuntur.

Ac si a stomacho & intestinis exordiamur; perturbato illius fibrarum muscularium oscillatorio motu, vel blanda alimentorum attritio, & solutio impeditur, atque eorundem in ventriculo mora nimis prorogatur, quae postea ipsorum corruptionem,

vel saltem aciditatem, & acrimoniam affert, cuius effectus in nidorosis rutibus frequenter experiuntur etiam hypochondriacae foeminae, vel e contra fibrarum anularium ordo longitudinalibus praevalens ipsa ingesta praemature eliminat, quae si eandem in intestinis dispositionem inveniant, male soluta & inconcocta excernuntur. Si vero oscillatorius, seu peristalticus fibrarum intestinalium motus haud celerior & praecipuus, sed nimis tardus atque suspensus sit, quod ab inaequali earundem fibrarum hic, illic contranitentium momento oriri fas est, non solum alvi stypticitas habetur, sed etiam a contentorum diuturna stasi salino-volatiles particulae exaltantur, & nerveam tunicam moleste proritando intestinale tubum in praeternaturales contractiones eiusdem diametrum valde coangustantes inducunt. Interim aereae molecule rarescentes a contentorum particulis, quibus inhaerent, expediuntur & coeuntes flatulentam materiam parant, quae cum in viam a praedictis contractionibus pene oclusam incidat, nec a peristaltico motu suspenso ac perturbato deorsum pellatur, aequilibrum vi sursum tendit, donec fortasse ad pylori valvulam, si tenuia intestina occupet, perveniat, si vero crassa, ad valvulam coli, sive ilei insertionem, a quibus quodammodo repulsa & reflectens fortes rugitus, magisque rareficans enormes hypochondriorum tensiones parit, aliaque plurima ini ventris symptomata, quae iam superius aliquoties exposuimus, & explicare

explicare curavimus, quorum diversitatis ratio in diversa temperamentorum constitutione posita est, quae ipsius affectionis hypochondriacae speciem exhibet, cuius varia est mechanica & quae diversam exposcit curationem:

Equidem foeminei corporis eiusque solidi praesertim nervei textura rarior & flexibilior statuitur, quam in viris; verum plures sunt etiam in foeminis rarioris texturae ac flexibilitatis gradus. Quaedam enim densiorem solidorum compagem nactae sunt, ut virilem aemulentur, quemadmodum e contra quidam virorum adeo rara & flexibili solidorum textura donati sunt, ut ad foemineam prorsus accedant. Praeterquam quod varia eorumdem solidorum elasticitas perpendenda nec non fluidorum natura, quae ab ipsa elastica solidorum vi crasim accipit. Uno verbo temperamentorum diversitatem, quae in peculiari solidorum & fluidorum affectione collocatur, respicere debet medicus, ut specificum huius morbi characterem agnoscat, suamque curationem recte dirigat.

Eruendae sunt igitur indicationes iuxta praecepta ac monita superioribus capitibus allata, quae si repetere vellem, taedio lectores profecto afficerem. Sufficiet ideo pro tironibus quaedam universalia tradere auxilia, quae ad hypochondriacum & hystericum morbum curandum efficaciora expertus sum, quorum externa prius & a chirurgico fonte deprompta expendamus. Antequam tamen cura-

tivam methodum exaremus, hypochondriaco - hystericarum status duplex considerandus, acutus scilicet, & lentus.

Si acutus, vehementes illos paroxysmos amplectitur, in quibus foeminae e. g. sensibus omnino carentes tamquam apoplecticae iacent, vel diris convulsionibus vexantur, vel suffocationibus & strangulationibus opprimuntur, vel maniaca furore invaduntur, vel acutis doloribus, veluti colica hysterica, clavo quoque hysterico aliisque similibus cruciantur. Quo posito causae sunt investigandae, non solum dispositivae, quae corporis temperamento inhaerent, de quibus tirones iam monuimus, sed etiam motrices eosdemque insultus provocantes. Si enim menstruorum suppressio, aut imminutio accusetur, plethorico existente corpore, vel materiae seminalis, aut volatilium partium copia, quae fluidorum massam repleat, & ad virilem concubitum alliciat, aut quodcumque animalis liquidi solidique nervei organum suscitare valeat, calidiora antispasmodica vulgariaque remedia prorsus fugienda.

Venae sectionem utique in his casibus caeteris quibuscumque remediis anteferre debemus, de qua nemo profecto rationalium medicorum dissentit, ac satis imminuta vasorum plethora diluentia, ac in menstruorum defectu fomenta, balnea aquae dulcis, pediluvia sunt administranda, nec non suffumigia, & specifica odorifera, aut potius grave olentia in

actuali paroxysmo; deinde diluentia & aperientia, sed temperata, e. g. vulgares decoctiones rad. asparagi, rusci, aristol. rot., graminis, herbae capill. V. fumariae, ceterach. pentaph., quae vel solae vel alicui blando emmenagogo superbibantur, quod erit extractum fumariae, vel agrimon. drachm. i. ad drachm. sem., croci orient. gr. xv. tart. vitriol. drachm. sem. cum syr. de quinque radic. F. B. pro una dosi ad quindecim ac viginti dies mane repetenda.

Iis vero, quibus menstrua non deficiunt, sed ferventi corporis habitu gaudent, diluentia, refrigerantia & sedantia tantummodo prodesse possunt; serum scilicet lactis, vel saltem cichoraceae decoctiones, emulsiones ex frigidis feminibus cum nitro depurato, aut papaverato, absorbentia & testacea, succinata addito semper nitro, ac ipsum semen papaveris & agni casti, quae omnia nimiam fluidorum rarefactionem & solidi nervei irritamentum, eiusque motus *ataxiam* compescere valent. His tamen remediis in utroque casu purgantia ex lenientibus sunt praemitenda, ex simplici nempe cassia, vel extracto polypodii ac sale tartari parata, aut manna sero lactis soluta. Opportunum imo necessarium erit oleum amygdal. dulc. drach. i, quod diras crispationes prae aliis remediis lenire & sedare solet. Paregorica cum succino, aut cinnabaro sociata, aquae thermales, sed temperatae, acidulae vero in primo casu praestantiores, quippe ad menstrua promovenda val-

de inserviunt; in secundo casu ubi sola refrigerandi & solidi nervei orgasmum compescendi indicatio habetur, aquae dulces, aut nitratae paucio scilicet nitro decoctae erunt idoneae, ptisanae refrigerantes ex hordeo & avena praesertim Hannoveriana compositae, quibus addam in utroque casu multum profuturam esse aquam ad usum potus pro vino, de quo non nisi paucam quantitatem, & ad dimidium cyathi post cibum, ut bibant aegrae oportet.

Si vero non ex menstruorum suppressione, vel saltem non ex vasorum plethora, nec materiae seminalis, aut partium volatilium copia oriatur morbus, minorem sanguinis quantitatem extrahere, ac specifica nervalia efficaciora adhibere expediet, praesertim si solidorum tonus imbecillior sit, ac nervorum textura valde rara & laxa, propter quam sanguis, & caetera fluida crudis rudibusque moleculis referta sint. Vulgaria itaque antispasmodica, anthysterica dicta, tunc amplectenda, veluti assa foetida, castoreum, faecula bryoniae, galbanum, aquae specificae, five simplices, ut artemisiae, nucum viridium, fl. sambuci, cerasorum & aliae, quae etiam obstetricibus notae sunt, five compositae, ut aqua hirund. cum cast., anthysterica Querc., deinde huius generis spiritalia & volatilia, nempe: elixir uterinum Crollii, tinctura castorei, liquor anodynus mineralis Hoffmann.

Si autem hypochondriaco hysterico morbus lentus sit, eiusque sympto-

symptomata virorum symptomatibus prorsus similia; cuius speciei sit affectio, erit primo investigandum iuxta regulas superius allatas, quae percepta curativae indicationes rite desumi poterunt, pro quibus iisdem remediis illic recensitis, seu eadem methodo uti oportebit. Modo tamen monendum mihi restat; quod scilicet hysterici paroxysmi vehementes cum post datum circiter temporis spatium revertuntur, ope Ch. Ch. plerumque feliciter curantur, ut ego ipse non semel expertus sum.

Mulier 25. annorum plethorica atque musculosa, quae tres partus habebat, postquam timoris & moestitiae occasionem acuta ventris tormina passa fuit, quibus communi remedium methodo oleosorum tum per os, tum per alvum clysteribus mediantibus, unctionibus, fomentis & paregoricis obuiam ivi. Haec quamvis praedictorum remedium ope quiescerent, haud tamen exstinguebantur, quippe minus intensa quidem, sed post aliquantulum temporis per vices revertebantur. Praeter dolores cibi fastidium, cardialgiae, praecordiorum anxietates, ventris rugitus eandem vexabant. Efficacia purgantia, sed temperata adhibui, atque repetii, praemissa quoque larga venae sectione, tandem, cum omnia accidentia aliquantulum remissa viderentur, repente ab immani respirandi difficultate & suffocativa strangulatione, animique furore aggressa fuit, ut per fenestras se proicere conaretur. Repetita venae sectione se-

datus fuit insultus, sed postridie redit, duas circiter horas perdurans, deinde post unius diei intermittentiam rursus aegram invasit, & pene constantem periodum acquisivit. Antispasmodica, sive anthysterica remedia paregoricis sociata non omissis etiam diluentibus & refrigerantibus parum iuvabant, tandem Ch. Ch. usu cessarunt praedicti insultus, & integrae sanitati paucos post dies restituta fuit.

Virgo 30. annorum sanguinei temperamenti, ac succi plena stomachi affectionibus praecipue vexabatur, nempe doloribus, sed saepius vomitibus cum viscoae materiae expulsionem, nausea, cardialgia, deinde cordis palpitatione, praecordiorum angustis, tussi, vigiliis nocturnis, vertigine; menstruum tamen cursu minime defraudabatur. Nihilo minus frequentibus venae sectionibus indigebat, a quibus sensibile levamen ipsa percipiebat, purgantibus pariter medicamentis non raro utebatur, tum ad stomachum exonerandum, tum ad ventrem summa stypticitate detentum laxandum. Praeter purgantia & minorativa, seu viscosos succos in eiusdem stomachi glandulis haerentes incidentia, roborantia quoque, & fibrae elasticitatem promoventia praescribebantur. Tandem convulsiva quaedam accidentia supervenerunt cum totali sensuum defectu, corporis lapsu, rigida artuum & totius corporis tensione, dentium stridore, quandoque cum spuma ex ore. In hoc autem statu integram horam pertransibat, postea de universali dolore

& contusionis sensu querebatur; idemque insultus eadem hora quotidie repetebat. His accidentibus occurrere conati sumus iteratis sanguinis extractionibus, non solum per venae sectionem, sed etiam per hirudines haemorrhoidalibus vasis applicatas & capiti pone auriculas, pediluvii ac perfrictionibus, nec non suffumigiis nervalibus, emeticis, ex sola ipecacuanna, anthelminticis, cinnabarinis, succinatis, aliisque antispasmodicis, & capitalibus remediis, tamen temperatioribus, deinde specificis & decoctis. Quae cum inefficacia experti fuisset, Ch. Ch. praescripsimus: verum nec ab illa sensibile levamen retulit patiens. Omnibus itaque frustra tentatis ad mercurialem unctionem confugimus, qua nondum peracta; sed inchoato ptyalismo cessarunt insultus, nec amplius illam molestarunt. Priora autem pathemata, quamvis ab hoc remedio non extincta, tamen adeo retusa ac remissa fuerunt, ut non nisi leviter ac per vires aegram molestant, ac ipsa sufficienti valetudine modo fruatur.

Mulierem 35. annorum minus calidi, quam humidi temperamenti gravis respirandi difficultas absque tussi, ac febre nocturno tempore invasit, quae iteratis venae sectionibus, oleo amygdalarum dulcium aliquoties repetito, emulsionibus refrigerantibus, opiatis antispasmodico nuptis, paucis diebus prorsus sedata fuit. Notandum hanc aegram nullam occasionalem sui morbi causam accusare potuisse, sed solam menstruorum proximis ante paroxysmum mensibus in-

opiam. Anno sequenti eodem mense de obtuso capitis dolore, cardialgia, ventris rugitu, cibi nausea, vomitu, palati amaritudine, atque viscositate queri caepit: vires deficiebant, ac interdum lipothymiae superveniebant, ex quibus lectum petere cogeatur, his accedente profundo animi moerore cum propriae salutis desperatione. Haec pathemata perpendens, atque cum illis superioris anni comparans, nihil aliud esse praeter spasmodicae hypochondriacae affectionis symptomata arbitratus sum; priorem scilicet respirandi difficultatem spasmodicam vertebrarum thoracis & intercostalium atque diaphragmatis nervorum crispaturam fuisse, posteriorem vero symptomatum syndromen praeternaturalem organicarum partium contractionem tum capitis, tum imi ventris viscerum: capitis, scilicet, quia internis eiusdem membranis praesertim pia matre, cerebri anfractus, quos penetrat, forsitan constringente, haec contractio arteriolarum spirituum materiam medullaribus tubulis suppeditantium extremitatem comprimit, ex quibus regrediens sanguis, ac eorundem diametrum violenter distendens corticalem substantiam opprimit, & ipsius membranae fibras distrahens dolorem capitis gignit: compressis vero praedictis arteriolis cum iisdem medullaribus tubulis spirituosae materiae notabilis portio deficiat, animalium spirituum secretio, & ad organa influxus imminuitur, proinde vires languent, ac in molestas lipothymias aegra quandoque

quandoque cadit. Abdominis pariter, quia nervorum stomachi & intestinorum plexus animali liquido inaequaliter inflati absque ordine contrahuntur, & ita musculosarum fibrarum motus oscillatorius intercipitur, aut perturbatur, quare idem stomachus prave digerit, cibum nauseat, & ingestum aliquando evomit, ac interclusis flatibus murmurant intestina. Perturbato ac interrupto tot partium praesertim medullarium cerebri fibrarum motu oscillatorio, necessario mens contristatur, quippe, ut alibi ostendimus, natura de constanti & harmonica solidorum oscillatione gaudet, cuius opē fluida motu uniformi per minima etiam vasa progrediuntur; at in perturbata ac interrupta eadem oscillatione fluida remorantur, quod cum ad salutis & vitae destructionem tendat, idcirco mentem moerore afficit. Interim cruditatum infarctui in stomachi glandulis se manifestante emeticum ex blandis praescribere volebam, sed renuente aegra, potionem ex manna in decoctione sennae & tartaro solutam eidem emetico subrovagi: postea mediocrem sanguinis extractionem e vena pedis fieri iussi, quam Chirurgus ipsi aegrae gratificaturus nimis larga manu exequutus fuit, ideoque non expectatum levamen, sed aliquem languorem ab hac extractione retulit; quapropter antequam ad specifica, seu curativa remedia transirem, aliquo confortante usus fui, deinde rhabarbari tincturam cum sale tartari extractam in decoctione radicum asparagi, rusci, fumariae, sem. cumini & anisorum

praescripsi, quam per octodecim dies hausit, bis intermisso ac in fine rursus exhibito medicamento ex cassia cum eodem rhabarbaro, sale tartari, diagydio & cinnamomo. Exonerato ventriculo, eiusque glandularum farcimine, nisi prorsus, saltem pro maiori parte soluto, ad corroborantia, stomachi & intestinorum tonum instaurantia, ac universi membranosi & nervosi systematis amissam elasticitatem promoventia confugi, nempe tincturam martis aronizatae in aqua menthae, melissae compositae, quam ad 30. circiter dies prosequuta est, deinde properante hyemali frigore essentiam absynthii Helvetii in chocolata sumpsit, postea balsamum Peruvianum ad guttas tres in iure; a quibus remediis tamen parum iuvaminis consequebatur. In hoc statu hyemen transegit. Accedente autem vere blandum emeticum, quem prius recusaverat, eidem exhibui, Ipecacuanam scilicet ad drachm. ii. cum tart. vitriolati pauca quantitate uno, vel duobus intermissis diebus ter repetii, non absque sensibili aegrotantis levamine, quae a priori nausea pene evaserat, deinde magisterium martis aperitivum macis, & oleo cinnamomi aliquantulum aromatizatum ad plures dies caepit, post quod ad ius viperinum transiit. Interim cum morbi symptomata aliquantulum remissa essent, sed non extincta, mense Iulii aquas acidulas consueto ordine bibit, quo peracto quidem convaluit, ac menstruorum fluxum aliquantulum copiosorem assequuta fuit.

Virgo 32. annorum melancholicum & ficcum corporis habitum nacta, quindecim ab hinc annis post febrem continuam, sed non inultum acutam, ex genere scilicet synocharum, stomachi doloribus, vexari caepit, quibus trita methodo oleosorum & anodynorum remedium liberata fuit; tamen post aliquot menses iidem redierunt dolores magisque acerbi, ad quos compescendos praeter oleosa & paregorica sanguis quoque e vena extractus fuit, deinde blando emetico bis repetito praeter modum viscosi succi e ventriculo eiectiones fuerunt, rursusque anodynis per fomenta & unctiones, oleosis & paregoricis ventriculi fibrarum crispationem laxare conati sumus. Nihilominus sedati dolores quandoque reviviscebant, tamen mitiores. Anno circiter transacto acuta febre prehensa fuit, cui accesserunt ventriculi & intestinorum dolores cum dolorosa ventris intumescencia, vomitibus spontaneis aeruginosam viridemque materiam eiicientibus. Tunc medici opus fuit acutae febris impetum & calorem compescere, ventris inflammationem praecavere, vomitusque occasionem tollere, quod repetitis venae sectionibus, unctionibus ac fomentis, clysteribus laxantibus & anodynis, sero lactis destillato, emulsionibus frigidis, gelatinis, laudano, nitratis, alkalinis, ac temperatis antispasmodicis praestitum fuit. Discessit itaque febris, ac detumuit venter, aliqua tamen remanente duritie universali; dolores quoque recesserunt, sed non prorsus abierunt.

Nam paulo post datis cuiuslibet fere diei horis, post prandium scilicet, ac summo praesertim mane postquam expergiscebatur, iidem stomachi dolores exsurgebant, non tamen adeo vehementes; qui adhuc, sed aliquanto leviores eodem ordine perseverant. Symptomata, quae praeter dictos stomachi dolores aliquot annorum cursu pertulit infirma, fuerunt: praeternaturalis rerum absurdarum appetitus, sive pica, qua inter caetera carbones deglutiebat, quaedam praecordiorum angustiae, rauco, gulae compressio, interdum sensuum abolitiones, menstrua modo parca, modo nimis copiosa narium haemorrhagiae. Postea ab hinc quinquennium lumborum dolores in alterutro latere nephritim praemonstrantes, quandoque insurrexerunt, quos etiam urinae suppressio ad 30. & plures horas sequebatur. Urinae plerumque crudae & aquaeae, quandoque rubrae ac multum sedimenti etiam arenosi secum ferentes exercebantur, deinde copiosus sanguinis mictus superveniebat, qui adhuc quandoque renovatur. Praeterea sicca tussis, haud tamen constans, sed recurrens accessit, interdum cum aliquo sanguinis sputo, febris quoque plerumque levissima, atypus, in qua viribus non destituebatur infirma, quippe raro in lecto commorabatur, nec sufficienti nutrimento destituebatur. Haec autem sunt accidentia, quibus ipsa patientis praedicto temporis spatio vexata fuit, quibusque adhuc, sed multo levius molestat. Remedia, quae hoc tempo-

tempore adhibita fuerunt, plurima sunt, nec singula referre, etiam si cuncta memoria tenerem (quod nimis arduum) operae pretium censeo. Notandum tamen huius stomachum adeo exquisitae sensationis modo esse, ut levissimum blandumque leniens deglutire non possit, quin acerbos ineat dolores. Quare leniens, quod minori molestia ferre possit, est oleum amygdalarum dulcium, sed ad duas tantum uncias cum aliqua anodyna decoctione, aut iure ipso haustum. In hoc itaque temperamento atque corporis habitu, in quo solida nervea ad spasmodicas crispationes adeo facile incitantur, eorumque fibrae summam rigiditatem a natura consequutae sunt, ob quam lente & imperfecte oscillant, laxantia, emollientia, diluentia, & anodyna semper adhibere opus fuit; idcirco praeter unctiones, fomenta ac pediluvia, balnea aquae dulcis opportunis tempestatibus aliquoties facta fuerunt, a quibus inter caetera notabile levamen persentit; urina enim, si suppressa, statim solvebatur, ventris durities & tensio paulatim laxabatur, ac dolores re mittebant. Lac caprinum ordine semidiaetetico, primo crudum solo saccharo commixtum, postea ob digestionis defectum decoctione radic. chinae dilutum atque decoctum sum-

psit, quod cum a stomacho caeterisque solidis non satis subigi noscetur, asininum substitutum fuit, quod quidem minus rudem, sed non perfectam concoctionem assequebatur. Aquas minerales ex acidulis temperatioribus bibit, quae licet ab aegra satis mingerentur, tamen stomachi dolores potionis diebus aliquantulum exasperabantur, idcirco aquas dulces Nocerianas acidulis substituiimus, ac paeterito aquarum tempore ad ptisanas refrigerantes transivimus, postea ad traumatica, vel potius leviter incrassantia decocta; postremo vero ad destillatum ex infusione ras. Cor. C. lacte vaccino, testudine nemorali &c. cuius formulam superius descripsimus. Alkalina, nitrata, cinnabarina, succinata, nec non specifica nervalia, & anthysterica, sed temperata, non omisimus; quaecumque enim spirituosae, volatilia & exaltantia, in gradu etiam remisso, absque molesto caloris sensu atque doloris stomachi exacerbatione ferre nunquam potuit. Aquam loco vini plerumque bibit. Ut vero praesentem aegrotantis statum referam, dicam huiusmodi incommoda admodum quidem mitiora evasisse, sed nondum extincta dici posse, quod tamen aliquando vere dicturos esse speramus.



C A P V T II.

De affectione hypochondriaca scorbutica.

Nullam fortasse nostri corporis affectionem hypochondriaco morbo magis cognatam & affinem, quam scorbuticam inveniemus. Equidem hypochondriaci morbi causam proximam esse talem solidorum praecipue affectionem, qua oscillatorius fibrarum motus perturbatur, ac naturalis & animalis oeconomiae ordo vim patitur, ostendimus; Scorbutica autem affectio pro summa fluidorum massae dyscrasia & corruptione passim definitur, qua universi corporis functiones admodum laeduntur (a). Modo vero huiusmodi fluidorum dyscrasiam a praedicta solidorum oscillatorii motus interceptione oriri facile demonstrabimus, idcirco quaedam veritates sunt ponderandae, ac pro postulatis habendae.

I. Sanguinis crasin eiusque partium componentium naturam & proportionem non solum a vi cordis propulsiva, sed etiam arteriarum praesertim minimarum alterna contractione & dilatatione pendere; si motus scilicet vitalis arteriarum a quibusdam sic appellatus (b), fortis sit, ac naturali celeritate praeditus, optimam consistentiam, ac partium componentium aequam proportionem assequitur sanguis: si nimis vehemens sit huiusmodi motus, sive contractilis earundem arteriarum vis contenti fluidi resisten-

tiam praetermodum excedat, valde compacta erit eiusdem sanguinis crasis, ac rubrorum globulorum ratio serosorum rationem nimis superabit; e contrario, si nimis lentus, aut imbecillis, idem motus, laxa quoque erit sanguinis compages, ac rubrorum globulorum ratio aequa serosorum ratione aliquantum inferior, quorum phaenomenorum explicationem superius attigimus.

II. Considerandum chyli materiam, quae quotidie sanguinem adit, nisi contractili solidorum vi satis subigatur, ipsius cruoris massam caeteraque fluida rudibus moleculis coinquinare.

III. Quod fluida nostri corporis, praesertim sanguis, si progressivo motu in aliqua parte desituantur, aut valde lentescant, eiusdem corporis calore admodum commotis eorundem particulis corrumpuntur, vel saltem salinis ab oleosis extricatis acrimoniam, aut aciditatem acquirunt, pro ut varia salinarum molecularum fluidis innatantium figura, quae porro solidas partes diversimode prorit, ac stimulo afficit.

His praemissis mechanicum modum, quo hypochondriaca affectio in scorbuticam migrat, clare concipiemus; verumtamen quae ad diagnosim spectant prius evolueri oportet.

Si

(a) Hoffmann. T. IV. par. V. Cap. de Scorb. de Motu Vitali.

(b) De Gorter Exercit. Med.

Si itaque hypochondriacus de praeternaturali lassitudine queri incipiat, summaque corporis gravitate, qua proprios artus attollere vix possit, vagis vel fixis doloribus lancinantibus molestetur, praesertim in thoracis & costarum regione, faciei color pallido fuscus appareat, sinistri hypochondrii conspicua tensio atque durities, acris gingivarum pruritus, ichorosa, vel sanguinea substantia ab iisdem gingivis fluens, maculae latae, vel parvae rubri, vel potius obscuri coloris, oris halitus male olens, alvus modo laxa, modo pertinaciter sicca, frequens sanguinis e naribus excretio, vel repentina irruptio, levis respirandi difficultas, virium prostratio, lipothymiae, lenta febris, parvi pulsus; haec si adsint, scorbutica affectio quoque adest. (Monendum tamen, non de primario ac essentiali scorbutico, sed de illa tantum scorbutica affectione, quae ab hypochondriaca prodire saepe observatur, nos hic sermonem habere). Quotiescumque igitur in hypochondriacis oscillatorius motus non solum perturbatur, sed in aliquibus saltem partibus suspendatur, fluidorum progressus motus intercipitur, chyli molecule imperfectae atteruntur, ideoque sanguis crudis asperisque particulis repletur, quae in locis a corde valde disiunctis vasisque minimis necessario lentescunt, eorumque diametros obstruunt.

Hoc in abdominis visceribus plerumque evenit, quippe, ut superius perpendimus, cum fluida in venae portae ramis a mesenterio, ventricu-

lo & intestinis caeterisque visceribus oriundis, utpote a propulsiva cordis vi remotioribus, lento motu progrediantur, crudae huiusmodi particulae per caeliacae & mesentericae arteriae extremitates ad eosdem venae portae ramulos advectae, ob oscillatorii impulsus defectum, & ob irregularem asperamque earundem superficiem vasculorum parietibus adhaerentes, in ipsorum ostiis remorantur atque coagmentantur, & sic fluidorum progressus sistitur, minor materiae biliolae quantitas ad venae portae truncum defertur, sanguis in praedictis arteriis regredi conatur, ac molestas distensiones ventriculo & intestinis affert, aliquando cum febre ac vomitu, atque hypochondriorum tensione, interdum serosiore materia ob interclusum ex arteriis in venas transitum per laterales tubulos ac secretoria oscula praeternaturali cursu secedente diarrhaeas. In liene cum maior fluidi quantitas per arterias appellat, quam per venas refluat, nec aliis secretoriis tubulis, per quos imminui possit, gaudeat, eiusdem visceris vasa tument, eiusque magnitudinem augent, quae in sinistro hypochondrio conspicua redditur.

Cum lienis officium in ventre pulmonum officio in thorace simile a recentioribus passim existimetur, sanguinem scilicet, qui per eundem transit, attenuare, aliumque, cui in venae portae trunco commiscetur, diluere, ut bilis materia datum fluiditatis gradum acquirat; deficiente ideo lienis munere, eo crassior evadit biliolosa materia, eoque tardiori motu

ad hepar fertur, immo quia a trunco, seu sinu venae portae ad ramos hepaticos nempe a latiori ad angustiores canaliculos tendit, difficulter progreditur (quidquid in contrarium sentiat celeberrimus Hambergerus, qui huiusmodi motus retardationem ab opposita causa oriri putat (a), non solum scilicet ob angulum, quem rami cum trunco efficiunt, sed & ob amplitudinem summam ramorum maiorem, quam est amplitudo trunci) difficulter inquam progreditur eadem bilis materia, nisi capsulae membranosae oscillatoria contractione valide compellatur; quod cum ob elasticitatis defectum & eiusdem motus oscillatorii interruptionem consequi nequeat, secretorios bilis tubulos aegre subit, ac in extremis ipsius venae portae hepaticae ramulis aliquandiu stagnat, ac naturalem texturam pervertit, donec nova bilis illuc iugiter affluente materia in laterales canaliculos ad venam cavam ducentes praeternaturali quantitate abire cogatur, qua cruoris massam coinquinat, quae cum flavum colorem bilioso succo peculiarem amiserit, atque obscurum terreumque induerit, eodem quoque universam cutem inficit, qui interdum adeo obscurus fit, ut nigrae icteritiae colorem aemuletur.

Nimis pauca igitur bile ad intestina fluente deest facibus necessarium vehiculum, per quod intestinales parietes lubricantur, eorumque fibrae nerveae salino-lixiviosis particulis ad motum peristalticum incitantur; ideo-

que summam alvi stypticitatem interdum experitur aeger. Hanc necessario consequuntur imperfecta digestio, ac cibi nausea; musculosae enim ventriculi fibrae pene inertes ingesta languide subigunt, ac tarde eliminant ita, ut ipsa alimenta ex diuturna mora acrimoniam acquirant, qui per ructus ac eiusdem ventriculi dolorem se manifestat. Insuper huius visceris glandulae ac secretoria vascula, valde lentescunt fluidis, crassioribus succis infarciuntur, qui ipsius membranas onerant, eorumque motum attritionis supprimunt, atque gastricum liquorem ad macerandum cibum destinatum intercipiunt, vel saltem viscosiorem & suo muneri ineptum separant.

Adeo multiplicantur in vasis minimis hinc, illinc stagnationes, ut pleraque organa secretoria obstruantur, & ita suppressis liquidorum separationibus, sanguinis caeterorumque fluidorum massa retentis liquidis, quae fecerni debent, contaminatur, ac veterum cacochymiam constituit, propter quam eadem fluida solidorum momento magis resistunt, & ita naturalis oeconomiae ordo pervertitur. Insuper coinquinatorum atque stagnantium fluidorum textura eo magis depravatur, salinae elementares particulae ab oleosis exsolvantur, atque coagmentatae in angulosas asperasque moleculas excrescunt, quae ad tenuiora vascula delatae eorumque laxioribus parietibus haerentes easdem scindunt cum ipsius sanguinis effusione, praeser-

(a) *Physiolog. Med. edita 1751. Acta erudit. Lipsiae 1752.*

praesertim in gingivis, quarum vascula valde exilioribus tunicis constant, vel nervosas tertii & quinti paris propagines vellicant, molestoque pruritu atque dolore aegrum afficiunt.

In essentiali autem scorbutico ulterius procedit morbus, quippe eorundem vasculorum tonicis motus, sive a fibrarum laxitate, quod plerumque evenit, sive a nimia rigiditate atque spasmodico erethismo prorsus deficit. In primo casu flagnantibus succis praedicta vascula turgescunt, iisdem corruptis flaccescunt, & in gangraenosos abscessus migrant, qui male olent: in secundo, vasculorum diametri adeo coarctantur, ut affluentia liquida excludant, & ita arescunt gingivae atque extenuantur.

In peripheria quoque corporis consistunt fluida, quorum tenuiores ac volatiliores particulae, quae per cutis ineatus ad transpirationis evacuationem implendam sunt eliminandae, vel a sanguinis sinu, ob magnam eiusdem dyscrasiam, ac viscosarum & lentescentium molecularum aggeriem, qua idem sanguis repletur, extricari nequeunt, vel ab extincto oscillatorio arteriolarum motu, quae transpirabilem materiam in secretorios cutis meatus propellere debent, non emittuntur. Haec autem transpirabilis materia diutius in iisdem vasculis retenta ac exaltata multo acrior fit, eiusque particulae cutaneorum vasculorum fibras scindendo, aut porulos instar cuneorum dilatando, sensim prodeunt, ac ulcerosas in cute pustulas

efficiunt, quae in essentiali scorbutico saepe in profundas atque exedentes plagas degenerant; vel intra cruoris massam per venas regredientes eadem particulae rubros globulos penetrando ac dividendo, eiusdem sanguinis crasum eo magis destruant, & liquida ab ipso derivantia, praesertim lympham coinquinant.

Posito huiusmodi fluidorum in capillaribus peripheriae vasculis lentore, sanguis ab extremis arteriolis in venas tarde migrat; ideoque a sanguine e truncis veniente maiores sustinet impulsus, ex quibus idem sanguis in laterales canaliculos ad transpirationis, aut sudoris materiam secernendam tantummodo aptos violenter intruditur, qui cum tam angustos cutis porulos permeare nequeat, sub cute expanditur, ac maculas repraesentat, quae vel purpureae, vel obscurae, prout crassior, aut fluidior erit ipsius sanguinis crasis, & maior, vel minor lentoris gradus, illius praecipue, qui e propriis vasis egressus sub eadem cute transparet. A praedicto lentore obstructae arteriolae, cellulosas musculorum membranas perreptantes, ob interceptum fluidi motum valde tumunt, ac earundem tunicas vehementer distrahunt, non sine acutis ac lancinantibus doloribus, qui in scorbutico rheumate notantur, & qui saepe circa thoracem saevientes pleuritidem mentiuntur.

Haec symptomata a lenta febre plerumque comitantur, praesertim si ad essentialis scorbuti gradum accedant. Etenim aucta sanguini circulanti, pro-

inde & solidis impellentibus resistentia, & assiduis ac pene universalibus irritamentis provocata eorundem elasticitate, ad frequentiores oscillationes determinantur, quae tamen ob imminutam spirituosae substantiae & elasticorum globulorum in sanguine quantitatem, qua idem a solidis impulsus in solida reagit, & ob universalem solidorum atoniam, ob quam minori vi a corde pellitur, ac minori momento in arterias nititur, imbecilliores sunt, idcirco pulsus languidiores quoque & parvi diametri percipiuntur.

Sanguis praeterea ita lentescens, ac volatilioribus particulis spoliatus paucam spirituum materiam cerebro suppeditat, quae ob languidam arterio-
larum quoque ipsius cerebri contractionem a crassiori parte difficulter evadit, & secretorios medullaris substantiae tubulos lente ingreditur, ex quo virium prostratio, & aliquando lipothymiae superveniunt, nec non levis in respiratione anhelitus, qui scorbuticum assidue opprimit; nam imminuto ad nervosum genus spirituum influxu, animales & naturales actiones cito languent.

Non solum vero sanguinis, sed etiam lymphaticae substantiae lentescentis perniciosi effectus in scorbuticisprehenduntur; quoniam lymphaticae arteriolae, quae inter nervosos tubulos & membranosas fibras pro earundem partium nutritione excurrunt, adeo inflantur, ut ipsi tubuli ac fibrae a se invicem valde distrahantur, aut comprimantur: magna vero fi-

brarum distractio, praesertim si inaequalis sit, acerbos dolores parit, & animalium spirituum motus ataxiam, qua finitimae, vel quocumque modo communicantes nervorum propagines inaequaliter repelluntur, & ita spasmodicas contractiones dolores interdum consequuntur, atque summa compressio liberum animalis spiritus influxum ad musculos impediens quemdam artuum stuporem refert.

Haec & similia symptomata hypochondriaco morbo quandoque accedunt, quae, si leviora, aut mediocriter gravia, absque mortis scilicet, saltem proximo periculo, hypochondriaco-scorbuticam affectionem tantummodo efficiunt, si vero pernicio-
sa & ad mortem verisimiliter ducentia, essentialem scorbutum enuntiant, in quo pro desperata aegri salute ut plurimum conclamare fas est.

In essentialem vero scorbutum migrare posse hypochondriacam affectionem ex modo dictis manifeste evincitur, quippe eo magis laxato solidorum tono, ac infirmato oscillatorio motu, liquida diuturniores stagnationes patiuntur, ex quibus non solum pravae sanguificationes, & in liquidis stagnantibus salino-fixarum partium ab oleosis separationes, quae vitiosam reddunt earundem crasim, sed etiam tales volatilium partium fiunt exaltationes, ut ipsorum liquidorum natura omnino pervertatur ac corrumpatur. Huiusmodi succorum depravatio atque corruptio inter caetera huius morbi phaenomena ex eoprehenditur, quod per contagium commu-

communicatur, ut animadvertit Hoffmannus (a), qui omnium contagiosarum affectionum putridas exhalationes pro causa agnoscit; siquidem haec, inquit, *altius penetrando instar seminis, seu fermenti humores iam dispositos praesertim pingues inquinant, & in suam convertunt naturam.*

Sennerti observationibus praedictus auctor propriam sententiam confirmat a solo scilicet cadaverum scorbuto extinctorum foetore hunc morbum irrepsisse, atque auctoritatem Caspari Hoffmanni adducit, qui (b) ab hoc morbo extinctorum cadaveribus, cum putrescere incipiunt, sodales abesse oportere monet, nisi eadem labe contaminari velint. Quae phaenomena modo expositam morbi mechanicam confirmare videntur: miasmata enim scorbuticorum cadaveribus effusa non in fluidorum tantum massam, sed in solida quoque suam actionem exercent, quippe non illico contagii effectus, & acquisiti morbi symptomata infectum adoriuntur, quemadmodum si sola fluida, veluti viperarum & serpentum venena, ut plerique saltem recentiorum putant, afficerent, sed eadem mechanica, qua effluvia e phthificis emanantia adstantes inficiunt. Nam illa mediante inspiratione pulmonares vesiculas ingressa, utpote tenuiora & volatilia earundem vesicularum poros penetrant, & pulmonares nervorum plexus atque propagines ita feriunt, ut spasmodice contrahantur,

& arteriolarum diametrum secretoriaque glandularum vascula coarctent, ac liberum in primis ex iisdem arteriolis in venas transitum intercipient; deinde secreta liquida ad bronchia humectanda destinata intra glandulas cohibeant, quae sensum in dura tubercula summa bronchiorum siccitate excrescunt, unde phthificorum accidentia insurgunt. Ita scorbuticorum quoque effluvia, sive putentium cadaverum, tum ab inspirato aere evecta, tum salivae immixta in nostrum corpus se insinuant, ac fluidorum circulantium ope huc, illuc deferuntur, solidisque partibus adhaerent, ac nervosi & membranosi systematis fibras permeando earundem tonum everunt, atque contrahendi vim labefactant; hinc deficiente oscillatorio organicarum partium motu omnia oriuntur, accidentia, quae scorbutum comitantur.

Veteribus haud prorsus ignotum fuisse hunc morbum verisimile videtur, quamvis de hoc apud auctores controversia habeatur. Pluribus quidem locis Hippocrates scorbuti accidentia describit. In primis enim sub morbo lienari (c) haec habet: *Venter tumet, postea vero etiam lien inflatur & durus est, ac dolores acuti in lienem incidunt, color etiam mutatur & niger conspicitur, pallidus & qui malicorii speciem referat, ex ore male olet, gingivae a dentibus discedunt, & in tibiis ulcera veluti pustulae; membra extenuantur, &c.*

Aaa 3

Qui

(a) Tom. IV. Par. 5. Cap. de Scorb. de intern. affection. de magn. Lienib.

(b) Cap. LVII. de Febr. (c) Lib.

Qui textus non solum in Hippocratis operibus (a) sed etiam apud Sennerium (b) & Hoffmannum (c) aliosque legi potest; & alibi (d). Quibus lienes magni, iis gingivae vitiantur, & os grave olet, quibus autem lienes magni sunt, neque sanguinis eruptiones, neque os grave olet; in tibiis ii mala ulcera habent, & nigras cicatrices. Quod si manifestus quispiam adfuerit faciei abscessus, aut vox gravis sit, aut dentium dolor, iis sanguinis eruptionem e naribus fore, &c. Alio denique (e) loco sub convolvuli nomine aptius delineat idem Hippocrates. Morbus autem per autumnum oriri incipit, in eoque haec accedunt; ex ore malus odor exspirat, a dentibus gingivae abscedunt, & ex naribus sanguis effluit. Interdum vero ex cruribus ulcera erumpunt, & haec quidem sanescunt, alia vero exoriuntur, color niger est, cutis tenuis, &c.

Epidemicum factum fuisse hunc morbum in exercitu Caesaris Germanici notat Plinius, sub aliis tamen vocibus (f) *stomacacis* & *scelotyrbis*: in Germania, inquit, trans Rhenum castris a Germanico Caesare promotis maritimo tractu fons erat aquae dulcis, qua pota intra biennium dentes deciderent, compagesque in genibus solverentur, *stomacacem* medici vocabant, & *scelotyrbem*, &c. Cuius

causam pravo aquae dulcis, de qua biberant milites, fonti tribuebat auctor, sed minus recte. Nam post biennium hoc accidisse narrat (g); quapropter non aque fonti, sed aeris constitutioni Romanis militibus sub longe diverso climate degere assuetis culpa imputanda erat. Ante hanc historiam vero alia a Strabonio refertur (h), tempore Augusti, scilicet in Elii Galli exercitu ab eodem Caesare in Arabiam misso, hunc morbum *stomacacem* & *scelotyrbem* appellatum ortum fuisse. A Galeno quoque (i), Paulo Aegineta (k), & Avicenna (l) scorbutus describitur, licet ob rariores ipsius casus peculiari nomine eundem non insigniverint citati auctores. Sed de morbi historia haec satis sint, quoniam hic non de essentiali scorbuto, sed de hypochondriaco-scorbutica affectione tantum agimus.

Ad modo expositam affectionem curandam, & ad eiusdem curationis indicationes rite desumendas hypochondriaci morbi speciem, a qua & scorbutica accidentia trahunt originem, prius examinare oportet iuxta regulas ac divisiones superius traditas, quae species cum a peculiari in primis inditoque solidorum, deinde & fluidorum vitio pendeat, in quo temperamenti & habitus corporis diversitas posita est, ad hoc tamquam causam

prima-

(a) Loco cit. (b) Lib. III. pag. 5. Sect. II. Cap. 1. de Scorb. (c) T. IV. p. 5. de Scorb. (d) Lib. II. praenotion. (e) Lib. II. de intern. affect. (f) Hist. natur. Lib. XXV. Cap. 3. (g) Sennert. ibidem. (h) Lib. VI. Geograph. vide Sennert. (i) 2. De Natura hum. Tex. 3. (k) Lib. III. Cap. 49. (l) Lib. III. fen. 15. Tract. II. Cap. 5.

primariam cura est dirigenda, ac illa eligenda sunt auxilia, quae superiori-
bus capitibus pro qualibet ipsius mor-
bi specie exponuntur. Ut autem quae-
dam remedia proponamus, quae am-
bobus simul iunctis affectionibus re-
cte mederi possint, illa breviter excu-
tiam, quae fibrarum tonum roborent,
si laxus sit, laxent, si nimis rigidus,
ut solida amissum motum oscillatori-
um recuperare, ac fluida stagnantia
fatis compellere valeant, ac ut for-
tiori quoque momento arteriolae
in rudes ac heterogeneas sanguinis
moleculas nitantur, ac sphaeroideam
figuram elementaribus eiusdem glo-
bulis analogam impertiantur, a quo
optima ipsius sanguinis crasis habetur;
praeterea quae fluidorum acrimoniam
temperent, lentorem diluant, & ana-
leptica sint, unoque verbo, quae glo-
bulosam sanguinis naturam facilius
assequantur.

Praemissis itaque lenientibus velu-
ti cassia cum extracto polypodii atque
rhabbaro & paucis diagrydii granis,
vel manna in decoctione violarum,
fl. persicorum soluta congruos adden-
do, prout mos est, correctivos ad
specifica remedia est transeundum;
sed antequam haec evolvamus, de
sanguinis missione aliquid dicendum,
utrum conveniat nec ne.

In essentiali scorbuto perniciosam
plerumque saltem esse sanguinis mis-
sionem, tum mechanica ratio, tum
fere omnium medicorum, qui de hoc
morbo egerunt auctoritas nobis sua-
dent: in hypochondriaca autem scor-

butica affectione eandem haud pror-
sus damnare, nec proscribere debe-
mus. In quibusdam enim casibus
maxime necessariam esse invenimus;
in plethoricis scilicet temperamentis
in quibus cruoris massa ob copiam &
crassitiem solidorum momento nimis
resistit, vel in sicco corporis habitu,
cuius sanguis texturam nimis compa-
ctam habet, atque serosa & lymph-
tica substantia pene destituitur, quod
rigidiorem solidorum tonum indicat,
tunc sanguis extrahendus, ut idem
novum celeritatis gradum acquirens
aliquantulum attenuetur, ac nimia fi-
brarum tensio laxetur, ut naturalem
ad oscillandum elasticitatem solida re-
cuperent, & e contra venae sectio
vitanda in iis temperamentis, quae
veteres frigida & humida appellabant,
quorum sanguis seroso & lymphatico
latice abundat, aut contractilis arte-
riarum vis est imbecillis, fibra mol-
lis atque spongiosus corporis habi-
tus.

Discussa in genere sanguinis extra-
ctione, quanta, & quo in loco con-
veniat, est inquirendum, quod cuique
tritas revulsionis & derivationis leges
meditanti patebit (a). Unctiones,
pediluvia, atque balnea aquae dulcis,
quae in datis hypochondriacis affectio-
nibus simplicibus superius commen-
davimus, etiam in hypochondriaco-
scorbuticis admodum proderunt. Si
quidem haec non solum transpirabi-
lem materiam intra cutaneas arterio-
las detentam solvunt alliciuntque, ac
fibrae rigiditatem laxant, sed etiam

per

(a) Dom. Silva vid. Cap. 1. & 2. part. 2. huius.

per absorbentia vascula humidam substantiam corpori communicant, quae salinas asperasque moleculas membranosis solidis haerentes, earumque fibras moleste proritantes diluunt, ac perniciosos lentores facile solubiles reddunt. Balnei usum etiam in scorbuto essentiali, initio morbi vel eodem remittente apprimè utilem esse censent plures practici, inter quos Fernelius (a), Sennertus (b) Martinus Matheus (c), Fridericus Hoffmannus (d): in affectione vero, de qua agimus hypochondriaco scorbutica mirum praestare posse asserit Volkamerus (e); qui virum hypochondriaco-scorbuticum, solo balneo aquae dulcis vulgaribus herbis emollientibus decoctae mane & vespere adhibito, post paucos dies morbo evasisse, ac vires prius amissas recuperavisse testatur, in cuius balnei aqua nigricantem ac male olentem saburram innatare observavit (f).

Interna autem remedia iuxta specificam morbi differentiam sunt exhibenda, quae differentia contrarias saepe involuit indicationes. Si itaque aegri corporis constitutio, atque temperamentum sit e. g. calidum siccumque, cuncta illa remedia, quae primo & secundo cap. secundae partis huius libri proposuimus, opportuna sunt; ac specifica antiscorbutica vulgaria, veluti cochlearia, beccabunga, nasturtium tamquam impertinentia sunt reiicienda; ac diluentia, tem-

perantia, antispasmodica, anodyna & analeptica erunt amplectenda.

Pulpa tamarindorum cum flore cassiae parum aromatizato erit optimum laxans, alternis diebus per aliquot vires sumendum, cui superbibet aeger serum lactis depuratum. Hoc serum aliquamdiu, cum absorbentibus pulveribus lapill. C., concharum pp., succini sumere quoque debet. Optimae erunt gelatinae cor. c., vel ras. ebor. decoct. pariter refrigerantes, sonchi, lactucae, buglossae, fragariae & similia, deinde valde opportunum lac asinum, vel caprillum, praesertim diaetetica forma exhibitum, postea aquae thermales, non acidulae, sed dulces, veluti Nocerianae, aut Leucenses, vel cum nitro dulci ebullitae. Victus humectans esse debet, elixae carnes, non assae, pultes ex farina hordei, oryzae, aut avenae Hannoverianae.

Si aeger temperamentum utique calidum, sed non adeo siccum corporis habitum nactus sit, ita, ut ad calidum & humidum vergat, quibusdam antiscorbuticis, sed aliquo diluente temperatis uti licebit, cuiusmodi sunt succi depurati fumariae, beccabungae, aut nasturcii ad unc. ii. lacte commixti, vel lacti praemissi, sive potius serum lactis cum praedictis antiscorbuticis alterantibus destillatum, quae remedia ita parata fluidorum acrimoniam retundere & diluere, ac solidorum fibras ad interruptum motum oscillatorium recuperandum

(a) *Observat. XXXIV.* (b) *Ibidem.* (c) *Tract. de Morb. Mesenterii.*
(d) *Eodem capite.* (e) *Decur. II. an. 6.* (f) *Vid. Hoffmann. ibidem.*

randum blande allicere valebunt. Secus vero antiscorbutica simplicia, praesertim, quae volatilibus acribusque particulis praedita sunt, solida ad vehementes, & inconcinnas contractiones concitant, fluida in magnam rareficientiam, eorumque salinas moleculas in summam exaltationem inducunt; hinc gravis oritur huiusmodi morbos tractandi difficultas, per quam de medicinae pro iisdem curandis utilitate quandoque desperant medici; unde celeberrimum illud Celsi dictum fortasse ortum duxit: *Optima inter- dum medicina est medicamento abstinere.* Et sane ut medicamenti effectus indicationi respondeat, talem mutationem praecipue in solidis excitare debet, ut amissus naturalis motus iisdem restituatur, qui in homogeneis fibrarum componentium vibrationibus consistit; hanc autem mutationem perficere nequeunt medicamenta, nisi ex data eorundem particularum figura, mole, sive specifico pondere atque celeritate.

Si vero aegri temperamentum sit frigidum & siccum, diversa aliquantulum methodo curanda erit affectio. Solventia ex cassia & rhab., vel alia ex temperatis in hoc capite modo descriptis praemittenda erunt, quae, pro ut stomachi, aut caeterorum imi ventris viscerum infarctus requirit, aliquoties repeti possunt. Interim monendum, alterantia, aut minorativa, vel quaecumque specifica antiscorbutica cum aliquo diluente socianda. E. g. succi depurati beccabungae, nasturtii aquatici, cochleariae

in sero lactis, vel ipso lacte sunt capiendi, vel lac, aut serum iisdem superbibendum. Hic maxime conveniunt decocta analeptica & aliquantulum expansiva ex radic. chinae & saeparillae post levem ebullitionem contusae, ras. eboris, cor. c., carne vitulina, ranarum, caudis & chelis cancerorum fluviatilium, vel testudine nemorali, ius quoque viperinum circulatam, in quo simul ebulliant pauca eiusdem salsae & chinae quantitas & cochleariae folia. Aestivo tempore postquam thermales dulces biberit aeger ad ptisanam ex avena Hannoveriana, cochlearia, fumaria, & pullo campestri paratam transire potest. Huiusmodi autem potionibus aliquod solidum specificum mane praemittere potest, veluti extractum cochleariae, aut fumariae cum arcano dupl. Myns. ac specie diarrhod. Abb., aut essentia iuniperi aromatizatum; item pulvis viperinus, aut Hannoverianus, aut absorbens Wedelii, Marchionis, & similia, quorum bases sint alkalina, antispasmodica, ac leviter exaltantia remedia.

Denique si hoc morbo laborantis temperamentum sit frigidum & humidum, eo magis diversa, immo priori ex recensitis aegrorum temperiebus prorsus opposita erit curandi ratio; hic enim venae sectio pro perniciofa est habenda. Solventia ex refrigerantibus, veluti cassia peculiari aegrotantis indicationi adversantur. Opportunae utique erunt pilulae tartareae, de ammoniaco Querc., cochiae, & similes, vel extractum polypodii

lypodii cum rhab. & tart. vitriol. quibus solventibus interdum leve emeticum, videlicet rad. ipecacuanhae praecedere opus erit. Decocta ex fassaparilla contusa, guaiaco, fassafra, china, stybio & mercurio crudo, quae alicui solido expansivo atque attenuanti specifico superbibet aeger, cuiusmodi erunt extracta cochleariae, fumariae, cum croco orientali & paucis falis volatilis succini granis, bezoarticum ioviale, mercurius diaphoreticus; succi pariter, vel decoctiones alterantium antiscorbuticorum etiam validiorum, cochleariae, nasturtii, &c. quibus addi possunt radices raphani silvestris, calami aromatici, vel pampini vitis, &c.

Maxime praestantia tamen erunt chalybeata, five solida, five liquida forma parata; solida nempe chalybis limatura perfecte laevigata, vel cum sulphure praeparata, extracto aloes & cochleariae subacta, oleo macis vel cinnamomi aromatizata. Praeterea crocus ipsius martis, five remedia crocum praecipue continentia, ut pulvis cachecticus Qu., opiata antiscorbutica Helvetii, quae praesenti indicationi admodum satisfaciunt. Liquida autem forma, tincturae mart. tartar., pomatae, aut aronizatae, & alia, quae in quarta affectionis hypochondriacae specie iam attigimus, quemadmodum & aliae tincturae, five elixiria stomachica ex amaricantibus, discutientibus, & aromatibus in spiritu vini infusis extracta. Balsama quoque, inter quae ad stomachum roborandum eminet Peruanum cum ali-

quantulo macis compactum, ex artefactis vero balsamum pareirae bravae, praesertim ubi affectio ad cachexiam tendat, atque urinae excretionem indicatio postulet.

Pro illis, qui gingivarum doloribus, tumescentiis ac sanguineis eruptionibus molestantur, ablutionibus uti oportebit ex corroborantibus, anodynis ac vulnerariis. E. g. decoctionibus in aqua chalybeata factis radic. tormentillae, bistortae, consolidae, fl. balaustiorum, cynosbatos, sem. fumachii, aquilegiae & similia. Juvant praeterea cochleariae, vel rosarum siccarum masticatio, spiritus cochleariae gossypio in eodem intincto, ac gingivis per aliquot tempus admotum, vel tinctura laccae cum spiritu cochleariae extracta, vel saeviente dolore laudanum liquidum eodem modo applicatum. Accedente vero earundem gingivarum flaccescencia & corruptione, quae tamen solo essentiali scorbutico supervenit, de quo non agimus, aliae decoctiones, vel tincturae in spiritu vini extractae ex aromaticis atque balsamicis, veluti galangae, ari, macis, caryophyllorum, cardamomi, myrrhae styptica etiam addendo validiora, ut alumen crudum, gumma elemi, vel lapidem medicamentosum Crollii &c. de quibus plura apud auctores, qui de hoc morbo tractarunt, legi possunt. Hic tamen monendum, in quibusdam casibus, five aliis huiusmodi affectionum speciebus, praesertim prima & secunda a praedictis ablutionibus gingivarum dolores atque intumescencias potius

potius exasperari, quam leniri, quippe si gingivarum rubor ac dolor cum spasmodica nervorum crispatura & calore coniungatur, anodynis refrigerantibus, nempe lacte, vel emulsionibus ex feminibus frigidis, aut hordei decoctione cum mucilaginis ex feminibus hyosciami, cydoniorum, addito etiam laudano liquido uti necesse erit.

Vir 40. annorum melancholici & sicci corporis habitus, ventris rugitibus, obtuso capitis dolore molestari coepit, deinde notabili virium languore, gravi moestitia, ob quam ab omni solatio abhorrebat, immo consanguineorum & amicorum societatem effugiebat, aut nisi invitus ferebat. Eius corpus aliquantulum extenuabatur; rheumatici dolores hinc, inde insurgebant cum molesto gingivarum pruritu, parvae maculae in cute apparebant. His symptomatibus occurrimus lenientibus ex cassia & rhab., sanguinis per haemorrhoidalia vasa mediantibus hirudinibus evacuatione, decoctis analepticiis, lactis usu ad plures menses prius caprilli, postea asinini, balneo aquae dulcis, pulveribus absorbentibus; hinc aquas Nocerianas media aestate bibit, postea ptisanas ex avena, pullo campestri, ebullitioni superadditis fumaria & cochlearia. Post horum remediorum usum se melius habere fatebatur, tamen cum ex cuiusdam circumforanei promissis integram sanitatem se brevi assequuturum fore speraret, si eius specificis medicamentis uteretur, huic se addicere non dubitavit. Ve-

rum cum haec medicamenta ex antiscorbuticorum exaltantium genere essent, eiusdem morbi accidentia admodum exasperaverunt, quo sinistro eventu aliquantulum territus a circumforaneo se abdicavit, rursusque meo regimini se dedit, ac eadem methodo in pristinum statum rediit, postea chalybeatum liquida forma paratum sumpsit, cui decoctum ex china, ras. Cor. C., cacao, testudine nemorali, caudis & chelis cancerorum fluviatilium superbibebat, tandem ad pristinam fere salutem paulatim redactus fuit.

Juvenis 30. circiter annorum calidi temperamenti, ac mediocriter sicci corporis habitus, cuius sanguis admodum rarescibilis, atque solutus, eiusque solida flexilia & elastica percipiebantur (quippe ad iram valde promptum se ostendebat) hypochondriaca & scorbutica simul affectione prehensus fuit. Siquidem de pungente oris ac praesertim gingivarum dolore, deinde rheumaticis superiorum & inferiorum artuum doloribus, quibus nocte magis, quam die vexabatur, conqueri coepit, quorum, nonnulli costarum regionem invadebant, ac thoracem ita coangustabant, ut respiratio laboriosa evaderet. His accedebant virium prostratio non assidua, sed recurrens, stomachi nausea, cardialgia, ac interdum vomitus, denique quidam universalis formicationis sensus. Sciendum duobus circiter ante morbi invasionem annis gravem gonorrhoeam ab hoc iuvene

fuisse contractam, quae licet sana methodo curata fuisset, molestum uretrae calorem, quem mingendo plurimum mensium spatio persensit, eidem reliquerat. Remedia prius ingruente affectione adhibita, fuerunt, primo laxantia ex temperationum classe desumpta, postea pulpa tamarindorum cum fero lactis mane ad plures dies, fero autem refrigerantes emulsiones; hinc absorbentia, nitrata, succinata, lac caprillum, aquae Noceriae, balneum, quae remedia cum aliquo sui levamine aeger prosequabatur. Ab hac tamen methodo importuna quorundam amicorum exhortatione amotus fuit, & cuiusdam empyrici manibus traditus, qui electuarium purgans, ac decoctum exaltans, salfam & guaiacum inter caetera continens, nec non pilulas eiusdem speciei, ac quaedam antiscorbutica specifica ipsi subministravit, a quibus non leve damnum retulit. Auctus enim fuit universalis calor, cui peculiaris gingivarum & gutturis accessit, notabilis quoque corporis exsiccatio, nec non stomachi atonia, eiusque attritorii, sive peristaltici motus perturbatio, qua imperfectae digestionis effectus experiebatur. In hoc statu rursus ad me confugiit, meoque consilio lactis usum recepit, quod tamen cum stomachus haud satis subigere posset, etiam cum chinae decoctione temperatum ac leviter ebullitum, asininum priori substitutum fuit, in quo aliquamdiu perseveravit, non sine aliqua morbi praesertim interni caloris gingivas & fauces prius

infestantis remissione; sed iterum stomachi repletionem accusante aegro, licet lactis usui blandum laxans bis, vel ter in mense interponeretur, loco lactis illud destillatum sumpsit, quod superius in hoc capite commendavimus, & primo capite partis secundae descripsimus, in quo pro buglosa & borragine, inditae fuerunt vulgares antiscorbuticae, cochlearia, nasturtium, &c. Horum remediorum ope cuncta symptomata praeter rheumaticos dolores pene extincta videbantur, qui tamen dolores aliquanto retusi fuerant. Nihilominus hos adhuc perdurantes esse morbi acquisiti effectus iure suspicabar, quemadmodum & alii in consilium vocati, quibus problema solvendum propositum fuerat: utrum, dolores rheumatici ab intrinseca causa vitioque fluidorum & solidorum, seu ab hypochondriaca scorbutica affectione, de qua dubitare nemo poterat, an a causa acquisita licet diligenter curata, originem ducerent. Senserunt itaque mercuriali linimento a venereo seminio tutandum esse aegrum, quod remedium utpote violentum magna circumspectione in simili temperamento exhibendum esse arbitratus fui. Nam etiamsi, tam ex venereo morbo, quam ex salino acri affectione indicaretur, prohibebat tamen, vel saltem periculosum ostendebat temperamenti species; sanguis scilicet tenuioribus ac volatilibus partibus constans, & ad exaltationem pronus, atque solida nervea rarioris texturae, & ad violentas oscillationes disposita, ne mercurius

curius specificè gravioribus suis particulis solidorum elasticitatem magis provocaret, & ipse vehementiorem impetum accipiens funestae ad nobiliores partes irruptionis causa esset, aut roridam substantiam dispellendo corpus ad maciem disponderet. Quapropter, ne mercurii actio praevisadamna inferret, incoepta remedia ex diluentium & analepticorum genere desumpta prosequi necesse erat, ac balneum aquae dulcis renovare, antequam mercurialem unctionem iniret. His igitur praemissis mercuriali linimento levi manu ad plures vices applicato se submisit, a quo nullum incommodum retulit; rheumatici dolores vero rursus imminuti fuerunt, sed non prorsus extincti. Notandum tamen quod ipse cum in aprico & crassiori aere extra propriam urbem degat, ac inter amicos conversetur, nec doloribus, nec incommodis molestari fatetur, ex quo pristinam eiusdem salutem brevi assequuturum fore speramus, dummodo a consueto auxiliorum datis temporibus renovandorum genere victuque humectandi adhuc non recedat.

Vir 45. annorum temperamenti frigidi & sicci postquam per plures annos hypochondriacam affectionem pertulisset, quae ventris rugitibus atque contractionibus respirandi difficultatem afferentibus stomachi plenitudine, palati viscositate, quandoque cardialgiis eundem vexabat, in lipothymiam tandem incidere caepit ac virium languorem, quibus accedebant gingivarum notabilis emaciatio,

qua dentes dimovebantur, notabilis in corpore nutrimenti defectus, ac pallidior faciei color. In hoc statu medicam opem petiit, meque accersivit. Examinato itaque casu ac temperamenti affectionibus contemplatis leniens ex cassia cum rhabarb. exhibui & ad lacteam semidiaetam ineundam aegrum hortatus sum, eidemque iam annuenti bolos quolibet mane lacti praemittendos, praescripsi, nempe extracti cochl. scrup. ii., rhab. scrup. i., tart. vitr. scrup. sem., ess. iunip. gut. iv. pro duabus vicibus. Postquam ad duos circiter menses lac sumpserit, ad ptisanam transiit ex avena Hannoveriana, pullo campestri, amygdalis dulcibus, additis in fine ebullitionis cochlearia & fumaria, quibus remediis aliquantum proficere videbantur. Siquidem viribus magis constabat, nec amplius lipothymias passus erat, eiusque corpus magis enutririperispicue noscebatur. Adveniente aquarum tempore acidulae Recoari dictae eidem ab alio Professore propositae fuerunt, quibus & si pro morbo idoneis, tamen temperamenti affectiones respiciens prorsus assentiri non poteram. Has itaque sumpsit aeger sufficienti, quoad vires, conferentia, sed aliquo notabili nutritionis detrimento, quod ut amissum recuperaret, priorem ptisanam recepit, in qua non sine notabili iuvamine per integrum mensem perseveravit. Ineunte autumnodecoctum praescripsi ex radice chinae, fructibus cacao, raris & corde vitulino compositum, quoad duos circiter menses sumpto pri-

stinum fere statum se consequutum fuisse fatebatur, praeterita hyeme aliquo ex prioribus incommodis rursus molestari coepit, quapropter aliud decoctum partim analepticum, ac partim expansivum eidem insinuavi, ex radicibus scilicet falsae parillae & chinae, caudis & chelis cancrorum fluviatilium, testudine nemorali, additis in fine ebullitionis cochlearia & nasturtio aqu., postea ius viperinum, in quo pariter praedictae herbae in fine ebullitionis indebantur, praescripti; aestivo tempore priorem ptisanam praeteriti anni resumpsit: Autumno vero tincturam martis aronizatam in aqua foeniculi, & cinnamomi per quadraginta dies hausit, ac paulatim ad pristinam salutem restitutus est.

Viro 40. annorum temperamenti frigidi habitusque corporis mediocriter humidi, ac fibrae laxioris hypochondriaca in primis affectione prehensus fuit, cuius inter molesta accidentia ventris tensionum, borborygmore, styplicitatis, ructuum, dolorum, obscuri faciei coloris, animi moeror eminebat. Accesserunt postea notabilis virium languor, frequentia animi deliquia, gingivarum, totiusque corporis extenuatio &c. cuius morbi causa non solum vitiosae corporis temperiei, sed animi quoque passioni tribuebatur. Meum itaque auxilium petiit: ego autem primarum viarum farcimen in aegro agnoscens praemissa levi potione ex manna in decoct. fl. persic., tart. &

femin. anisorum soluta, infusionem, sive tincturam rhab. cum sale tart. & parum sal. ammon. in nodulo positi in aqua cochleariae, & beccabungae extracta praescripti, qua duarum hebdomadarum spatio soluto, vel satis inminuto farcimine chalyb. ras. optime laevigatas ad scrup. i. extracto cochleariae & rhab. in bolos subactas, ac cinnamomo satis aromatizatas sumere caepit, quibus superbibebat decoctum ex radic. falsae parillae, chinae, ras. ebor. & cor. c. carne vitulina, caudis & chelis cancrorum compositum; quibus nempe bolis ad 25. dies, decocto vero ad 40. continuatis aeger aliquantulum levare noscebatur. Hinc ad ius viperinum transiit, in quo ut superius cochlearia, & nasturtium leviter ebulliebant. Ineunte aestate aquas sulphureas Patavinas Virginis dictas bibit. Accedente autumno opiatum antiscorbutica Helvetii ad 20. circiter dies sumpsit. Horum remedium salutarem quidem effectum experiebatur aeger, cuius symptomata praesertim animi deliquia, & virium prostratio admodum remissa erant; de stomachi tamen tensione quandoque dolores afferente, ac repletionis sensu quaerebatur, suumque corpus aliquid nutrimenti assequutum fuisse videbatur. Quapropter prius decoctum ex falsaparilla, china, &c. renovatum fuit, cum quo liquorem anodynum mineralem Hoffmanni capiebat. Huius autem & similium auxiliorum continuatione, nec non frequentibus animi solatiis integram sanitatem recuperavit.

C A P V T III.

De affectione hypochondriaca phthifica.

Hypochondriacam affectionem interdum ad phthifum aegrum disponere, & cum ea coniungi non raro in medico exercitio deprehendi, neque ullum dubito artis clinicum, vel etiam solam theoriam profitemem me hallucinatum fuisse fore iudicaturum; siquidem primus plures phthificorum casus mente evolvendo, nonnullos hypochondriacae affectionis accidentibus coniunctos, nec non eandem subsequentes inveniet, theoreticus verò hos morbos inter se facile iungi, ac secundum a primo ortum ducere posse sibi suadebit. Et duplici quidem causa, si fluidorum vitium a vitio solidorum veluti oriundum tantummodo spectemus, hypochondriaca affectio phthifum portendere valet.

Prima causa erit fluidorum vitium in qualitate, omissa quantitate, e. g. si sanguinis crassities augeatur, ac rubrorum globulorum ratio supra serofos & lymphaticos multiplicetur, quod, vel a praeternaturali solidorum in fluida actione evenit, qua tenuiores molecule fortiori vi in crassiores compinguntur, lymphaticae scilicet in serofas, serofae in rubras transeunt, ac sanguis accelerato motu propria vasa percurrens serofas, proinde & lymphaticas arteriolas tenuiori ac specifico earundem fluido defraudat, quod fluidum ab eiusdem sanguinis sinu, nisi in motu aliquan-

tulum remisso secerni non potest; quapropter solidae partes consueta lymphatica substantia destitutae magis arescunt, ac idem sanguis, ad quem per venulas lymphaticas ipsa lymphatica substantia redit, eoque, unde discesserat revertitur, necessario vehiculo destituitur, quo naturalis oeconomiae officia, nempe secretiones, & in minimis quorumcumque viscerum vasculis liberam traiectionem obtineat, vel praedictae sanguinis crassitiei augmentum & rubrorum globulorum supra serofos & lymphaticos rationis multiplicatio evenit a summa fibrarum solida componentium rigiditate, ex qua minimae arteriolae adeo coangustantur, ut sanguineae molecule arctius praelum subire debeant, ac tenuiores, veluti serosae aucta contactus vi in maiores, seu rubros globulos cogantur.

Vitiatur autem fluidum, seu sanguis ex hypochondriaca affectione, non in sola crassitie atque globulorum proportionem, sed & in heterogenea molecularum, quibus idem sanguis refertur, natura, quotiescumque chyli particulae ex alimentis in ventriculo ac intestinis prave digestis cruoris massam ingrediuntur, in qua ex interrupto oscillatorio membranosorum viscerum caeterarumque organicarum partium motu aegre attenuantur, quippe imbecille arteriolarum praelum subeunt, quarum vis contractilis

contractilis ab iisdem membranosis visceribus parum fulcitur. Non solum vero arteriolae, sed & illa praefertim vascula, quae arteriarum officium gerunt, languide contrahuntur, nec fluida contenta satis subigere ac propellere valent. Huiusmodi vascula sunt quidem venae portae ramuli in imi ventris visceribus distributi sanguinem ad hepar pro bilis secretionem vehentes, quorum vis contractilis & propulsiva ex se debiliior, nisi ab oscillatorio fibrarum ventriculi, intestinorum ac mesenterii motu adiuvetur, ut alibi innuimus, necessarium impulsum materiae biliosae communicare nequit, ut haec ad sinum venae portae eiusque hepaticos ramulos sufficienti celeritate tendat, ac secretorios tubulos ingrediatur.

Positis itaque iisdem principiis sequitur; primo crudis viscidisque particulis sanguinem coinquinari, quae in extremis pulmonum arteriis facile haerere possunt, secundo ex separationum defectu illis obrui liquidorum speciebus, quae per secretoria vascula eliminanda erant. Insuper accedit salinarum partium multiplicatio ac exaltatio, quibus & ipsa lymphae inficitur, bronchiales glandulae infarciuntur, ac interna eorumdem bronchiorum membrana stimulo afficitur, atque crispatur.

Secunda causa, per quam hypochondriaca affectio ad phthisim quandoque ducit, est vitium motus fluidorum, quod non solum in imi ventris visceribus, contingit, sed in caeteris etiam nobilioris officii partibus

inter quas pulmo enumeratur, cuius nervei plexus cum inferioribus communicantes, quippe eorundem truncorum intercostalis & vagi propagines sunt, spasmodicis crispationibus ipsi quoque subiacent, quae ut pulmonares vesiculas, earumque spatiola coarctant, notabili respirandi difficultate, vel saltem extrema eorundem pulmonum vascula constringunt, ac progressivum sanguinis motum interceptiunt, ita ut eiusdem quantitas, quae per venas redit, minor sit quantitate, quae per arterias ingreditur, detractis etiam naturalibus secretionibus. Quare idem sanguis regrediens capillares arteriolas vehementer distendit, ac dirumpit, & in periculosam haemoptysim aegrum inducit, aut diutius stagnans in abscessus migrat, qui lenta febre, tussi ac purulentis sputis se manifestant. Saepe vero idem sanguis ob angustatum per venas reditum in aliena lateralia vascula, nempe lymphatica, violenter intruditur, a quibus utpote exilioribus ac minori vi elastica praeditis cum sufficientem impulsu ad progrediendum accipere nequeat, ibidem detinetur, eaque praetermodum distendit, ita, ut vel dirumpantur cruentum sputum afferentia, vel in praeternaturalem molem excrescant, quae si in extima pulmonum superficie fiat, acutum dolorem, si internam partem occupet, obtusum, acerbam tussim, febrem, ponderis sensum ac quasdam in decubitu respirandi difficultates producit. Haec autem symptomata morbi initio, cum interdum acutiora sint, pleuritidem,

ritidem, aut pulmoniam repraesentant, quae tamen in abscessus quoque, aut vomicas degenerant. Praeterea ipsae bronchiales glandulae, earumque secretorii tubuli adeo arctantur, ut lymphaticam materiam ad ipsa bronchia humectanda destinata admittere nequeant, ideoque membranosae earundem partium fibrae arcescunt, atque contrahuntur, vel si admittant, ob spasmodicam excretoriorum meatuum angustiam eandem detinent, cuius materiae cum pars fluidior ac tenuior traiciatur, crassior, quae remanet, induratur, deinde excresecens glandularum cryptas, sive vascula, in quibus continetur, adeo distendit, ut ipsa in sicca tubercula eleventur. Hinc molestae tussis, quae siccae diu perseverant, donec frigida tuberculorum materia ad suppurationem tendat, lenta, sed continua febris, laterales dolores, corporis emaciatio, caeteraque symptomata, quae in phthisi observantur.

Vitium motus fluidorum non a sola retardatione, quam modo attigimus, sed ab aucta quoque celeritate, ac inaequalitate pendet. Haec pariter motus vitia, quae cum hypochondriaca affectione saepius iunguntur, imo ab eadem affectione immediate oriuntur, ad phthysim quandoque disponunt.

Ad praeternaturalem celeritatem quod attinet; haec quidem a vehementiori solidorum oscillatione augetur, quae vehementior oscillatio in illis hypochondriacis praesertim contingit, quorum solida nervea spongiosae, sive rarioris texturae sunt, eorumque fibrae

adeo flexibiles, ut dato copiosiori, aut vehementiori spirituum animalium in easdem influxu ad violentas oscillationes concitentur, quae solidis vitalibus communicatae praeternaturali vi fluida propellunt, in quorum motu accelerato circulationis ordo perturbatur. E. g. sanguis a corde per pulmonarem arteriam, quae aorta multo brevior est, tanta celeritate atque impetu proiicitur, ut tota eiusdem quantitas dato tempore in venam pulmonarem per extremos utriusque vasis ramulos permeare non possit, eiusque globuli regredientes contra eiusdem arteriae ramulorum latera nituntur, & in secretoria vascula absque ordine ingeruntur, rubri nempe in serosa, ferofi in lymphatica, a quibus difficulter regredientibus periculosa fiunt stagnationes, quae paulatim in phthysim aegrum inducunt.

Si vitium in motus inaequalitate consideremus, non leviora quoque damna, & ad phthysim impulsus ab eodem oriri dignoscemus. Vasa enim, quae spasmodicis membrarum ac nervorum contractionibus coarctantur, eadem posita vi cordis propellente, quae in aequali a corde distantia aequalis esse debet, minori sanguinis quantitati transitum concedunt, quam vasa actu libera; sanguinis vero maior copia iuxta hydraulicae leges ad libera vasa tendit, quam ad constricta; in illis quippe minorem, in his vero maiorem resistenciam invenit, eoque maior ad illa fluat sanguinis quantitas, donec ipsa vasa libera adeo distendantur, ut eorum

vis elastica contractilis, qua in sanguinem nituntur, vi resistentiae vasorum constrictorum aequalis fiat. Quapropter praedictas vasorum spasmodicas constrictiones, quae in morbis hypochondriacis saepe contingunt, periculosa vasorum liberorum distensiones necessario consequuntur; quae distensiones eo maiores ac periculosiores erunt, quo minor erit vis contractilis fibrarum vasa componentium, unde illae fiunt globulorum sanguineorum aberrationes, hinc stagnationes atque tubercula, de quibus modo loquuti sumus. Haec fluidorum motus inaequalitas inter ini ventris ac thoracis viscera, potissimum supponenda. Nam spasmodicae crispationes, a quibus membranosa eiusdem ventris viscera saepius laceffuntur, eiusque vasa coarctantur, maiorem sanguinis quantitatem in ipso thorace determinant, quippe, cum ab inferioribus vasis naturalis sanguinis quantitas transmitti nequeat, sanguis, qui superest in vasis superioribus, veluti thoracis, recipi necesse est. Insuper eadem fluidorum motus inaequalitas etiam inter viscera eiusdem cavitatis, immo inter vasa eiusdem visceris saepe evenit, quia in perturbato oscillatorio nervorum motu, quem in hypochondriaco morbo demonstravimus, non solum quidam eiusdem trunci nervorum plexus, sed & ipsius plexus ramuli inaequaliter contrahuntur, proinde quaedam eiusdem visceris vascula, quorum nervei ramuli,

quibus irretiuntur, maiorem contractionem ineunt, magis coangustantur, quam caetera, quorum nervei ramuli minorem contractionem patiuntur, ideoque maior fluidorum quantitas ad libera eiusdem visceris vascula derivabitur, quam ad constricta; igitur fluidorum motus inaequalitas etiam in uno viscere habetur, quae in pulmonibus quoque contingens hunc potius, quam illum lobum afficit, ac ubi spasmodicae crispationes saevientes fluida intercipiunt, vel quo loco ipsa fluida deflectunt, morbus implantatur, stagnationes scilicet, tubercula, vel abscessus, quae aegrum ad phthisim perducunt.

Nil itaque mirum, si hypochondriaca affectio in phthisim quandoque degeneret: quotiescumque etiam oscillatorius pulmonarium plexuum motus perturbetur, ac interrumpatur, quemadmodum in abdominis nervorum quoque aliarumque partium plexibus atque membranis, id fieri evicimus; si peculiare aliquid in pulmonum textura, vel potius in nervearum ac membranosarum fibrarum tono vitium, sive laxitatis, sive tensionis ac duritiei adsit, per quod eadem fibrae congrua elasticitate ad fluida impellenda destituantur, vel in thoracis aut colli constructione, per quam inspiratio aliquantulum imperfecta fiat, ac liquorum egressus nonnihil retardetur, phthisim hypochondriaco morbo supervenire comperiemus (a).

Huiusce

(a) Vid. apud Morton. Lib. III. Cap. IV. pag. 90. Phthisim ab hypochondriaca affectione ortam.

Huiusce morbi compositi indicationes diversae esse possunt, prout diversa hypochondriacae affectionis species, quam animadvertere semper debet medicus, sicuti saepissime innuimus, ut morbum per dispositivam ac efficientem sui ipsius causam aggrediatur. Si itaque phthifica affectio adhuc in suo principio detegatur, illis prorsus remediis aegro mederi oportebit, quae in data hypochondriaca affectione, tamquam causa, conveniunt; quae si primae speciei sit, calida nempe & sicca, humectantia, refrigerantia & analeptica tantummodo adhibenda, si secundae speciei, calidae scilicet & humidae, diluentia, temperantia, plethoram imminuentia atque obstructa vascula leniter referantia, ac aequilibrium non solum inter fluida & solida, sed etiam inter solida, & solida captantia. Quare sanguis in debita quantitate extrahendus erit, venae sectione, ac hirudinum ad haemorrhoidalia vasa applicatione. Opportuna balnea aquae dulcis, nec non emollientes unctiones hypochondriis atque pectori, & aliquando universales, ex oleo nucleorum pineorum, amygdalarum dulcium, unguento resumptivo, & similibus; enemata refrigerantia & anodyna ex decoctione hordei, vel lacte cum butyro recenti, vel oleo solo amygd. dulc. parata, & alia chirurgici fontis remedia, quae superius proposuimus (a), quibus modo addam suffumigia humida, seu vapores emollientes inspirandi ex eadem hordei, vel

radic. althaeae, verbasci, fol. malvae, viol., pariet. decoctione, vel ipso lacte; hi enim vapores ab inspirato aere intra pulmonares vesiculas erecti rigidum fibrarum tontum laxare & arescentes membranas humectare, & ita stagnantium liquidorum separationes, aut progressivum motum interceptum facile solvere valent.

Ex internis quoque auxiliis eadem, quae in dictis capitibus commendavimus, sunt revolvenda. Solventia erunt, cassia cum pulpa tamarindorum, aut diacassia, vel si secundae speciei sit morbus hypochondriacus ipsa cassia cum paucis rhab. praesertim si abdominis viscerum, vel saltem primarum viarum infarctus detegatur, ad quod eliminandum, si opus fuerit, idem solvens aliquoties repetere fas erit, cui mane superbibendum ferum lactis depuratum, sero autem emulsiones ex seminibus frigidis, papaveris albi aliquantum dilutae, vel decoctiones violariae, sonchi, hederæ terr., fragariae, &c. deinde cito ad lac asininum, vel caprillum, quibus etiam interdum praestantius habetur muliebre, est transeundum pro mane & sero, quo tempore a carnibus abstinendum, ac solidis pultibus ex succo, vel farina hordei, aut oryzae iure vitulino, vel pullo iuniori decoctis utendum. Huc quoque spectant gelatinae cor. c., eboris, ptisanæ refrigerantes & analepticae, aquae minerales ex temperantibus, illaque specifica omnia, quae in dictis capitibus enuntiavimus.

Ccc 2

Si

Si tertiae speciei fit primaria affectio, frigidi nempe & sicci corporis habitus, a methodo quoque eiusdem capitis non est recedendum, quam repetere supervacaneum puto; hoc tantummodo repetam, ut commendem oleosa, quae hic admodum proficiunt, praesertim, si aliquamdiu singulis diebus iterentur. Oleum scilicet amygdalarum dulcium prima vice ad sex uncias, postea ad duas tantum, vel tres in decoctione rad. althaeae, cynoglossae, &c.

Quod de tribus speciebus huius affectionis diximus, etiam de quarta intelligendum, cuius tamen rarior est casus, de hypochondriacae nempe frigidae & humidae affectionis cum phthifica copulatione, nisi peculiaris pulmonarium vasorum atonia, vel quaecumque organica laesio, aut vitiosa partium constructio inveniat. Progrediente autem phthisi, quae ex frequenti sanguinis per pulmonaria vasa eruptione, vel tuberculis numero, aut magnitudine gravioribus evenit; horum nonnulli ex sola lymphatica materia congesti difficulter, ac nisi diuturno tempore suppurant, sed indurescentes molestam & assiduam bronchialis membranae distractionem pariunt, ex qua siccae tussis incessantes, laterales dolores, respirandi difficultates, lentae, sed continuae febres insurgunt, quippe a spasmodicis fibrarum membranosarum contractionibus non solum respirationis organa coarctantur, sed pulmonarium quoque vasorum diametri adeo coangustantur, ut progressivus sanguinis mo-

tus in iisdem intercipiatur, unde propulsivae cordis & vasorum vi resistentia augetur, eorumque elasticitas magis provocatur; quae febres, licet abscessu purisque evacuatione non comitentur, nihilo minus ad maciem tendunt, corpusque exsiccant, alii vero non simpliciter lymphatici, sed etiam sanguinei, non a sola scilicet lymphâ stagnante geniti, sed etiam a sanguine e propriis vasis in aliena intruso, vel quocumque loco detento, qui lymphatica substantia commixtus facilius in pus convertitur. His tuberculis in abscessus migrantibus cum copiosa eorumdem purulentae materiae expulsionem alii succedunt, aliosque novi deinceps excipiunt, donec aeger diuturna nutritii succi consumptione, quae a continua febre continuaque sanguinis caeterorumque liquidorum in saniem conversione pendet, in tabem pulmonarem incidat.

Haemoptyses autem graves, quae ad praedictam tabem aegrum conducunt, abscessus quoque aut vomicae consequuntur, quippe sanguis, licet eiusdem expulsio supprimatur e propriis tamen vasis egressus tumorem efficit, qui suppurans in insanabile ulcus plerumque degenerat, quapropter summa circumspeditione curandi sunt haemoptoici, styptica nempe remedia quam fieri potest vitando, iisdemque sola temperantia sanguinisque orgasmum compescencia substituendo; styptica enim remedia sanguinem quidem erumpentem sistere, lentescentem vero minime solvere possunt, immo ipsum stagnantem eo
magis

magis cohibent, nam stypticorum vis in solida profecto agendo potius, quam in fluida sanguinem erumpentem sistit, sed illorum actio in solida nihil aliud esse potest, quam arterio-
larum diametrum aliquantulum angustare, vel saltem earundem motum oscillatorium coercere. In utroque autem casu maius stagnationis periculum imminebit, sive ob maiorem resistantiam, quam invenit sanguis in coarctata vasa permeando, sive ob minorem impulsus, quem accipit a coercito oscillatorio solidorum motu, ut ex arterioli in venas naturali celeritate progredi valeat. Si quis vero eadem styptica in fluida agere extra mechanicam philosophandi simplicitatem arbitrari velit, hanc actionem, nisi in fluidi, seu ipsius sanguinis condensatione collocare non poterit, ideoque eodem progressivo sanguinis in vasis pulmonaribus motui insurgent impedimenta, quae ad phthificum morbum disponunt.

Si quis rursus instet haemoptysim a vehementi solidorum in fluida momento, vel nimia sanguinis rarefactione aliquando oriri. Resp. primo, donec pulmonarium vasorum diameter naturalis magnitudinis servetur, ac oscillatoria arteriarum vis, licet vehementior, uniformis tamen sit, sanguinem e propriis vasis erumpere non est verisimile, nam ii, quorum pectoris structura minime vitiosa sit, etiam si acuta febre cum plethora saepe coniuncta laborent, aut velociter currant, vel quodcumque etiam violentum corporis subeant exercitium, in

quo solida magno impetu in sanguinem irruunt, ac ipse sanguis etiam rareficens summa velocitate vasa percurrit, in haemoptyses tamen non incidunt.

Verum concedatur violentum solidorum & fluidorum motum sanguinis in pectore eruptiones quandoque portendere, quae quidem non nisi praevio pulmonum vitio, aut notabili plethora vasa distendente evenient; alia fortasse desunt validiora auxilia, quibus vehementem solidorum motum sedare, sanguinisque impetum ac rarefactionem compescere possimus? Venae sectio quidem non solum sanguinis plethoram (contra quam adstringentia remedia nihil certe valent, immo hac subsistente eo deteriora evadunt) sed etiam ipsius rarefactionem minuit, ac nimiam vasorum distensionem, resistantiam, copiosamque ex ipsa plethora animalium spirituum secretionem auferendo vehementes solidorum ictus lenit, ac periculosum sanguinis impetum cohibet.

Venae sectioni vero iunguntur temperantia ac nimium aestum compescencia; absorbentia scilicet atque nitrata, inter quae eminet nitrum coralliatum, emulsionem ex seminibus frigidis, gelatinae ex ras. eboris, cor. c. serum lactis, decoctiones ex simplicibus refrigerantibus, veluti portulaca, lactuca, nymphaea, urtica, cuius postremae succus potius temperans, quam adstringens felici exitu in praxi adhibetur.

Victus ordo in qualitate & quantitate observandus. Quoad primam
Ccc 3 pultes

pultes ex herbis refrigerantibus, veluti lactuca, cucurbitulis ipsiusque urticae summitatibus, vel ex hordeo, eiusque succo avena quoque Hannoveriana, vel oryza eorumque farinis; alimenta solida ex carne vitulina, aut vervecina, aut pullo iuniori. Quoad secundam, nempe alimenti quantitatem, per varios ab haemoptysi dies tenui, seu parco alimento utendum, id est a solidis cibis ac praesertim carnibus abstinendum, ac solis pultibus in iure tenui ovisque sorbilibus atque offis ex pane aqua immerso vesci oportet; aqua fontis ad usum potus vino substituenda.

Hac methodo caeterisque praecauti-
tionibus, quas utpote minoris momenti praetermitto sine stypticis remediis rite tutiusque curabitur haemoptysis. Ex quacumque vero ex indicatis causis, si ad phthisim tendat aegrotus, ad illa confugiendum erit auxilia, quae phthisis gradus, eiusque accidentia, nec non hypochondriaci morbi species tamquam dispositiva alterius morbi causa, requirunt, de quibus sigillatim agere perlongum esset opus & ad nostrum institutum minime pertinens. Dicam tantummodo, quod caveant medici, ne chymicis balsamicisque remediis abutantur; haec enim nisi in fibrae laxitate stomachi atonia ac notabili purulentae materiae pulmones obruente congerie locum non habent. In caeteris casibus, in quibus ob siccam tuberculorum naturam parum, aut nihil purulentae materiae expellitur, ac rigidus fibrarum tonus, calidaque & sic-

ca habitus corporis constitutio habetur, tamquam pernitiosa sunt vitanda, ac maximum auxilium in lactea dieta est sperandum. Omnia enim exaltantia ac roborantia, seu solidorum elasticitatem magis provocantia horum indicationi magis adversantur, nec de traumatica eorundem balsamicorum actione est praesumendum; siquidem traumatica actio, seu consolidandi vis, de qua tamen in siccis tuberculis non indigemus, in fluidorum homogeneorum ac substantiae praesertim lymphaticae non interrupta per sua vasa circulatione consistit, ob quam organicae partes scissae praedictae substantiae iugiter affluentis appositione iunguntur, & ad cicatricem ducuntur. Quod ut assequamur iisdem positis morbi principiis analeptica diluentia, & refrigerantia erunt opportuna, quibus rigidum solidorum tonum laxare, flexibilem reddere, ac nimiam siccitatem temperare possimus, ut eadem solida placido motu oscillent, quibus praeterea febrilem aestum compescere, ac lymphaticam substantiam ab ipso aestu consumptam sanguini restituere pariter possimus, ut per propria vascula excurrento organicas partes nutriat, ac per abscessus divisas connectat, illudque pulmonum vitium tollat, vel imminuat, ne nova tubercula enascantur, quorum continua successio phthisim confirmat.

Confirmatae phthisis curatio cum ad institutum nostrum minime spectet, mox dictis nihil addam, nisi rursus tirones moneam, ut illos consulant

fulant auctores, qui phthifim pertrahant, illaque eligant remedia, quae hypochondriacae affectionis speciei tamquam praecipuae morbi causae conveniunt.

Vir 40. annorum calidi & ficci corporis habitus ad iram maxime pronus ini ventris rugitibus, punctoriis doloribus, qui ad thoracem & costas ascendebant, obnoxius ibat, ac saepe ructibus, stomachi ardore, aliisque hypochondriacae affectionis pathematibus quandoque molestabatur. Repente in sanguinis sputum cum tussi incidit, a quo territus, quippe levem etiam morbum pertimescere solebat, ad me arcescendum illico servum misit, meque cum non invenisset servus, eidem praecepit & quosdam domesticos exoravit, ut alium quemcumque medicum perquirerent & ad seipsum statim ducerent. Primus itaque, qui se obviam fecit medicus ad aegrum ductus post sanguinis missiones ad styptica remedia statim confugit, & quamvis cruentum sputum brevi evanisset, in eorundem remedium praescriptione aliquantulum perstitit, ex quibus notabile thoracis ligamentum productum fuit, propter quod idem thorax ad inspirandum aegre dilatari poterat, non sine aliqua tussi, modo sicca, modo cum alicuius, sed non crassioris lymphae expulsionem. Post varias hebdomadas, rursus accersitus ego, ut oleum amygdalarum dulcium in primis ad sex uncias, postea ad tres quotidie per quatuor, vel quinque vices sumeret eidem consului, deinde & pectorales

decoctiones becchicas ac sedantes emulsiones, refrigerantes & similia, quibus profecto se melius habuit, tum quoad pectoris ligamentum ac tussim, tum quoad febriculam, quae absque typo, nec sensibili accessione, sed pene quotidie aegrum prehendebat. Paulo post notabilis supervenit, haemorrhoidalium vasorum hiatus, per quem magna sanguinis quantitas non semel erupit, & a pulmonaribus vasis aliquantulum coarctatis ac fluidis lentescantibus obrutis salutarem revulsionem molita fuit, & ita per tres circiter annos prorsus convaleuit. Postea commissis in vitae regimine aliquot erroribus in febrem incidit acutam continuam, cum aliqua notabili tussi, hypochondriorum tensione, alvi stypticitate, quae post congruas venae sectiones ac repetitos haustus olei amygdal. dulc., nec non diluentium & temperantium copiam praeter unctiones & clysteres anodynos & laxantes valde remisit, & ad lentam periodicam redacta fuit; quapropter ut abdominis viscerum infarctus ac tensio adhuc subsistens tolleretur, cassiam cum pauco rhab. alternis diebus repetendam praescribere opportunum mihi visum fuit, cui serum lactis superbibebat, & vacuis diebus mane idem serum intermittebat; dilutas quoque emulsiones vespere capiebat, & humectanti diaeta utebatur. Hoc ordine febris quidem imminuebatur, sed non exstinguebatur, nec amplius, nisi insensibilem periodum servabat. Tussicula adhuc perseverabat, sed nulla prorsus catharralis materiae

materiae saltem concoctae expulsi-
one, venter aliquantulum detumuerat,
sed naturalem mollitiem nondum as-
sequutus erat. Cum de phthisi inci-
piente ac de siccis tuberculis iure ti-
mendum esset, praeter dicta remedia
ut balneum aquae dulcis iniret aegro
suasi, quo tempore ptisanam refrige-
rantem, postea aquas dulces ad usum
thermalium bibit, & a febre tandem
quemadmodum ac a tussi evasit, ni-
hilo minus nova ad firmam salutem
sibi comparandam auxilia eidem in-
sinuare curavi, antequam rus peteret,
quae neglexit, ac notabiles in victu
errores, spirituosos praesertim potan-
do liquores commisit, ita ut post du-
os vel tres menses a febre ac tussi ite-
rum captus ad urbem redierit, a me
rursus opem exquirens. Novam tunc
venae sectionem & cassiae leniens
praescripsi lacteam statim adiiciens se-
midiaetam, in qua a cibis solidis se-
prorsus abstineret, ac solis pultibus
ex farina hordei, vel oryzae loco
prandii, & coenae vesceretur. Haec
semidiaeta post quadragesimum diem
aegro exoptante suspensa fuit, quam-
vis notabile levamen ab eadem ipsum
accepisse nosceretur: siquidem febris
aliquanto levior evaserat, caloris quo-
que externi ac tussis notabilis remis-
sio, & amissae nutritionis aliqua re-
paratio percipiebatur. Perseverabant
tamen quidam acuti dolores vagi cir-
ca costas, in altero latere magis sae-
vientes, nec non ventris rugitus, at-
que contractiones, quae quandoque
insurgebant. Lacti substitui deco-
ctum analepticum ex rad. chinae, ras.

eboris, cor. c. testudine nemorali,
ranis; cui ad spasmodicam nerveo-
rum plexuum ac membranarum crispa-
turam laxandam quaedam parego-
rica & sedantia interponebam. Inte-
rim aliquod sputum caeruleum & ro-
tundum aeger expellebat, atque ca-
lorem internum praeter dictos dolores
saepe accusabat, quamvis febris a re-
misso suo gradu non ascenderet. Cru-
ento autem sputo vix apparente rur-
sus vena secta fuit, ac prius nitrata
cum absorbentibus, postea pulvis Ha-
ly Abb. eidem suppeditata fuerunt.
In hoc statu notabilis remissionis to-
tam pertransiit hyemen; ineunte au-
tem vere augescere aliquantulum fe-
bre de calore interno caeterisque
symptomatibus magis querebatur;
quapropter nova sanguinis extractio
etiam per haemorrhoidalia vasa facta
fuit. Convocatus alius medicus an-
tihecticum Poterii cum therebinto &
flor. benioveni proposuit, & infirmo
suasit, cui remedio aegre annui, quip-
pe a dispositiva morbi causa, seu a
praedicta hypochondriacae & pulmo-
naris affectionis specie idem excludi
videbatur, quae prostrema nisi pau-
xillum quidem purulentae materiae in
pulmonibus enuntiabat, sed hi a spas-
modica potius nerveorum plexuum
vascula & vesiculas coangustantium
crispatione, quam a tuberculorum
suppurantium mole opprimi percipie-
bantur; ideoque ut ptisanam refrige-
rantem cum seminib. frigidis eidem
medicamento superbiberet, instabam,
ne ab ipso remedio utpote exaltante
laederetur. Post haec, aquas ther-
males

males aluminosas Mutinenses ipsi insinuavit idem medicus, quae licet levis minerae fuit participes, tamen ut omnino infontes praeterire non audebam. Morbus in eodem gradu usque ad vigesimum circiter diem post aquarum potum perseveravit, nec aliud novi symptomatis praeter inspirationem aliquantulum difficiliorem persentiebat aeger; sed postea haemoptoicus rursus factus est, atque magnam sanguinis eruptionem passus, quae summa quidem difficultate, nulla tamen stypticorum remediorum ope, sed solis temperantibus, levibus refrigerantibus, paregoricis, venae sectionibus, & frequentibus pediluviiis sedata fuit. Per plures dies a sanguinis eruptione febris & tussis exasperatae fuerunt, ac vocis tonum prius obscurum, tunc ipse pene amisit. Quare destillatum illud ex infusione ras. eboris, cor. c. & decoctione testudinis nemoralis, pullastrae, addito lacte vaccino, &c. quod superius descripsi, eidem exhibui (a). Remissa tandem febre & ad pristinum gradum redacta caeterisque symptomatibus quoque remissis, ut rus peteret eundem hortatus fui, quo in loco temperatiorem & humidiorum, quam in urbe aerem inspiraret. Libenter amplexus est meum consilium, ac per tres circiter menses rure commoratus fuit, non sine aliquo sensibili salutis iuvamine. Nam inter caetera conspicuum valde fuit nutritionis augmentum, calor tum internus, tum externus imminutus, pulsus minus

frequens, notabilis virium instaurationis. In hoc statu urbi se restituit, ac in eadem totam hyemem pertransiit. Ineunte vere aliquantulum exasperata sunt omnia, ideoque sanguis extractus fuit prius e vena, postea ab haemorrhoidalibus vasis per hirudines. Cum tamen purulentos & copiosiores sputos emitteret, quoddam electuarium ex pulvere hederæ terrestris, parum scordei & speciei diaireos, pauxillo fl. sulphuris & balsami Copaivae melle subactum praescripsi, de quo singulis diebus drachm. i. capiebat, eidem superbibendo emulsionem ex amygdalis dulcibus, & seminibus cannabis, in quorum remediorum usu profiteri sibi videbatur. Postea electuario ad septuaginta & plures dies iam continuato substitutum fuit butyrum sulphuris ad scr. sem. cum balsami eiusdem guttis tribus, ac syrupo de hederæ terrestris in pilulas redactum, pro quolibet die ante dictam emulsionem capiendum. Hoc tempore, in quo scribo eadem remedia, ipsamque methodum, tum pharmaceuticam, tum dieteticam prosequitur. Morbi symptomata admodum remissa videntur, febris levissima, praeternaturalis calor, saltem extrinsecus, qui tactui se manifestabat, extinctus est, vires non parum sunt refectionae, corpusque aliquantulum instauratum apparet. Tussis quoque rarior, ac minor prioris materiae expulsio. Ruralem aerem adire eundemque locum, in quo anno praeterito commoratus est, petere statuit.

(a) *Cap. III. Par. 2. huius.*

tuit. De infausto vero huius morbi exitu adhuc timendum, quippe etiam si pulmonum laesio pene consolidata videatur, dispositiva tamen morbi causa superest, quae in vitioso solidarum partium praesertim nervearum tono, ex quo vehementer & inaequaliter eadem contrahuntur, nec naturali harmonia invicem agunt, quemadmodum & vitiosa corporis structura, procerae scilicet staturae atque colli longioris consistit.

Juvenis 34. annorum habitus corporis robusti, atque congruae nutritionis, in suis actionibus promptus & alacris, vehementibus tamen animi motibus quandoque obnoxius, ac ut antiquorum verbis utar, temperamenti calidi & humidi, cum colicam passionem aliquoties sustinisset, postea ructibus, borborygmis ac frequentibus abdominis crispationibus molestari coepit. Cuiusdam erroris occasione, ex quo transpirationis suppressionem inivit, lenta febre cum tussi prius sicca & levi respirandi difficultate prehensus fuit. Huius morbi initio occurrimus venae sectione, olei amygdalarum dulc. repetitis haustibus, becchicis atque expectorantibus, sed temperatis, quibus quidem auxiliis, febris aliquantulum remissa, sed nondum extincta fuit, immo post quadraginta circiter dies aliquod sputum caeruleum apparuit. In hoc statu adhuc per plures dies perseveravit aeger, postea cum a morbo pene evasisse sibi videretur, lecto vale dixit, & ad res domesticas propriaque negotia incumbere voluit. Hunc ta-

men aliquando invisens a febre & tussi non prorsus liberum inveniebam; tandem hyemali tempore ab utraque solutus apparuit. Accedente vere cum iter satis longum suscepisset, in quo solis calori per notabile temporis spatium se exposuit, vix domui restitutus haemoptoicus factus fuit, non sine aliqua febriculae accessione atque tussi, nec non levi respirandi difficultate. His pectoris symptomatibus iungebantur quoque notabilis ventris tensio, ac borborygni. Praeter venae sectiones etiam repetitas, hirudinesque haemorrhoidalibus vasis applicatas, unctiones emollientes, refrigerantia sedantia & paregorica ad sanguinis sputum cohibendum adhibuimus. Postea ad imi ventristensionem fibrarumque intestinalium crispationem laxandam, nec non cruditatum infarctum auferendum, obstructosque canales referandos, praemissa per quinque, vel sex dies olei amygdalarum dulcium potione, cassia cum rhab. ad plures vices alternis diebus exhibita fuit, interposita decoctione ex alterantibus aperitivis, ipsiusque rhab. tenui quantitate. Extricato ventre, remissisque morbi symptomatibus ad lactis caprilli usum transitum fecimus, quod ob peculiarem stomachi tonum cum decoctione radicis chinae temperari, ac leviter ebulliri oportuit. Aestivo tempore aquas acidulas sumpsit, ac vespertinis horis balneum aquae dulcis inivit, deinde ptisanam refrigerantem ex avena cum feminibus frigidis, cichorio, melle Hispanico, paucoque nitro

nitro ad quinquaginta dies bibit, ac lactis usum autumnī tempore recepit. Equidem in salute adeo profecit, ut convalescens dici posset. In hoc autem statu hyemem ac veris partem pertransiit, quo tempore cum aliorum pro suis negotiis se contulisset, illius urbis Professore consuluit, ut aliquid ad suum morbum omnino profligandum ac firmiorem salutem consequendam suggereret. Ille balsamicas quasdam pilulas, ac vulnerariam & subadstringentem decoctionem eidem praescripsit, quod remedium etiam, post reditum, aliquamdiu continuavit, donec scilicet enormem sanguinis per os eruptionem passus fuerit, quae non nisi plurimum dierum spatio, ac post repetitos insultus, tutiori & consueta methodo venae sectionum, hirudinum applicatione, succo urticae, gelatina cor. c. in aqua plantaginis facta, frequentibus pediluviiis sedata fuit. Perseverabant tamen febricula ac tussis cum caeruleis & aliquantulum purulentis sputis. Interim aquas Nocerianas mane capiebat cum eadem gelatina, ac vespere emulsionem cum paucis nitro coralliato, deinde ptisanam ex hordeo, pulloque campestri ac seminibus peponis, amygdalisque dulcibus, addito cichorio, ac pulverem Haly Abb. sumpsit, postea ad lactis usum rediit usque ad hyemem, in qua pene liberum se ostendebat. Vere accedente lac respuit, cui decoctum analepticum substitutum fuit. Mense autem Iunii, licet res feliciter progredi videretur, ac nisi leve in respiratione ligamen perciperet,

in novam sanguinis per os eruptionem incidit, quamvis anteriori mense, prout mos erat, sanguis eidem extractus fuisset. Haec sanguinis eruptio ad sputum tantummodo redacta pertinax fuit, ac praedictis superiori quoque anno adhibitis auxiliis valde restitit; tandem cohibita fuit, febricula tamen & tussis ac leve in respiratione ligamen perseverabant, quibus quandoque costarum dolores, ventris rugitus atque crispationes accedebant. In hoc statu aquae aluminosae Mutinenses S. Peregrini dictae aliorum consilio eidem suppeditatae fuerunt. Paulo post sanguinis eruptio supervenit, diris convulsionibus, magna respirandi difficultate notabilique pulsuum oppensione ac frequentia coniuncta. His accidentibus obviam ire curavimus venae sectionibus, pediluviiis, antispasmodicis ac sedantibus remediis, oleo amygdalarum dulcis decoctione rad. althaeae, cynoglossi, violariae ac semin. papaveris albi: sed post paucos dies cum aliquantulum remissa viderentur praedicta accidentia, iterum sanguis per os erupit, hinc caetera accidentia exasperata fuere, ac sedato sanguinis sputo aliquod puris sputum apparuit: respirandi quoque difficultas ad asthmatis gradum increvit, & pulsus valde oppressi ac frequentes facti sunt. Ad expansiva & expectorantia antispasmodicis coniuncta confugimus, extractum scilicet croci, fl. beniovinī, sal. volat. succini extracto enulae compacta; ad decoctiones quoque expectorantes erysimi, tussilaginis, &c.

cum syrupo de althaea edulcoratas, eo magis invalescente respirandi difficultate & obscuratis pulsibus e vivis sublatus est.

C A P V T IV.

De affectione hypochondriaca asthmatica.

Respirandi difficultatem inter familiaria hypochondriacae affectionis symptomata superius enumeravimus (a); modo asthmaticam affectionem ab hypochondriaca oriundam, vel cum ipsa coniunctam contemplemur. Haec autem passim a medicis dividitur in siccam & humoralem; utramque vero ex hypochondriaca affectione fieri posse demonstrabimus, & quosdam casus afferemus, qui huiusce morbi pathologiam comprobent, quorumque observatio clinico medico non raro contingit.

In siccum igitur asthma facile degenerat, vel cum eo coniungitur hypochondriaca affectio, quippe uterque morbus ad convulsivorum genus spectat; siccum nempe asthma ex spasmodica nervorum plexuum, qui respiratoriis organis inserviunt, crispatione oritur. Praecipua autem organa respirationis sunt pulmones praeter asperam arteriam in bronchia definientem, diaphragma cum propriis musculis idem componentibus, quod a Winslow in magnum & parvum distinguitur (b), musculi inter-

costales, dentati posteriores, superior & inferior supra & infracostales ac sternocostales, ex quibus ultimis tres, dentatus scilicet inferior & infracostales & sternocostales pro aeris expiratione costas deprimunt, atque thoracem constringunt, priores vero ad aerem inspirandum eundem thoracem dilatant. Si igitur nervei plexus, qui per easdem organicas partes distribuuntur, spasmodice contrahantur, eorum contractio respirandi difficultatem secum afferre necesse est.

Et quoad pulmones, eorum bronchia ita coangustantur, ut aer inspirandus ipsorum vesiculas difficulter adire possit, ac in dato temporis spatio, quod ad inspirandum infumitur, non nisi tenuis aeris quantitas easdem vesiculas ingrediatur, quae pro naturali ipsarum dilatatione, ac pro libero sanguinis in pulmonaribus vasis comineatu non sufficit, hinc anhelosa, frequens & cum sibilo respiratio.

Quoad diaphragma vero & musculos, quorum nonnulli costas elevant, ac thoracem dilatant, alii deprimunt, & constringunt, sive communis & aequalis

(a) Cap. I. huius. (b) Expos. anatom. pag. 554. 556.

aequalis fiat horum musculorum spasmodica contractio, sive inaequalis & quibusdam musculis peculiaris, laboriosa sequitur respiratio. E. g. musculi costas elevantes propriis nervorum ramulis contractis easdem costas suspendunt aerisque egressum remorantur: musculi vero costas deprimentes in praeternaturali contractione manentes in caeteros antagonistas vim faciunt, ac thoracis dilatationem impediunt, quod frequentius observamus, ac facilius contingere posse videtur. Siquidem plures causae praeter depressores musculos ad thoracis constrictionem tendunt, inter quas costarum gravitas, ac naturalis diaphragmatis circa suum centrum adscensus ex visceribus abdominis, quae in inspiratione ab eodem compressa contra ipsum renituntur.

Si autem utrique musculorum generi inspirationi & expirationi intervenientium communis sit spasmodica affectio, tetani species fit, seu motus tonicus, ex quo thoracis parietes nec attolli, nec deprimi possunt, nisi summo patientis conatu. Cum itaque hypochondriacus morbus in nervoso & membranoso systemate versetur, nil mirum si thoracis aequae ac inferioris ventris nervos laceffat, quod duplici causa fieri posse ostenditur. Prima scilicet ex harum partium consensu, secunda ex actuali nervorum per organicas respirationis partes distributorum vitio.

Ex partium consensu; nam plerique nervorum, qui inferioris ventris visceribus, respirationis quoque orga-

nis prospiciunt & cum caeteris e spinali medulla oriundis multis locis communicant. Octavum nempe par & intercostale tam in pectore, quam in abdomine distribuuntur, ac plurimis in locis ad varios earundem cavitarum plexus formandos concurrunt, ideoque & inter se communicant, quemadmodum & cum totius spinalis medullae vertebralibus, praesertim intercostale, quod in duas magnas chordas iuxta omnium vertebrarum latera excurrentes dividitur, quae hinc inde tuberositatibus glandiformibus interciduntur, ex quibus brevium filamentorum ope cum medullae spinalis gangliis connectuntur, idcirco a celeberrimo Winslow magnum sympathicum appellatur. Quid igitur mirum si abdominalium nervorum passiones pectori aliquando communes fiant, ac oscillationis defectus, qui attritorium ventriculi motum & peristalticum intestinorum tollit, alternum quoque & oscillatorium thoracis perturbet? Etenim animale liquidum, quod ab aliqua causa nervos laedente commovetur versus sternum repellitur, hinc superiores ramos maiori quantitate atque impetu invadit, proinde bronchia pulmonum, aut eiusdem thoracis musculos in violentas contractiones inducit, quae laboriosam reddunt respirationem.

Hoc quidem in diaphragmate praesertim contingit, quippe magnus inter hoc & abdominis viscera ratione propinquitatis nervorumque cohaerentiae adest consensus. Nam tumefcente ventriculo ac intestinis ipsius

diaphragmatis descensus atque explicatio inspirationi necessaria interrumpitur, contractisque ex spasmodica affectione iisdem partibus, per oesophagi saltem mutnam connexionem eiusdem adscensus ad liberam exspirationem intercipitur; ratione autem nervorum cohaerentiae, quoniam magna chorda paris intercostalis, quae diaphragma perforat, eiusdemque superiori superficiei nervea filamenta suppetit, mediantibus gangliis semilunaribus dictis (a) cum ventriculo, mesenterio, intestinis, hepate caeterisque omnibus imi ventris visceribus communicant, quare cum iisdem compatitur, & in convulsivos motus facile trahitur, qui alternam eiusdem actionem coercent. Ex consensu quoque vertebralium nervorum, qui abdominis musculis serviunt, & ex iisdem musculis, quorum superiores extremitates pluribus thoracis costis, & quorundam etiam sterni adhaerent, difficilis habetur respiratio; siquidem praeter modum tensis iisdem nervis etiam musculus ventris in violenta contractione manent, qua praedictas costas elevare non sinunt, quemadmodum superius animadvertimus.

Ex actuali quoque nervorum per organicas respirationis partes distributorum vitio iidem asthmatici affectus excitantur, quod vitium, vel simul eodemque tempore abdominis nervos invadit, vel praevis horum vitio succedit, & ab hoc originem ducit. In primo casu utriusque ca-

vitatis nervorum fibrae naturalem tonum ac elasticitatem simul amittunt, ob quam animali liquido inaequaliter & absque proportionem inflantur, unde quaedam fibrarum muscularium series, aut quidam musculus eodem liquido magis tumidi suorum antagonistarum vim superant, & sic alterna & reciproca eorumdem actio sufflamatur, ex qua naturalis respiratio habetur.

Causa, propter quam nervei tubuli nervorumque plexus inaequali animalis spiritus quantitate repleantur, erit procul dubio fibrarum eorumdem nervorum tonus nimis rigidus, vel nimis laxus. Si rigidus, eadem fibrae nimis tensae, aut durae influenti liquido resistunt, ideoque ipsi nervei tubuli ad sufficientem spirituum quantitatem excipiendam se satis dilatare nequeunt. Sicuti vero nervorum momentum in directa ratione spirituum nervos influentium esse arbitramur, ita aequali posita spirituum in cerebro secretionem, singulorum nervorum momentum erit quoque in ratione directa amplitudinis tubulorum nerveorum. Si vero toni laxitas invenitur, valde flexibiles fibrae nerveae spirituum influentium nisi praeter modum cedunt, atque flectuntur; ac proinde nimium repletis iisdem tubulis, nervorum & musculorum actio violenta evadit, cui si antagonistarum vis minime respondeat, convulsivi motus insurgunt, qui in organis respiratoriis suffocationem interdum minantur.

In

(a) Winslov. pag. 556.

In secundo casu, quando scilicet asthmaticus affectus hypochondriaco succedit, praedictorum organorum nervei plexus peculiare vitium, seu maiores vitii gradus, five rigiditatis, five laxitatis inde contraxisse censendi sunt, quapropter earundem partium officium perturbatur, haec autem morbi successio facilius evenit, si toni vitium in laxitate consistat. Nam interdum serosa, vel lymphatica materia nervorum nutritioni, & irrigationi destinata, inter eorundem fibras intruditur, eiusque molecule instar cunei ipsarum fibrarum parallelismum tollunt, ac tubulos comprimendo, spirituum influxum prohibent, vel saltem imminuunt, proinde thoracis musculorum actionem infringunt, quae imbecillitas, si respiratoriis musculis universalis sit, asthmaticus morbus a paralytica affectione pendet, quae diuturnum, non periodicum, sed constantem eundem reddit, si vero peculiaris sit, nec cunctis musculis aequalis, asthmaticus insultus spasmodicam affectionem pro causa agnoscit, nec constans est, sed periodicus. Verum de his phaenomenis superius egimus.

Cum humorali quoque asthmate coniungitur hypochondriaca affectio, vel illi praecedit, sed in eo plerumque corporis habitu, in quo fibrae laxitas, ac solidorum vis contractilis imbecillis invenitur. Siquidem fluida sub eadem vi comprimente, utpote leviori, traiecta non bene atte-

ri, & subigi possunt, ideo imperfecta habetur sanguificatio; serosae scilicet partes rubris praevalent globulis, in quos eadem serosae molecule aegre compinguntur, quae ad bronchialia laxioris toni vascula delatae lentescunt, ac secretoriis ductibus aliquamdiu immorantes, tenuiori parte effluente, crassiores fiunt, ac pondere & distensione pulmonares vesiculas obruunt, aut salium exaltatione acrimoniam acquirendo, nerveas fibrillas proritant, non sine tussi ac earundem vesicularum coarctatione, quae respirationem difficilem reddit. Praeterea extraneae particulae, quae quotidie ex alimentis in sanguinem deferuntur, debiliori vasorum praelo subactae sanguineorum globulorum naturam tarde assequuntur, ac irregularem figuram asperamque superficiem servantes in praedictis pulmonum secretoriis invicem adhaerent, ac tenaci catarrho bronchiales glandulas & vicina vascula ita infarciuntur, ut aucta mole pulmonarium vesicularum cavitatem occupent, quod humorale asthma constituit.

Idem tamen ex causa pene contraria sequitur effectus, posito nempe rigido fibrarum tono arteriae minus dilatantur, sed dilatationi constrictio respondet. Quapropter minori impetu se constringentes ipsae arteriae fluida minus conterunt, ac minori momento eadem impellunt, hinc fluidorum molecule minus attritae homogeneam laevitatem tarde acquirunt,

runt, & ob maiorem inter se ipsas contactum facile coagmentantur, eo-que facilius, quia imminuta celeritate vehuntur, ac in minimis vasculis magis lentescunt, proinde in viscosos quoque succos degenerant, quod superius iam demonstravimus.

Quoad medendi methodum, asthmatis genus in primis respicere debet medicus; deinde aegrotantis temperamentum, quod affectionis hypochondriacae speciem refert, an convulsivum scilicet sit asthma atque siccum, vel humorale, aut etiam mixtum, quod non raro evenit. Indicationes asthmatis sicci & convulsivi in sicco temperamento rigidaque fibra, erunt procul dubio, habitum corporis humectandi, fluidorum massam diluendi, nerveosque plexus laxandi, atque corpus enutriendi. In laxiori autem fibra ac rarioris solidi nervei textura post congruam humectationem congruumque diluentium usum corroborantia quoque ac tonum fibrae resistentia adhibere opus erit, ne tubuli nervei animali spiritu extra proportionem inflentur, aut ab extraneo liquido infarciantur.

Diversae quidem sunt asthmatis humidi indicationes; nam diluentia, expectorantia, expansiva, & incidentia hic maxime conveniunt. In asthmate vero mixto utraque indicationes locum habent.

Remedia itaque, quae ad primum spectant, erunt inprimis sanguinis

missio, quae ad tonum fibrae laxandum, sanguineae stagnationis, aut eruptionis in vasis pulmonaribus periculum amovendum perutilis, & uno verbo ad suffocationem vitandam necessaria a medicis comperitur. De quantitate autem sanguinis extrahendi, ac de extractionum numero nihil determinari potest, haec enim, pro ut insultus contumacia, pulsuum tensio, sanguinisque maior, vel minor spissitudo requirit, est peragenda, ac post iteratas venae sectiones, quibus non solum vasorum imminuitur plenitudo, sed etiam sanguinis densitas, eiusdem motus accelerando, solvitur, hirudines quoque venis sedalibus applicandae. Unctiones quoque laxantes & anodynae sunt adhibendae, nec pediluvia omittenda, sed inter caetera extrinseca remedia balneum aquae dulcis pro singulari habendum.

Ex intrinsecis oleosa inprimis sunt praescribenda, & ad plures dies iteranda; veluti oleum amygdalarum dulcium, vel seminum peponis, deinde emulsionem refrigerantes, serum lactis, frequentia paregorica, sive solida, sive liquida cum aliquo semper antispasmodico ex temperatis sociata, de quibus iam superius verba fecimus. Ptisanas refrigerantes valde opportunae, decocta ex radicibus chinae, cannae mont., althaeae, cynoglossi, additis, carne vitulina, caudisque & chelis cancerorum fluviatili-um; his vero praestantius lac asinum. Convulsivum tamen asthma

in laxioris fibrae nerveae constitutione, quemadmodum supra animadvertimus, praeter modo dicta, aliqua etiam expansiva & corroborantia possunt remedia, decoctum scilicet ex radice salsaeparillae & chinae cum ras. eboris & cor. c., additis quoque carne vitulina, caudis & chelis cancrorum fluviatilium ut supra; quo tempore etiam tincturam martis pomatam capere poterit infirmus.

In asthmate humorali diversa erit curationis ratio. Parca vel nulla sanguinis extractio, ac balneum aquae dulcis in rigido tantum fibrarum tono, quemadmodum & unctiones emollientes convenire possunt: in caeteris vero resolventes, & disgregantes, ut butyrum iuniperi, pinguedo anserina cum oleo catellorum, croco & camphora, vel cum paucis mercurio extincto commixta, aut suffumigia ex saccharo, vel olibano cum paucis etiam cinnabari naturali, aut humectantes vapores ex decoctione rad. & fol. althaeae, verbasci, nymphaeae, &c. quae postrema remedia mediante inspiratione affectis pulmonibus citius mederi possunt. Ex internis auxiliis aliquod catharticum ex lenientium genere sumet aeger, inter quae mannam in decoctione tussilaginis, erysimi solutam, vel syrupum violarum cum tartaro solub. deinde ad specifica pectoralia & incisiva est transeundum, veluti extracta enulae, camp. scabiosae, ireos, sperma ceti, crocum orientale, flor. sulphuris, butyrum eius-

dem, beniovinum, salem volatilem succini, cor. c., ac ubi viscosa apparent sputa ac notabilis fibrae laxitas, gummi ammoniacum aceto scillitico solutum, fuliginem praeparatam, olibanum, myrrham, &c. quibus superbibantur decoctiones quoque pectorales, radic. liquiritiae, cannae mont., ireos, herbae veronicae, hyssopi, erysimi saccharo vel melle hispanico edulcoratae, syrupi quoque eiusdem generis, de erysimo, tussilagine, fuligine; spiritus eiusdem in ipsis syrupis, vel decoctionibus mixtus, aut volatilis oleosus Sylvii, &c. Si mixtum sit asthma, ac utriusque generis particeps, utriusque pariter auxiliorum generis particeps esse debet curationis methodus.

Vir 33. annorum sicci corporis habitus & melancholici temperamenti hypochondriacae affectionis quaedam signa dedit, postea in respirandi difficultatem incidit, quae ad asthmatis gradum brevi ascendit. Haec quidem in duplicem distingui poterat, lenta continua, vehemens & intermittens, sive periodica, quae cum nulla, vel pauca tussi invadebat, nec ulla pectoris solvebatur excretionem. In hoc subiecto eadem methodo usus fui, quam in primo casu asthmatis sicci ac fibrae rigidioris indicavi. Post celebratam venae sectionem in brachio ac pede, ab haemorrhoidalibus vasis per hirudines sanguis extractus fuit, unctiones emollientes ac pediluvia praesertim in gravibus insultibus.

sultibus non omissa fuerunt. Oleum amygdalarum dulcium frequenter hausit aeger, five mane, five sero loco coenae. Pulpam cassiae simplicem ac tantummodo aromatizata aliquoties sumpsit, eidem superbibens ferum lactis depuratum, cui paregorica interponebat cum specifico antispasmodico sociata; postea ad usum ptisanæ refrigerantis transiit, ac in balneum aquae dulcis descendit; tandem lac asininum per quadraginta dies cepit, ac paulatim a morbo prorsus evasit.

Vir quadraginta annorum pallidi coloris, mollisque corporis habitus quibusdam ventris, ac stomachi praesertim affectionibus molestabatur, doloribus nempe, borborygmis, ructibus, palati viscositate, ciborum nausea, deinde notabili, & continua respirandi difficultate oppressus fuit, quae quandoque exasperabatur cum tussi ac viscosae materiae expectoratione, quae symptomata humoralis asthmatis characterem exhibebant. Idcirco tenuem sanguinis quantitatem e vena brachii extrahi iussi, postea potionem ex manna in infusione fennae & tartaro soluta praescripsi, deinde pilulas quotidie sumendas ex gummate ammoniaco aceto scillitico soluto, sapone Veneto, rhabbarbo, & tartaro vitriolato, essentia iuniperi aromatizatas, quibus superbibat decoctionem pectoralem, atque attenuantem ex canna montana, pareira brava, ireos, liquiritia, quam ut

frequenter biberet, commendabam; syropos quoque de erysimo, de hyssopo aqua fl. aurantium dilutos cum spiritus fuliginis paucis guttis. Post satis longum horum remediorum usum respirationis gravitate aliquantum levare videbatur aeger, catarrhalem materiam minus viscosam quidem per os expellebat, sed adhuc copiosa eiusdem quantitas non sine tussi pulmonem obruebat. Praedicta potio eidem rursus propinata fuit, hinc decoctum ex falsaparilla & china cum paucis guaiaco & saffra frumfit, praemittendo bolum ex butyri sulphuris scrup. sem. extracti croci gr. ii. syrapi de erysimo quant. sat., postremo tincturam martis tartarizatam, ac paulatim pristinam salutem recuperavit.

Vir 54. annorum mediocriter sicci corporis habitus, ac fibrae rigidioris, quibusdam crispationibus ac doloribus, modo ventrem, modo pectus infestantibus, nec non borborygmis obnoxius levi quoque respirandi difficultate quandoque molestari coepit, cui tussis supervenit, quae incommoda per quinque, vel sex menses neglexit, donec vehementi ac orthopnoico respirationis insultu prehensus fuit. Accersitus itaque medicus venam secari praecipit, deinde cum haemorrhoidalium vasorum tributo eidem familiari per notabile temporis spatium defraudaretur, ope hirudinum deficiens naturae munus supplere curavit, ac notabilis sanguinis quantitas

quantitas per eadem vasa extracta fuit; nihilo minus praedicti suffocati-
vi insultus per vices redibant, ac fre-
quenter aegrum adoriebantur, pulsus
in actuali insultu aliquantum frequen-
tes, inaequales & sepulti percipie-
bantur, eodem remittente rariores
& expansiores, ipsoque sedato natu-
rales fiebant. Tussis aderat molesta,
praesertim ingruente paroxysmo; spu-
ta valde viscosa ac extra paroxysmum
copiosa excernebantur. Cum variis
interim auxiliis resisteret morbus,
inter quae numerantur, quotidianus
olei amygdalarum dulcium haustus,
unctiones, pediluvia, decoctiones
pectorales, levia paregorica, syrupi,
boli expectorantes ac expansivi, urgen-
te praesertim suffocatione, extracto
enulae, fl. beniovini, sale succini volatili
vel croci extracto compositi; consultum
fuit ut in balneum aquae dulcis descen-

deret, ac ptisanam ex avena Hannove-
riana seminibus frigidis, hedera terrestri
ac melle hispanico paratam caperet,
bolum praemittendo ex butyro sulphu-
ris, fl. beniovini, syrupo de fuligi-
ne subactum. Quae methodus post
duodecim circiter dies multum pro-
desse videbatur; siquidem minori im-
petu ingruebant insultus, ac postea
rarius, tandem viginti dierum spatio
prorsus evanuerant. Completo bal-
nei tempore, ut ptisanae lac asininum
succederet opportunum existimavi,
cui tamen alvum nimis laxanti ca-
prillum substitutum fuit, quod, ut
in salute magis firmaretur & asthma-
tica affectio longius abiret, ad quin-
quaginta dies continuavit.

Asthma, ac sputum sanguinis in
affectione hypochondriaca legi apud
clarissimum Roncallum Parolinum in
pulchra sua morborum Histor. (a).

C A P V T V.

De affectione hypochondriaca calculosa.

Calculi praesertim renalis genera-
tionem hypochondriacae affe-
ctioni non raro supervenire me do-
cuerunt quaedam observationes, quae
cum mechanico operandi naturae mo-
do prorsus conveniunt. Quod ut
melius elucescat, eiusdem calculi na-
turam in primis, deinde occasionales
ac dispositivas causas hic breviter exa-
rabimus.

Calculus nihil aliud est quam ag-
geries durarum partium prius in san-
guine, deinde in urina innatantium,
quae viscido mediante succo coagmen-
tantur (b). Coagmentatio vero,
nisi in vasis, in quibus fluidum, seu
urina lente movetur, fieri nequit;
siquidem motus directus ac progressi-
vus eidem coagmentationi se oppo-
nit, ideoque durae particulae, quo

Eee 2

magis

(a) *Hist. morb. num. XXIV.* (b) *Pitcar. Elem. Medic. Cap. XXIV.*

magis de motu directo amittent, eo facilius in calculi moleculas coagmentabuntur.

Dispositiva itaque ac efficiens calculosae concretionis causa, primo in liquidorum vitio, secundo in solidorum actione est inquirenda. Liquidorum vitium, quod calculi materiam praebet, erit procul dubio in fluidorum massa praedominium illarum partium, quae eundem calculum componunt, solidarum nempe & terrearum molecularum copia, quae, utpote graviores, per urinam excernuntur. Nam Boerhaavius urinam etiam sani hominis in vitreum tubulum recipiens mediante microscopio observavit, ac ex sabuli flocculis artificiales calculos compingi posse facto demonstravit (a). Praeter terrearum molecularum copiam etiam viscosarum aggeries est supponenda, quarum ope terreae particulae coalescunt, & quae procul dubio male attritarum chyli molecularum soboles sunt. Terreae igitur particulae utpote graviores subeuntes laterales canaliculos, seu fistulas, quae unitae pyramidalia, & polygonal corpora constituunt, imminuta progressivi motus celeritate, earundem fistularum fundum petunt, quibus si viscosae interponantur, simul coeunt, & calculi rudimenta efficiunt, quae ad alia corpora membranacea, nempe papillaria cum deferantur, novis ac-

cedentibus moleculis, crassiores evadunt, ac in pelvim eructata, iisdem parietibus aliquamdiu haerentia, maiorem acquirunt molem, qua ureterum orificia non nisi aegre magnoque dolore permeare possunt.

Quoad vitiosam solidorum actionem est notandum, has calculosas concretiones in motu nimis retardato principium habere, quo mediante praedictae terreae particulae coagmentantur. Huic motus retardationi causam imputant nonnulli recentiorum, ob quam ren sinister multo frequentius, quam dexter calculo infestetur, ac inter varias huius phaenomeni rationes, quas Schulzius adducit, praecipuam esse sinistrae venae emulgentis longitudinem procul dubio arbitratu doctissimus Haller, quae ex fatus necessitate (b) ultra aortam extenditur; ideo sanguis, cum per hanc ad venam cavam fertur, maius spatium describere debet, quam per dexteram, proinde etiam plus celeritatis amittit. Quapropter sanguini per renales arteriolas excurrenti augetur resistentia, ex qua crassiores atque terreae moleculae maiori copia congregantur, ac facilius in praedictis fistulis coeunt.

Aliae etiam huius motus retardationis causae in rene sinistro a medicis considerantur, coli nempe intestini flexura quod flatu distentum hoc viscus premit (c); ventriculus quoque post

(a) Haller. Praelect. T. 2. Actio Renum. (b) Praelect. T. 1. Act. Renum. (c) Hoffmann. T. 2. Par. 2. Medic. system.

post notabilem ingestorum copiam tumidus idem comprimit, ita ut propria elasticitate in urina secernenda gaudere non possit (a). Ex quibus, vel similibus causis fit naturalis arteriolarum & fistularum renalium atonia, ob quam urinae materia necessarium impulsum non accipiat, atque crassiores molecule stagnationis occasionem inveniant. Saepe vero spasmodica renalis plexus affectio, sive peculiaris, sive aliis visceribus abdominalibus ventriculo praesertim & intestinis communis, haec organa secretoria ita coarctat, ut per angustiora ostiola urina traici debeat, ideo cruda & aquea apparet, ac si renalium earundem arteriolarum & tubulorum motus oscillatorius acceleretur, copiosa excernitur, & ita crassiori urinae parte detenta, terreae particulae viscoso mediante glutine cohaerent, calculosque efficiunt.

Haec calculosa rudimenta ex liquidi renalis retardatione pendentia in illis praesertim arteriolis fieri verisimile est, quae serpentina directione, ac in orbem convolutae illos efficiunt glomeres, qui corpuscula glandulis similia repraesentant; quae tamen Ruyschius non glandulosos folliculos, sed solummodo arteriolarum intestinorum forma inflexarum glomeratam congeriem ultimo contendit (b), quae per macerationes dissolvi potest. Hoc autem suadere,

ac demonstrare videtur, ut animadvertit Haller (c), facilis transitus ex arteria in uretere, qui iniectionum ope cum ceracea materia conspicuus redditur, nec ullos facit nodulos, qui se manifestarent, si glandulosi ibi inessent folliculi. In his praecipue arteriolis calculi rudimenta fieri etiam Malpighii observatio valde comprobabat, qui (d) in Daviae Nobilis Bononiensis cadavere ren invenit duris ac rotundis corpusculis veluti plenum, quae per urinarios ductus iisdem arteriolis communicantes lapidea filamenta in pelvim calculis quoque plenam emittebant, nec impertinens est alia eiusdem Haller observatio, quam de aedituo templi Leidenfis refert (e), cuius alter renum totus calculosus inventus fuerat.

Equidem Boerhaavius (f) duplici apparatu urinam in renibus secerni posse, imo naturae consentaneum esse censet, operosiore scilicet via, ac per glandulosam fabricam, seu per istos arteriolarum glomeres, qua via, exigua sed acrior atque crassior urina aqueam & copiosiore suo colore tingit, & simpliciore, quae potus materiam separat, & quidquid aqueum & tenue in urina adest. Aliorum viscerum exemplum adducit, in quibus duplici modo natura in liquore secernendo usa est, hepate scilicet atque testibus, semen considerans veluti liquorem mixtum ex

E e e 3

arterioso

(a) Boerhaav. *ibidem*. (b) *Thesaur. X.* (c) *Ibidem*. (d) *De glandulis*. (e) *Ibidem*. (f) *Par. 353.*

arterioso testis humore & glanduloso muco prostaticarum.

Quidquid sit de loco in quo rudimenta calculi elaborantur, nostra parum interest. Colligendum quidem erit ex natura calculi modo considerata, hypochondriacam affectionem ad calculi generationem ex vitio solidorum ac fluidorum multum confluere posse. Vidimus enim superius fluidorum vitium in hypochondriaca affectione ex molecularum sanguinem componentium crassitie atque cruditate plerumque oriri, quae calculorum materiam subministrant: vitium quoque solidorum ex perturbata oscillatorii motus harmonia; ob quam eadem fluidorum molecule male atteruntur, ac retardato motu minimas arteriolas ac secretoria viscerum vascula percurrunt. Accedentibus igitur crebris visceralium nervorum crispationibus, quae vasculorum diametrum coarctent, vel arteriolarum elasticam vim, qua fluida naturali celeritate in secretorios ductus compelluntur, cohibeant, si haec in renibus contingant: graviores ac terreae molecule lente progredientes maiorem coeundi, ac glutinosae substantiae ope concreescendi occasionem accipiunt.

Duplex itaque erit in praesenti indicatio, prima scilicet ut haerentes calculi eliminantur, atque concrecentes conterantur, secunda ut fluidorum crassities attenuetur, diluatur,

eorumque celeritas augeatur: deinde ut spasmodicae crispationes sedentur, ac solidorum elasticitas alliciatur, a qua fluidorum non solum progressivus motus, sed optima etiam crasis, sanguinisque molecularum elaboratio pendet.

Ad calculos haerentes eliminandos, qui si conspicuae molis sint, non sine molesto cruciatu ureteres inire, ac per ipsos descendere nec absque nephritica passione in membranaceis renum fistulis immorari queunt, oleosa inprimis paregorica, diluentia, ac ultimo loco aperitiva & diuretica, calculosque frangentia necessaria sunt, supra quod tirones mittimus ad illos auctores, qui de calculo agunt. Ad morbosam vero lapidicinam evertendam illa adhibenda erunt auxilia, quae praedictum fluidorum & solidorum vitium auferre possunt, a quo hypochondriaca affectio fovetur, illaque effugienda erunt praeiudicia, quae supra animadvertimus. Hoc autem cum in affectionis hypochondriacae specie recte dignoscenda consistat, pro huius affectionis curatione quatuor superiora capita consulenda erunt.

Vir quinquaginta annorum melancholicum temperamentum, pallidum colorem, siccumque corporis habitum nactus, sedentariae vitae deditus, cum hypochondriacae affectionis pathemata diu pertulisset, frequentes scilicet dolores in cordis scrobi-

scrobiculo, hypochondriorum tensiones, borborygmos, alvi stypticitatem, urinas saepe tenues & aquosas, interdum copiosas, acidos ructus, vertigines, postea de gravativo lumborum dolore queri coepit, a quo, arenosa apparente in urina materia, levabatur; tandem acuto lumbi sinistri dolore prehensus fuit, cui vomitus supervenit, ac urinae suppressio. Post usum olei amygdalarum dulcium, praevio bolo paregorico, non omissis unctionibus, & fomentis emollientibus, & anodynis, cessavit dolor, & postea notabilis molis calculus emissus fuit. Transacto vix mense iterum obtusus lumborum dolor accessit, qui sicuti ante arenosae materiae excretionem discessit, sed arenoso urinae sedimento rursus peracutus sinistri lumbi dolor successit, qui non sine magno patientis labore, validisque artis auxiliis superatus fuit. Etenim praeter remedia prius adhibita in balneum aquae dulcis descendere aeger coactus fuit, ac post anodynorum & emollientium internorum & externorum usum, terebinthum simplicem ex diureticis larga dosi sumpsit, a quo cito apparens calculus validiorem impulsus accepisse censendus est. Ut vero haec lapidosa fodina dissiparetur, quae aegrum aliquando in vitae discrimen ducere poterat, aquae acidulae praescriptae fuerunt, postea quaedam specifica, quorum praecipua fuerunt, rasurae saponis cum tartaro vitriolato terebinthinae ope in pilulas compactae,

quibus superbibebat decoctionem mulsam ex radicibus asparagi, rusci, saxifragiae, millefolii. In quorum remedium usu adhuc exigua arenae portio in urina interdum conspiciebatur, tandem ad martialia liquida forma parata transiit, ac quaedam breviter sed frequentia itinera suscipiens a sedentaria vita se aliquantulum abdicavit, & musicales concentus frequenter adivit, quo regimine non solum a calculis, sed etiam ab hypochondriaca affectione convaleuit.

Virgo 25. annorum melancholici corporis habitus cum hypochondriaca affectione per duos circiter annos devincta fuisset, cuius praecipua symptomata erant, ventris ac praesertim stomachi diuturni dolores, rugitus, atque tensiones, nauseae, absurdarum rerum appetitus, frequentes lipothymiae, vertigines, alvi stypticitas, urinae crudae & aquosae, postea ab acuto lumborum dolore adorta fuit cum pene totali urinae suppressione, cui cum consueta emollientium & anodynorum methodo obviam ivissemus, aegra cum copioso arenae sedimento aliquot tenues calculos per urinam eiecit, ac lumbi dolore levata fuit. Hic autem insultus quamdam periodum acquisiverat, quae ad 15, vel 20. dies extendebatur, usu tamen balnei aquae dulcis aliquantum perrupta fuit; denique diluentium ac humectantium regimine incessanter ad duos circiter annos continuato, lacte scilicet asinino,

asinino, aqua dulci nitrata ad usum ab hypochondriacâ vero affectione mineralium a morbo renali prorsus, pro maiori parte liberata fuit.

C A P V T VI.

De affectione hypochondriaca tympanitica & aliis quibusdam affectionibus in solidum, in quas hypochondriacus morbus migrare potest.

Ex affectionibus, quae morbo hypochondriaco copulantur, vel succedunt, tympaniticam quoque leviter attingemus, caeterasque tantum enumerabimus, quippe earundem historiae adhuc mihi desunt, ac licet nonnullos ipsarum casus, qui in praxi mihi occurrerunt, reminiscar, tamen cum ob plurimum annorum spatium a memoriae potestate remoti sint, ac huius operis idea tunc nondum genita ad eorum symptomata sigillatim notanda me impellere non potuerit, ideo praedictos casus recensere modo non valeo.

Prima itaque sit tympanitica affectio, quae ab aere ventriculum ac intestina enormiter inflante plerumque fieri fere omnes consentiunt, praeeunte Dom. Litre, qui plurimis validisque observationibus hoc evicit, atque manifestavit, mediante scilicet paracentesi atque candelae accensae ad tubum, per quem instrumentum

Troiquart dictum infigitur, applicatione, quibus non in abdominis cavitate tympaniticorum aerem contineri indicavit, mediantibus vero cadaverum sectionibus in ventriculo ac intestinis praeter modum inflatis detineri clare demonstravit.

Aliae vero observationes id comprobantes inveniuntur, apud Hildanum scilicet (a), ac Ephemerides Germaniae (b), apud Bonetum (c), quae observationes etiam a D. Boissier de Sauvages in quadam dissertatione: *quomodo aer diversis suis qualitatibus supra nostrum corpus operetur*, adducuntur; alias quoque plures D. Combalusier refert, quibus & novas addit, ut quatuor tympanitis species statuatur (d), quae utrum conveniant a D. Zeviani sapienter discutuntur (e).

Praefatus Doct. Litre mechanici pariter tympaniticae hydropis tradit. Aeris

(a) Centur. VI. Observat. 74. (b) Tom. II. Observat. 86. (c) Lib. III. Sect. XXI. Observat. 22. (d) Pneumatologia pag. 26. (e) Del Flato a favor degl' Ipocondriaci.

Aeris nempe alimentis mediantibus in ventriculum & intestina ingressum triplicem usum habere considerat; primum scilicet, five propria elasticitate, five salinis & sulphureis partibus; quibus scatet, ad eorundem alimentorum digestionem conferre. Et sane aeris molecule, dum ipsa alimenta, a quibus continentur, in ventriculo fermentescunt, aliquanto rarefactae ab eorundem alimentorum particulis secedere coguntur, ac ratione aequilibræ adscendunt, easque calore & salivali succo iam maceratas magis dissolvunt. Secundum: stomachi membranarum in alimenta actionem coadiuvare, cum horum pauca quantitas in eodem continetur; nam ipsae membranae naturalis contractionis ope ad sese ita accedere nequeunt, ut eadem exigua alimenta immediate conterere, ac digesta ad intestina compellere valeant; necesse igitur erit, cum non detur actio in distans, ut mediante aliquo corpore inter ventriculi membranas & alimenta existente hoc fiat, quod nihil aliud praeter aerem in ipso ventriculo contentum esse potest. Tertium aeris officium in ventriculo ac intestinis praesertim vacuis erit, impedire, ne eorundem membranae proprio pondere, contractione & aere externo ratione aequilibræ comprimente ad sese mutuo nimis accedant, ita ut alimenta recipere, nec transmittere queant.

Ventriculum ac intestina tamquam vacuos musculos considerat, in quo-

rum cavitate aer contentus antagonista officium gerit. Aeris actio centrifuga ab interno ad externum tendit, membranarum vero ventriculi & intestinorum orbicularium saltem fibrarum praecipua actio centripeta ab externo ad internum dirigitur (dico orbicularium fibrarum, quippe longitudinalium actio interni ipsius aeris actionem potius adjuvat). Donec igitur haec agentia corpora alternatim agant, eorumque vires inter se aequilibrantur, peristaltici motus officium optime impletur. Si vero fibrarum orbicularium momentum aeris elasticitatem superet, ventriculi ac intestinorum cavum nimis arctabitur, & alimentorum ingressui ac transitui resistet, aut si velox sit, ac successiva earundem orbicularium fibrarum contractio, non solum aer supra & infra impetu eliminabitur, sed etiam ipsa alimenta inconcocta, seu immaturae faeces chylosa materia nondum secreta & exsorpta, commixtae eiicientur. E contra si aeris elasticitas membranarum, seu fibrarum orbicularium momentum superet, ventriculus & intestina praeter modum dilatantur, nec dilatationi respondebit contractio, ideoque peristalticus motus intercipietur, ac ex interno calore eo magis rarefcente aere, praedictorumque viscerum membranas enormiter distendente, venter intumescet, durus fiet, ac leviter percutienti resonans, alvus ficescet, flatus per os ac per anum raro ac nisi difficulter emittentur, quo-

Fff

niam

niam contractilis earundem membranarum vis, qua contenta pelluntur, sufflaminiatur.

Ex quibus a praelaudato auctore recte infertur, proximam tympanitis causam esse ventriculi ac praesertim intestinalium membranarum atoniam, quae ab animalium spirituum earundem fibras praecipue orbiculares influentium inopia pendet. His igitur positis hypochondriacum morbum in tympanitem quandoque definere facile concipiemus. Nam sive quartae speciei sit, in qua fibrae laxitas pro dispositiva morbi causa accusatur, sive tertiae etiam speciei, in qua fibrarum tonus nimis rigidus, eadem hypochondriaca symptomata ab illo oriri posse & in utroque casu aegrum ad tympanitem quoque adduci deprehendemus. In primo casu, in quo ventriculi & intestinorum fibras nimis laxas esse arbitramur, iuxta principia modo exposita res per se patet, nec alia explanatione indiget. In secundo vero praedictis principiis dispositiva morbi causa adversari videtur. Si haec enim in atonia collocetur, in rigiditate, quae atoniae opponitur, eadem admitti non posse aliquis dicet. Id tamen conceptu arduum minime esse quisque fatebitur, si perpendat:

Primo: Internas convulsiones diuturnas, & contumaces crispationes, quibus hypochondriaci praesertim ter-

tiae speciei torquentur, tandem in morbosam nervearum partium atoniam abire, ac membranosas fibras diu laceffitas laxitatem acquirere. Exemplum habemus valde frequens in externis convulsionibus, seu quae musculos & artus invadunt, non solum in epilepticis, sed etiam in aliis convulsivis affectibus minus gravibus, passionibus nempe hystericis dictis in foeminis, ac in maribus hypochondriacis, quorum casus iam supra retuli. Hi post convulsivos insultus praeter universalem in artubus & musculis sensum doloris, praesertim in illis partibus, quae maiorem divulsionem passae sunt, universalem quoque lassitudinem sentiunt, quae spirituum animalium dissipationem ac nervearum partium violentam distractionem necessario sequitur. Similes quoque effectus in ventriculo & intestinis concipere debemus, quorum musculares fibrae post diuturnas ac praeternaturales contractiones, quae interdum acutos dolores secum ferunt, elementaribus suis particulis distractis naturalem tonum amittunt, ac momento aeri interni, qui ex interrupto motu peristaltico, frequentibusque alimenti corruptionibus admodum rarefit, prorsus cedunt, ac ita inflantur, ut suam contractilem vim contra aerem exercere amplius non valeant.

Secundo cum fibrarum tensiones ac rigiditates ad illum gradum perveniant, in quo subtiliora vascula tenue fluidum secernentia, veluti lympham

ita

ita coarctentur, ut nec idem fecerere, nec ad intestinorum membranas traducere queant, eadem vascula paulatim obliterantur, membranae exsiccantur, ac in perniciosam atrophiam quandoque incurrunt, vel saltem nerveae propagines in musculares intestinorum fibras desinentes, ipsaeque fibrae ita arescunt, ut etiam animalium spiritum excludant, eoque incapaces evadant; idcirco funesta paralysis exsiccationi supervenit, qua contractili & elastica vi intestinales membranas destituit: hinc aeris rarefcentis momentum praevalens illa gignit morbi accidentia, quae modo enumeravimus: quibus addendum parum, vel nihil doloris tympaniticos praesertim in statu morbi experiri, quamvis intestinales fibrae violentas distensiones ac distractiones patiantur; quod sane a spirituum animalium in easdem fibras influxu ex nimia tensione praepedito oritur, ac praedictam paralysem verisimilem esse apprime ostendit.

Hic tamen monendum, aerem tympaniticum in ventris cavitate, ac inter intestinorum tunicas interdum contineri, nisi graviorum auctorum observationibus, Plateri scilicet (a), Bellonii (b), Vallesii in commentariis ad Hippocratem de victus ratione in acutis (c), Duverney in commentariis Petropolitanis (d), quemadmodum etiam in praelaudato D.

Boissier de Sauvages legitur (e), fidem praestare nolumus (f).

Quoad morbi curationem hic paucis me expediam, ac morbi initia, eiusque dispositivas causas exarandas propono. Licet enim in statu ac fine morbi parum dissimilis esse debeat medendi methodus, quippe in fine morbi non causae, sed effectus sunt considerandi, tamen cum ab opposita causa iidem saepe nascantur effectus, in principio non effectus sed causae sunt oppugnandae, ac inquirendum, an dispositiva causa sit affectio hypochondriaca tertiae, an quartae speciei; an scilicet aegri constitutio sit melancholica & ficca, an humida & laxa. Si haec ultima; in primis examinandum, an stomachi & intestinorum glandulae crudorum ac viscosorum succorum farcimen praemonstrent, aut universalis fluidorum massa heterogeneis moleculis sit referta, quod cacochymiam veteres appellabant, quae si detegantur, congruis purgantibus erunt cavitates everrendae, ac fluidorum massa expurganda, cuius generis erunt e. g. manna cum tartaro & senna, cui superbibenda aqua tetutiana: pilulae quoque aloeticae, vel tartareae cuiuscunque speciei, vel de ammoniaco Querc. cum rhab. aut mercurio dulci ac diagrydio, quibus prout casus postulat, repetitis ad epicratica, seu lente purgantia est transeundum, ex

Fff 2

quorum

(a) Pag. 656. (b) Pag. 141. (c) Pag. 244. (d) Tom. V. pag. 213. (e) Ibidem. (f) Vide Haller Opusc. pathol. Observ. XXVI.

quorum numerosa serie praestantiora erunt, pilulae Beccherianae, Stahlianæ, rhabarbarum cum extracto fumariae, imperatoriae, angelicae, vel levistici, pulpa baccarum juniperi, vel lauri, aut eiusdem rhab. tinctura, sale tartari, vel ammoniaco extracta, decoctiones radicum calami aromatici, galangae, ari, fol. dictami, menthae crispae, pulegii, cortic. aurantiorum.

In casu dolorum ventris acutorum oleum sem. lini per os sumptum multo magis convenit, quam oleum amygdalarum dulcium. Paregorica parca dosi cauteque exhibenda, stomachica & intus discutientia utique necessaria erunt, quae ex aromaticorum, volatiliū ac spirituosorum remediorum classibus sumuntur, quaeque hic enumerare impertinens, vel saltem supervacaneum puto, quippe in pharmacopoeis sigillatim descripta inveniri possunt a tironibus. Postea opportuna erunt aquae acidulae, vel etiam sulphureo chalybeatae, proinde martialia & corroborantia remedia, quae in quarta morbi hypochondriaci specie enumeravimus, erunt praescribenda.

Fomenta quoque ex decoctionibus simplicium discutientium in vino generoso factis, veluti radicibus bryoniae, ononidis, ireos, fl. camaemeli, meliloti, sem. carvi, anis., foeniculi, &c. Cerata resolventia & corroborantia, stercus bovinum, fasciae, vel

laminae curvae ventrem compriimentes, clysteres carminativi ex decoct. furfuris frumenti, seminum lini cum melle rosato solutivo, vel si anodyna esse debeant, philonio romano, aut persico.

Si vero tympanitis ab hypochondriaca tertiae speciei affectione praecedatur, melancholica scilicet & sicca, pene opposita methodo saltem in principio uti oportebit. Ex solventibus oleosa & lenientia sunt amplectenda. Oleum amygdalarum dulcium, vel sem. lini prima vice larga dosi, postea ad plures dies in iure ad duas vel tres uncias sumendum erit, deinde cassia cum paucis rhab. & sale tartari, si purgandi necessitas detegatur, vel syrupus violatus, vel manna in decoctione fl. persicorum & violarum soluta, aut similia solventia erunt praescribenda, ac pro epicraticis extractum polypodii, vel fumariae cum paucis rhab. & nitro depurato, quibus superbibendae decoctiones fumariae, agrimoniae, cichorii, pentaphylli & similia in fero lactis factae; postea lactis usus admodum proderit, ac optimum erit asininum simplex, si autem caprillum, aut vaccinum priori substituatur, utrumque cum decoctione radic. chinae, cannae, aut saponariae temperare tutius erit. Perutilia quoque erunt destillata, ptisanæ, decocta traumatica, quae in eadem affectione hypochondriaca tertiae speciei superius descripsimus, ac uno verbo illa omnia convenient artis.

artis auxilia, quae diluunt, humectant, ac fibram flexilem reddunt, blandoque stimulo eiusdem elasticitatem proritant. Idcirco etiamunctiones laxantes & anodynae, fomentaque eiusdem generis, balnea aquae dulcis, clysteres quoque emollientes & anodynii, aquae dulces, Noceriae, Leucenses, aut similes, quae nisi a conclamata aegri vita, viriumque prostratione prohibeantur, prodesse possunt.

Duas tantum observationes hypochondriacae affectionis in tympanitem transeuntis, vel ad ipsam tendentis afferre modo possum: altera mihi evenit, alteram vero a Parente meo accepi, quem hoc anno vita functum lugens reminiscor.

Tribus abhinc annis mulieris quadragenariae curationem suscepi, quae ventris rugitibus ac flatibus valde obnoxia erat, quibus quandoque accedebant tormina, diarrhoeae, ventris tensiones, lipothymiae, cordis palpitationes, tandem post diuturnos dolores ac febrem, quamvis levissimam, notabili ventris intumescencia, ac duritie, quae manu percutiente resonabat, capta fuit, non sine alvi stypticitate ac cibi nausea. Prior affectio, nempe hypochondriaca, erat quartae speciei; nam aegrotantis temperamentum, seu corporis constitutio erat humida & laxa, eiusque solida valde rarioris texturae. Praescriptum fuit inprimis oleum sem. lini, hinc

manna in decoctione tartari, fennae, & rhab. soluta, ac ter repetita, cui toties superbibit aquam tetutianam: solutivo medicamento interpositae fuerunt pilulae ex gummate ammoniaco aceto scyllitico soluto, rhabarbaro, extracto aloe, & tartaro vitriolato. Fomenta corroborantia & discutientia atque clysteres carminativos non omisimus. Interim venter aliquantulum detumere coeperat, ac cibi nausea aliquantulum minui, ideoque easdem pilulas ad plures dies prosequuta fuit aegra, post quas ad tincturam martis aronizatam in aqua cerasorum nigrorum, ac parum melissae compositae transitum fecit. Hinc aquas acidulas *di Recoaro* dictas sumsit. Quibus peractis cum venter ad statum pene naturalem redactus fuisset, ac in caeteris symptomatibus valde levatam se novisset aegra, remediis omnino valedixit, liberoque victui se dedit. Post duos menses, ineunte scilicet autumnno rursus ventris dolores eandem adorti fuerunt, atque doloribus ventris intumescencia, immediate successit, non sine magna tensione ac resonantia. Huic accedebat lenta febris pene intermittens, sed erratica, cum priore cibi nausea. In hac morbi recidiva accersitus blandum emeticum ex ipecacuanha statim praescripsi, deinde post congruum temporis spatium prius solutivum cum aqua tetutiana, ac successive eadem pilulae epicraticae purgantes, eademque localia remedia repetita fuerunt, sed paucio salutis progressu. Insuper

opiatum antiscorbuticum Helvetii per plures dies porrexi, ac postea pulverem cachecticum ex croco scilicet martis, orientali, radice ari, cinnabari nativa, macis & cinnamomo. Nova quoque localia applicata fuerunt, ut sterqus bovinum, cerata resolventia, nempe ex cicuta, diabolani, aliud ex nicotiana; postremo laminae cartaceae fasciis circumprimentibus ventri appositae fuerunt, ut interno aeris nifui aliquantum resisterent, ac intestinorum vim contractilem nimis oppressam paululum sustinerent, sed contumax ventris intumescencia perdurabat, nec caetera accidentia minuebantur. Alia propterea quaedam specifica adhibita fuerunt, veluti sem. sinapis cum balsamo pareirae braevae, cui superbibebatur pauca decoctio rad. raphani silvestris, sem. dauci, & anisorum, vel aqua menthae, cerarum nigrorum, cinnamomi cum aliquot guttis liquoris anodynii mineralis Hoffmanni; sed omnia frustra, imo corpus emaciari noscebatur. Tandem decoctum ex falsaparilla cum carne pullastrae ac ranis satis aromatizatum eidem suppeditatum fuit, quod eundem quoque eventum ac priora remedia sortitum est. Quare augefcente corporis macie, ac ventris mole subsistente aegra fatum subiit.

Vir 40. annorum melancholici temperamenti, sicciue corporis habitus assiduus lucubrationibus, mentisque applicationibus in litterarum exercitio fatigatus, saeva hypochondriaca affectio-

ne prehensus fuit, cuius praecipua accidentia erant dolorosa, sed non universalis, ventris tensio huc illuc vagans, frequentes borborygmi, notabilis anorexia, summaque animi opacitas, a vespertinis horis quaedam cardialgia, seu stomachi molesta sensatio. Remedia, quae huic aegro propinata fuerunt, ad amissum referre nequeo, quippe parens meus hanc observationem haud recentem non scripsit nec distinctam remediorum seriem tunc cum haec scriberem memoria tenebat. Curatio in genere in hypochondriacam tertiae speciei affectionem directa fuit, ac melancholicum siccumque corporis habitum semper respexit medicus, ac post congrua solutiva ex cassia cum rhabbaro, aliaque similia lenientia, quibus purum lactis serum superbibebat aeger, ad specifica partim antispasmodica & sedantia, partim leviter discutientia, fibraeque elasticitatem suaviter proriantia se convertit, ad quam intentionem melius explendam eadem specifica cum diluentibus iungebat. Hinc ad nimiam habitus corporis siccitatem temperandam, ac notabiliorem nutrimenti imminutionem amovendam decocta analeptica eidem exhibuit, ac postremo cum de interna & dolorosa ventris distractione non sine conspicua, sed inaequali eiusdem in hypogastrica praesertim regione intumescencia, quae modo in dextero, modo in sinistro latere, modo superius, modo inferius protuberabat, infirmus assidue quereretur, ut fascia circum-

circum aequaliter comprimente ventrem ligaret, eidem consulit, ex qua se valde levatum ille comperiit, ac paulatim non solum a peculiari ventris affectione tympanitem minitante, sed etiam ab universali, seu hypochondriaca evasit.

Alii quidem morbi in quos hypochondriaca affectio degenerare facile potest, hic percurrendi essent, ve-

luti cholera, five humida, five sicca, colica & iliaca passio, hepatis lienisque obstructio ac inflammatio, alique viscerales imi ventris morbi, qui in genere a retardato in eorundem vasculis liquidorum motu ortum ducunt; verum tamen cum ad has theorias fulciendas practicae observationes adhuc mihi defint, opportunum de his agendi tempus expectare operae pretium censeo.

F I N I S.



INDEX RERVM.

A.

Adolescentes & iuvenes febrī hecīcae
sunt obnoxii - 210

Aequilibrium inter solida & fluida quo-
modo turbetur 322. seqq. Turba-
tum multa producit mala ibid. In-
ter solida & solida varia parit ma-
la - 325 seqq.

Aer in sanguine 10. Chylo immixtus
ad sanguinem venit 11. In solidis
& fluidis praesens ibid. Est soni ve-
hiculum 280. seqq. Eius effectus in
pulmones 9. Eius effectus in su-
perficem corporis 12. seqq. Gra-
vis & levis natura & effectus 14.
Varia a variis causis constitutio 12

Alexipharmaca in Febribus acutis caute
sunt adhibenda 144. 152. Quan-
do convenient 154. Num & quando
in febre maligna - 175. 188

Animalis actio quid? - 252

Animi affectus in malo hypochondriaco
sunt singulares 273. Eius recreatio
quomodo in C. H. agat 349. Est
optimum mali hypochondriaci reme-
dium - 348

Antiperistalticus intestinorum motus Ga-
leno fuit cognitus 254. Efficit ilia-
cam passionem 255. Probant suppo-
sitoria per os reiecta ibid.

Antispasmodicorum usus in mal. hypo-
chondr - 337

Arteria cum venis cohaeret 7. Eius ob-
structio quomodo fiat 7. seq. Earum
actio in sanguinem 23. Parvitas in-
signis 24. Minimarum cum aorta
comparatio ibid. Tunicae sunt ela-
sticae - 25

Arthritis unde? - 121

Asodes febris descriptio & quomodo a
Lypiria differat 193. Eius sympto-
mata ibid. seqq. Causae procatacti-
cae 194. Prognosis ibid. Cura ibid.

Asthma humorale unde oriatur 399. Eius
cura 401. Siccum unde 396. Eius
curatio 400. Sympathicum unde
veniat - 265 seqq.

Atonia ventriculi febrī quotidianae con-
iuncta - 231

Auditus cur voluptate afficiatur ab har-
monia 280 seqq. Cur molestia a dis-
sonantia 296 seqq. Quomodo fi-
at - 284 seqq.

Auris fabrica - 282 seqq.

B.

Balneorum aquae dulcis usus in febr.
hecīca 213. In malo hypochondr.
scorbutico - 376

Balsamica in phthisi sunt vitanda 390. Eo-
rum usus internus in febr. hecīca
ubi pulmones laesae sunt 206

Bezoar vires sunt dubiae 187
Bilis

Bilis aerem continet 10. Est saponacea substantiae 45. Quomodo fercernatur? 32. Omnibus admiscetur humoribus 31. Eius disquisitio chemica 45. Corruptio quomodo fit? - - 341

Bulimos unde? - 63

C.

Cacochymia unde oriatur? 112, 118

Calculi haerentis effectus 98. Genesis in C. H. - 403 seqq.

Calculosae concretionis causae dispositivae - - 404

Calor corporis unde veniat? 314

Capitis accidentia in hypochondriaco malo 272 seqq. Dolor in febre ardente - - 140

Cerebri vasa quomodo in febribus acutis inflammentur? 150. Corpus callosum imaginationis & memoriae est praecipuum organon 301. In mentis applicationibus afficitur ibid.

Chalybeata in febr. tertiana conveniunt 225. In malo hypochondr. scorbutico praestant - 378

Chlorosis ad quotidianam refertur 231

Chylus aere abundat. 11. Quomodo elaboratur? 58. Quomodo in vasa lactea traducatur? 59. Eius propulsio in ductum thoracicum ibid. Mutatio in sanguinem ab arteriarum pulmonalium motu pendet 60

Clysmata in febre ardente conveniunt - - 142

Colliquativae febris descriptio 196. Eius symptomata - 196 seqq.

Concubitus immoderatus est causa mali hypochondr. extrinseca 306

Consensus est capitis & ventriculi singularis 96. seqq. Est omnium C. H. partium 88. Inter secretiones 89. seqq. Inter urinae & sudoris excretionem - - 90. seqq.

Contagium febris malignae in quo consistat? - 160. seqq.

Contusio efficit vasorum laxitatem 87. Eius curatio - ibid.

Convulsionis natura & causae 68

Convulsiivi motus in febre maligna unde oriantur? - 158

Cor ranae extractum se contrahit. 14. seqq. Eius actio alterna unde veniat? 21. seqq. Contractio a structura musculari & fluidi nervei influxu 19 seqq. Palpitatio unde oriatur? 270. seqq. Systoles & diastoles causae 19 seqq. Vis quanta? 22. seqq.

Corpus humanum totum ex cerebro eiusque propaginibus nervis construitur - - 250. seqq.

Corruptio humorum a stagnatione 64. Solida quoque afficit ibid.

Cortex chinae caute adhibendus in febr. contin. periodica 208. In febr. hecticica 214. Cum purgantibus coniunctus convenit in febr. quartana 229. Eius usus in malo hypochondr. hysterico conveniens 363 seqq.

Cucurbitarum applicatio in febre maligna - 184 seqq.

D.

Dentitio varios producit effectus 98

Digestio quid? 56. Quibus auxiliis perficiatur? 58. 64. Prava unde oritur? 120. Varia producit mala 123. Eius laesae ventriculi symptomata & causae - 97

G g g Diluen-

Diluentia in febre maligna conveniunt - - - 188

Dura mater peculiari motu & sensu caret - - - 242

E.

Elodes febris quid? 196. Eius causa proxima 197. Causa efficiens 199. Curatoriae indicationes ibid. seqq.

Emetica in febr. malign. quommodo & quando adhibenda? - 186

Epistolae febris descriptio 201. Eius causa proxima ibid. Symptomata ibid.

Exercitium corporis hypochondriacis remedium optimum 348

F.

Febres acutae saepius a medicis malignae dicuntur - 148

Febris ardentis causa proxima 141. Crisis 141. Cura consistit in temperantibus 142. 155. Oritur a bilis vitio 138. A transpiratione suppressa ibid. Symptomata 137. Signa pathognomonica 137. Septimo die finitur 141. Pulsus 139. Urina ibid. In hac fortiora purgantia nocent. 143. 151. Qualia convenient medicamenta? - 144. seqq.

Febris accidentia 104. Descriptio ibid. Causae dispositivae 109. seqq. Causa efficiens 105. Causa proxima ib. 116. In vulneribus 107. In fracturis 108. Oritur a solidorum ac fluidorum aequilibrio turbato 108. seqq. Signum pathognomonicum 106. seqq.

Febris continuae divisio 128

Febris continuae periodicae cura 206 seqq. Differentia 203. Exacerbatio unde? 205. seqq. Febrilis materiae sedes 204. seqq. Occasionales causae

ibid. Prognosis 206. Symptomata - - - 203. seqq.

Febris diaria s. ephemera in aliam saepe degenerat 129. Plurium dierum fit Synochus ibid. Eius accidentia 128. Causa procatactica ibid. Crisis 129. Descriptio - 128

Febrifuga quando in febr. tertiana convenient? - 223. seqq.

Febris hecticae descriptio 209. seqq. Diagnofis ibid. Distinctio ibid. Indicationes curatoriae 213. seqq. Prognofis ibid. Symptomata 210. seqq.

Febris lenta scorbuto supervenit 371

Febris lymphaticae descriptio 217. Diagnofis ibid. Indicationes curatoriae 219. Procatacticae causae 218. Proxima causa ibid. Prognofis ibid.

Febris maligna ardente est periculofior 147. Est contagiosa 160. Num differat a pestilentiali? 164. Eius causa proxima & efficiens 156. 164. Causa dispositiva 164. Curatoriae indicationes 173. seqq. Descriptio 147. Diagnofis ibid. Prognofis 172. Symptomata malignitatem ostendunt 147. seqq. Materia est volatilis 160. Cum veneno convenit 164. Quommodo in C. H. agat? - 160. seqq.

Febris quartana quid? 225. Eius causae dispositivae 226. Causae occasionales ibid. Curatoriae indicationes 228. Distinctio in simplicem & duplicem 227. Prognofis 228. Symptomata - 225

Febris quotidiana tendit ad Hydropem Coma & Lethargum 230. Eius causae dispositivae ibid. Curatoriae indicationes 232. Prognofis ibid. Symptomata - 230

Febris tertiana legitima a spuria ratione intensioris differt 222. Eius causa efficiens

efficiens an in fluidis an in solidis consistat? 221. seqq. Causa proxima 219. Curativae indicationes 222. seqq. Descriptio 219. Distinctio ibid. Prognosis 222. Symptomata 220. seqq.

Fibra rigida & debilis quid? 5. Eius cohaesio ibid. Earum elasticitas efficit motum peristalticum 254. Gluten - - - 5

Flatus varia inducunt mala 259

Fluidorum dyscrasia a solidorum oscillatorio motu intercepto oritur 368 seqq.

Foetus nutritio & incrementum unde veniat - - - 39 - 43

Frictio in Febre maligna 184. seqq.

Frigus febris tertianae unde? 220. Eius & caloris repentina mutatio nocet 168

G.

Glandula quid? 27. Apud veteres ib. Earum fabrica 28. Differentia ib. Meseraicarum obstructio 120

Globuli sensus in gutture 345

H.

Haemoptysis in pulmonibus efficit vomicas 388. Quomodo tractanda? - - - ibid. seqq.

Hemiplegia in febre maligna unde? 157

Hydrops quotidianae succedit 230. 232

Hypochondriaca affectio nervosum ac membranosum systema in primis corripit 241. Oritur a motu peristaltico perturbato 253. seqq. Non in fluidorum massa consistit 245. seqq. Composita quid? 351. Cur sine febre invenitur? 346. Et hysterica parum differunt 103. Unde utraque oriatur? ibid. In asthma siccum degenerat 396. Multum confert ad calculi genesis 406.

Scorbuto est affinis 368. Mutatur in scorbutum 372. Quomodo ad phthisin disponat? - 383

Hypochondriacae affectionis causae intrinsecae s. dispositivae unde oriuntur? 307. Causae occasionales 297. Definitio 311. Species 313. Nominis etymologia 237 Sedes 238. seqq. 249. seqq. Symptomata examinantur 241. seqq. Symptomata thoracem afficientia 264. seqq. Signa characteristica 102. 243. Symptomata viris & foeminis communia 351. seqq. Hypochondriacae affectionis symptomata foeminis propria 352. Quorum nonnulla & in viris observantur - 353. 360

Hypochondriacae asthmaticae affect. curatoriae indicationes 400. seqq. Symptomata 397. seqq. Peculiares historiae - 401. seqq.

Hypochondriacae calculosae affect. curatoriae indicationes 406. Peculiares historiae - - - ibid. seqq.

Hypochondriaca calida & humida affectio rarior. 321. Ab aequilibrio inter solida & fluida turbato oritur 322. Eius symptomata ib. Cura 326. seqq.

Hypochondriacae calidae & siccae affect. symptomata 317. seqq. Indicationes curatoriae - 319. seqq.

Hypochondriacae frigidae & humidae symptomata 339. seqq. Indicationes curatoriae - 346. seqq.

Hypochondriacae frigidae & siccae symptomata 330. seqq. Cura 335. seqq.

Hypochondriaca hysterica s. muliebris affect. parum differt a virili 351. Non ab utero oritur 351. 357. Sed a peculiari foeminarum solidi nervi textura 353. seqq. Eius divisio in statum acutum & lentum 361. Indicationes

tiones curatoriae ibid. seqq. Peculiares historiae 353. 353. seqq.

Hypochondriacae phthificae symptomata 384. seqq. Curatoriae indicationes 387. seqq. Mutatio in tabem pulmonarem 388. Peculiares historiae 391. seqq.

Hypochondriacae scorbuticae affect. diagnosis 369. Symptomata 368. Prognosis 372. Curatoriae indicationes 374. seqq. Peculiares historiae 379. seqq.

Hypochondriacae tympaniticae affect. symptomata 410. seqq. Curatoriae indicationes 411. seqq. Peculiares historiae 413. seqq.

Hysterica affectio unde oriatur? 99. Eius sedes ibid. Signa pathognomonica 102

I.

Icterus simplex unde oriatur? 113. Cum febre - ibid.

Imaginatio cerebri fibras medullares varie sollicitat - 300

Inflammatiō a nimia elasticitate solidorum 114. Excitat febrem ibid.

Intellectus unde oriatur? 300

Ipecacuanhae usus in malo hypochondr. hysterico - 365

Iuvenes & viri malo hypochondriaco inprimis sunt obnoxii 311

L.

Lac est specificum febris hecticae remedium 214. Quale inprimis conveniat? ibid. Quomodo illo utendum? 215. Eius natura & partes constitutivae 48. Usus in affectione hypochondriaca calida & sicca 320. Usus in affect. hypochondr. frigida & sicca 337. Usus in affectione hypochondriaca phthifica 387. Usus in affect. hypochondr. asthmatica 402. In af-

fect. hypochondr. tympanitica 412. Usus in febre hectica 214

Laetitia hypochondriacis optime convenit 304. Eius effectus in C. H. ibid.

Lentoris humorum causae in febre maligna 167

Lienis officium in quo consistat? 369

Lympha quid 2. A sero separatur ibid. Nutritionis est proxima materia 3

Lypiriae descriptio 190. Causa proxima ibid. Prognosis 191. Indicatio curatoria - ibid.

M.

Maculae rubrae in febre maligna unde orientur? 159

Malacia unde veniat? 63

Mars in febre quotidiana inprimis convenit - 232

Meditatio cerebri fibras afficit 297

Melancholia a malo hypochondriaco orta. - 296. seqq.

Membrana simplex quid? 6. Vasculosa ibid. Earum compositio ibid.

Memoria quomodo in cerebri fibras agat? 300

Mentis stupor in febre maligna 157. seqq.

Mercurii crudi usus in febre maligna 189

Moeror perniciosus C. H. infert damna 303

Monstra sine capite & corde 16. seqq.

Morbi ex vitio solidorum 71. seqq. Ex vitio fluidorum 77. seqq. A nimia rigiditate partium 84. A nimia laxitate 85. Ab aere oriuntur 14. Saepius in alios mutantur 92. Eius definitio 71

Morborum

Morborum musicorum concentu profligatorum historiae 289. seqq.

Mors quid? 64

Muscularis fibra ultima quid? 50. Earum perpetuus in contractionem nifus 68

Muscularis motus a fluido nerveo pendet 55. Eius causae 52. seqq. Phaenomena 51

Musculi abdominales iuvant digestionem 58

Musculus quid? 50. Quibus componatur partibus ibid. Contrahendi vim habet 253. Unde pendeat? ibid. Eius rubedo unde? 50

Musica hypochondriacis in primis convenit 349. Eius effectus in tarantatis 291. seqq.

N.

Natura in harmonica solidi nervei & membranosi oscillatione delectatur & contra 276. seqq. Probatur ex phaenomenis odoratus, visus, auditus ibid.

Nervei fluidi influxus inaequalis motum oscillatorium perturbat 301. seqq. Varios in intestinis edit effectus 302. Sanguinis motus & secretiones perturbat ibid. seqq.

Nervis est singularis consensus 92. seqq. 265. seqq.

Nutritio quid? 38. Quomodo peragitur ibid. Quibus in locis perficitur? 39. Eius materies 43

O.

Obstructio vasorum unde oriatur? 110. seqq. Vasorum hepatis 113. 119. Efficit icterum ibid.

Oculorum inflammatio quomodo fiat? 114

Opium usus in malo hypochondriaco 329

Ossium nutritio quomodo fiat? 41

P.

Pancreatici succi indoles 45. Disquisitio per varia experimenta 46

Pediluvia in febribus contin. periodic. 207. In malo hypochondr. 328

Peristalticus motus a nonnullis in dubium revocatus 254. seqq. Iuvat motum sanguinis per venae portae ramos 262

Peristalticus motus perturbatus varia efficit mala 262. Producit mali hypochondr. symptomata 258

Petechiae quid? 147. Saepius falso assumuntur a medicis 149

Phantasmata in hypochondriacis unde oriuntur? 296

Pica unde veniat? 63

Pilorum nutritio & elongatio quomodo fiat 41

Plethorae effectus 245. seqq.

Pueri ab hypochondriaco malo sunt immunes 310

Pulmonum actio & usus 8. seqq. Eorum inflammatio unde? 121

Pulsus velocitas in febribus 104. Unde oriatur? 105. In febre maligna 156

Purgantia ad sanguifera vasa veniunt 143 Qualia in febr. continua periodica sint adhibenda? 207. In febr. maligna quomodo & quando adhibenda? 186. In febr. quartana 229. In febr. tertiana qualia? 223. seqq.

R**R.**

Respiratio quommodo perficiatur? 396.
Sanguinis motum per pulmones iuvat
260. Eius necessitas 9

Rheumatismus unde? 121

S.

Saliva saltem continet 47. Eius partes
constitutivae & mixtio ibid.

Salivationis effectus in tarantatis 294

Sanguineorum globulorum mutatio in
minores 1. 317. Figurae rotundae in
ellipticam mutatio 1. Elasticitas qua-
lis? 10

Sanguinis color unde pendeat? 1. Mixtio
ibid. 49. Specifica gravitas 2. Dis-
quisitio chemica 49. Particulae sunt
diversae indolis ibid. 123. Et liquo-
rum inde secretorum velocitas latet.
89. seqq. Defectus unde oriatur? 246.
Eius accidentia ibid. Crassities nimia
unde? 247. Eius effectus ibid. Cru-
sta phlogistica unde? 317. seqq. Ni-
mia tenuitas varia affert mala 248

Sanitas quid sit? 68. Eius signa 69

Saponacearum pilularum usus in malo
hypochondriaco 328

Scorbutus a cadaverum foetore ortus 373
Num veteribus fuit notus ibid. seqq.
Eius symptomata 371. seqq.

Secretio humor. unde pendeat? 30. Cur in
eius organis constanter eadem 31. seqq.

Seminis secretio quommodo fiat 32. Ma-
teria quibus partibus constet? ibid.

Senectutis causae 40. 43

Senes rarius a malo hypochondriaco affi-
ciuntur 311

Serum sanguinis quibus partibus compo-
natur 2

Sitis in febre ardente unde? 139

Solida inter se habere debent aequilibri-
um 83. Eorum atonia a vitio fluido-
rum orta 342. Disquisitio chemica 4.
seqq. Partes elementares 5. Elasti-
citas unde pendeat? 66. seqq. Nutri-
tio 5. Motus unde? 17. seqq.

Somnus cerebri medullares fibras relaxat
297. seqq. Huius diuturni peculiares
historiae 298. seqq.

Sonus quommodo efficiatur 277. Quom-
modo auris partes afficiat 283. Au-
gmentum accipit ex elliptica figura ib.
eius celeritas 280

Spasmus quommodo assumendus 253

Spiritus animalis admodum est tenuis 3.
seqq. Eius actio ibid. Existentiam
experimenta evincunt ibid. Impul-
sus 4. Proprietates ibid.

Styptica remedia in haemoptosi sunt vi-
tanda 388. Eorum actio in C. H.
ibid. seqq.

Sternutatio quommodo fiat? 95

Sudoris peculiariora organa dantur 38

Suffumigia humida in affect. hypochon-
driaco pthifica profunt 387

Syncopalis febris ex asode oritur 195.
Eius curatio ibid.

Synochus quid? 129. In alium mutatur
morbum 133. Eius accidentia 129.
distinctio in acmaesticam, epacmaesti-
cam & paracmaesticam ibid. Sympto-
mata 131. seqq. Synochi simplicis a
putridi symptomatibus gradu diffe-
runt ibid. Crisis 132. Curatoriae
indicationes 133. seqq.

T.

Tarantati musica curantur 291. Eorum
symptomata 290. seqq.

Tarantulae venenum qua in re consist. 292
Tempe-

Temperamentorum signa & proprietates
34. seqq. Differentiae ibid. 312

tiali 180. seqq. In febre tertiana
quando adhibenda? 222

Temperamentum calidum & humidum
quid? 35. 3. 2 Calidum & siccum quid?
34. 313. Frigidum & humidum quid?
35. 338. Inprimis ad malum hypo-
chondr. est proum 339. Frigidum
& siccum quid? 35. 329. seqq. Ad ma-
lum hypochondriacum est disposi-
tum - - - ibid.

Venae sectio in haemoptoicis convenit
389. In affect. hypochondr. asth-
matica 400. In affect. hypochondr.
calida & humida 327. In affect. hy-
pochondr. calida & sicca 320. In af-
fect. hypochondr. frigida & humida
importuna est 346. In affect. hypo-
chondr. frigida & sicca 336. In af-
fect. hypochondr. hysterica quando
administranda? 361. seqq. In affect.
hypochondr. scorbutica num conue-
niat? - - - 375

Tendo quid? 50. Eius structura 51.
Vasa a Ruyschio fuerunt detecta ibid.

Thyphodes quid? 190

Tremor unde veniat? 93. Eius causae 68.

Venenum nonnullis animalibus est inge-
nitum, nonnullis acquisitum 165.
Eius effectus 93. 95. 164. seqq.

Triteophies quid? 203

Tympanitis morbo hypochondriaco suc-
cedit 408. Quomodo oriatur? 409.
Eius sedes ibid. - Causa proxima 410.

Ventriculi humoris origo & indoles 56.
actio in ingesta 57. seqq. Fibrae mu-
sculares quomodo agant? ibid. Ea-
rum laxitas & rigiditas nimia nocet.
61. Dolor unde? 63. Infarctus non
efficit malum hypochondriacum 249.

V.

Vasa quomodo fiant? 6. Sunt varii
generis - - - ibid.

Vermes an ab ipsis febres malignae? 171.
Quales in intestinis edant effectus 98

Vasorum sanguiferorum differentia 6.
Cohaesio ibid. seqq. Eorum disten-
sio unde veniat? - - - 10

Vertigo a ventriculi infarctu 344

Vasorum pulmonalium rigiditas aut laxi-
tas nimia digestionem primam & se-
cundam perturbat 60. seqq.

Vesicantia in febre maligna quando adhi-
benda? - - - 185

Venae sectio in acutis febribus necessa-
ria 149. Eius neglectus nocet. ibid.
In febre ardente 142. In febre col-
liquativa 199. In epiala 202. In fe-
bre maligna 149. 152. 182. Neglecta
nocet ibid. In synocho 134. seqq.
Eius effectus 136. In febre pestilen-

Vesparum morsus effectus 94

Virium languor in febre maligna essen-
tialis quomodo a spurio dignosca-
tur? 174. Prostratio in febre maligna
mala - - - 156

Viscerum aequalis elasticitatis necessi-
tas - - - 86

Vita-

- Vitalis actio quid? - 252
- Vita laboriosa malum hypochondriacum arcet 305. seqq. Sedentaria ad malum hypochondriacum disponit 304. seqq.
- Vita in quo consistat 64. Eius initium unde? - ibid.
- Vnctio in febre ardente 142. In febre continua periodica 206. In febre quartana 228. In affectione hypochondriaca frigida & sicca 335. In affectione hypochondriaca scorbutica - - 375
- Vomitoria nonnunquam in febre tertiana conveniunt 223. In febre quartana - 229
- Vrina continet aerem 10. Eius secretio 33. Partes & indoles ibid. Chemica analysis - 44
- Vterus non habet exquisitam sensationem 356. Eius consensus 99. Structura 100. Expansio & contractio unde? - 40. seqq.







